


626256

Музыкальные инструменты

1912 г.

9(47.929)

640



2593

9(47.925)

18 AUG 2006

5-40

05 SEP 2011

ՀՐԱՏԱՐԱԿՈՒԹԻՒՆ Գ. ԳԱՆՏԵԱՆԻ № 70

այ



ԵՂԻՇԷԻ


Գ Ա Տ Ա Ր Ո Ւ Թ Ի Ւ Ն

Վ Ա Ր Դ Ա Ն Ա Ն Ց

Հ Ս Տ

ԱՆՁԵՒԱՑԵԱՑՆ ՕՐԻՆԱԿԻ

1004  
16834



Handwritten signature



Թ Ի Ֆ Լ Ի Ս

Էլեկտրոնայ. օր. Ն. Աղանեանցի, պոլից. 7.  
1912

05 APR 2013

4595



# ՎԱՐԴԱՆԱՅ

Ե Ի

## ՀԱՅՈՅ ՊԱՏԵՐԱԶՄԻՆ

### ԴԱԽԹԻ ԵՐԻՑՈՒ ՄԱՄԻԿՈՆԻ ՀԱՅՅԵԱԼ

Քանն զոր պատուիրեցեր՝ արարի, ո՛վ քաջ-  
վանն Հայոց պատերազմին հրամայեցեր, յորում  
բազումք առաքինացան քան զսակաւս:

Անա նշանազրեցի յայսմ եւթն յեղանակիս,  
Առաջին՝ զԺամանակսն:

Երկրորդ՝ զԻրացն պատահումն յիշխանէն ա-  
րեւելից:


Երրորդ՝ զՄիաբանութիւն ուխտին եկեղեց-  
ւոյ:

Չորրորդ՝ զԵրկպառակութիւն ոմանց բաժա-  
նելոց ի նմին ուխտէ:

Հինգերորդ՝ զՅարձակումն արեւելեաց:

Վեցերորդ՝ զԸնդդիմանալն Հայոց պատե-  
րազմաւ:

Նւթներորդ՝ զՅերկարումն իրացն խռովութեան:



Յայսմ յեւթն գլուխս կարգազրեալ և եղեսաք ծայրալիր պարապմամբ գսկիզբն և զմիջոցն և զկատարածն, զի հանապազորդ ընթեանուցուս, լսելով զառաքինեացն զքաջութիւն, և զյեսուկացելոցն զվաստութիւնս. ոչ յանձին կարօտութիւն երկրաւոր առաս գիտութեանց լրման, այլ յայցելութիւն երկնաւոր անսեսութեանն՝ որ մատակարարէ յառաջգիտութեամբ զհասուցմունս երկոցունց կողմանցն, որ երեւելեօքս զաներեւոյթնս գուշակէ:

Այլ դու, սվ մեծ ի գիտութեանն Աստուծոյ, առ ինչ արդեւք հրամայեսցես քան եթէ հրամայիցիս լաւագունացն: Որպէս երևի ինձ և այնոցիկ որ զեզերեցին յիմաստասիրութիւն՝ երկնաւոր սիրոյ է ի քեզ այս նշանակ, և ոչ երկրաւոր փառասիրութեան. քանզի և ասացին իսկ ոմանք ի քաջ պատմագրացն. «Զուգութիւն է մայր բարեաց, անգուգութիւն ծնող շարեաց»:

Որպէս և մեր իսկ հայեցեալ ի սուրբ սէքքոյոյ հրամանիդ՝ ոչ ինչ դանդաղեալ վեհերեցաք հայելով ի մեր ազիտութիւնս: Քանզի բազում ինչ է սրբութիւն՝ սատար լինելանօսութեան, որպէս աղօթք՝ գիտութեան, և սէր սուրբ՝ միաբան օգտից:

Զոր և մեր ընդ հրամանին քում ընկալեալ՝ յօժարութեամբ ձեռնարկեցաք զայս ինչ, որ է միտիթարութիւն սիրելեաց և յոյս յուսացելոց:

քաջալերութիւն քաջաց, կամակարութեամբ յարձակեալ ի վերայ մահուան, առաջոյ տեսանելով զգօրազուխն յաղթութեան, որ ոչ ումեք ոսնհար լինի թշնամութեամբ, այլ ամենեցունցուցանէ զիւր անպարտելի գօրութիւնն: Եւ անա սոք կամեսցի՝ ընդունի իբրև զհաճատակ առաքինի: Եւ քանզի բազմազիմի է նահատակութեանց անուն, և նա բազմազիմի շնորհս բաշխեաց ամենեցուն. զոր և մեծ իսկ քան զամենայն՝ զսէր սուրբ յաննեց մտաց գիտեմք:

Այս պարգութիւն զվերնոյն բերէ զնամանութիւն. զոր և մեր ի քեզ տեսեալ, մոռացաք զմեր բնութիւնս: Եւ անա վերաբերիմք ընդ քեզ ճախրելով, և իբրև բարձրաթոխս եղեալ՝ զամենայն փնասակար մրրկածին օգովքդ անցանիցեմք, ծծելով փոքր ի շատէ յանապական վերին օգոցն՝ աւնուցումք զգիտութիւն ի փրկութիւն անձանց և ի փառս ամենայաղթ եկեղեցւոյ: Ուստի և բազում սուրբ պաշտօնեայքն զուարթութեամբ կատարեսցեն զսպաս վիճակին իւրեանց, ի փառս Հօրն բոլորեցուն. ուր ընդ նմին սուրբ Երրորդութիւն ցնծացեալ բերկրիցի յանարամական յիւրում էութեանն:

## ԱՌԱՋԻՆ ՅԵՂԱՆԱԿ

### ԺԱՄԱՆԱՍԻՔՆ

Արդ որովհետև ընկալաք զհրամանս պատուիրանի յաննախանձ քոյոց բարուց բնութեանդ, սկըացուք ուստի արժան է սկսանել. թէպէտ և ոչ յօժարիցեմք զթշուառութիւն մերոյ ազգիս ողբալ: Ահա ոչ ըստ կամաց արտօսըալիք ողբովք ճառազրեմք զբազում հարուածսն՝ յորում պատահեցաք և մեք իսկ ականատեսք լինելով:

Քանզի ի բառնալ ազգին Արշակունեաց, տիրեցին աշխարհիս Հայոց ազգն Սասանայ պարսկի, որ վարէր զիւր իշխանութիւնն օրինօք մոզուցն. և բազում անգամ մարտնչէր ընդ այնոսիկ՝ որ ոչ ընդ նովին օրինօքն մտանէին, սկիզբն արարեալ յամաց Արշակայ արքայի որդւոյն Տիրանայ, և կուռէր մինչև ցամա վեցերորդ Արտաշիսի արքայի Հայոց, որդւոյն Վռամշապհոյ: Եւ իբրև զնա ևս մերժեաց ի թագաւորութենէն, ի նախարարսն Հայոց անկանէր թագաւորութիւնն. զի թէպէտ և գանձն յարքունիս Պարսկաց երթայր, սակայն այրուծին Հայոց բովանդակ ի

ձեռն նախարարացն առաջնորդէր ի պատերազմի։ Վասն որոյ և աստուածպաշտութիւնն բարձրագուծն կամակարութեամբ երևելի լինէր յաշխարհին Հայոց, ի սկզբանց տէրութեանն Շապհոյ արքայից արքայի մինչև ցամն երկրորդ Յագկերտի արքայից արքայի՝ որդւոյ Վաւմայ՝ զոր եզրիտ սատանայ իւր գործակից, և զամենայն մթերեալ թոյնսն թափեաց ի բաց, և ելից զնա իբրև զպատկանդարան դեղեալ նետիւք։ Եւ սկսաւ եղջեւր ածել անօրէնութեամբ, դուռդանայր, և գոռալով հող հանէր ընդ շորս կողմանս երկրի, և թշնամի և հակառակորդ երևեցուցանէր իւր զհաւատացեալքս ի Քրիստոս, և նեղեալ տագնապէր անխաղաղասէր կենօք։

Քանզի յոյժ սիրելի էր նմա խռովութիւն, արիւնհեղութիւն, վասն այնորիկ յանձնիւր տարաբերէր, եթէ յ՞ թափեցից զգառնութիւն թիւնից, կամ ո՞ւր բացատրեցից զբազմութիւն նետիցն։ Եւ առ յոյժ յիմարութեանն իբրև զզազան մի կատաղի յարձակեցաւ ի վերայ աշխարհին Յունաց. եհար մինչ ի քաղաքն Մծբին, և բազում գաւառս Հոռոմոց աւերեաց ասպատակաւ, և զամենայն եկեղեցիս հրձիգ արար. կուտեաց զաւար և զգերի, և ահաբեկ արար զամենայն զորս աշխարհին։

Իսկ երանելին Թէոդոս կայսր՝ քանզի խաղաղասէր էր ի Քրիստոս, ոչ կամեցաւ ելանել

ընդ առաջ պատերազմաւ. այլ այր մի Անատոլ անուն, որ էր նորա սպարապետ արևելից, առաքեաց առ նա բազում գանձիւք։ Եւ արք պարսիկք, որք փախուցեալ էին վասն քրիստոնէութեան և էին ի քաղաքի կայսեր, կալաւ և ետի ձեռս նորա։ Եւ զամենայն զոր ինչ ասաց ի ժամանակին՝ կատարեաց ըստ կամաց նորա, և արգել զնա ի բազում բարկութենէն, և դարձոյց անզրէն յիւր քաղաքն Տիգրան։

Եւ իբրև ետես անօրէն իշխանն եթէ յաջողեցաւ չարութիւնն նորա, սկսաւ այլ ևս խորհուրդ յաւելուլ, իբր ոք զի ի հուր բորբոքեալ յաւելլով բազում նիւթս փայտից։ Քանզի ուստի սակաւ մի կասկածոտն էր՝ անտի աներկիւղ հաստատեցաւ վասն այնորիկ զրգուեցոյց զբազումս ի սուրբ ուխտէն քրիստոնէից, էր՝ զոր բանիւք սպասնալեօք, էր՝ զոր կապանօք և տանջանօք, և էր՝ զոր չարաչար մահուամբ վախճանէր։ Յափշտակութիւն առնէր ընչից և արարոց, և մեծաւ անարգանօք տանջէր զամենեսեան։ Եւ իբրև ետես՝ եթէ վայրատեալ ցրուեցան ի բազում կողմանս, ի խորհուրդ կոչէր զպաշտօնեայս ձախակողմանն՝ որք կապեալ էին ի կռապաշտութեան անլուծանելի հանգուցիւք, վառեալք և ջնւեալք իբրև զհնոց առ այրել զուխտ սուրբ եկեղեցւոյ։

Քանզի էին իսկ այնպիսիքն բնակեալ ի

կեանս իւրեանց իբրև ի թանձրամած խաւարի, և ողիքն արգելեալք ի մարմնի իբրև գիւենդանի ի գերեզմանի, յորս ամենևին չծագէ նշոյլ սուրբ լուսոյն Քրիստոսի: Նա և արջք օրհասականք ընդ վախճանել շնչոյն հղօրագոյնս կուռին. յորոց և իմաստունքն տեղի տուեալ փախչին ի նոցանէ: Այսպիսի իմն եկեալ հասեալ է վախճան տէրութեանն. եթէ հարկանին՝ չգգան, և եթէ հարկանեն՝ չիմանան, և իբրև ոչ գասնի արտաքին թըշնամի, ընդ անձինս իւրեանց մարտ եղեալ կուռին: Իդէպ իսկ ելանէ բան մարգարէին ի վերայ նոցա. «Այր, ասէ, առ քաղցի իւրում շրջեսցի և կերիցէ գիէս անձին իւրոյ»: Նման սրմին և Տէրն ինքնին ասէ. «Ամենայն տուն և թագաւորութիւն՝ որ յանձն իւր բաժանի, ոչ կարէ կալ հաստատուն»:

Արդ զի՞ կոծիս, զի՞ մրցիս, զի՞ այրիս, զի՞ բորբոքիս, զի՞ ոչ շիջանիս. զի՞ կոչես ի խորհուրդ գայնասիկ՝ որոց զողիսն ձեր ի ձէնջ քաղեալ՝ հանեալ է զանապականդ յապականութիւն, և զապականելի մարմինդ գէշաքարշ արարեալ իբրև զազիր մեռելոտի ի բաց ընկեցեալ: Ապաքէն գայդ կամիրս՝ զի ծածկեսցի խորհուրդն ամբարշտութեան. տեսչիր յորժամ յայանեսցի, ապա գիտասցես զելս կատարածի դորս:

Ասեն մողքն. «Արքայ քաջ, աստուածքն ետուն քեզ գտէրութիւնդ և գյաղթութիւն. և ոչ

ինչ կարօտին նոքա մարմնաւոր մեծութեան. բայց եթէ ի մի օրէնս դարձուցանես զամենայն ազգս և ազինս՝ որ են ի տէրութեան քում. յայնժամ և աշխարհն Յունաց հնազանդեալ մտցէ ընդ օրինօք քովք: Արդ զբանս գայտասիկ վաղվաղակի կատարես դու, արքայ. զօր գումարես և գունդ կազմես. խաղա գնա դու յաշխարհն Քուշանաց. և զամենայն ազգս ժողովեա և անցոյստ Պահ դուռն ի ներքս. և դու անդէն արաքեզ բնակութիւն: Յորժամ արգելուս և փակես զամենեոսան ի հեռաւոր օտարութեան, կատարին խորհուրդք կամաց քոց. և որպէս երևիս մեզ ի դենիս մերում՝ տիրես դու և երկրին Քուշանաց, և Յոյնք իսկ ոչ ելանեն ընդ քո իշխանութիւնդ: Բայց միայն զազանդ քրիստոնէից բարձ ի միջոյ:

Հաճոյ թուեցաւ խորհուրդն թագաւորին և մեծամեծացն, որ էին ի նմին բանի, հրովարտակս գրէր, պնդադեսպանս արձակէր յամենայն տեղիս տէրութեան իւրոյ: Եւ այս է պատճէն հրովարտակին.

«Առ ամենայն ազգս տէրութեան իմոյ Արեաց և անարեաց, բազմասցի ի ձեզ ողջոյն մարդասիրութեան մերոյ. դուք ողջ լերուք, և մեք մեղէն ողջ եմք զիցն օգնականութեամբ:

«Առանց զձեզ ինչ աշխատ առնելոյ խաղա-

ցաք գնացաք յերկիրն Յունաց, և տունց դորժոյ պպտերազմի սիրով մարդասիրութեամբ նուաճեցաք զամենայն երկիրն մեզ ի ծառայութիւն: Իուք զբարի զմտաւ ամէք, և անսպառ լերուք յուրախութեան. բայց բան զայս կատարեցէք վաղվաղակի, զոր սսեմքս:

«Մեք ի մտի եղաք անվրէպ խորհրդովք խաղալ գնալ յաշխարհն արևելից, աստուածոցն օգնականութեամբ դարձուցանել ի մեզ գաէրութիւնն Իուշանաց. դուք իբրև զհրովարտակս զայս սեասնէք՝ անխափան վաղվաղակի այրեձի գումարեցէք առաջի քան զիս, յանդիման լերուք ինձ յԱպար աշխարհին»:

Ըստ այսմ պատճենի հրովարտակ եհաս յաշխարհն Հայոց, ի Վրաց և յԱղուանից և ի Լվինաց, ի Ծաւղէից և ի Կորդուաց, յԱղձնեաց և բազում այլ տեղեաց հեռաւորաց, որոց ոչ էին օրէնք երթալ զայն ճանապարհ յառաջ ժամանակու: Իունդ կազմէր ի Հայոց մեծաց զազատ և զազատորդի, և յարքունի տանէ զոստանիկ մարդիկ. ըստ նմին օրինակի ի Վրաց և յԱղուանից և յաշխարհէն Լվինաց, և որ այլ ևս ի կողմանց կողմանց հարաւոյ մերձ ի սահմանս Տաճկաստանի և ի Հոռոմոց աշխարհն և ի Կորդուաց և ի Կղացն և ի Ծաւղէիցն և յԱրզնարդիւն, որք էին ամենեքեան հաւատացեալք ի մի կաթողիկէ ա-

ռաքելական եկեղեցի:

Եւ անմեղութեամբ ոչ գիտացեալ զերկրմի միտս թագաւորին՝ խաղացին գնացին յիւրաքանչիւր աշխարհաց լրջմտութեամբ և անտրտում ինդութեամբ և տիրասէր խորհրդովք, կատարեալ զսպաս զինուորութեան աներկբայ վաստակովք: Բարձին ևս ընդ իւրեանս սուրբ կտակարանս բազում պաշտօնէիք և բազմագոյն քահանայիւք: Բայց հրաման տուեալ աշխարհի՝ ոչ իբրև յակնկալութիւն կենաց, այլ իբրև ի վճարումն վախճանի, յանձն առնելով միմեանց զօգիս և զմարմինս: Զի թէպէտ և խորհուրդ թագաւորին չէր յայսնեալ նոցա, սակայն կարծիք իմտի էին ամենեցուն. մանաւանդ իբրև բեկեալ տեսին զգօրութիւնն Յունաց առաջի նորա՝ յոյժ հարեալ խոցեցան ի խորհուրդս իւրեանց:

Բայց քանզի պատուիրանապահք էին սուրբ կտակարանացն Աստուծոյ, հանապաղ յիշէին զպատուիրեալսն ի Պաւղոսէ, եթէ «Ծառայք, հնազանդ լերուք տերանց ձերոց մարմնաւորաց. մի սուտակասպաս և առ աշս աշառելով. այլ սրտի մտօք ծառայել իբրև Աստուծոյ և մի իբրև մարդկան. քանզի ի Տեառնէ է հատուցումն վաստակոց ձերոց»:

Եւ ամենայնիւ այսու բարեմտութեամբ յուղարկեալք յաշխարհէ և յանձն եղեալք սուրբ Հոգւոյն, յանդիման լինէին. փութով կատարեալ

զհրամանն, և զամենայն արարեալ ըստ կամաց նորա: Յոյժ ուրախ լինէր թագաւորն, իբր այն եթէ կատարեցան կամք կարծեաց նորա. և ահա առնէր ընդ նոսա զայն ինչ զոր պաշտօնեայքն ամբարշտութեան նորա խրատեցին:

Արդ իբրև ետես թագաւորն զամենայն կազմութիւն և զբազմութիւն գնդի բարբարոսաց, որք սրտի մտօք եկեալ էին ի վաստակ արքունի, առաւելապէս ուրախ եղև առաջի մեծամեծացն և ամենայն բազմութեան զօրաց իւրոց: Ի վերին երեսս թաքուցանէր զկամս մտացն իւրոց, և ահամայ առաւելապէս պարզէր գնոսա: Թաղաց գնաց միանգամայն ի վերայ տէրութեանն Հոնաց աշխարհին, զոր Քուշանս անուանեն, և զերկեամ մի կուռեալ՝ ոչ ինչ կարաց ազդել նոցա: Ապա արձակեաց զմարզիկան յիւրաքանչիւր տեղիս, և զայսն ի նոցա տեղիս փոխանակ առ իւր կոչեաց նովին պատրաստութեամբ: Եւ այսպէս ամ յամէ սովորութիւն կարգեաց, և իւր անդէն քաղաք բնակութեան շինեաց. սկսեալ ի շորբորդ ամէ տէրութեանն իւրոյ մինչև յամն մետասաներորդ թագաւորութեանն:

Եւ իբրև ետես եթէ հաստատուն կացին Հոնոմք յուխտին իւրեանց զոր եղին ընդ նմա, և զադարեցին Թայնդուրք ելանել ընդ պահակն Ճորայ, և յամենայն կողմանց խաղաղութեամբ բնակեաց աշխարհ նորա, և ի նեղ ևս էարկ զթագաւորն Հոնաց, քանզի աւերեաց զբազում գա-

ւառն նորա, աւետաւորս առաքեաց ընդ ամենայն ատրուշանս աշխարհին իւրոյ. ցլուք սպիտակօք և զիսաւոր նոխազօք առատացոյց զգոնս կրակի, և խիստ թանձրացոյց անդադարութեամբ զպաշտօն պղծութեանն իւրոյ. պսակօք և պատուովք մեծարեաց զբազումս ի մոգաց և զբազմազոյնս ի մոգպետաց: Ետ և հրաման յափշտակել զքրիստոնէից. զինչս և զստացուածս, որք էին ի մէջ Պարսկաց աշխարհին:

Եւ այսպէս հպարտացաւ բարձրացաւ ի միտս իւր, ի վեր քան զմարդկային բնութիւն ընդվզեալ ապարասանէր, ոչ միայն յիրս մարմնական պատերազմացն, այլ մեծ ոմն զինքն կարծէր քան զբնութիւն հայրենի կարգին. վասն այնորիկ կեղծաւորութեամբ թագուցանէր զինքն ըստ կարծեացն, և որպէս երևէր իմաստնոցն՝ յանմահից իմն կարգի գնէր զինքն: Եւ յոյժ էր ցասուցեալ ընդ անունն Քրիստոսի, յորժամ լսէր թէ տանջեցաւ, խաչեցաւ, մեռաւ և թաղեցաւ:

Եւ իբրև այսպէս օր ըստ օրէ ի սոյն միտս ցնորեալ դանդաչէր, մի ոմն մանկազոյն ի նախարարացն Հայոց ընդդէմ բանս եղև ասէ. «Արքայ քաջ, դու ուստի գիտես զայդպիսի բանս խօսել զՏեառնէ»: Ետ պատասխանի թագաւորն և ասէ. «Իմ իսկ առաջի ընթերցան զգիրս մոլորութեանն ձերոյ»: Ետ պատասխանի անդրէն պատանին և ասէ. «Ընդէր, արքայ, ցայդ վայր



**ԵՐԿՐՈՐԴ ՅԵՂԱՆԱԿ**

**ԻՐԱՅՆ ՊԱՏԱՀՈՒՄՆ**

**ՅԻՇԽԱՆԷՆ ԱՐԵՒԵԼԻՑ**

միայն ետուր ընթեռնուր այլ յառաջ ևս մատթ զկարդացումն և լսես անդ գյարութիւնն, գյայտնութիւնն առ բազումս, զվերացումն յերկինս, զնստեղն ընդ աջմէ Հօր, զխոստումն երկրորդ գալստեան՝ զհրաշակերս յարութիւնն առնելով բոլորեցունց. զհամառօտ հատուցմունս արդար դատաստանին»: Իբրև լուաւ զայս թագաւորն, ի խոր խոցեալ՝ վեր ի վերոյ ծիծաղեցաւ և ասէ. «Ամենայն այդ խաբէութիւն է»: Ետ պատասխանի զինուորն Քրիստոսի և ասէ. «Եթէ հաւատարիմ են քեզ մարմնաւոր չարչարանք նորա, հաւատարմագոյն ևս լիցի քեզ երկրորդ անաւոր գալուստն նորա»:

Եւ զայս լսելով թագաւորին՝ բորբոքեցաւ իբրև զհօւր հնոցին ի Բաբելոնի, մինչ և իւրքն իսկ անգէն դեռ ևս իբրև զՔաղզէացիսն այրեցեալ լինէին:

Յայնժամ զբոլոր բարկութիւն սրտմտութեանն եհեզ յայրն երանելի՝ որում անուն էր Գարեգին: Կապեալ ստիւք և կապեալ ձեռօք զերկեամ մի տուաւ ի չարչարանս, և հանեալ ի բաց գտէրութիւնն ի նմանէ՝ ընդունէր զվճիռ մահու:

1001  
16837

Որոց ոգիքն թուլացեալ են յերկնաւոր առաքինութենէն՝ յոյժ ընդ անիւ անկեալ է բնութիւն մարմնոյ. յամենայն հողմոյ շարժի և յամենայն բանէ խռովի, և յամենայն իբաց դողայ. երազագէտ է այնպիսին ի կեանս իւրում, և յանգիւտ կորուստն յուղարկի ի մահուան իւրում: Որպէս և ասաց ոմն ի հնոցն, մահ ոչ իմացեալ՝ մահ է, մահ իմացեալ՝ անմահութիւն է: Որ զմահ ոչ զիտէ՝ երկնչի ի մահուանէ. իսկ որ զիտէ զմահ՝ ոչ երկնչի ի նմանէ:

Եւ այս ամենայն չարիք մտանեն ի միտս մարդոյ յանուստեմութենէ: Կոյր զրկի ի ճառագայթից արեգական, և տգիտութիւն զրկի ի կատարեալ կենաց: Լաւ է կոյր աչօք քան կոյր մտօք: Որպէս մեծ է հոգի քան զմարմին՝ այսպէս մեծ է տեսաւորութիւն մտաց քան զմարմնոց:

Եթէ ոք կարի առաւելեալ իցէ աշխարհա-  
կան մեծութեամբ, և մտօքնաղքատագոյն, այն-  
պիսին ողորմելի է քան զբազումս. որպէս և տե-  
ասնեմք իսկ՝ ոչ միայն ի չափաւոր մարդիկ՝ այլ  
և յոր մեծն է քան զամենայն: Թագաւոր եթէ  
ոչ ունի զիմաստութիւն աթոռակից իւր, ոչ կա-  
րէ ի վիճակին իւրում վայելուչ գոյ: Իսկ եթէ  
առ մարմնաւորս այսպէս, սրչափ ևս առաւել առ  
հոգևորան:

Բոլոր մարմնոյս հոգի է կենդանութիւն, իսկ  
մարմնոյ և հոգւոյ միտք են կառավար. և որպէս  
առ մի մարդ՝ այսպէս առ բոլոր աշխարհս: Թա-  
գաւոր ոչ զիւր միայն տացէ պարտիս, այլ և ո-  
րոց եղև պատճառք ի կորուստ:

Բայց մեք թէպէտ և ոչ ունիմք հրաման  
բամբասել զիշխանն, բայց և ոչ գովողք կարեմք  
լինել այնմիկ՝ որ աստուածամարտն լինիցի: Այլ  
զանցս իրացն պատմեմք որ ի նմանէ ընդ սուրբ  
եկեղեցիսն էանց, և ոչ դանդաղիմ. ոչ բամբա-  
սասէր մտօք, այլ ճշմարտութեամբ զելս իրացն  
ասելով ոչ լռեցից: Ոչ ի կարծ ընդոստուցեալ,  
և ոչ ի լուր զարթուցեալ. այլ ես ինքնին ան-  
ձամբ անդէն ի տեղուջն պատահեցի և տեսի և  
լուայ զձայն բարբառոյ յանդգնաբար խօսելով.  
Իբրև զհողմ սաստիկ՝ զի բախիցէ զծով մեծ,  
այնպէս շարժէր և տատանէր զամենայն բազ-  
մութիւն զօրացն իւրոց: Եւ հանդէս առնէր ա-

մենայն ուսմանց, և անդաճէր զմոգութիւն և  
զբաւզէութիւն և զամենայն ուսմունս աշխար-  
հին իւրոյ: Արկանէր ի ներքս և զքրիստոնէու-  
թիւն կեղծաւորութեամբ, և ասէր զայրացեալ  
մտօք. «Հարցէք, քննեցէք, տեսէք. թող որ լաւն  
է ընտրեալ կալցուք»: Եւ փութայր որ ինչ իմտին  
էր՝ զի վազվազակի կատարեսցի:

Իսկ ի կողմանց կողմանց քրիստոնեայքն որ  
ի զօրուն էին՝ իմացան զխորհուրդն որ ծածուկ  
վառեալ բորբոքէր, և կամէր հրդեհել զլերինս և  
զգաշտս առհասարակ: Զեռան և նոքա անծախա-  
կան հրով, և սաստկապէս պատրաստեցան առ  
փորձութիւն զաղտնի մեքենայիցն:

Սկսան այնուհետև բարձր բարբառով, սաղ-  
մոսիւք և երգովք հոգևորօք և մեծապայծառ  
վարդապետութեամբ յայտ յանդիման մեծի բա-  
նակին զպաշտօնն ցուցանել, և աներկիւղ առանց  
զանդիտելոյ՝ ո՛ր ոք և երթայր առ նոսա՝ ուսու-  
ցանէին կամակար: Եւ Տէր յաջողէր նոցա նշա-  
նօք և արուեստիւք. քանզի բազում հիւանդք  
ընդունէին զբժշկութիւն ի հեթանոսական զօրուն:

Իսկ անօրէն իշխանն իբրև զիտաց եթէ յայտ-  
նեցաւ խորամանկութիւն խորհրդոյն, և պատ-  
րաստեալ հուրն՝ մինչչև ուրուք ի նա փչեալ՝  
վառումն նորա յայտնի իմացաւ երկիւղածացն  
Աստուծոյ, սկսաւ ծածուկ նետիւք խոցոտել  
զմիտս իւրոյ չարութեանն. և անբժշկական վէրս

յոգիս և ի մարմինս տեսանէր:

Մէրթ շանթէր գալարէր իբրև զօձ թունա-  
ւոր, մերթ պարզէր գոչէր իբրև զառելծ գայրա-  
ցեալ. գելոյր և տապալէր երկդիմի մտօք. զխոր-  
հուրդս կամացն կամէր կատարել: Քանզի ձեռն  
արկանել և ունել ոչ կարէր, — վասն զի ոչ էին  
համագունդ ի միում վայրի առ նմա, — սկսաւ  
ախուհետե յառաջ կոչել զկրտսերս յաւագաց և  
զանարգս ի պատուականաց և զտգէտս ի գիտ-  
նոց և զանարիս ի քաջարանց. և զի մի մի թուի-  
ցեմ, այլ զամենայն արժանաւորսն յետս տանէր.  
մինչ և զհայր և զորդի քակէր ի միմեանց:

Եւ թէպէտ ընդամենայն ազգս առնէր զան-  
կարգութիւնս գայս, առաւել ընդ Հայոց աշխար-  
հին մարտնչէր. քանզի տեսանէր զնոսա ջերմա-  
զոյնս յաստուածպաշտութեան. մանաւանդ որք  
էին յազգէ նախարարացն Հայոց, և անմեղու-  
թեամբ ունէին զսուրբ քարոզութիւն առաքելոցն  
և զմարգարէից: Պատրէր զոմանս ի նոցանէ ոս-  
կւով և արծաթով, և զբագումս այլով եւս առատ  
պարգևօք. իսկ զոմանս ազարակօք և մեծամեծ  
գեղօք, զոմանս պատուովք և իշխանութեամբք  
մեծամեծօք: Եւ այլ ևս սնոտի յոյս ոգւոց ա-  
ռաջի գնէր. և այսպէս հրապուրէր և յորգորէր  
հանապաղ. «Եթէ միայն, ասէ, զօրէնս մոգու-  
թեան յանձին կալլիք, և զձեր մոլորութիւնդ  
սրտի մտօք զարձուցանիցէք ի ճշմարտութիւն

երևելի մերոց զիւցազնական օրինացս, ի մեծու-  
թիւնս և յաւագութիւնս հասուցից հաւասար իմոյ  
սիրելի նախարարացս, նա առաւել ևս զանցու-  
ցից»: Եւ այսպէս կեղծաւորութեամբ խոնարհե-  
ցուցանէր զինքն առ ամենեսեան, խօսելով ընդ  
նոսա ի պատճառս սիրոյ, զի խորամանկութեամբ  
որսալ մարթասցէ զնոսա ըստ առաջին խորհր-  
դականացն խրատուց: Եւ զայս առնէր սկսեալ ի  
չորրորդ ամէն մինչև ի մետասաներորդ ամի իւ-  
րոյ տէրութեան:

Եւ իբրև ետես եթէ ոչինչ յարգեցաւ ծա-  
ծուկ հնարագիտութիւնն, այլ ընդդէմն յուրվա-  
զոյն գործէին — քանզի տեսանէր զբրիստոնէու-  
թիւն՝ որ օր քան զօր յորդեալ տարածանէր ընդ  
ամենայն կողմանս հեռաւոր ճանապարհին ընդ  
որ ինքն անցանէր, — սկսաւ հաշել և մաշել և հա-  
ռաչելով յոգւոց հանել: Յայտնեաց ակամայ  
զծածուկ խորհուրդսն. ետ հրաման բարձր բար-  
բառով և ասէ. «Ամենայն ազգ և լեզուք՝ որ են  
ընդ իմով իշխանութեամբ՝ զադարեսցին յիւրա-  
քանչիւր մոլոր օրինաց, և միայնոյ եկեսցեն յեր-  
կրպագութիւն արեգական, զոհս մատուցանելով  
և աստուած անուանելով, և սպաս ունելով կրա-  
կի. և ի վերայ այսր ամենայնի և զմոգութեան  
օրէնս կատարելով, մի ինչ ամենևին պակաս  
առնիցեն»:

Ձայս ասելով քարոզ կարդայր ի մեծի կարաւանին, և պատուէր սաստիւ ի վերայ զնէր ամենեցուն. և դեսպանս ստիպաւ արձակէր յամենայն ազգս հեռաւորս, զդոյն պատուէր հրամանի առ ամենեսեան արկանէր:

Արդ ի սկզբան երկոտասաներորդ ամի թագաւորութեան իւրոյ՝ գունդ գումարէր անհամար բազմութեամբ, յարձակեալ հասանէր յերկիրն թիտաղական:

Ձայս տեսեալ թագաւորին Քուշանաց՝ ոչ հանդուրժէր ընդ առաջ ելանել նորա պատերազմաւ. այլ խոյս տուեալ ի կողմանս ամուր անապատին, թագստեամբ ապրէր հանդերձ ամենայն զօրօքն իւրովք: Իսկ սա ասպատակ արձակէր զաւառաց, տեղեաց, վայրաց, առնոյր զբազում բերդս և զքաղաքս, և կուտէր զգերին, զառ և զապուռ և զաւար, ածէր հասուցանէր յերկիր իւրոյ տէրութեանն: Եւ անդ այնուհետեւ յընդունայն եղեալ ի նոյն խորհուրդս՝ հաստատէր ի կարծիս մոլորութեան, ասելով ցպաշտօնեայս ամբարշտութեանն. «Ձինչ հատուցուք մեք աստուածոցն փոխարէնս այս մեծի յաղթութեանս՝ որ ոչ ոք կարաց ելանել ընդդէմ մեր պատերազմաւ»:

Յայնմ ժամանակի առ հասարակ մողք և քաղեայք բարձին զձայնս իւրեանց միաբան և ասեն. «Աստուածքն որ ետուն քեզ գտէրութիւն

և զյաղթութիւն ի վերայ թշնամեաց քոց, ոչ ինչ կարօտ են ինդրել ի քէն յերևելի պատուականացս, այլ զի բարձցես զամենայն ուսմունս մոլորութեան մարդկան, և ի մի դարձուցես օրէնս զբաղաշտական պատուիրանին»:

Հաճոյ թուէր բանն առաջի թագաւորին և ամենայն մեծամեծացն, մանաւանդ որ էին առաջակայք օրինացն: Խորհուրդ ի մէջ առեալ յաղթէր իւրատն:

Անդէն ի ներքոյ Պահ դրանն արգելոյր զբազմութիւն այրուծիոյն Հայոց և զՎրաց և զԱղուանից, և զամենեցուն՝ որ էին հաւատացեալ ի սուրբ աւետաբանն Քրիստոսի: Եւ հրաման սաստիւ դոնապանացն առնէին, եթէ որ յարևելս առ մեզ գայցէ՝ թողցեն, իսկ յարևելից յարևմուտս անանց լիցի ճանապարհ:

Եւ իբրև արգել և փակեաց զնոսա յամուր և յանել զառագիլն, — և յիրաւի ասացի ամուր և անել, քանզի չիք անդ տեղի փախստի և թաքստի, վասն զի շուրջանակի թշնամիք են բնակեալ, — յայնմ ժամանակի ձեռն արկանէր ի նոսա, մեծաւ չարչարանօք և պէսպէս թանջանօք վատթարէր զբազումս ի նոցանէ, և ստիպէր ուրանալ զճշմարիտն Աստուած, և խոստովանել զերևելի տարերս: Իսկ զօրականքն առ հասարակ գեղեցիկ խորհրդով, քաջապէս զօրութեամբ միաբան աղաղակէին և ասէին. «Վկայ են մեզ եր-

կինք և երկիր. ոչ երբէք հեղգացեալ եմք յար-  
քունի վաստակս, և ոչ խառնեալ վատութիւն ընդ  
արութիւն քաջութեան. ի գուր և անողորմ են  
հարուածքս ի վերայ մեր»:

Եւ բազմանայր գոչումն աղաղակի նոցա,  
մինչև ինքնին թագաւորն ականատես լինէր ի-  
րացն յանդիմանութեան, և անդէն վաղվաղակի  
երդմամբ հաստատէր և ասէր. «Ոչ թողացուցից  
ձեզ, մինչև կատարես՞իք զամենայն կամս հրա-  
մանաց իմոց»:

Եւ անա իշխանութիւն առեալ չարաչար  
սպառաւորացն, զչորս զինուորսն ի բուն աւա-  
գացն մատուցին ի փորձութիւնս տանջանաց: Եւ  
զառաջեաւ դատեալ բազում հարուածովք, նո-  
վին կապանօք անցուցին ի տեղիս արգելանին:  
Իսկ այլոցն խարէութեամբ առ ժամանակ մի  
թողութիւն արարեալ, և զամենայն վնասուն պատ-  
ճառս արկանէր զկապելովքն. և զայս առնէր սա-  
տանայական խրատուն:

Իսկ յետ երկոտասան աւուր հրամանս տայր  
ընթրիս գործել առատութեամբ և աւելի քան  
զաւուրց սովորութիւն, և կոչէր զբազումս ի զին-  
ւորական քրիստոնէիցն: Եւ ի ժամ զահու պատ-  
րաստութեան զիւրաքանչիւր տեղի շնորհէր նո-  
ցա զբազմականին. և սիրով խոնարհութեամբ  
խօսէր ընդ նոսա ըստ առաջնում կարգին, զի  
թերևս հաւանեացին ուտել զմիս զոհեալ, զոր ոչ

էր երբէք օրէն ուտել քրիստոնէից: Իբրև ոչ կա-  
լան յանձին ամենեքին, ոչ ինչ կարի ստիպեաց,  
այլ հրամայեաց մատուցանել նոցա զսովորական  
կերակուրն, և առաւել զինեօքն յաւելոյր ի տա-  
ճարին զխրախութիւն:

Եւ անտի իբրև ի գուրս ելին ի սրահս ար-  
քունի, արգելին զոմանս ի նոցանէ ձեռս յետս  
կապելով, և զխոնջանունսն կնքելով. և զգու-  
շութեամբ պահէին՝ էր որ զերկուս աւուրս, և  
էր որ զերիս: Բազում և այլ ևս յանարժան հա-  
րուածս չարչարէին, զոր ոչ ընդ գրով իսկ ար-  
ժանի համարեցաք արկանել: Եւ զոմանս ի նո-  
ցանէ ընդ քարշ վարէին յօտարութիւն յազնուա-  
կան պատուոյն անարգեալ:

Եւ գունդս գունդս դարձեալ գումարէին ի  
նոցանէ յերկիր հեռատան՝ յամուրս անապա-  
տին՝ ի մարտ պատերազմի թշնամեացն արքայի.  
և բազմաց իսկ անդէն հասանէր վախճան մա-  
հու սրով: Եւ զամենեցունց զկարգեալ թոշակն  
նուազեցուցանէին, և քաղցիւ և ծարաւով տա-  
ռապեցուցանէին գնոսս, և ձմերոցի տեղիս զգժ-  
նեայ վայրսն հրամայէին նոցա. և անարգս և  
վատթարս յաչս ամենեցուն գնոսս ցուցանէին:

Իսկ նոքա առ սէրն Ֆրիստոսի յոյժ ինդու-  
թեամբ ընդունէին զամենայն չարչարանսն վասն  
մեծի յուսոյն որ առաջոյ պատրաստեալն կայ  
պատուիրանապահ համբերողացն: Որչափ չարու-

Թեամբ զանարգութիւնն բազմացուցանէր, նոքա  
ևս քան զևս զօրանային ի սէրն Քրիստոսի. մա-  
նաւանդ զի բազումք ի նոցանէ զգիրս սուրբս  
ուսեալ էին ի մանկութենէ, այնու զանձինս  
մխիթարէին և զընկերան քաջալերէին, և աշխա-  
րայ զպաշտօնն ունէին և բազմացուցանէին:

Վասն որոյ և բազումք ի հեթանոսաց՝ որոց  
հեշտ և ցանկալի ձայնքն թուէին, քաջալերէին  
գնոսա, և ասէին բանս մխիթարութեան, իբրև  
եթէ լաւ իցէ մարդոյ մահու չափ ճգնել՝ քան  
յայդպիսի օրինաց ուրանալ:

Բայց սակայն թէպէտ և նոքա առ սէրն  
Քրիստոսի յոյժ զուարթութեամբ խնդային ըստ  
ներքին մարդոյն, արտաքին տեսիլն կարի ողորմ  
էր յօտարութեանն: Այսպիսի պատուական զի-  
նուորութիւն հասեալ էր ի չարաշուք անարգու-  
թիւն, և հայրենի ազատութիւնն չարաչար կայր  
ի ծառայութեան մարդախոշոշ բռնաւորին, որ և  
ըստ հեթանոսաց օրէնս անցանէր արիւնհեղու-  
թեամբ, և ամենևին չկարծէր՝ թէ գուցէ այսր  
ամենայնի վրէժխնդիր յերկնից:

Նա և ոչ զերկրաւոր վաստակս ուրուք յի-  
շէր. և որ մեծն քան զամենայն է ըստ մարմ-  
նաւոր կարգի, քանզի գոյին ոմանք ի նախարա-  
րացն Հայոց՝ որոց զեղբարս նորա սնուցեալ էր  
մայրենի կաթամբն իւրեանց, առաւել քան զա-  
մենեսեան գնոսա զատէր:

Եւ յայսր ամենայնի վերայ այլ ևս չարու-  
թիւն խորամանկեաց: Չմի ոմն ի հաւատարիմ  
ծառայիցն իւրոց ի գործ առաքէր յերկիրն Հա-  
յոց՝ որում անունն էր Դենշապուհ. որ եկեալ  
հասեալ հրամանաւ արքունի, զողջոյն բերեալ  
զմեծ թագաւորին, և խաղաղասէր կեղծաւորու-  
թեամբ աշխարհագիր առնելով ամենայն երկիրն  
Հայոց ի թողութիւն հարկաց և ի թեթևութիւն  
ծանրութեան այրևձիոյն: Թէպէտ և ի վերին ե-  
րեսս կեղծաւորէր, այլ ի ներքոյ խորհուրդք չա-  
րագոյն ցուցանէին:

Առաջին, զազատութիւն եկեղեցւոյ արկա-  
նէր ի ծառայութիւն:

Երկրորդ, միայնակեաց քրիստոնեայք որ  
բնակեալ էին ի վանորայս, ընդ նովին աշխար-  
հագրով էարկ:

Երրորդ, զհարկ աշխարհին առաւել ծանրա-  
ցոյց:

Չորրորդ, զնախարարեանն բանսարկութեամբ  
արկ ընդ միմեանս, և յամենայն տան արար  
խռովութիւն:

Եւ զայս ամենայն առնէր՝ զի թերևս զմիա-  
բանութիւնն քակտեսցէ, և զուխտն եկեղեցւոյն  
ցրուեսցէ, և զմիայնակեացն փախուսցէ, և  
զշինականսն վատնեսցէ. և առ յոյժ ալքատու-  
թեանն՝ ակամայ զիմեսցեն յօրէնս մոզուց:

Եւ եւս չարագոյն հինգերորդն. քանզի որ հազարապետն էր աշխարհին՝ իբրև զհայր վերակացու համարեալ էր աշխարհականացն քրիստոնէից. զբզուեաց յարոյց զամբաստանութիւն ի վերայ նորա, և հանեալ զնա ի գործոյն՝ փոխանակ նորա պարսիկ ամ յաշխարհն, և մեւս ևս մոզպետ դատաւոր աշխարհին, զի զեկեղեցւոյ փառս աղաւաղեսցեն:

Բայց սակայն թէպէտ և ամենայն գործքս այս դժնեայ էին, չև էր ուրուք ձեռն արկեալ յայտնի յեկեղեցին. վասն այնորիկ և ոչ ոք ընդդիմացաւ նմա, թէպէտ և էր ծանրութիւն հարկացն: Քանզի ուստի արժան էր առնուլ հարիւր դահեկան, նոյնչափ կրկնէին և առնուին. սոյնպէս և եպիսկոպոսաց և երիցանց ղնէին, ոչ միայն շինաց՝ այլ և աւերակաց: Նա բնաւ ճիլ իսկ կարէ պատմել վասն ծանրութեան մտից և սակից, բաժից և հասից, լերանց և դաշտաց և մայրեաց: Ոչ ըստ արքունի արժանաւորութեանն առնուին, այլ հինաբար յափշտակելով, մինչև ինքեանք իսկ մեծապէս զարմանային՝ թէ ուստի այս ամենայն գանձ ելանէ՝ զիսորդ շէն կայցէ աշխարհն Հայաստանեայց:

Եւ իբրև տեսին՝ թէ այսու ամենայնիւ չկարացաք ձանձրացուցանել, յայնժամ յայտնապէս հրաման ետուն մոզաց և մոզպետաց նամակ մի գրել ըստ ձախողակի զենին իւրեանց: Եւ է պատ-

ձէն նամակին այս.

«ՄԻՀՐՆԵՐՍՅԷՆ ՎԶՈՒՐԿ, հրամանատար Երան եւ Աներան, Հայոց մեծաց ողջոյն շատ».

«Դուք զիտասլիք, ամենայն մարդ՝ որ բնակեալ է ի ներքոյ երկնի, և ոչ ունի զօրէնս դենի մագդեզն, նա խուլ է և կոյր, և դիւաց Հարամանոյ խարեալ:

«Քանզի մինչ չև էին երկինք և երկիր, Զրուան մեծն աստուած յաշտ առնէր զհազար ամ՝ և ասէր. «Թերևս լիցի իմ որդի Որմիզդ անուն, արասցէ զերկին և զերկիր»։ Եւ յղացաւ երկուս յորովայնի. մի վասն յաշտ առնելոյ՝ և զմեւան ևս ի թերևան ասելոյ: Իբրև զիտաց, եթէ երկուեն յորովայնիս, «Որ վազ եկեսցէ, ասէ, նմա սաց զթագաւորութիւնս»։

«Իսկ որ էր ի թերանաւաստութենէն յղացեալ՝ պատառեաց զորովայնն և ել ի դուրս: Ասէ ցնա Զրուան. «Ո՞վ ես դու»: Ասէ. «Որդին քո եմ Որմիզդ»: Ասէ ցնա Զրուան. «Իմ որդին լուսաւոր է և անուշահոտ, դու խաւարային ես և չարասէր»։ Եւ իբրև կարի դառնապէս ելաց, ետ ցնա զթագաւորութիւնն հազար ամ:

«Իբրև ծնաւ զմեւս ևս որդի, անուանեաց զնա Որմիզդ. եհան զթագաւորութիւն յԱրհմսէ, և ետ ցՈրմիզդն, և ասէ ցնա. «Ցայժմ ես քեզ

յաշտ արարի, արդ դու ինձ արա»: Եւ Որմիզդ արար զերկինս և զերկիր. իսկ Արհմն ընդդէմ չար գործեաց:

«Եւ այսպէս բաժանին արարածքս. հրեշտակք՝ Որմզդի են, իսկ դեքն Արհմնոյն, և ամենայն բարիք որ յերկնից և այսր լինին՝ Որմզդի են, և ամենայն վնասք որ անտի և այսր գործին՝ զայն Արհմն արար: Սոյնպէս յերկինս որ ինչ բարի է՝ զայն Որմիզդն արար, և որ ոչն է բարի՝ զայն Արհմն արար. որպէս զմարդ՝ Որմիզդ արար. և զախտս և զհիւանդութիւնս և զմահ՝ Արհմն արար: Եւ ամենայն թշուառութիւնք և պատահարք որ լինին, և պատերազմունք դառնութեան, չարին մասին արարածք են. իսկ յաջողութիւն և տէրութիւնք և փառք և պատիւք և առողջութիւնք մարմնոց, զեղեցկութիւնք դիմաց և ճարտարութիւնք բանից և երկայնակեցութիւնք ամաց, այդ ի բարեոյն առնուն զգոյացութիւն. և ամենայն որ ոչ այդպէս է՝ ի նա չարի մասն խառնեալ է:

«Եւ ամենայն մարդիկ մոլորեալ են որ ասեն՝ եթէ «Զմահ Աստուած արար, և չար և բարի ի նմանէ լինին»: Մանաւանդ որպէս քրիստոնեայք ասեն՝ թէ «Աստուած նախանձոտ է. վասն թզի միոյ ուտելոյ ի ծառոյն՝ Աստուած զմահ արար, և զմարդն արկ ընդ այնու պատուհասիւ»: Զայդպիսի նախանձ և ոչ մարդ առ

մարդ ունի, թող թէ Աստուած առ մարդիկ. զի որ զայս ասէ՝ նա խուլ է և կոյր, և ի դիւաց Հարամանոյ խաբեալ:

«Դարձեալ մեւս ևս այլ մոլորութիւն. «Աստուած որ զերկինս և զերկիր արար՝ եկն, ասեն, և ի կնոջէ ումեմնէ ծնաւ՝ որում անուն էր Մարիամ, և առն նորա Յովսէփ». այլ ճշմարտութեամբ՝ Բանթուրակայ ուրումն եղեալ նա որդի յանկարդ խառնակութենէ: Եւ զհետ այսպիսի մարդոյ մոլորեալ են բազումք.

«Եթէ աշխարհն Հոռոմոց առ յոյժ յիմարութեան տգիտաբար մոլորեալ են և զրկեալ ի կատարեալ դենէս մերմէ, յանձանց պայմանեն զվնասն իւրեանց. դուք ևս ընդէր զհետնոցա մոլորութեանն ցնորիք: Այլ զոր օրէնս տէրս ձեր ունի՝ զնոյն և դժւք կալարուք. մանաւանդ զի և առաջի Աստուծոյ վասն ձեր համարս ունիմք տալ:

«Մի հաւատայք առաջնորդացն ձերոց՝ զոր նածրացիսդ անուանէք. քանզի յոյժ են խաբեբայք. զոր բանիւք ուսուցանեն՝ զործովք ոչ առնուն յանձն: «Միս ուտել, ասեն, ոչ են մեղք», և ինքեանք ուտել ոչ կամին. «Կին առնել արժան է», բայց ինքեանք և հայել ի նա ոչ կամին. «Կարասի որ ժողովէ, ասեն, մեղք են յոյժ», բայց զաղբատութիւն առաւել քան զյոյժ գովեն: Յարգեն զթշուառութիւն, և պարսաւեն զյաջո-

դուածս. ծաղր առնեն զանուն բախտի, և զփառաւորութիւն յոյժ այսպանեն. սիրեն զանշքութիւն հանդերձից, և յարգեն զանարգս քան զպատուականս. գովեն զմահ՝ և պարսաւեն զկեանս. անարգեն զծնունդս մարդոյ, և գովեն զանորդութիւն: Եւ եթէ լսէք դոցա և ի կանայս ոչ մերձենայք, աշխարհիդ վախճան վաղվաղակի հասանէ:

«Այլ ես ոչ կամեցայ զամենայն ըստ մասանց ընդ գրով արկանել առ ձեզ. զի բազում այլ ինչ է զոր խօսին դոքա: Որ չարագոյն ևս է քան զոր գրեցաքդ, զԱստուած ի խաչ ելեալ ի մարդկանէ քարողեն, և գնոյն մեռեալ և թաղեալ, և ապա յարուցեալ և վերացեալ յերկինս: Ո՛չ ահա ձեզէն իսկ արժան էր անդէն դատաստան առնել վասն այդպիսի անարժան ուսմանց: Դեւք որ չարք են՝ ոչ ըմբռնին և տանջին ի մարդկանէ, թնդ թէ Աստուած սրարիչ ամենայն արարածոց. զոր ձեզ ամօթ է ասել, և մեզ կարի անհաւատալի բանք:

«Արդ երկու իրք կան առաջի ձեր. կամ արարէք բան առ բան նամակիս պատասխանի, և կամ արիք ի Դուռն եկայք, և յանդիման լերուք մեծի հրապարակին»:

## ԱՆՈՒԱՆՔ ԵՊԻՍԿՈՊՈՍՍՅՆ

որք պատասխանեցին նամակին.

ՅՈՎՄԷՓ Եպիսկոպոս Այրարատայ.

ՍԱՀԱԿ Եպիսկոպոս Տարօնոյ.

ՄԵԼԻՏԷ Եպիսկոպոս Մանազկերտոյ.

ԵՂՆԻԿ Եպիսկոպոս Բագրևանդայ.

ՍՈՒՐՄԱԿ Եպիսկոպոս Բզնունեաց.

ՏԱՃԱՏ Եպիսկոպոս Տայոց.

ԹԱԹԻԿ Եպիսկոպոս Բասենոյ.

ԳՅՅՈՒՆ Եպիսկոպոս Տուրուբերանոյ.

ԵՐԵՄԻԱ Եպիսկոպոս Մարդաստանի.

ԵԼԼԱԼԻ Եպիսկոպոս Մարդոյ աղւոյ.

ԱՆԱՆԻԱ Եպիսկոպոս Սիւնեաց.

ՄՈՒՇԷ Եպիսկոպոս Արձրունեաց.

ՍԱՀԱԿ Եպիսկոպոս Որշտունեաց.

ԲԱՍԻԼ Եպիսկոպոս Մոկաց.

ԳԱԴ Եպիսկոպոս Վանանդայ.

ԵՂԻՇԷ Եպիսկոպոս Ամասունեաց.

ԵՂԲԱՅՐ Եպիսկոպոս Անձևացեաց.

ԵՐԵՄԻԱ Եպիսկոպոս Ապահունեաց:

Այս ամենայն Եպիսկոպոսք և բազում քրեպիսկոպոսք և պատուական երիցունք ի տեղեաց տեղեաց հանդերձ սուրբ ուխտիւ եկեղեցւոյ՝ միաբանք և միահաւանք, միահամուռ ժողովեալք ի թագաւորանիստ քաղաքն յԱրտաշատ,

հաւանութեամբ մեծամեծ նախարարացն և ամենայն բազմութեամբ աշխարհին արարին նամակին պատասխանի:

### «ՅՈՎՍԷՓ ԵՊԻՍԿՈՊՈՍ»

«հանդերձ ամենայն միաբանելովքս ի մեծամեծաց մինչեւ ցփոքունս, Միհրնեքսեհի մեծի հազարապետիդ Արեաց եւ Անարեաց՝ թագում խաղաղասէր մտօք թագմասցի ողջոյն առ քեզ եւ ամենայն մեծի սպահիդ Արեաց.

«Ի նախնեաց ունիմք սովորութիւն աստուածատուր պատուիրանաւ՝ աղօթս առնել ի վերայ կենաց թագաւորի, և անձանձրոյթ խնդրել յԱստուծոյ վասն երկայն ժամանակաց դորա, զի խաղաղութեամբ վարեսցէ զտիեզերական իշխանութիւնդ զոր աւանդեալ է դմա յԱստուծոյ. զի ի դորա յերկար խաղաղութեանն և մեք ասողջութեամբ և աստուածպաշտութեամբ կատարեսցուք զկեանս մեր:

Վասն նամակին զոր քո ի մեր աշխարհս տուեալ էր, յառաջ ժամանակաւ մի ոմն ի մոգպետաց, որ կատարելագոյն էր ի դենիդ ձերում, և դուք առաւել քան զբնութիւն մարդկանի վերհամարէիք զնա, հաւատաց նա յԱստուած կենդանի յարարիչն երկնի և երկրի, և բան առ բան

երոյժ և իմացոյց ձեզ զօրէնս ձեր: Եւ իբրև ոչ կարացին բանիւ զդէմ ունել նորա, քարկոծեալ մեռաւ յՈրմզդէ արքայէ: Եւ եթէ հաւատարիմ համարիցիս զմեր բանս լսել, ի բազում տեղիս այլք աշխարհիդ ձերոյ գտանին զիրք նորա. ընթերցիր, այտի տեղեկանաս:

«Այլ վասն օրինացս մերոց, ոչ ինչ անբերոյթ են, և ոչ յանկեան ուրեք աշխարհի քարոզի. այլ համատարած ընդ ամենայն երկիր, ընդ ծով և ընդ ցամաք և ընդ կղզիս. ոչ միայն ընդ արեւմուտս, այլ և ընդ արեւելս, այլ և ընդ հիւսիս և ընդ հարաւ և ի միջոցս լի է հոծութեամբ: Ոչ ի մարդ ապաստան՝ եթէ վերակացուաւ ասարածեսցի ընդ աշխարհս. այլ ինքն յինքենէ՝ ունի զհաստատութիւն: Ոչ առ այլովք վաթարօքն վեհ երևի, այլ ի վերուստ յերկնուստ ունի զանսուտ օրէնսդրութիւնն. ոչ միջնորդաւ, զի մի է Աստուած, և չիք այլ ոք բացի նմանէ, ոչ երիցագոյն և ոչ կրտսերագոյն:

«Ոչ սկիզբն առեալ յումեքէ լինել Աստուած, այլ ինքն ինքեամբ մշտնջենաւոր. ոչ ի տեղուջ ուրեք, այլ ինքն ինքեան տեղի. ոչ ի ժամանակի իմիք, այլ ժամանակք ի նմանէ գոյացան. ոչ միայն քան զերկինս երիցագոյն, այլ և քան զկարծիս մտաց մարդկան և հրեշտակաց: Ոչ ձեանայ ի տեսիլ տարրեղէն, և ոչ անկանի ընդ տեսլեամբ ական. և ոչ միայն ձեռին չգննի, այլ

և ոչ ընդ միտս ուրուք հարկանի, ոչ միայն ընդ մարմնականացս՝ այլ և ընդ անմարմին հրեշտակացն. բայց եթէ ինքն. կամի, իւրոց արժանաւորացն մտաց իմանի, այլ ոչ աչաց տեսանի, և մտաց՝ ոչ երկրաւորացս, այլ որ յԱստուած են հաւատացեալ ճշմարտիւ:

«Եւ անուն նոցա Արարիչ երկնի և երկրի. իսկ յառաջ քան զերկին և զերկիր, որպէս ինքնագոյ՝ ինքնանուն է: Ինքն անժամանակ է, իսկ արարածոցս յորժամ կամեցաւ՝ սկիզբն արար լինելոյ, ոչ յընչէ՝ այլ յոչընչէ. զի ինչ՝նամիայն է, և այլս ամենայն ի նմանէ ընչացաւ: Ոչ եթէ իբրև յետոյ իմացաւ և արար, այլ մինչ չև արարեալ էր նորա՝ ի կանուխ զիտութեանն իւրում տեսանէր զարարածս. որպէս և այժմ մինչ չև է գործեալ մարդոյ բարի ինչ կամ չար, Աստուծոյ յայտնի է անգործք մարդկան: Սոյնպէս և յայնժամ մինչ չև էր, ոչ խառն ի խուռն ինչ ճանաչէր զանեղսն, այլ կարգեալ և յարմարեալ կային առաջի նորա իւրաքանչիւր մասանցն տեսակք. իսկ մարդկան և հրեշտակաց՝ և տեսակքն և որ ի տեսակին լինելոց էին:

«Եւ քանզի արարող զօրութիւն է, ոչ կարէր խափանել գնորա բարեբարութիւնն՝ մեր չարութիւնս. որպէս և եղև իսկ, և ունիմք դատաւոր զաջն արարիչ: Ձեռք որ զերկինս և զերկիր հաստատեցին՝ նոյն և տախտակս քարեղէնս փո-

րադրեցին ևւ ետուն մեզ դպրութիւն՝ որ ունի զօրէնս խաղաղականս և փրկականս. զի դիտացուք զմի Աստուած արարիչ երեւելաց ևւ աներեւութից. ոչ այլ ևւ այլ, իբր թէ ոմն բարի ևւ ոմն չար, այլ մի ևւ նոյն համակ բարի:

«Բայց եթէ թուիցի քեզ չար ինչ գոյ յարարածս Աստուծոյ, ասա համարձակ, զի թերևս ուսցիս զճշմարտն բարի: Ձդևս չար սասցեր. գոն և դեք բարի՝ զոր և դուք և մեք Հրեշտակս անուանեմք. եթէ կամին՝ և դեք բարի լինին, և եթէ կամին՝ և հրեշտակք չար լինին: Այդ և ի մարդիկ երևի, և առաւել ի միոյ հօր որդիս. է որ հնազանդ և հպատակ է հօրն, և է որ չարագոյն քան զստանայ: Նա և ինքն իսկ մարդն առանձին յերկուս բաժանեալ տեսանի, երբեմն չար՝ և երբեմն բարի. և որ բարին էր՝ նոյն և չարացաւ, դէպ եղև զի դարձեալ անդրէն ի բարին շրջեցաւ, և բնութիւն մի է:

«Բայց այն որ ասեսն, եթէ վասն թզոյ միոյ մահ արար Աստուած, վատթարագոյն է պատառ մի մագաղաթ քան զթուզ. ապա եթէ բան թագաւորին նկարի ի նմա՝ ո պատառէ զնա՝ մահու ընդունի զպատուհաս: Իսկ արդ չար արժան է ասել թագաւորին. քաւ, ես ոչ ասեմ, այլ խրատ ի գործ արկեալ և զայլս ուսուցանեմ: Յայնժամ էր Աստուած նախանձոտ՝ թէ չէր պատուիրեալ չուտել ի ծառոյ անտի. ապա եթէ յառաջագոյն

զգուշացաւ, զգութ բնական սիրոյն իւրոյ յայտնեաց ի նմա: Իսկ արհամարհելով մարդ՝ ընկալաւ զպատիժս մահուն:

«Բայց այն զոր ասացեր՝ եթէ Աստուած ի կնոջէ ծնաւ, յայդմ չէր արժան քեզ խորշել և փախչել. դի ահաւասիկ Արհմն և Որմիզդ ի հօրէ ծնան և ոչ ի մօրէ. որում եթէ քաջ միտ զնես, և ոչ դու յանձն առնուս: Եւ մեւս ևս այլ ծանրագոյն քան զայդ, Միհր աստուած ի կնոջէ ծնաւ, եթէ ոք ընդ իւրում ծնողին անկցի:

«Այլ սակաւիկ մի եթէ ի բաց թողացուցանէիր զփքուսն տէրութեանդ, և ընկերաբար գայիր ի պայքար, գիտեմ զի իբրև այլովդ ամենայնիւ յոյժ իմաստուն ես, և վասն ծնողեան Տեառն մերոյ ի սուրբ կուսէն՝ ոչ աւելաբանութիւն համարէիր, այլ առաւել քան զարարչութիւնն յոչընչէ զաշխարհս՝ մեծագոյն զվերջին փրկութիւնն իմանայիր, ազատութեան մարդոյն զյանցաւորութիւնն զնէիր, և բարերարութեանն Աստուծոյ՝ զազատութիւնն ի ծառայութենէ:

«Քանզի յորժամ լսես եթէ յոչընչէ արար Աստուած զամենայն աշխարհս, բանիւ ծնունդ իմաշիր զարարածս: Իսկ քանզի Աստուած որ զայս մեծ մարմին առանց չարչարանաց ծնաւ, ապաքէն իբրև զհայր դութ ունի ընդ սմա: Զի որ ինքն անապական է՝ և զարարածս առանց ապակո՞ւթեան ծնաւ. իսկ սա կամօք զլորեալ

ապականեցաւ, և անձամբ ևս ոչ կարէր կանգնել կալ ի վերայ ոտից: Վասն զի էր ի հողոյ, անձամբ անձին արարեալ՝ անդրէն ի նոյն բնութիւն դարձաւ. և իբրև ոչ եթէ յօտար զօրութենէ չարի ինչ ընկալաւ ուրուք զպատիժս պատուհասին, այլ ի յիւրմէ հեղգութենէն շլտելաբերար պատուիրանին, խրատեցաւ ծառայական մասնն մահուամբ զոր կրեաց յանձն իւր:

«Արդ եթէ զմահ չար աստուածն արար, զինչ գոյացութիւն երևի մահու ի միջի. և ոչ ինչ:—Բայց զբարի Աստուծոյ զարարածսն խանգարեաց:—Եթէ այդ այլպէս է՝ նմա և բարի իսկ ասել ոչ մարթի, այլ կիսագործ ապականացու: Եւ որոյ աստուծոյ արարածքն ապականելիք են և կղծանելիք՝ նմա անեղծ Աստուած չմարթի ասել: Տի՛ օն անդր թողէք պիմարութեան բարբանջմունսդ:

«Միոյ աշխարհի երկու դեհապետք ոչ լինին, և ոչ միոյ արարածոյ երկու աստուածք: Եթէ ժպրհեսցին և լինիցին երկու թագաւորք միոյ աշխարհի, աշխարհն կղծանի և թագաւորութիւնքն խանգարին:

«Աշխարհս նիւթեղէն է, և նիւթքս որիչ որիչ են և ընդ միմեանս հակառակ. մի է արարիչ հակառակորդացս՝ որ ածէ զսոսա ի սիրելութիւն հաւանութեամբ. որպէս մալեալ կակղէ զջերմութիւն հրոյն՝ օդոյս հովութեամբ, և զա-

պառուսն բրտութիւն օգոյն՝ հրոյն եռանդմամբ. սոյնպէս և զմանրամաղ փոշիացեալ հողս՝ ջրոյն խոնաւութեամբ զանգանէ; իսկ զիվայր ծորելի բնութիւն ջրոյն՝ սալայատակ արամայուցեալ հողոյն կափմամբ:

«Զի եթէ միաբանէին տարերքս, դուցէ որ ի կարճամտաց և Աստուած անապական զոսս կարծէր, և թողեալ զարարիչն՝ արարածոյս զերկրպագութիւն մատուցանէր. վանն այնորիկ որ արար զսա՝ զգուշացաւ յառաջագոյն, զի հայեցեալ մարդիկ ի յանդիմանութիւն ազականացու տարերացս՝ անապական միայն զկառավար տրա իմացին, զմի և ոչ գերկուս. զնոյն արարիչ չորեքկին նիւթոյս՝ յորմէ ամենայնքս ծննդագործին հրամանաւ արարողին իւրեանց:

«Եւ շրջագայութեամբք չորեք յեղանակք կատարեալ գործեն զտարևոր սպասաւորութիւնն. և չորեքեան հային կամաց ակնարկելոյ արարչին իւրեանց, և անզգայութեամբ լծեալ են ի գործ հարկաւորութեանն, չյափշտակելով զկարգ պատուոյն ի միմեանց:

«Եւ անա պարզաբան լուսաւորութիւն՝ դիւրատար ի յականջս ամենեցուն:

«Զի այն որ հուրն է՝ զոյացութեամբ և զօրութեամբ խառնեալ է յերիսն ևս մասունս. իբրև զի գտանի ջերմութիւնն յովսպոյն ի քարինս և յերկաթս, և սակաւագոյն ի յօդ և ի ջուր,

և ինքն առանձին ուրեք ոչ երևի: Իսկ ջրոյ բնութիւն զոյ առանձինն, գոյ և ի խառնուածն երից ևս մասանց, յովսպոյն ի հողաբոյսս և սակաւագոյն ի յօդ և ի հուր: Իսկ օգն թափանցանց է ընդ հուրն և ընդ ջուր, և ի ձեռն ջրոյն ընդ կերակուրս անեցականս:

«Եւ այսպէս խառնեալ են տարերքս այս, և գոյացեալ իբրև զմի մարմին, և ոչ կորուսեալ զիւրաքանչիւր բնութիւնս, և ոչ երբէք զկայան առեալ հակառակութեամբ, հայելով ի մի իշխանն յանխառնն՝ որ զխառնուածն յարմարեալ կազմէ առ ի բնակութիւն կենդանեաց ամենեցուն, և տևողութիւն յարակայութեան բոլոր աշխարհիս:

«Իսկ եթէ առ անբան աշխարհս այսպէս հոգ տանի Աստուած, որչափ ևս առաւել առ բանաւոր աշխարհս՝ մարդն:

«Զոր և ձեր ոմն քաջ յիմաստնոցն ասաց, եթէ Միհրն աստուած մայրածին էր ի մարդկանէ, և թագաւոր աստուածադաւակ է, և համհարզ քաջ եւթներորդաց աստուածոց: Եւ եթէ հաւատալ արժան է առասպելաբանութեանդ—գորդուք և գործովք իսկ կատարեալ ցուցանէք ի դենիդ ձերում—մեք ոչ. ևս առասպելացն հաւատամք, այլ աշակերտք եմք մեծին Մովսիսի մարգարէին՝ ընդ որում Աստուած խօսեցաւ ի մորենուջն և ի Սինէ; և դէմ յանդիման օրէնսս զրեաց և ետ ցնա. և ծանոյց զնիւթեղէն աշ-

խարհու իբրև գարաբաժս, և զիւր աննիւթ էութիւնն՝ արարիչ նիւթոցս յոչընչէ. և զերկիրս երկրաւորօքս և զերկինս երկնաւորօք եցոյց նմա՝ զի գործք ձեռաց նորա են: Բնակիչք երկնի՝ հրեշտակք, և բնակիչք երկրի՝ մարդիկ. բանաւոր՝ մարդ և հրեշտակ միայն, և Աստուած ի վեր քան զերկինս և զերկիր:

«Եւ ամենայն արարածք անբանութեամբ կատարեն զհրամանս պատուիրանի նորա, և ոչ երբէք անցանեն ըստ եղեալ սահմանն իւրեանց. բայց մարդ և հրեշտակ ազատ թողեալ ի կամս անձին, քանզի մտաւորք են, եթէ կայցեն ի հրամանի նորա, անմահք են և որդիք Աստուծոյ: Զբոլոր արարածս սուեալ է ի ծառայութիւն, զերկիրս՝ մարդկան, և զերկինս՝ հրեշտակաց. ապա եթէ ստունգանիցեն և անցանիցեն զպատուիրանաւ, զընդդէման գործեսցեն Աստուծոյ, յիւրաքանչիւր պատուոցն զանարգանս ընկալցին. զի երեսցցի աէրութիւնն անբամբաս, և յանցաւորք յանցանացն ամօթալից:

«Իսկ եթէ դու ի տգիտութեան վրիպեալ իցես, ես որ հաստատունս զիտեմ՝ ոչ կարեմ զալ զկնի քս մոլորութեանդ: Եթէ աշակերտիմ անուսումնութեանդ՝ երկօքինս յանդիւտկորուսան մատնիմք, թերևս ես չարագոյն քան զքեզ, քանզի վկայ ունիմ ինձ զինքնասաց ձայնն Աստուծոյ. «Ծառայ, սէ, որ ոչ գիտէ զկամս տեան

իւրոյ, և արժանի գանի ինչ գործ գործէ, ըմպել ըմպէ գան, այլ սակաւագոյն. իսկ որ տեղեկագոյն է կամաց թագաւորին, և յանցանէ ինչ առաջի նորա, առանց բարեխօսի բազմապատիկ տանջի»:

«Արդ աղաչեմ զքեզ և զամենեսեան որ ընդ քոյով իշխանութեամբ են. մի դու ընդ իս բազմապատիկ տանջիր, և ոչ ես ընդ քեզ սակաւագոյն. այլ ես և դու և ամենայն բազմութիւնդ հանդերձ արի թագաւորաւդ այնպէս աշակերտեսցուք աստուածային գրոց՝ զի ի տանջանացն ապրեսցուք, և զբժոխս սու ոտն կոխեսցուք, և յանշէջ հրոյն զերծանիցիմք, և զարքայութիւնն ժառանգիցեմք, և անցաւոր կենօք զանանց մեծութիւնն անվախճան ունիցիմք:

«Բայց յորմէ դուզ զարհուրեալ ես՝ զիւրահաւան լեր, և վաղվաղակի աշակերտիս ճշմարտութեանն:

«Ոմն ի հրեշտակաց յանմահիցն զնդէն ստամբակեալ ի բաց զնաց յերկնից, և ի մեր աշխարհըս եկեալ՝ պատիր բանիւք և սուտ խոստմամբ զանլինելի յոյան առաջի դնէր՝ իբրև տղայ մանկան՝ անվորձ և անկիրթ նորաթեք մարդոյն, ի վեր հայեցուցանելով զմիտս նորա, ուտել ի պրտոյ ծառոյն—յոր հուսն չհրամայեաց երթալ—զի լիցի աստուած: Իսկ նորա մոռացեալ զպատուիրանն Աստուծոյ, խաբեցաւ զկնի մուրը խա-

բէութեանն, կորոյս զոր ունէր զիսոս անմահութեանն, և չեհաս երազայոյս կարծեացն: Վասն նորոյ և մերժեալ ի կենաց տեղոյն, ընկեցաւ յապականելի աշխարհս՝ յորում և դուք էք բնակեալ այժմ, և ցնորեալ մոլորիք զկնի նորին խրատառի: ոչ ևս ուտելով ի պատուիրեալ ծառոյն, այլ զարարածս աստուած ստելով, և անխօս տարերցս երկիր սրագանելով, և անորովայն դիւաց կերակուր մատուցանելով, և յարարչէն բոլորեցունց ի բաց մերժելով:

«Ոչ յագի չաք խրատառն, այլ կամի զի քան զինքն չարագոյնս արասցէ: Քանզի դեւքն ոչ եթէ բռնաբար վարեն զոք ի կորուստ, այլ զմեղս քաղցրացուցանեն ի կամս մարդոյն, և ողորանօք որսան զանուամունս ի խաբէութիւն, որպէս բազում մարդիկ զրնկերս իւրեանց ի գողութիւն և յաւազակութիւն: Իբր ոչ եթէ բռնի ինչ վարելով, այլ պատիր խաբէութեամբ տան գործել բազում չարիս, զոմանս ի կախարդութիւն, և զոմանս ի պոռնկութիւն, և զոմանս յանթիւ ի բազում յայլ իրս ազտեղութեան: Եւ արդար դատաւորք վրէժ առնուն մահու չափ. իբր ոչ եթէ բարի Աստուծոյ դատաւորք իցեն բարեգործ, և չարին չարագործ. զի բազում անգամ է զի ի բարի մարդկանէ չարք լինին, և յետոյ ի չարագունից անտիկատարելագոյն բարիք:

«Եւ դատաւորք ստոյգ՝ որք դատին զչարա-

գործս, ոչ եթէ չարք անուանին և չարչարիչք, այլ յոյժ բարիք և բարեգործք. և բնութիւն մի է, և ոչ երկու. իսկ ի միոջէ անտի գործք երկուութեան երկին. ոմանց սատակիչք, և ոմանց պարգևատուք: Եւ եթէ առ մարդիկ այս պաշտի, ի ձեռն թագաւորական վիճակին խրատուն խնամ տանել իւրում իշխանութեանն, որչափ ևս առաւել Աստուծոյ բոլոր աշխարհս, որ ընդ ամենեցուն կեանս կամի և ոչ զմահ: Եւ ահա ուր բազմացաւ յանցաւորութիւն՝ տանջեաց զամենեսեան մահուամբ. իսկ ուր եղև ունկնդրութիւն հնազանդութեան՝ շնորհեաց պարգևս անմահութեան:

«Այն է ճշմարիտ Աստուած՝ բոլորեցունց մեր արարիչ, զոր դու աներասանակ արձակ բերանով՝ ահա հաներկիւղ համարձակ հայհոյես: Թողեալ զՅիսուս Քրիստոս զփրկական անունն՝ Բանթուրակայ որդի անուանես, և մարդ մոլորեցուցիչ կարծես. և զերկնաւոր փրկութիւնն աղաւաղես և անարգես ի կորուստ անձին և բոլոր աշխարհիդ: Զոր տալոց և հատուցանելոց ես զանանցական վրէժ տանջանացն յանշէջ հուրն սպառնացեալ զեհենին, հանդերձ ամենայն գործակցօք քոյովք, առաջնովք և միջնովք և վերջնովք:

«Այլ մեք այսպէս զիտեմք զԱստուած, և ի սոյն հաւատամք ի յաներկբայս:

«Եւ որ արար զաշխարհս՝ նոյն եկն և ծնաւ ի սուրբ Կուսէն Մարիամայ, յառաջագոյն նկատելով մարգարէիցն, առանց իրիք պատճառանաց մարմնաւոր կարգի: Որպէս յոչընչէ արար զայս մեծամարմին աշխարհս, սոյնպէս առանց իրիք մարմնական միջնորդի առ զմարմինն յանփորձ Կուսէն ճշմարտիւ, և ոչ ստուերագիր երևամբ: Էր Աստուած ճշմարտիւ, և եղև մարդ ճշմարտիւ. ոչ ի լինելն մարդ՝ կորոյս զաստուածութիւնն, և ոչ ի կալ մնալն Աստուած՝ աղաւաղեաց զմարդկութիւնն, այլ նոյն և մի:

«Այլ քանզի ոչ կարէաք տեսանել զանտեսանելին և մերձենալ յանմերձենալին, եկն եմուտ ընդ մերով մարդկութեամբս, զի և մեք մտցուք ընդ նորա աստուածութեամբն: Ոչ անարգս ինչ համարեցաւ զգենուլ զիւր ստեղծուած մարմինս, այլ մեծարեաց իբրև աստուածաստեղծ զիւր գործ: Ոչ առ սակաւ սակաւ շնորհեաց ինչ սմա զանմահութեան պատիւն՝ իբրև զանմարմին հրեշտակաց, այլ միանգամայն զբոլոր բնութիւնն մարմնով՝ շնչով և հոգևով զգեցաւ, և միաբանեաց ընդ աստուածութեանն. միութիւն, և ոչ երկուութիւն. և այսուհետև մի գիտեմք զաստուածութիւնն, որ յառաջ էր քան զաշխարհս, նոյն և այսօր և յաւիտեան:

«Այս Յիսուս Քրիստոս՝ որ յիւր մարմինն փրկեաց զբոլոր աշխարհս, սա եկն կամօքի մահ.

և որպէս ինքն աստուածութիւնն գիտէ՝ թանձրացաւ յանարատ Կուսէն, և ծնաւ և պատեցաւ ի խանձարուրս և եղաւ ի մուր, և շարժեաց ած զմոզսն յարևելից կողմանցս յերկրպագութիւն. սնաւ իբրև զտղայ կաթամբ, աճեաց և մեծացաւ ամս երեսուն, մկրտեցաւ ի Յովհաննէ ի յամլորդւոյն ի Յորդանան գետ: Արարնշանս մեծամեծս և արուեստս ի մէջ Հրէիցն. մատնեցաւ ի քահանայից, դատապարտեցաւ ի Պիղատոսէ պոնտացւոյ: Սաչեցաւ, մեռաւ, թաղեցաւ, յարեաւ յաւուր երրորդի. երեւեցաւ երկոտասան աշակերտացն և այլոց բազմաց աւելիքան գհինգ հարիւրոցն: Եւ շրջելով ընդ նոսա զաւուրս քառասուն՝ վերացաւ յերկինս ի լեռնէն Ջիթենեաց յանդիման իւրոց աշակերտացն, ել և նստաւ ի հայրենի աթոռն: Սոստացաւ երկրորդ անգամ գալ անաւոր զօրութեամբ յարուցանել զմեռեալս, նորոգել զբոլոր աշխարհս, առնել դատաստան արդար ի մէջ արդարոց և մեղաւորաց, տալ պարգևս արժանաւորաց, և հատուցանել պատիժս չարագործաց՝ որ այսմ ամենայնի բարերարութեանց ոչ հաւատան:

«Յայսմ հաւատոց զմեզ ոչ ոք կարէ խախտել, ոչ հրեշտակք և ոչ մարդիկ, ոչ սուր և ոչ հուր, ոչ ջուր, ոչ ամենայն զինչ և են դառն հարուածք:

«Ամենայն ինչք և ստացուածք մեր ի ձեզս

քո, և մարմինք մեր առաջի քո կան. ըստ կամաց քոց արա զինչ և կամիս: Եթէ սովին հաւատովք թողուս, ոչ յերկրի այլ տէր փոխանակեմք ընդ քեզ, և ոչ յերկինս այլ Աստուած փոխանակեմք ընդ Յիսուսի Քրիստոսի, որ չիք այլ Աստուած բաց ի նմանէ:

«Ապա եթէ յետ այսր մեծի վկայութեան այլ ինչ հարցանես, աւասիկ կամք, զբոլոր մարմին տուեալ ի ձեռս քո. վաղվաղակի արա զինչ և կամիս: Ի քէն տանջանք և ի մէնջ յանձնառութիւնք. սուր քո՝ և պարանոցք մեր: Չեմք ինչ լաւ մեք քան զառաջինսն որ յայսր վկայութեան վերայ եղին զինչս և զստացուածս և զմարմինս իւրեանց:

«Զի եթէ անմահք իսկ էաք, և մարթ էր մեզ մեռանել վասն սիրոյն Քրիստոսի՝ արժան էր. քանզի և նա անմահ էր, և այնչափ սիրեաց զմեզ՝ մինչև մահ ի յանձն էառ, զի և մեք նորա մահուամբն յաւիտենական մահուանէն ապրեսցուք: Եւ եթէ նա յիւր անմահութիւնն ոչ ինայեաց, մեք զի կամօք եղաք մահկանացուք, կամօք մեռցուք վասն սիրոյ նորա, զի կամօք յանձն առցէ զմեզ յիւր յանմահութիւնն. մեռցուք իբրև զմահկանացուս. զի ընկալցի զմեր մահն իբրև զանմահից:

«Այլ դու յայսր ամենայնի այլ զմեզ մի հարցաներ. զի ոչ եթէ ընդ մարդոյ է ուխտ հա-

ւատոց մերոց, եթէ պատրիցիմք իբրև զտղայս. այլ անլուծութեամբ ընդ Աստուծոյ՝ որում չիք հնար քակտել և ի բաց ելանել, ոչ այժմ և ոչ յապա, և ոչ յաւիտեանս, և ոչ յաւիտենից յաւիտեանս»:

Ի սմին մեծի հաւանութեան ամենայն բազմութիւնն միաբանեաց ի մեծամեծաց մինչև ցփոքունս. անսուտ երդմամբ եղին վկայութիւն՝ կենօք և մահու ի նմին կալ հաստատուն:

Եւ իբրև եհաս նամակն յարքունիս՝ և ընթերցան ի մեծի խոնաստանի յանդիման ամենայն բազմութեան կարաւանին, բազումք այնոքիկ էին որ իբրև լսէին՝ գովէին զպատասխանիս: Թէպէտ և երկնչէին յահէ տէրութեանն՝ սակայն ի ծածուկ առ միմեանս զնոյն վկայութիւնս գովութեանց տային. առաւել քան ընդ ճարտարաբանութիւնն՝ ընդ համարձակութիւն աներկիւղութեանն զարմանային: Եւ բազումք յահաբեկելոց սկսան զբահել պնդապէս, և զնոյն շշնջիւն լսէին յամենայն շրթանց:

Իսկ չարասէր մոզպետն հանդերձ մեծ հազարապետաւն շնչեաց չարախօսութիւն, և բորբոքեաց զթագաւորն իբրև զհուր անշիջանելի: Եւ սկսաւ կրճտել զատամունսն իբրև զօրհասական վիրաւոր. և յայտ յանդիման ձայն արկեալ

իմե՛ծ հրապարակին, և ասէ. «Գիտեմ ես զչա-  
րութիւնն բազմութեան մարդկանս՝ որ թերահա-  
ւատեն ի մերոց օրինացս, և զկնի կախարդու-  
թեան մոլորեալ են անդարձութեամբ: Եւ իմ ե-  
դեալ է իմտի՛ թէ ոչ ումեք թողացուցից ի մե-  
ծամեծ հարուածոցն՝ մինչև ակամայ ի բաց կաց-  
ցեն յայնպիսի վրիպական օրինաց. եթէ ոք կա-  
րի ի մերձաւորաց իցէ, զնոյն անցս և ընդ նոսա  
անցուցից»:

Յայնժամ ծերն դառնացեալ բանս ի ներքս  
ընկէց, և ասէ ցթագաւորն. «Առ ի՛նչ է քո այդ  
մեծ տրտմութիւնդ. զի եթէ կայսր չելանէ ըստ  
քո հրաման, և Հոնք կան քեզ ի ծառայութեան,  
հր մարդ է յերկրի՛ եթէ կարող է ընդդէմ դառ-  
նալ քում հրամանիդ: Տիրաբար հրաման տուր ի  
ներքս, և ամենայն որ ինչ և ասես՝ վաղվաղակի  
կատարի»:

Եւ անդէն թագաւորն իներքս կոչեալ զգալ-  
րապետն, հրամայէր զբել հրովարտակ. և ոչ ևս  
ըստ սովորութեանն, այլ բանս զայրագինս իբր  
առ ատելիս և անպիտանս, չյիշելով ամենեկն  
զմեծամեծ վաստակս տիրասէր մարդկանն. այլ  
միայն կոչոյ հրաման տուեալ յականէ, յանուա-  
նէ զարս զոր ինքն ճանաչէր: Եւ այս անուանք  
են նախարարացն. Ի տոհմէն Միւնեաց ՎՍՍԱԿ  
անուն:

Ի տոհմէն Արծրունեաց ՆԵՐՇԱՊՈՒՀ անուն:

Ի տոհմէն Ռըշտունեաց ԱՐՏԱԿ անուն:

Ի տոհմէն Թորխոռունեաց ԳԱԴԻՇՈՅ անուն:

Ի տոհմէն Մամիկոնէից ՎԱՐԴԱՆ անուն:

Ի տոհմէն Մոկաց ԱՐՏԱԿ անուն:

Ի տոհմէն Ապահունեաց ՄԱՆԷՃ անուն:

Ի տոհմէն Ամատունեաց ՎԱՀԱՆ անուն:

Ի տոհմէն Վահևունեաց ԳԻԻՏ անուն:

Ի տոհմէն Անձևացեաց ՇՄԱԽՈՆ անուն:

Զայսնախարարքս յականէ յանուանէ կոչեցին  
ի դուռն արքունի. և կէսքն առ նմա իսկ էին ի  
կարաւանին, և այլքն ի կողմանց հիւսիսոյ ի Հո-  
նաց պահակին. թողեալ էր զոմանս ի նախարա-  
րացն անդէն յաշխարհին Հայոց:

Արդ թէպէտ և ոչ համագունդ ի միոջ վայրի  
գիպեցան ամենեքեան, սակայն յառաջագոյն գի-  
տացեալ զխորհուրդս չարաբարոյ բռնաւորին, և  
զհեռաւորսն ևս իբրեւ զմերձաւորսն ի միոջ վայ-  
րի առ միմեանս համարէին:

Եւ ի ձեռն Յովսեփու մեծի եպիսկոպոսի  
նովին ուխտիւ հաստատեալ՝ խաղացին գնացին  
յիւրաքանչիւր տեղեաց ի դուռն արքունի: Եւ  
յոյժ փութային վասն եղբարց և որդեաց և սի-  
րելի դայեկասնունդ բարեկամացն՝ որ չարաչար  
կային ի մեծի նեղութեանն: Վասն որոյ և նոքա  
զանձինս ի մահ մատնեցին՝ ոչ ինչ զանգիտելով  
իբրև զանարի վատասիրտս. այլ յոյժ քաջու-

Թեամբ պնդէին զանձինս, զի թերևս կարասցեն փրկել զնոսա ի մեծամեծ հարուածոցն:

Եւ իբրեւ հասին ի դուռն արքունի, ի մեծի շաբաթու Զատիկին յանդիման լինէին թագաւորին: Բայց թէպէտ եւ տեսանէին զեղբարս իւրեանց ի մեծամեծ վիշտս տառապանաց՝ որ վասն անուանն Քրիստոսի ճղնեալք էին պնդապէս, ոչ ինչ տրտում եւ տխուր գերեսս ցուցանէին հրապարակին: Եւ որչափ նոքա զուարթագին երևէին ամենեցուն՝ առաւել զարմանային շարասէրքն:

Եւ զի օրէնք էին յառաջ ժամանակաւ, յորժամ ի Հայոց այրուծի ի դուռն երթայր, ի ձեռն պատուաւորի զօրագլխի ուրուք, այր ընդ առաջ յղէր, եւ հարցանէր զողջոյն եւ զխաղաղութիւն Հայոց աշխարհին, և երկիցս եւ երիցս անգամ զնոյն առնէր. և զհանդէս զնդին ինքնին տեսանէր թագաւորն եւ յառաջ քան զգործ պատերազմին հասանել զգալն իսկ առ նա՝ մեծիշնորհակալութեան համարէր, եւ առաջի աթոռակցացն իւրոց եւ ամենայն մեծամեծացն՝ զովութիւն մատուցանէր ամենեցուն, եւ յիշէր զնախնեացն զվաստակս, եւ զառն առն քաջութիւն պատմէր նոցա:

Իսկ այն օր ոչ մի ինչ յայցցանէ ամենեւին ինչ ոչ յիշեաց. այլ իբրև զհարադեւ մի՝ ոչ զազարէր յուզել եւ շարժել զբուք ձմերայնուոյ: Որպէս և նմանեալ իսկ էր ծովածուփ ալէկոծ

խուժութեան, ոչ զուզնաքեայ վեր ի վերոյ, այլ անդատին յանդնդոց բարձրանայր փրփրեալ կուտակեալ, եւ վիշապաւծայն որոտալով, զազանաբար զոչելով առ հասարակ զողացուցանէր զտիեղերական իշխանութիւնն, որպէս թէ փրեալ տարածանիցի համատարած ամենայն ի վերայ լերանց, խորոց և ձորոց՝ ապականել միտնգամայն զլայնութիւն դաշտացն վայելչութեան:

Մռնչելով բարբառ արձակեալ և ասէ. «Երդուեալ իմ յարեգակն, ի մեծն աստուած — որ ճառագայթիւքն իւրովք լուսաւորէ զամենայն տիեզերս, եւ շերմութեամբն կենդանածնէ զամենայն գոյացեալսն — եթէ ոչ վաղիւ ընդ առաւօտն, ընդ երեւումն սքանչելոյն, ընդ իս զիւրաքանչիւր ծունր նմա ոչ կրկնեսջիք՝ խոստովանելով զնա աստուած, ոչ ինչ թողացուցից ձեզ՝ զամենայն նեղութիւնս շարշարանացն ի վերայ ածելով, մինչեւ ակամայ կատարիցէք զկամս հրամանաց իմոց»:

Իսկ հաւատացեալքն հաստատեալք ի Քրիստոս՝ որ ի սառնամանեաց ձմերայնուոյն հովանային, և ոչ ի տապոյ խորշակին ջեռնութիւն, և ոչ յահագին ձայնէն սարսէին, և ոչ ի սպառնալեաց տանջանացն զանգիտէին. այլ ի վեր հայեցեալք զգօրութիւնն Քրիստոսի յօգնութիւն եկեալ տեսանէին, և զուարթագին դիմօք և համեստ բանիւք յառաջ մատուցեալ՝ տային պա-

առախանի թագաւորին.

«Խնդրեմք ի քէն, արքայ քաջ, ունկն դիր սակաւ բանից մերոց, և քաղցրութեամբ լուիցեալ որ ասելոցս եմք:

«Քանզի յիշեցուցանեմք քեզ զժամանակն Շապուոյ արքայից արքայի, որ էր հայր հաւունքո Յազկերտի, և ետ նմա Աստուած զերկիրն: Հայոց ի ժառանգութիւն սովին օրինօք որով եւ մեք իսկ վարիմք այժմ, և հարքն մեր և հաւք հարցն մերոց կացին նմա ի ծառայութեան վաստակս, և սիրով կատարէին զամենայն հրաման բանի նորա, և բազում անգամ ի նմանէ մեծապարգևք ելանէին: Եւ յայնց ժամանակաց մինչև ի քո հայրենի աթոռ՝ և մեք զնոյն ծառայութիւն ծառայեցաք. բայց թերևս քեզ լաւագոյն քան զառաջնոցն»:

Ձայս ասելով ցուցանէին զքաջութիւն արութեանցն լաւագոյն քան զառաջնոցն ըստ զինուորութեան կարգի: Իսկ զմտից և զսակից, և որ այլ ևս էին հարկ աշխարհին, բազմագոյն քան առ հարքն նորա երթայր յարքունիս:

«Նա և ի սուրբ եկեղեցւոյն, որ էր ազատ ի Քրիստոս ըստ կարգի նախնեացն մերոց ի սկզբանէ, և զու ընդ հարկաւ եդիր. և մեք առ սէր քոյոյ տէրութեանդ ոչ ինչ ընդդիմացաք քեզ: Արդ վասն էր յուզեալ իցէ ցասումնս այս ի վերայ մեր. առա զու մեզ զսլատառսս վնաս-

առն. եթէ օրէնքն մեր պատճառք իցեն անվաստակ լինելոյ առաջի քո»:

Իսկ չարադէն լի ամենայն նենգութեամբ՝ զերեսս ի մի կոյս դարձուցեալ և ասէ. «Վնաս համարիմ ընդունել ի գանձ արքունի գհարկս աշխարհին ձերոյ, և անօգուտ զքաջութիւն արութեան ձերոյ. քանզի տգիտաբար մոլորեալ էք ի ճշմարիտ օրինացս մերոց, և զաստուածս անարգէք և զկրակ սպանանէք և զՂուրս պղծէք, և զմեռեալս ի հող թաղելով զերկիր ապականէք, և քրտիկար չառնելով ոյժ տայք Հարամանոյ. և որ մեծ քան զամենայն՝ զի հանապազ ի կանայս ոչ մերձենայք. և մեծապէս լինի դիւաց խնդութիւն, չխրատելով ձեր և չպահելով զամենայն կարգս մողայ: Տեսանեմ զձեզ իբրև զխաշինս ցրուեալս և վայրատեալս յանապատի, և յոյժ զեղջէ մտաց իմոց՝ թէ զուցէ աստուածքն բարկացեալ վասն ձեր՝ ի մէնջ վրէժս առնուցուն: Այլ դուք եթէ կամիք կեալ և կեցուցանել զանձինս ձեր, և մեծարանօք անդրէն յուզարկիլ, զոր ասացի՝ վաղիւ վաղվաղակի կատարեցէք»:

Յայնժամ երանելի նախարարքն առ հասարակ զձայնս իւրեանց բարձին և ասեն յանդիման ամենեցուն. «Մի դու, արքայ, և մի զայդ այլ ևս առ մեզ ասեր. քանզի ոչ է եկեղեցի շինուած մարդոյ, և ոչ սուրբ արեգական, որ էլ զուդ այլ ընդ այլոյ կարծես՝ թէ աստուած

լիցէ. ոչ միայն զի ազատուած չէ, այլ և կենդանի չէ: Այլ եկեղեցիք ոչ են պարզեք թագաւորաց, և ոչ արուեստ ճարտարութեանց, և ոչ զիւտք իմաստնոց, և ոչ աւար քաջութեան զինուորաց, և ոչ պատիր խաբէութիւնք դիւաց. նա և բնաւ իսկ ամենևին զինչ և ասացես յերկրաւորացս, կամ ի վեհից կամ ի վատթարաց, բնաւ ուրեք եկեղեցի ի նոցանէ ոչ պոցի: Այլ շնորհք են մեծին Աստուծոյ, ոչ միում ումեք ի մարդկանէ տուեալ, այլ ամենայն բանաւոր ազգաց որք վիճակեալք են ի բնակութիւն ի ներքոյ արեգականս: Հիմունք նորա եղեալ են ի վերայ հաստատուն վիմի. ոչ ներքինք շարժել կարեն, և ոչ վերինք զրդուեցուցանել: Եւ զոր երկինք և երկիր ոչ դողացուցանէ՝ մի ոք ի մարդկանէ խրոխտացի յազթել նմա: Հնապա, որով օրինակաւ զինչ կամիս առնել՝ կատարեա. պատրաստ եմք ամենեքեան առ ամենայն մեքենայս հարուածոցն տանջանաց զոր սպառնացար. ոչ միայն ի շարժարել՝ այլ և ի մեռանել: Եւ եթէ դարձեալ ևս գնոյն բանս հարցանես՝ ի միոյլէ միոյլէ լուիցես տուաւ քան զդոյն պատասխանի»:

Յայնժամ դառնացեալ քան զլեզի թագաւորն՝ փլուզանէր անդէն ի փորին զժով կամաւոր մաղձոյն իւրոյ. և ընդ քիթան և ընդ բերանն առ հասարակ զուղի ջերմախառն ելանէր, իբրև ի սաստիկ հնոցէ ծուխ թանձրացեալ: Եւ

առ չհանդուրժել սրտին իւրոյ՝ կոտորէր զգորութիւնս մարմնոյն, և ծակոտէր զբազմամթեր աման խորհրդոցն, ցրուէր և վատնէր զամենայն խորհումն նենդութեան: Եւ զոր ոչ երբէք կամէր իւրոց սիրելեացն յայտնել՝ ակամայ առաջի ծառայիցն Քրիստոսի մերկանայր և դնէր զամենայն կարգաւ:

Երեքինէր և չորեքինէր զանսուտ երդումն յարեգակն, և ասէր այսպէս. «Ոչ կարէք աւերել զանխաբ ամուրս իմ. և ոչ որում ցանկացեալք էք՝ վաղվաղակի տամ գտանել ձեզ. այլ զամենեսեան զձեզ և որ ի գնդիս են՝ չարաշար կապանօք ի Սաղաստան տամ անցուցանել ընդ անճանապարհ տեղիս, որ և բազումք ի ձէնջ ի խորշակէ յերթալն սատակիցին, և մնացեալքն անկցին ի բերդս ամուրս և ի բանդս անելս: Եւ ի ձեր աշխարհն առաքեցից զօրս անթիւս հանդերձ փոք, և զկին և զորդիս ի Սուժաստան տամ խաղացուցանել. և զեկեղեցիս, և զոր անուանէք վկայարանս՝ քակեցից, քանդեցից և յապականութիւն դարձուցից. և եթէ ոք ընդդէմ դարձեալ գոցի՝ կոխան եղեալ դազանաց անդորմ մեռանիցի: Եւ զամենայն ասացեալս արարից և կատարեցից առ մնացորդս աշխարհին»:

Եւ վաղվաղակի հրամայէր զպատուականսախարարսն հանել մեծաւ անարգանօք յերեսաց իւրոց. և զգուշութեամբ հրաման տուեալ դան-

ճապետին՝ առանց կապանաց յիւրաքանչիւր վանս պահել, և ինքն զառածեալ անդրէն դառնայր անմխիթար տրամութեամբ յօթեանսն անկանէր:

Իսկ հաւատացեալքն ճշմարտութեամբ ի Քրիստոս՝ ոչ ինչ երկմտութեամբ թերահաւատէին յառաջին խրատուէ սուրբ վարդապետացն իւրեանց. այլ տակաւին խնդրէին հնարս իրացն, թէ որպէս զանձինս և զսիրելիս հանցեն ի մեծ նեղութենէն: Եւ բազում անգամ շանալով, և մեծամեծացն որ օգնականք էին նոցա ի Դրանն արքունի՝ խոստումունս մեծամեծս առաջի դնէին առ ի յոյս կարասւոյ, և ոչ սակաւ գանձս առ ժամայն ծախէին նոցա:

Եւ իբրև յամենայն կողմանց եկն փակեցաւ անել արգելան նոցա, յայնժամ զխորհուրդն Արարհամու ի մէջ առեալ՝ ազադակէին և ասէին ի սիրտս իւրեանց. «Ամենեցուն մեր նուիրեալ և եղեալ զեղբարս և զորդիս և զամենայն սիրելիս ընդ կապանօք իբրև զՍահակ ի վերայ սուրբ սեղանոյն, ընկալ, Տէր, զկամաւոր պատարագս մեր, և մի տար զեկեղեցի քո յայսն կատականաց անօրէն իշխանիս այսորիկ»:

Մի սին ներքինի ի խորհրդակցացն արքայի ի ծածուկ ունէր զանքակ սէրն ի Քրիստոս—քանզի մկրտեալ իսկ էր յաւազանն կենդանի— և մեծապէս հոգ տանէր հնարից կենաց վշտացելոցն: Եւ իբրև ստուգեաց ճշմարտիւ, եթէ զոր

բազում սպառնացաւ թագաւորն չարիս՝ զամենայն կամի անցուցանել ընդ աշխարհն Հայոց, թէպէտ և ոչ ամենեցուն՝ այլ սակաւուց ի նոցանէ խրատ ետ և ուսոյց ելս հնարից, զի առ անգամ մի ի նեղութենէ անտի զանձինս ապրեցուցեն:

Եւ մինչդեռ գունդ կազմէին՝ որ զնոսա շիօթակ արասցեն յանդարձ օտարութիւն—որպէս զբազում նախարարսն ի Վրաց աշխարհէն արարին—ի նմին ժամանակի գուժկան հասանէր ի կողմանցն Քուշանաց՝ եթէ գունդ հատաւ ի թշնամեացն, որ ելին աւերեցին զգաւառս բազումս արքունի: Եւ այս լինէր մեծ օգնականութիւն նոցա յերկնից: Եւ անօրէնն ճեպեալ տազնապէր զայրուծին յառաջ արձակեալ, և ինքն փութայր ստիպաւ զհետ երթալ. և ի խոր խոցեալ ի խորհուրդսն՝ ցրուէր զառաջին հաստատուն երզումն:

Իսկ երկիւղածացն Տեառն զայս տեսեալ՝ մեծաւ յուսով ազօթելով ասէին միաբան. «Իու Տէր ամենայնի, որ զիտես զծածկեալս սրտից մարդկան, և յայանի են առաջի քո ամենայն աներևոյթ խորհրդոց, և ոչ ինչ խնդրես վկայութիւն յերեւելաց. որպէս զի և զանգործս մեր տեսին աչք քո. արդ առաջի քո հեղումք զինդրուածս մեր: Ընկալ, Տէր, զծածկութիւն աղօթից մերոց, և կատարեա զմեզ ի հաճոյս պատուիրանաց քոց, զի ամաչեսցէ չարն որ խրոխ-

սացեալ մարտնչի ընդ մեզ իշխանութեամբ անօրինին: Շարժեա, Տէր, զկամակոր խորհուրդս նենգաւորին, և խափանեցո զկամս ամբարշտութեան նորա, և դարձո զմեզ խաղաղութեամբ խորհրդոցն անդրէն ի սուրբ եկեղեցին. զի մի՛ յանկարծակի յափշտակեալ աւերեսցի չարաչար ի թշնամեաց»:

Եւ անձամբք իւրեանց զայս ուխտ եղեալ անքակութեամբ ընդ Աստուծոյ, զի հաստատուն կացցեն ըստ առաջին խորհրդոցն, պատգամ ի ներքս յղէին զնոյն խրատտուն իւրեանց, իբր թէ կատարեսցին կամք անօրէնութեան նորա:

Ձայն իբրև լուաւ թագաւորն՝ յոյժ ցնծացեալ բերկրեցաւ, կարծեցեալ զգիսն հասանել նմա յօգնականութիւն, շրջեալ և աւերեալ զհաստատուն խորհուրդս ծառայիցն Աստուծոյ. զի տես մատուցանեն երկրպագութիւն արեգական, պատուեալ զնա զոհիւք և ամենայն օրինօք մոգութեանն:

Եւ զայն ոչ կարաց իմանալ ցնորեալն՝ եթէ անստուեր լոյսն արեգականն արդարութեան սպառէր և մաշէր զխաւարային խորհուրդս նորա, և եղծեալ ապականէին ամենայն խեղաթիւր կամք նորա: Եւ կուրացեալ ի ճշմարտին յայտնութենէ՝ ոչ ինչ իմացաւ զպատրանս խաբէութեանն որով վրիպեացն: Հեղոյր արկանէր առաջի նոցա զպարգևս երկրաւորս, և վերստին ա-

մենեցուն զպատիւս և զգահսն նորոգէր, յառաջ մատուցանելով և երևելի աւանելով ընդ ամենայն տիեզերական իշխանութիւնն: Եւ անբաւ առատութեամբ աղարակս և աւանս միում միում նոցա յարքունուստ շնորհէր. սիրելիս և բարեկամս կարդայր զնոսա, և առ հոլարտ յանդգնութեան մտացն կամակորութեան՝ կարծէր եթէ փոխանակիցի ճշմարտութիւնն ընդ ստութեան:

Եւ զայս արարեալ, բազում այրուծի գումարէր ընդ նոսա, և ի մոգուցն ոչ սակաւս, աւելի քան գեւթն հարիւր վարդապետս՝ յէր ընդ նոսա, և զմեծ ոմն իշխան մոգպետ կացուցանէր ի վերայ նոցա: Թոնարհէր և ազաչէր պատուիրելով, թէ մինչ ես ի պատերազմէս դարձեալ գայցեմ խաղաղութեամբ, ձեր արարեալ և կատարեալ իցէ զամենայն ըստ կամաց իմոց: Եւ այսպէս շքով և պատուով առաջնորդէր նոցա զերկայնութիւն ճանապարհին անդրէն յերկիրն Հայոց: Եւ ինքն աւետիս խնդալիս առաքէր յատրուշանս բազումս, զրէր և ցուցանէր մոգաց և մոգպետաց և ամենայն մեծամեծաց կողմանց կողմանց աշխարհաց՝ որպէս զիցն օգնականութեամբ զգործ քաջութեան իմոյ յառաջ մատուցեալ:

Իսկ խոհերականքն այնուհետև յարուցեալ յիւրաքանչիւր խաւարային դարանաց՝ իղձ լինէին վաղվաղակի զհրամանն կատարել. ձայն ա-

բարեալ յաշխարհս հեռաւորս՝ միանգամայն խաղալ գնալ յերկիրն արեւմտից: Եւ մինչ չև հասեալ էին ի մեծ յաշխարհն Հայոց, փայտ ընկենուին և վիճակս արկանէին, թէ որ լեզու որո՞ւմ դասու հասցէ յաշակերտութիւն: Զի առհասարակ հրաման առեալ էր յարքունուստ, որպէս Հայոց աշխարհին՝ նոյնպէս և Վրաց և Աղուանից և Լըփնաց, Աղձնեաց և Կորդուաց և Ծօղէից և Դարսան և որ այլ ևս ուրեք ուրեք ի ծածուկ յիշխանութեանն Պարսից ունէին զքրիստոնէութիւն:

Եւ անզգայ յարձակմամբ յաւարի առնուլ փութային զգանձս սուրբ եկեղեցեացն. և իբրև զդևս այնուհետև առ միմեանս հասանէին: Եւ լինէր գունդ զօրաց բազմաց, և շարասէրն սատանայ իբրև զօրավար ի մէջ նոցա երևէր, և անդադար յորդորելով զամենեսեան ճեպեալ փութացուցանէր: Կէտ եղեալ զժամանակն՝ զամիսն վեցերորդ, տագնապէին և ստիպէին արքունի հրամանաւ:

«Մինչև ի նաւասարդէ ի նաւատարդ, ասէ, յամենայն տեղիս՝ որ իցեն ընդ իշխանութեամբ թագաւորին մեծի, բարձցին կարգք եկեղեցւոյ, փակեցին և կնքեցին դրունք սուրբ տաճարացն, գրով համարով առցին նուիրեալ սպասքն յարքունիս, լոնսցեն ձայնք սաղմոսացն և դադարեացն ընթերցուածք անսուտ մարգարէիցն: Քահանայք մի իշխեսցեն ի տունս իւրեանց ուսու-

ցանել զժողովուրդս, և հաւատացեալքն ի Քրիստոս՝ արք և կանայք, որ բնակեալ են յիւրաքանչիւր մենանոցս, փոխեսցեն զհանդերձս իւրեանց ըստ աշխարհական կարգաց:

«Դարձեալ և կանայք նախարարացն կայցին զուսումն վարդապետութեան մոզացն: Ուստերք և դստերք ազատաց և շինականաց՝ կրթեսցին ի հրապարակս նոցուն մոզաց: Կարճեսցին և արգելցին օրէնք սուրբ ամուսնութեան զոր ունէին ի նախնեաց ըստ կարգի քրիստոնէութեանն. այլ փոխանակ ընդ կնոջ միոյ՝ բազում կանայս աւրացեն. զի աճեցեալ բազմացին ազգք Հայոց: Դստերք՝ հարանց լինիցին, և քորք՝ եղբարց. մարք մի ելցեն յորդուց, այլ և թոռունք ելցեն յանկողինս հաւուց:

«Պատրուճակք մի մեռցին անյազ, եթէ՛ յօղեաց իցէ և եթէ՛ յայծեաց և եթէ՛ յարջառաց և եթէ՛ ի հաւուց և եթէ՛ ի խողաց: Հայսք առանց փանդամի մի զանգցին. ծիրտք և քակորք ի կրակ մի եկեսցեն. ձեռք առանց գումիզոյ մի լուացին. շնջրիք և աղուէսք և նապաստակք մի մեռցին: Օձք և մողէսք, գորտք և մրջմունք, և որ այլ ևս խառնափնդոր բազմաճճիք են՝ մի կացցեն. այլ վաղ թուով համարով ի մէջ բերցին ըստ արքունի չափոյն: Եւ որ այլ ևս ինչ սպասք իցեն, կամ զոհից կամ սպանդից, ըստ տօնական

կարգին՝ տարևոր թուականին, և ըստ կապճաթիւ մոխջաչափ կարգին:

«Ձայս ամենայն որ ասացաք՝ առ ժամանակ մի մինչև ի գլուխ տարւոյ կատարեսցեն ամենեքեան. և զայն ամենայն առ յապապատրաստեսցեն»:

Իսկ զայս ամենայն հրաման պատուիրանաց առեալ մոզացն և մոզպետաց, զսիւ և զգիշեր փութային հասանել յաշխարհն Հայոց. և առ յոյժ խնդութեանն ոչ երբէք յագէին երկայնութեամբ ճանապարհին:

## ԵՐՐՈՐԴ ՅԵՂԱՆԱԿ

ՎԱՍՆ ՄԻԱԲԱՆՈՒԹԵԱՆ

ՍՈՒՐԲ ՈՒՍՏԻՆ ԵԿԵՂԵՑԻՈՅ

Թէպէտ և ոչ իցեմք բաւական ասել զամենայն չարիսն որ անցին անդէն ի կարաւանին ընդ դունդն Հայոց, սակայն և ոչ լռել կամիմք ծածկելով զվիշտս նեղութեանն. այլ ասասցուք փոքր ի շատէ, զի ձայնակիցք լիցուք այնոցիկ որք դառնապէս զմեզն ողբային. զի և դու իբրև լուիցես՝ ոչ սակաւ արտասուս հեղուցուս ի վերայ ազգին թշուառութեան:

Ձի ահա անդէն ի մեծ բանակին Պարսից՝ յազգաց ազգաց որք են հաւատացեալ ի սուրբ աւետարանն Քրիստոսի, իբրև տեսին զչար յանձնառութիւնն Հայոց, յոյժ հարան ի միտս իւրեանց, և կործանեցան անկան ի վերայ զիմաց իւրեանց: Բազումք ի նոցանէ թաղծեալ ի սուգ ծանրութեան, հարեալ յոզիս և դառնացեալ յար-

տասուս, եկին և յանդիմանեցին զնախարարեանն, և յոյժ դարովեցին զուխտ քահանայութեանն:

Զգուէին զամենեսեան և ասէին. «Զի անիցէք զսուրբ կտակարանսդ, և կամ յո՞ տանիցիք զսպաս աէրունեան սեղանոյն. մուանայցէք արդեւք զհոգևոր օրհնութիւնսդ, և կամ լո՞ւսալ զաղարիցէք ի մարգարէական ձայնիցդ: Կափուցէք զաչս յընթերցուածոց, և խցէք զականջս ի լսելոյ. միթէ զմտացդ անմուացութիւն ոչ յիշիցէք: Զի՞նչ առնիցէք զպատուիրեալն ի Տեառնէ. «Որ ուրասցի զիս առանջի մարդկան՝ յուրասս եղէց և ես առանջի Հօր իմոյ որ յերկինս է, և հրեշտակաց սրբոց»:

«Վարդապետք էիք առաքելական քարոզութեանցն. արդ աշակերտք լինիցիք մուլար խաբէութեանն: Ուսուցիչք էիք ճշմարտութեանն, արդ ուսուցանիցէք զպատիր խաբէութիւն մոզաց: Քարողք էիք արարչական գորութեանն, արդ զտարերս աստուածս խոստովանիք: Յանդիմանիչք էիք ստութեան, արդ և քան զսուսն ստագոնք լինիցիք: Ի հուր և ի հողի էիք մկրտեալք, արդ ի մոխիր և յաճիւն թաթաւիցիք. կենդանի մարմնով և անմահ արեամբ էիք սնեալ, արդ ի ձենձեր զոհից և ի շարաւս աղտեղիս մրճոտիցիք: Տաճար էիք Հոգւոյն սրբոյ, արդ զոհարան զիւանց լինիցիք. քրիստոսազգեսցք էիք ի ման-

կութենէ, արդ մերկացեալք ի փառացն՝ զիւսուրբ արեղական կաքաւիցէք:

«Ժառանգ էիք արքայութեանն, արդ անձամբ զանձինս արարէք ժառանգ գեհենին: Նոցա է սպառնացեալ հուրն անշէջ, ընդէր զուք ընդ նոսա այրեցեալ տոշորիցիք. նոցա պարարի որդն անմահ, իսկ արդգուք պարարիցէք զմարմինս ձեր նմա ի կերակուր. խաւարն արտաքին նոցա թանձրացեալ պահի, զուք լուսազգեստք՝ ընդէր յուզարկեցայք ընդ նոսա ի նոյն խաւար: Նոցա էր փորեալ զխորխորատն, զուք ընդէր լցէք յառաջագոյն. նոքա ի վաղնջուց հետէ էին իսկ կուրացեալք, զուք զիմրդ զկնի կուրացն կուրացարուք: Ե՞րբ ուսանիցիք զբազմաթիւ անուանս աստուածոցն նոցա, այն որ չիք ուրեք ի միջի և ոչ մի թեթևացեալք ի ծանր բեռանց՝ անձամբ անձին սուէք բեռն ծանրութեան. ազատեալք ի մանկութենէ՝ չարաչար մտէք յանադատելի ծառայութիւնն:

«Եթէ զիտէիք և երևէր ձեզ յայտնի, սուգ առին երկինք ի վերայ ձեր, և թաղծեցաւ երկիրս ի ներքոյ ոտից ձերոց: Հրեշտակք ի վերուստ են ձեզ բարկացեալք, և ի յերկրէս մարտիրոսքն են ձեզ ցասուցեալք: Ողորմիմ ողորմիմ սիրելեաց ձերոց, և բազում անգամ ողորմիմ անձանց ձերոց: Զի թէ մարդոյ փրկեալ էր զձեզ ի ծառայութենէ, և զուք անձամբ զան-

ձինս այլում ի ծառայութիւն արկտնէիք, ի մեծ բարկութիւն բրդէիք զառաջին տէրն ձեր. իսկ արդ զինչ առնիցէք զաստուածասաստ հրամանն. «Ես եմ Աստուած, և չիք այլ ոք բաց յինէն, և ոչ զինի իմ այլ ոք լիցի Աստուած. Աստուած նախանձոտ եմ ես, հատուցանեմ զմեզս հարց յորդիս մինչև յեւթն դար»: Իսկ եթէ որդիքն արդարք՝ վասն հարցն մեզաց ընդունին զսատակումն, իսկ յորժամ ինքեանք որդիքն իսկ մեղիցեն, ո՞չ ահա միանգամայն զանձանց և զհարց տայցեն ի միասին:

«Դուք էիք մեր ամուր պարիսպ ապաստանի. յորժամ աստի վտանգ հասանէր՝ առ ձեզ յանդորր ելանէաք. արդ մեծ ամուրդ այդ հիմն ի վեր տապալեցաւ: Դուք էիք մեր պարծանս առ թշնամիսն ճշմարտութեան, արդ դուք էք մեր նախատինք առ նոյն թշնամիս: Յայժմ վասն ձերոյ ճշմարիտ հաւատոցն և ի մեզ վտքրի շատէ խնայէին. և արդ ի պատճառս ձեր և զմեզ առնողորմ դատին: Ոչ միայն զանձանց զատաստան տալոց էք առաջի ահեղ ատենին Աստուծոյ, այլ և բազմաց ամենեցուն՝ որ ի ձեր պատճառս և զնոսա ես չարչարեսցեն»:

Չայս և առաւել քան զսոյն խօսեցան ընդ մեծամեծս աւագանւոյն, և յաւելին ցաւս ի վերայ ցաւոց: Յայտնել և ցուցանել նոցա զխորհուրդն ոչ կամէին, լռել և չառնել պատասխանի

անհնար էր. հեղձամղձուկ եղեալ մեծապէս յարտասուս հարկանէին: Ընդ նոսին դառնացեալ լսողք և տեսողք յանմխիթար սուգ լինէին ամենեքեան:

Յայնմ ժամանակի քահանայքն որ անդէն ի զօրուն էին, առ շժուժալ սրտիցն բարկութեան՝ քակեալ որոշեցան ի նախարարացն և յամենայն քաղմութենէն. և զմի ոմն դեսպան ձիով առաքեցին վութապէս յաշխարհն Հայոց: Գոյժ ի բերան առեալ և զօձիս պատառեալ, հասեալ ի ժողովս եպիսկոպոսացն, մեծապէս յարտասուս հարեալ, կայր և պատմէր զամենայն անցս չարչարանացն. այլ ոչ յայտնէր նոցա զծածկութիւն խորհրդոցն:

Յայնմ ժամանակի սիրեցան եպիսկոպոսքն յիւրաքանչիւր ի շխանութիւնս, և առաքեցին զքորեպիսկոպոս ի գեօղս և յազարակս և ի բազում ամուրս լեռնային գաւառացն: Իրդեցին ժողովեցին զբազմութիւն արանց և կանանց, շինականաց և ազատաց, զքահանայից և զմենակեցաց. խրատ եղին, սնդեցին և արարին զամենեսեան զինուորս Բրիտտոսի:

Եւ յառաջին բան խորհրդին այս հաստատեցաւ. «Ձեռն եղբօր հարազատի ի մերձաւոր իւր լիցի՝ որ անցեալ իցէ ըստ ուխտ պատուիրանին Աստուծոյ. և մի խնայեսցէ հայր յորդի, և մի ակն առնուցու որդի հօր պատուոյն: Կին կուուես-

ցի ընդ առն ամուսնոյ, և ծառայ դարձցի ընդ-  
դէմ տեառն իւրոյ: Օրէնք սասուածային կաց-  
ցեն թագաւոր ի վերայ ամենայնի, և ի նմին  
օրինաց ընկալցին յանցաւորք զպատիժս դատա-  
պարտութեան»:

Եւ իբրև այս այսպէս հաստատեցաւ կազ-  
մեցաւ, երևեցան ամենեքեան զինեալք և սաղա-  
ւարտեալք, սուր ընդ մէջ և վահան ի ձեռին՝ ոչ  
միայն արանց քաջաց, այլ և կանանց առնականաց:

Իսկ գունդն Հայոց ամենայն օգնականօքն  
հանդերձ և մոզացն բազմութեամբ՝ յամսեանն  
չորրորդի եկին հասին յաշխարհն Հայոց, ի դիւ-  
ղաքաղաք մի մեծ՝ որում անուն էր Անգղ: Բա-  
նակեցան, բոլորեցան, զետեղեցան, և յամենայն  
կողմանց անդր ժողովեցան, և էին սնթիւ բազ-  
մութիւն:

Եւ եղև յիտ տուրց քսան և հնգից, մոզ-  
պետն ինքնին մոզօքն հանդերձ հասանէր մեծաւ  
զօրութեամբ՝ քակել զգրունս եկեղեցւոյն յաւուր  
միաշարթուն. զփորձ առնուլ կամէր զառաջար-  
կութեան գործոյն: Իսկ սուրբն Ղևոնդ երէց միա-  
բանութեամբ առաջին խորհրդակցօքն և բազում  
ուխտիւ ի տեղուջ անդ պատրաստական դիպե-  
ցաւ, ոչ ետ թոյլ: Թէպէտ և ոչ էր տեղեկագոյն  
մտաց ամենեցուն նախարարացն, և ոչ զօրու-  
թեան ուժոյ մոզպետին, ոչ ինչ եկաց միաց ա-  
մենայն եպիսկոպոսացն, և ոչ առ սակաւ մի-

համբեր անօրէն իշխանին թողացուցանել. այլ  
բազում աղմուկ աղաղակի զօրացն և մոզաց հա-  
սուցանէր: Քանզի վիրգս ի ձեռն առեալ՝ զկա-  
ռափունս մոզացն և մոզպետին շարդեցին. փա-  
խստական յիւրաքանչիւր վանս արկանէին, և  
ինքեանք զպաշտօնն բարձրացուցեալ յեկեղեց-  
ւոյն՝ զտէրունական կանոնն կատարէին, մինչև  
յերեկոյն միաշարթին անդադար լինելով:

Եւ յետ այսր տազնապի խոովութեան՝ յա-  
մենայն կողմանց յաշխարհէն Հայոց բազմութիւն  
արանց և կանանց ի տեղին հասանէին: Եւ անդ  
էր տեսանել զմեծ աղէտ տարակուսին. ոմանք  
զգերարտօսր արձակելով իբր յաղբերականց հո-  
սէին յաչաց իւրեանց. այլք բարձրաճիչ աղաղա-  
կաւ՝ իբր այն թէ զերկինս դողացուցանէին, իսկ  
կէսքն խիզախելով և ի զէնս ընթանալով՝ զմահ  
քան զկեանս ընտրէին: Իսկ ոմանք ի սուրբ ուխ-  
տէ եկեղեցւոյն՝ զաւետարանն ի ձեռն առեալ,  
աղօթիւք առ Աստուած կարգային. և այլք ըղ-  
ձանային զպատառումն երկրին՝ զի անձանց լիցի  
վերեզման. Եւ այսպէս շտապ տազնապի ի վե-  
րայ մոզպետին հասուցանէին: Բազում անգամ  
աղաչէր զօգնականսն իւր, զի ի մահուանէ կա-  
րասցեն զնա ապրեցուցանել, և ողջանդամ ան-  
դէն յարքունիս հասուցանել:

Այլ վասն գործոյն յոր եկեալն էր՝ ստիպէր  
զնոսա և ասէր. «Թող գրեմ և ցուցանեմ մեծ

Թագաւորին, զի ի բաց թողացուցանէ զայսպիսի իրաց՝ առաջարկութիւն. զի եթէ և ինքեանք աստուածքն եկեացեն յօգնութիւն, չէ հնար օրինացս մոզութեան ի Հայս առնուլ զհաստատութիւն. որպէս զվորձ առի զմիաբանութեան ուխտին եկեղեցւոյ: Զի թէ էին զօրք յաշարհիս մոզք, ոչ ինչ խնայէին սոքա ի նոսա սատակմամբ՝ ոչ միայն զարտաքինան, այլ և յեղբարս և յորդիս և յամենայն մերձաւորս իւրեանց, նաև ոչ յանձինս իւրեանց: Մարդք որ ոչ ի կապանաց զանդիտեն, և ոչ ի տանջանաց երկնչին, և ոչ ի ստացուածոց սլատկառին, և որ յետին չար է քան զամենայն չարիս՝ զմահ քան զկեանս ընտրեն, ո՞վ է որ կարէ նոցա զիմակայ լինել:

«Լուեալ իսկ իմ էր ի նախնեաց մերոց, եթէ յաւուրս Շապուոյ արքայից արքայի, իբրև սկսաւ ուսումնդ այդ անել և բազմանալ և լնուլ զամենայն երկիրն Պարսից, և ևս անդր յարևելս հասանել, որ վարդապետքն էին օրինացն մերոց՝ յորդորեցին զթագաւորն, զի մի բնաւ ամենևին բարձցին օրէնք մոզութեան յաշարհէն. ետ հրաման սաստիկ զի լուեալ դադարեսցէ քրիստոնէութիւն: Եւ որչափ նա կամեցաւ արդելուլ, ևս քան զևս անեցին և բազմացան, և հասին մինչև յաշարհն Գուշանաց, և անտի ի հարաւակողմն մինչև ի Հնդկիս տարածեցաւ:

«Եւ այնպէս աներկեւղ և համարձակք էին

յաշարհին Պարսից, մինչև յամենայն քաղաքս աշխարհին եկեղեցի շինեցին՝ որ զանցուցանէր պայծառութեամբ զթագաւորանակ արքունեօքն: Շինէին և վկայարանս իմն անուանեալս, և զնոյն զարդ եկեղեցեաց զարդարէին, և յամենայն տեղիս՝ յապատս և յանապատս միայնանոցս շինէին: Եւ իբրև ոչ ինչ երևէր յայտնի օգնութիւն ուստեք, անելով անէին և բազմանալով բազմանային, և մարմնաւոր մեծութեամբք մեծանային: Զպատճառս հարստութեանն մեք ինչ ոչ գիտէաք. բայց այսչափ ինչ ճշգրտիւ իմանայաք՝ զի տիեզերք ամենայն զինի ուսմանց նոցա գնային:

«Թէպէտ և արկ ի նոսա թագաւորն դձեռն իւր խստութեամբ, և զբազումս կայաւ և չարչարեաց ի նոցանէ, և զևս բազումս մահուամբ սատակեաց, դառնացաւ և ձանձրացաւ յանձն իւր, և զնոսա ոչ կարաց նուազեցուցանել ի բազմութենէն: Դարձեալ թէպէտ փակեաց և կնքեաց զզրուես եկեղեցեացն ընդ ամենայն աշխարհն Պարսից, նոքա զամենայն տուն եկեղեցի արարին, և յամենայն տեղուջ զիւրեանց օրէնանկատարէին: Եւ զանձինս իւրաքանչիւր վկայարանս համարէին, և յաւազոյն զշինուածս մարդկեղէնս քան զհոգեղէնան հաշուէին: Սուրք սպանողացն բթեցան. և նոցա պարանոցքն ոչ ձանձրացան, աւարառուք ստացուածոց նոցա աշխատեցան, և աւարն օր քան զօր անեցեալ բազմացաւ: Սրտ

մտեալ էր թագաւորն, և յոյժ դառնացեալ դահիճքն բարկութեան. իսկ նորա արթունք և զուարթունք, և խնդալից ընդունէին զամենայն հարուածս տանջանացն, և սիրով տանէին զամենայն յափշտակութիւն ընչից իւրեանց:

«Իբրև ետես թագաւորն եթէ զոտն տուեալ զիմեցին ի մահ իբրև խաշինք սուրբք յաղն երկնաւոր, արգել և կարճեաց ի նոցանէ զհարուածս տանջանացն. և հրաման ետ մոզաց և մոզպետացն, զի մի ամենեկն ոք խուեսցէ զնոսա, այլ հաստատեալ կայցեն աներկիւղութեամբ յիւրաքանչիւր ուսմունս, մոզն և զանդիկն և հրեայն և քրիստոնեայն, և որ այլ բազում կեշաք են ի կողմանս կողմանս աշխարհին Պարսից. Եւ ապա առ երկիրն զխաղաղութիւն հաստատութեամբ, և լռեալ զազարեցին ամենայն խռովութիւնք յուզմանց: Քանզի ընդ մերոյ աշխարհին շարժման և արևմուտք ևս մեծապէս շարժեցան, և ամենայն տաճկաստան ընդ նոսին խռովեցան:

«Ձայն անա ի լսելոյ զիտեմք. բայց այս որ ես ինձէն աչօք տեսի, թուի ինձ թէ մեծագոյն ևս լինի քան զառաջինն: Արդ դու որ մարգպանդ ես աշխարհիս, պարտ է քեզ փոյթ յանձին ունել, գրել և ցուցանել յարքունիս զմիաբանութիւն բունութեանս, որպէս աներկիւղութեամբ առ ոչինչ համարեցան զհրամանս արքունի: Եւ եթէ չէր մեր աճապարեալ և ի փախուստ դարձեալ, միում

ի մէնջ ոչ տային ապրել: Եւ եթէ անգէն մարդիկ այդպէս բռնացան, եթէ յանկարծ զինուորս ևս ընդ ինքեանս միաբանեցուցանեն, ո՞ կարիցէ կալ առաջի դոցա յանդուզն յարձակմանդ:

«Ես անա անտեղեակ էի անքակ ուխտի եկեղեցւոյդ ի միմեանց. զի այլ է զոր լսէ մարդ, և այլ է զոր տեսանէ հաստատուն իւրովք աչօք: Ինչ որ ի մանկութենէ յայդմ օրէնս սնեալ էիր, և ճշմարտեալ գիտէիր զսնդութիւն մարդկանդ, եթէ առանց բազում արիւն հեղլոյ դոքա մեզ ոչ տան ձեռն արկանել յեկեղեցիսդ, ընդէր ոչ զայդ ամենայն հաւաստեալ յանդիման շասացեր թագաւորին: Քանզի ամենայն նախարարացն առաջ դու էիր, և զբոլոր աշխարհս քեզ յանձն արարեալ էր մարդպանութեամբ. ընդէր ոչ մեծապէս հոգ տարար յանձն քո: Չի յայլ ժամս իմաստուն էիր՝ և ես գիտէի. զայս ոչ իմաստութեամբ գործեցեր: Ապա թէ ոչ, յայտ է եթէ և դու ի նոցա բանի ես, և քոյով խորհրդով անցուցից զայս անցս ընդ իս և ընդ զօրս:

«Արդ եթէ այդ այդպէս է, և քեզ կամք չէ ունել զմոզութիւն, մի ինչ պատկառեր դու երկիւղիւ յարքայէ. ես գրեմ և ցուցանեմ ի դուռն մովպետան մովպետի և դերանդարձապետի և մեծ հազարապետին, զի անցեն զարքայ ի հաւանութիւն, որպէս զի ի բաց թողացուցէ ըստ առաջին հրամանին, և ի կամս մարդկան ապաստ

տան արասցեն, զի առ սակաւ սակաւ ընդելցին ընդ օրէնս մողութեան. զի որք կալցին՝ սիրով երևեսցին կատարեալ զհրամանս արքունի: Քանզի մարդ է աշխարհս. դուցէ յորժամ վասս ինչ նոցա առնիցեն, և ինքեանք ցրուեալ վատնեսցին յօտարութիւն: Իսկ յորժամ աշխարհս թափուր լինիցի ի մարդկանէս, յայնժամ և քեզ զլսովին՝ մեծապէս վասս հասանէ յարքունուստ»:

Ես պատուխանի մարգարանն մողպետին, և ասէ. «Ամենայն բանք խրատուղ զոր ասացեր՝ ճշմարիտ են. բայց դառաջինն զոր չիմացաք՝ տեսեր, և մեծապէս զղջացաք այժմ: Բայց դու արդ զոր ասեմս արա, և բարիօք թուեսցի քեզ. սակաւ իկ մի երկայնամիտ լեր և զխորհուրդս քո արգել ի բազմաց. բայց արանց՝ որոց ես ասեմ՝ նոցա յայտնես, մինչև ես ինձ ոյժ ժողովեցից՝ զոր ի թիկունս ածելոյ, և զուխտ եկեղեցւոյդ թերևս կարացից երկիւնդկել: Եւ եթէ զայդ այդպէս արարից, զիտեմ ապա թէ և զհրամանն արքունի կարող եմ կատարել»:

Եւ անդէն հրոս հանեալ ի Սիւնեաց աշխարհէն, զիւր գունդն ստուարացոյց ի թիկունս օգնականութեան մողաց և մողպետին: Եւ ապա սկսաւ ասել. «Աղէ դու անգամ մի հրովարտակ ի դուռն տուր վասն այրուձիոյն որ յԱղուանսն է տասն հազար, զի ի ձմերոց ի Հայաս եկեսցեն. և յորժամ գնտա ի ձեռին ունիցիմք՝ չիք

ոք որ եղծանել կարէ զհրամանն արքունի»:

Պատասխանի ես մողպետն և ասէ ցմարգպանն. «Այդ խորհուրդ դարձեալ իմոց բանիցս ընդդէմ է. քանզի մեք յորժամ բռնութեամբ կուուեսցուք ընդ աշխարհիս, աշխարհս ի բաց քանդի, և մեք ի պատուհասէ չապրիմք, անձանց վասս, և արքունի մեծապէս զեան»:

Եւ ոչ ինչ կամեցաւ ամենեկին ունին դնել նմա մարգպանն, զի սրտի մտօք կալեալ էր զպարսկական օրէնսն: Սկսաւ այնուհետև պատրել զոմանս կարասեալ և զոմանս ողորական բանիւք. զուամիկն ամենայն՝ անհղբանիւք սպառնացեալ սրտաթափ առնէր: Հանապազորդ առատացոյց զոռձիկան տաճարին, և յերկարէր գնուազսրն ուրախութեան, մաշելով զերկայութիւն զիշերացն յերգս արբեցութեան և ի կաքաւս լիտութեան, քաղցրացուցանէր ոմանց զկարգս երաժշտական և զերգս հեթանոսականս. մեծապէս զովութիւն մատուցանէր օրինաց թագաւորին: Բերեալ էր և յարքունուստ բաղմութիւն կարասուոյ, և միում միում կաշառ գաղտ խթէր ի պատճառս պարզի և պատուոյ. և բազում նենգութեամբ զանմեղ մարդիկ հրապուրէր և յինքն արկանէր:

Իսկ զայս ամենայն իբրև տեսին սուրբ եպիսկոպոսուքն, ևս քաջ զրգեալ յորդորեցան ի նոյն միաբանութիւն. և հնարադէտ իմաստութեամբ ընդ երկուս բաժանեցին զբանակն: Մա-

նաւանդ իբրև հաստատեալ գիտացին ի միտս իւրեանց՝ եթէ անօրէն իշխանն Սիւնեաց զօրհասական վէրսն ի յոգիսն ընկալեալ էր, խորշեցան մերժեցան և ի բաց փախեան ի նմանէ:

Սորհուրդ արարեալ ի զիշերի միում ամենայն ուխտին բազմութեամբ կոչեցին և զսպարապեան զօրաց ի խորհուրդն, հարցին և քննեցին և ի վերայ հասին մտացն անշարժութեան, որոյ ոչ և առ սակաւ մի թերացեալ էր ի սիրոյն Գրիստոսի: Եւ միաբան աղօթս արարեալ ի վերայ նորա, վերստին ընկալան զնա յառաքինութիւն: Եւ նովաւ որսացեալ զբազումս ի նոյն միաբանութիւն՝ որք ոչ էին քակեալ յառաջին միաբանութենէն, եկին և ժողովեցան զունդ զօրաց բազմաց: Եւ ևս առաւել հեռադոյն գատան ի մոզացն և ի մոզպետէն և յանօրինէն Վասակայ:

Իսկ նա այնչափ յիմարեցոյց և ամիշեցոյց զմիտս մոզպետին, մինչև չեա նմա իմանալ զիս իրացն: Սկսաւ բաշխել մոզս ի տունս նախարարացն և մեծամեծ ոռճիկս կարգել, զո՛նել պատրուճակս, և բռնաբար կնքաւոր մարդկանն տալ ուտել միս յազածոյ, և երկիր պագանել արեգականն: Իբրև սկսաւ բազմանալ ընդ ամենայն աշխարհն այնպիսի պղծագործ խառնակութիւն, յանդգնեցան և ևս կանայք փշտիպանացն յաւուր կիւրակէի անցուցանել զճրագունս եկեղեց-

ւոյն և պատառել զհանդերձս հաւատաւոր կահանցն:

Չայս զուժկան ազմկի իբրև տեսին միաբան սուրբ եպիսկոպոսունքն, զաւետարանն ի ձեռն առեալ հասին և անկան առանց հարցանելոյ ի վանս սպարապետին, ուր ժողովեալ էին զօրքն Հայոց:

Համբարձին զձայնս իւրեանց և ասեն. «Ազաչեմք զձեզ զամենեսեան սուրբ աւետարանաւս. եթէ ձերով խորհրդիւ գործէ զայն անօրէնութեան չարիս մարդպանն և մոզպետն, նախ զմեր պարանոցս հատէք, և ապա յեկեղեցին ձեռնարկեցէք: Ապա թէ առանց ձեր կամաց նորա զայն չարն գործեն, այսօր խնդրեսցի վրէժդ այդ ի նոցանէ»:

Իսկ որք էին ի ներքս ի վանս սպարապետին՝ յոտն կացին, միաբան համբարձին զձայնս իւրեանց առ Աստուած և ասեն. «Դու Տէր սրբաագէտ ամենեցուն, ոչ ինչ պիտի քեզ վկայութիւն ի մարդկանէ. եթէ խտորեալ իցեմք ի քէն սրաի մտօք, զայն դու ինքնին քաջ գիտես. այսօր իսկ դատես զմեզ ըստ մեզաց մերոց. ապա եթէ հաստատուն կամք յուխտի սուրբ աւետարանիս, դու Տէր լեր մեր օգնական այսօր, և տուր զթշնամիսն ճշմարտութեան ի ձեռս մեր, զի արասցուք ընդ նոսա ըստ կամաց քոց սրբոց»:

Չայս իբրև ասացին, ամենեքեան զգլուխ զգետնի հարկանէին, և ողջունեցան յաւետարա-

նէն և յեպիսկոպոսացն:

Իսկ մի ոմն ի նախարարացն սր անդր զիպեցաւ, էր ի նոցա խորհրդի, և ոչ միաբանեաց ընդ նոսա ի մեծ վկայութիւնն. և անդէն առ ժամայն ի նոցունց ի տեղուջն քարկոծեցաւ, և ահ մեծ անկաւ ի վերայ ամենեցուն:

Յայնժամ ամենեքեան ի նախանձ բարկութեան բրդեցան, մինչև ամենայն տեսողացն երկիւմունքն դողային, որք առ ոչ ինչ համարեցան զպարգևս արքունի, և առ ոտնհարին զհրամանս անաղինս: Ընթացան վաղվաղակի ի զհնս իւրեանց, վառեցան կազմեցան զգիշերն ամենայն, և ընդ ծագել արեգականն զգունդն յերկս մասունս բաժանեալ ի բանակն արկանէին: Գունդն առաջին յարևելից կուսէ, և գունդն երրորդ ի հիւսիսոյ կողմանէ, և գունդն երրորդ ի փակեցին զբազմութիւն բանակին. և զբազումս կոտորեցին, և զևս բազմագոյնս կապեցին զերևելի մարդիկ, և արկին ի բերդս ամուրս ընդ իւրեանց իշխանութեամբ: Եւ զառ և զապուռ զաւար բանակին ի մի վայր ժողովեալ պահէին իբր հրամանաւ արքունի:

Իսկ զմարզպանն ձերբակալ արարեալ, և միաբանէր ընդ նոսա երդմամբ՝ հաստատուն կալ յուխտին, զղջանայր զառաջին քակումն ի նոցանէ: Անկանէր ապաշխարութեամբ յոտս սուրբ

եպիսկոպոսացն, և աղաչէր խաղապատելով՝ զի մի մերժեալ ընկեսցի առ ի նոցանէ: Կրկնէր և երեքկնէր զանսուտ երդումն առաջի բազմութեանն ի սուրբ աւետարանն, զրէր և կնքէր զերդումն և կապէր զաւետարանէն. և աղաչէր՝ զի յԱստուծոյ խնդրեսցի վրէժխնդրութիւնն, և մի նոքա մարդկաբար սատակեսցեն զնա:

Իսկ նոքա թէպէտ և հաստատեալ զիտէին զնենգութիւն կեղծաւորութեանն նորա, և եթէ խաբէութեամբ դառնայ անդրէն ի հին մոլորութիւնն, ոչ ինչ փոյթ առնէին ձեռն արկանել ի նա վասն առաջին յանցանացն, այլ սուրբ աւետարանին թողին ի դատապարտութիւն:

Իսկ որք եկեալ էին յաւարի առնուլ զսուրբ զանձն եկեղեցւոյն, ակամայ եղին զանձինս և զաւար իւրեանց առաջի սուրբ եպիսկոպոսացն և ամենայն զօրացն. և եղծեալ ապականեցաւ հրաման թագաւորին: Եւ յաջողեալք զօրութեամբն Աստուծոյ՝ աղաղակէին և ասէին զօհանայով արք և կանայք և ամենայն ռամիկ բազմութիւնն. «Պատրաստ եմք ի հալածանս և ի մահ և յամենայն նեղութիւնս և ի չարչարանս վասն սուրբ եկեղեցեաց զոր աւանդեցին հարքն մեր առաջինք՝ զօրութեամբ զալստեան Տեառն մերոյ Յիսուսի Քրիստոսի, որով վերստին ծնաք ի մի յոյս հաւատոցն մկրտութեամբ ի Քրիստոս Յիսուս, ըստ նմին նմանութեան կամիմք չարչա-

բանօք և՛ արեամբ նորոգել զանձինն: Քանզի հայր մեր զսուրբ աւետարանն գիտեմք, և մայր՝ զառաքելական եկեղեցի կաթողիկէ: մի ոք չար անջրպետ ի մէջ անկեալ՝ զմեզ քակեսցէ ի սմանէ»:

Ոչ երևէր այնուհետև առաւել տէրն քան զծառայ, և ոչ ազատ փափկացեալ քան զգեղջուկ վշտացեալ, և ոչ ոք քան զոք նուազեալ յարութենէ: Մի սիրտ յօժարութեան ամենեցուն արանց և կանանց, ծերոց և տղայոց և ամենայն միաբանելոց ի Քրիստոս: Քանզի առ հասարակ զմի զինուորութիւն զինուորեցան և զմի ազան զրահս հաւատոց պատուիրանին Քրիստոսի. միով գօտեաւ ճշմարտութեան պնդեցին զմէջս արք և կանայք:

Ընկեցեալ կայր այնուհետև ոսկի, և ոչ ոք առնոյր իւր առանձինն արծաթ, և արհամարհեալ առանց ազահութեան, անարգեալ պատուական հանդերձք առ ի զարդս մեծարանաց: Նա՛ իւրաքանչիւր ստացուածք ոչ ինչ համարէին յաչս իւրեանց ստացողին: Տեսանէին զանձինս իւրեանց իբրև զմեռեալ դիակունս, և զիւրաքանչիւր գերեզմանս ինքեանք փորէին, և կեանք իւրեանց ի մահ համարեալ էին, և մահ իւրեանց անշուշտ կեանք:

Բայց այս բարբառ ստէպ ստէպ ընթանայր. «Քաջութեամբ միայն մեռցուք, զանուն և զողիս և եթ ժառանգեսցուք, զի կենդանի իցէ ի մեզ Քրիստոս, որում դիւրին է միւսանգամ նո-

րոգել զմեզ ի հողոյ և զամենայն զյառաջագոյն զննջեցեալսն, և հասուցանել իւրաքանչիւր ըստ գործս իւրեանց»:

Չայս և առաւել քան զսոյնս խօսելով, և մխիթարելով զանձինս և զմիմեանս, դարձեալ միւսանգամ զինուորքն պատրաստեցին զզէնս իւրեանց, և աղօթականքն անդադար լինէին յաղօթան իւրեանց, և պահողքն ճգնէին ի պահս իւրեանց: Չայնք պաշտօնէիցն ի տուէ և ի գիշերի անհատ էին ի սուրբ սաղմոսան. ընթերցուածք աստուածային կտակարանացն ոչ երբէք առնուին դադարումս յամենայն ժամ. սոյնպէս, և մեկնիչքն ի մխիթարութիւն երկնաւոր վարդապետութեանն:

Յայնմ ժամանակի դարձեալ յարձակեցան ի վերայ բերդիցն և առանաց, զոր ունէին Պարսիկքն ի տեղիս տեղիս, յամրոցս աշխարհին. տապալէին քանդէին զբնակութիւնս նոցա: Առաջին զմեծն Արտաշատ հանդերձ առանօք իւրովք. և առնուին զանմատոյց ամուրսն, զԳառնիքաղաքն, զԱնին, զԱրտագերս, և զաւանս իւրեանց. զԵրկայնորդսն և զԱրհնին, և զաւանս իւրեանց. զԲարձրաբուղն, զՍորանիստն, զՄխանիստն, զանկասկածելի Ողականն, և ընդ նոսա և զաւանս իւրեանց. զԱրփանեալն, զՎանն աւան, ընդ նմին և զաւանսն իւր. զԳուեալն և զԿապոյտն, զՈրոտն և զՎասակաշատն:

Չամենեսին զայս իւրաքանչիւր գեղիւք և ագարակօք, զօրօք և զօրագլխօք ի նմին ամի առեալ տապալեցին, և ի գերութիւն վարեցին զարս և զկանայս ընչիւք և ստացուածովք. հանդերձ պատուական գանձիւք և նոցին սպասուք: Տապալէին քանդէին զշինուածս նոցա, և այրէին կիզուին զտունս պաշտօնարկի և պաշտաման կրակի: Սրբէին զպղծութիւն կռապաշտութեանցն, և առնուին զկահ և զկագմածս ատրուշանացն, բերէին և զնէին ի սուրբ եկեղեցւոջն, և ի ձեռն սուրբ քահանայիցն նուիրէին ի սպաս տէրունական սեղանոյն: Եւ փոխանակ սնոտի պաշտամանցն, զոր տապալեցին յամենայն տեղիս հեթանոսացն, զփրկական խաչն Քրիստոսի կանգնէին. զամենասուրբ սեղանն ուղղէին, և զկենդանարար խորհուրդն կատարէին սրբութեամբ. պաշտօնեայս և քահանայս ի տեղւոջն կացուցանէին: Յուսով հաստատեալ խնդայր ամենայն երկիրն առ հասարակ:

Եւ մինչդեռ յայսմ մեծի առաքինութեան կատարեալ զործէին զգործ նահատակութեանն, երևէր իմն ի վերայ ամենեցուն աստուածային շնորհք. քանզի առանց հրամանի ի զօրացն Հայոց, յարևելից կողմանէ աշխարհին, յարձակեցան ոմանք յԱտրպատական աշխարհն, և ի տեղիս տեղիս բազում վնաս արարին՝ առնելով և աւերելով քանդելով զբազում ատրուշանս:

Իսկ որ ի մեծ ամուրսն անկանէին՝ խաչանշան արարեալ՝ ի վերայ զօրուն յարձակէին. որ և երկու մեծամեծ բերդացն պարսիսպն առանց ուրուք մերձենալոյ անկեալ կործանեցան. մինչև ամենայն բնակչաց երկրին զահի հարեալ ի մեծ նշանէն, ինքեանք ինքեանց ձեռօք զկրակատունս այրէին. ուրանալով զօրէնս մոզութեանն՝ խոստովանէին ի սուրբ աւետարանն:

Եւ այլ մեծամեծ աշողութիւնք կատարէին ի ձեռն զօրականին. քանզի ուր ոչ էր ակնկալութիւն եթէ գանուն Աստուծոյ ոք յիշեսցէ՝ արհաւիրք մեծ անկանէին ի վերայ նոցա, և ամենայն մարդ պատմէր ընկերի իւրում տեսիլս նորս և զարմանալիս: Սոյնպէս և աստեղքի յերկինս երևէին յոյժ լուսալիր պայծառացեալ, զոր ոչ ունէին յառաջին բնութեանն: Եւ ամենայն տղայք աշխարհին իբրև զարս պատերազմողս խիզախէին:

Եւ անա յետ աւուրց բազմաց եկն Եհաս հազարապետն Ազուանից սուրբ եպիսկոպոսաւ աշխարհին, մեծաւ տաղնապաւ փութացուցանէր զզօրսն ասելով. «Գունդն Պարսից որ էր ի կողմանս աշխարհին Հոնաց՝ զարձաւ այսրէն, եկն եմուտ յաշխարհս մեր. և բազում ևս և այլ այրուծի որ ի դրանէ եկն: Եւ թող զայս ամենայն, այլ և երեք հարեւր մոզ վարդապետ ածեալ ընդ իւրեանս, պառակտեցին զաշխարհն, եւ զոմանս

ոմանս յինքեանս արկին, և կամէին յեկեղեցին ձեռն արկանել. և հրամանաւ թագաւորին ստիպէին զամենեսեան և սաէին. «Եթէ կամօք յանձն առնուք զօրէնան, պարգևս և պատիւս զտանէք ի նմանէ, և թողութիւն հարկացն յարքունուստ լիցի ձեզ, ապա թէ կամօք չառնէք, հրաման ունիմք ի գեօղս և ի քաղաքս շինել ատրուշանս, և զվաճական կրակն ի ներքս դնել, և կացուցանել մոզս և մոզպետս օրէնսդիր ամենայն աշխարհիդ: Եւ եթէ ստամբակեալ ոք ընդդէմ դարձցի, ինքն մահու պատուհաս ընդունի, և կին և որդիք այնպիսուոյն անաշխարհիկ եղեալ՝ յարքունիս երթիցեն»:

Իսկ զունդն Հայոց իբրև լուաւ դայս գոյժ դառնութեան, ոչ ինչ թուլացեալ լքան ի քաջութենէն. այլ դարձեալ համազունդ ժողով լինէր ամենայն աշխարհին վասն գուժաբեր հրեշտակացն որ հասին առ նոսա: Եւ միաբան քաջալերս տուեալ՝ արձակեցին զնոսա, զի առ ժամանակ մի պատիր խաբէութեամբ զնոսա կալցեն, զի խափանեսցին ի չար կամացն՝ չձեռնարկել ի սուրբ ուխտ եկեղեցւոյն իւրեանց. և զօրութեամբն Աստուծոյ խորհուրդ ի մէջ առեալ՝ իրացն հնարիւք ելս խնդրէին:

Յայնմ ժամանակի զմի ոմն ի մեծ նախարարացն ի տոհմէն Գնունեաց՝ Ատոմ, ճեպով առաքեցին յերկիրն արևմտից, ցուցանել զայս ա-

մենայն խորհուրդ զչարիմաց թագաւորին արեւելից, միանգամայն և պատմել զիւրեանց քաջութիւն արութեանցն—զոր գործովք կատարեցին՝ առ ոտն հարկանելով զհրամանն անեղ, և մեծապէս սատակումն ի վերայ մոզացն հասուցանելով—ինչորել ի նմանէ օգնականութիւն սատարութեան, և եթէ նա կամեսցի՝ նմա իսկ մտանել ի ծառայութիւն:

Եւ այս է պատճէն հրովարտակին զոր զրեցին առ Թէոդոս կայսր.

«ՅՈՒՎԱՅՓ եպիսկոպոս բազում եպիսկոպոսակցօք իմովք և ամենայն զօրօք Հայոց, Վասակ մարզպան և Ներշապուն Ռմբոսեան հանդերձ Սպարապետաւս Վարդանաւ և ամենայն մեծամեծ նախարարօքս, առ մեծանունդ Թէոդոս կայսր, բազմացի ողջոյն մեր առ քեզ և ամենայն զօրաց քոց, որ խաղաղասէր մարդասիրութեամբ ձերով ախրէք ծովու և ցամաքի, և չիք ոք յերկրաւորացս՝ որ ձերում անարգել սէրութեանդ ընդդէմ դառնայցէ:

«Որպէս մեր իսկ ունիմք զանսուտ յիշատակարանան զառաքինի նախնեացն ձերոց, ունելով զՆերոպէ՝ անցին և ախրեցին և Ասիացւոց կողմանցն ի սահմանացն Սերայ մինչև ի կողմանս Գաղերովի, և ոչ ոք զտաւ ստամբակեալ

և ելանել ըստ ձեռն նոցա:

«Եւ յայնչափ մեծ իշխանութեան՝ Դաստակերա մեծ և սիրելի զՀայոց աշխարհս անուանէին: Վասն որոյ և նախնին մեր Տրդատիոս յիշելով զառաջին սէրն ձեր, որ ի տղայութեան փախուցեալ ի հայրասպան մարդախողխող հօրեղբարցն իւրոց՝ ապրեալ սնաւ յերկրիդ Յունաց, և ի ձէնջ թագաւորեալ տիրէր հայրենի աշխարհիս, սոյնպէս և զհաւատն որ ի Քրիստոս՝ ընկալեալ ի սուրբ եպիսկոպոսէն Հռովմայ, լուսաւորեաց զխաւարային կողմանս հիւսիսոյ, զոր և այժմ կամին ի մէնջ կորդել հանել խաւարասէր որդիքն արևելից:

«Եւ մեք ի ձեր քաջութիւն արութեանդ խիզախեալ, էր ինչ որ ընդդէմ դարձաք նոցա հրամանացն, և բազում այն է որ արդարաձիպատրաստեալ եմք: Ընտրեցաք զմահ աստուածպաշտութեամբ քան զկեանս ուրացութեամբ. եթէ դուք ես ի ձեռն առջիք զմեզ, ահա կրկին կենաց դիպեցաք, և ոչ մի անգամ մահու: Եւ եթէ սակաւիկ մի հեղգայք, գուցէ բազում և այլ աշխարհաց հասանիցէ տապ բոցոյ սորա»:

Եւ իբրև յանդիման եղեն մեծի թագաւորին, և ընթերցան զգիր պաղատանաց Հայոց աշխարհին և զյիշատակարանս նախնեացն, բազում մատեանք ի մէջ եկեալ ընթերցան՝ որ զնոյն ուխտ հաստատութեան ի ներքս գտանէին:

Եւ մինչդեռ երանելին թէոզոս հարցանէր զամենայն սինկղիստոսն, և հնարս իրացն կամէր գտանել խաղաղութեամբ, և հոգ տանէր մեծաւ յօժարութեամբ՝ զի մի եկեղեցիքն արևելից յափշտակեսցին յանօրէն հեթանոսացն, ի նմին ժամանակի անդէն վաղվաղակի հասանէր վախճան կատարածի կենաց նորա, և կարի չարխափանումն լինէր զործոյն օգնականութեան:

Եւ թագաւորէ փոխանակ նորա Մարկիանոս կայսր, և ի ձեռն վատթար արանց խրատուացն իւրոց ծառայից, Անատոլեայ՝ որ սպարապետն էր, և Փղորենտիոս ասորի, երկօքեան անարդք և վատթար արանց, միանգամայն և անաստուածք, ի նոցա բանս ելեալ թագաւորն, ոչ կամէր անսալ միաբան ուխտին Հայոց, որ ամենայն ուժովն իւրեանց ընդդէմ կացեալ էին չարութեանն հեթանոսաց: Իսկ անարիս այս լաւ համարէր պահել զուխտն հեթանոսաց վասն մարմնական խաղաղութեան՝ քան պատերազմակից լինել ուխտին քրիստոնէութեան: Վասն այսորիկ փութացաւ արձակեաց դեսպանս առ թագաւորն Պարսից զնոյն Փղորենտիոսն, և եմուտ ընդ նմա յուխտ հաստատութեան՝ ձեռնթափ լինել ի զօրացն Հայոց զօրու և զինու և ամենայն օգնականութեամբ:

Եւ իբրև այսպէս հաստատեցաւ, և հատու օգնականութիւն յուսոյ նոցա ի մարդկանէ, դար-

ձեռք սուրբ եպիսկոպոսքն քաջալերել սկսան գանձինս և զօրսն Հայոց: Թէպէտ և հայէին յիւրեանց սակաւութիւնն և յերկոցունց թագաւորացն միաբանութիւն, ոչ ինչ վատասրտեալ դողային, այլ ըստ առաջին ուխտին խիզախէին և ասէին. «Պատրաստ եմք ի սպանանել և ի մեռանել զիւրին է Սատուծոյ սակաւութիւնը զբազմաց գործ գործել, և անարգօք զմեծամեծ իրս կատարել»: Թէպէտ և ոչ ունէին թագաւոր առաջնորդ, և ոչ արտաքուստ օգնական զոր յօտարաց, սակայն անձանց առաքինութեամբ և սուրբ վարդապետացն մխիթարութեամբ՝ համագունդամենայն նախարարքն զօրօքն իւրեանց յիւրաքանչիւր տանէ ի մի վայր գային հասանէին վազվազակիբազում և այլ այրուծի՝ որ յարքունի տանէ անտի էր:

Եւ գամենայն զօրսն յերիս գունդս բաժանեցին:

Զգունդն առաջին տային ցնեքշապուհ Ռբմբոսեան, և գումարէին զնա պահապան աշխարհին, մերձ ի սահմանս Ատրպատական աշխարհին:

Եւ զգունդն երկրորդ տային ի ձեռն Վարդանայ զօրավարին Հայոց՝ անցանել ընդ սահմանս Վրաց ի վերայ մարգապանին Ճորայ, որ եկեալ էր աւերել զեկեղեցիսն Աղուանից:

Իսկ զգունդն երրորդ տային ի ձեռս Վասակայ իշխանին Սիւնեաց, որ ոչ ի բաց կացեալ

էր յուխտէն հեթանոսաց ըստ ներքին խորհրդոցն իւրոց:

Ընտրեաց և առ նա ընդ իւր՝ զորոց զիտէր զթուլութիւն հաւատոց նոցա.

Զիշխանն Բագրատունեաց զօրօք իւրովք:

Զիշխանն Խորխոռունեաց զօրօք իւրովք:

Զիշխանն Սպահունեաց զօրօք իւրովք:

Զիշխանն Վահեւունեաց զօրօքն իւրովք:

Զիշխանն Պալունեաց զօրօքն իւրովք:

Զիշխանն Գարեղենից զօրօք իւրովք:

Զիշխանն Ուրծայ զօրօքն իւրովք:

Եւ զայլ բազում զօրս յարքունի տանէն արկ յինքն, և զսեպուհս ոմանս յայլմէ տոհմէ: Եւ խորամանկ խարէութեամբ զարանամուտ լինէր յամուրս իւրոյ աշխարհին, ի պատճառս կեղծաւորութեան՝ եթէ ընդ ճապուկ անդր անցանէ ի վերայ գնդին Պարսից՝ հալածականս առնել յաշխարհէն Աղուանից:

Իսկ նա յամրածածուկ հաւարոցէն ձեպով դեսպանս արձակէր առ գունդն Պարսից. «Ահա աւագիկ քակեցի զմիաբանութիւն ուխտին Հայոց, և ընդ երիս կողմանս գունդս գունդս քակեալ բաժանեցի: Զգունդն առաջին հեռացուցի ի կողմանս Հերայ և Զարեանդայ, և գունդս երկրորդ ընդ իմով ձեռամբ է, սրոց ոչ ինչ տամ

Քիսա առնել զօրաց արքունի: Եւ զայլ ամենայն որ այր կռուոյ յաշխարհի աստ գտանէր՝ ցանեցի ցրուեցի ընդ ամենայն միջոցս աշխարհիս: Բայց զգունդն երրորդ արարի ընդ Վարդանայ Մղուանս՝ սակաւաձեռն և ոչ բազմաթիւ: Ե՛լ համարձակ ընդ առաջ նորա, և մի զանգիտեր ամենեկին տալ պատերազմ. գիտեմ զի ի պարտութիւն մասնին սառալի քոյոյ մեծի զօրութեանդ»:

Զայս գրեաց և եցոյց մարդպանին՝ որուժ անունն էր Սեբուխտ: Իսկ նա իբրև լուաւ զայս ամենայն զքաջալերս ի Վասակայ, և ստուգեալ հաստատեաց ի միտս իւր՝ եթէ սակաւաձեռն գնդաւ գայ սպարապետն Հայոց ի վերայ նորա, ոչ եկաց մնաց ի կողմանս Ճորայ. այլ կուտեաց զամենայն բազմութիւն զօրու իւրոյ, և փութանալի անցանէր ընդ մեծ գետն Կուր անուն. և պատահէր նմա մերձ ի սահմանս Վրաց հանդէպ Խաղխաղ քաղաքի, որ ձմերոց էր թագաւորացն Մղուանից: Անցանէր բաւանդակէր ամենայն զօրօք իւրովք. ուզմ արարեալ զբոլոր մեծութիւն զաշտին ի ներքս փակէր. զինեալք և վառեալք ամենայն պատրաստութեամբ ի մարտ պատերազմի ընդդէմ գնդին Հայոց:

Իսկ քաջն Վարդան և ամենայն զօրքն որ ընդ նմա էին՝ իբրև տեսին զբազմութիւն պատրաստութեան գնդին հեթանոսաց, հայեցան և յիւրեանց սակաւութիւնն. թէպէտ և կարի յոյժ

նուագունք էին քան զնոսա, ոչ ինչ զանգիտեցին առ ի յոյժ բազմութենէն, այլ հասարակ միաբան համարարձին յերկինս զձեռս իւրեանց, աղաղակէին և ասէին.

«Դատեա, Տէր, զայնոսիկ ոյք դատին զմեզ. մարտիր ընդ այնոսիկ որ մարտնչինս ընդ մեզ. զինու և սսպարաւ քով օգնեա մեզ: Շարժեա և դողացո զգունդագունդ բազմութիւն անօրինացս. ցրուեա և վատնեա զչար միաբանութիւն թշնամեաց քոց առաջի քոյոյ փրկական մեծի նշանիս, և տուր ի ձեռն սակաւուցս զքաջութիւն յազթութեան ի վերայ անհարին բազմութեանս: Ոչ ի պարծանս սնտոի փառասիրութեան անօգուտ վաստակոց ինչ աղաչեմք, կամ յազահութիւն ընչասիրութեան զանցաւոր մեծութիւն կապտելոյ, այլ զի ծանիցեն և գիտասցեն ամենեքեան այնօքիկ որ ոչն հնազանդին սուրբ աւետարանին քարոզութեան, եթէ դու ես Տէր կենաց և մահու, և ի ձեռն քո է յազթութիւն և պարտութիւն: Եւ մեք պատրաստ եմք ի մեռանել վասն քո սիրոյդ. և եթէ սպանանել ևս հասանէ զնոսա, ոչ եթէ մեզ ինչ, այլ ճշմարտութեանն եղիցուք վրէժխնդիրք»:

Եւ զայս ասելով՝ խումբ արարեալ յարձակէին, և զաջ թին բեկեալ՝ զձախոյ կողմամբն արկեալ, սրոյ ճարակ զամենեսեան տային ընդ երեսս զաշտին, և փախստական առնէին մինչև

յամուր տեղիս մայրեացն առ խորագոյն դարիւքն  
 Լոփնաս գետոյ: Ուր ընդդէմ դարձեալ թագա-  
 ւորագանց ոմանց Բաղասական արքայի, ընկեցին  
 զոմն ի ձիոյ ի նախարարացն Հայոց. ի գնդէն Դիմաք-  
 սենից զՄուշ սպանին, և զԳազրիկ վիրաւորեցին:

Յայնմ տեղուջ դէտ ակն ի վերամբառնայր  
 Արշաւիր Արշարունի, գոչէր առիւծաբար և յար-  
 ձակէր վարագաբար, հարկանէր և սատակէր  
 զՎուրկն քաջ զեղբայր թագաւորին Լփնաց, և  
 զբազում համհարզս նորին ընդ նմին սատակէր:  
 Եւ այնպէս ամենեքեան առհասարակ այր զա-  
 խոյեան իւր յերկիր կործանէր: Եւ առ յոյժ  
 յանդուզն յարձակմանն յոլովագոյն այն էր զոր  
 գետամոյնս առնէին քան զանկեալսն սրոյ ի ցա-  
 մաքի: Եւ ի բազմութենէ դիականցն անկելոց՝  
 յստակ ջուրք գետոյն յարիւն դառնային, և ոչ  
 գտանէր ոք ամենեկին ի նոցանէ ապրեալ և թա-  
 գուցեալ յանտառախիտ մայրիս դաշտացն: Բայց  
 մի ոմն ի զօրականէ թշնամեացն՝ զինու հանդերձ  
 ելեալ ի նիւս երիվարին անցանէր ընդ մեծ  
 գետն, մաղապուր պրծեալ ի պատերազմէն՝ զոյժ  
 տանէր ի մնացեալ բուն բանակն, որք փախս-  
 տական անկանէին ի մեծ շահաստանն:

Յայնմ ժամանակի զօրքն Հայոց կատարե-  
 լով զմեծ գործ պատերազմին՝ ի դիակապուտս  
 դառնային, ժողովէին զբազում աւար բանակին,  
 և կողոպտէին զանկեալ դիակունսն. և կուտէին

բազում արծաթ և ոսկի, զգէնս և զգարզս զարի  
 արանց և զքաջ երիվարաց:

Դարձեալ յարձակէին ոչ սակաւ քաջու-  
 թեամբ ի վերայ բերդիցն և քաղաքաց զոր ու-  
 նէին Պարսիկքն յաշխարհին Աղուանից, հզօրա-  
 պէս մարտնչելով և այրելով զամուրս արգելա-  
 նաց նոցա, և զերամս երամս մոզացն—զոր պատ-  
 րաստական ածեալ աշխարհին գայթակղութիւն—  
 ուր և գտանէին յամուրս ամուրս վայրացն, սրոյ  
 ճարակ տուեալ՝ դնէին գէշ թռչնոց երկնից և  
 զազանաց երկրի: Սրբէին զտեղիսն յամենայն  
 պղծագործ զոհիցն, և փրկեալ ազատէին զեկե-  
 ղեցիսն յանհնարին նեղութենէն:

Եւ բազումք ի նախարարացն Աղուանից և  
 յամենայն շինականացն, որք վասն անուանն  
 Աստուծոյ ցրուեալ և վատնեալ էին յամուրս լե-  
 բանց Կապկոհի, իբրև տեսին զաջողութիւն գոր-  
 ծոյն զոր կատարէր Աստուած ի ձեռն գնդին  
 Հայոց, գային ժողովէին և նոքա, և խառնէին  
 ի զօրս նոցա. և միաբանք և հաւասարք կցորդք  
 լինէին գործոյն նահատակութեան: Խաղային  
 դնային այնուհետև ի վերայ պահակին Հոնաց,  
 զոր ունէին բռնութեամբ Պարսիկքն. առնուին  
 քանդէին զպահակն, և կոտորէին զզօրսն որ ի  
 ներքս բնակեալ էին, և զզուռնն տային ի ձեռն  
 Վահանայ՝ որ էր յազգէ թագաւորացն Աղուա-  
 նից: Եւ յայսր ամենայն քաջութեան վերայ ոչ

ոք անկեալ վիրաւորեցաւ ամենեկին ի նոցանէ, բայց ի միոյ երանելոյ որ կատարեցաւ նահատակութեամբ ի մեծ պատերազմին:

Եւ անդէն ի նմին տեղոջ զայրն որում զդուռնն յանձն արարին՝ զնոյն զեսպան արձակեցին յաշխարհն Հոնաց, և ի բազում յայլազգաբարբարոսաց որ համագործքն էին Հոնաց աշխարհին, բանս զնեյ ընդ նոսա և ուխտ հաստատել՝ անքակութեամբ ունել զմիաբանութիւնն: Իսկ նոքա իբրև զայն ամենայն լուան, փութապէս վաղվաղակի հասանէին ի տեղին, և ականատեսք լինէին գործոյն յաղթութեան: Եւ ոչ ինչ յապաղեցին երդմամբ յուխտ մտանել ըստ կարգի իւրեանց օրինաց. յանձն առին և զերդումք քրիստոնէից՝ պահել ընդ նոսա հաստատութեամբ զմիաբանութիւնն:

Իսկ իբրև զայս կատարեցին և արարին իւրեանց մեծապէս հաստատութիւն, և դեռ անդէն ի տեղոջն զետեղեալ էին խաղաղութեամբ, գուժկան հասանէր յաշխարհէն Հայոց, զճակատ հարեալ և զօճիս պատառեալ վասն ապստամբին Վասակայ. այետս կացեալ յուխտէն քրիստոնէութեան և աւերեալ զբազում տեղիս Հայոց աշխարհին, մանաւանդ զձմերոցս արքունի, որ կայանք զօրացն էին, զԳառնին և զԵրամայիս և զԴրասխանակերտն՝ զմեծ Գաստակերտն, զՎարդանաշատն և զամուրն Օշական, զՓառախոտն,

զՍարդեանան, զՅուլակերտն աւան և զբերդն Արմաւրի, զԿուաշն աւան, զԱրուճն, զԱշնակն և զամենայն ոտն Արագածու, և զնահանգն Արտաշատու և զԱրտաշատն ինքնին զլիսովին, և զամենայն գեղս և զաւանս որ շուրջ զնովաւ էին, առեալ աւերեալ և հրձիգ արարեալ, և զամենեցուն ձեր զընտանիս փախուցեալ մերժեալ յիւրաքանչիւր բնակութենէ: Ձեռն արկեալ և ի սուրբ եկեղեցիսն, տարեալ և զսուրբ սպաս եկեղեցւոյն սեղանոյ. գերի վարեալ զընտանիս քահանայից, և զնոսին կապեալ և եղեալ ի բանդի. և ինքն սփռեալ տարածեալ ասպատակաւ աւերէ զբրկիրն ամենայն: Եւ զունդն որ էր ի կողմանս Ատրպատականի՝ ոչ ժամանեաց ձեռն տալ ի միջոց աշխարհին: Եւ զօրքն որ անդ մնացեալ էին՝ խոյս տուեալ յանօրինէն մերժեցան յեզր աշխարհին, և դեռ պահեն ընդ ձեզ զուխտ միաբանութեան սիրոյն Քրիստոսի: Բայց այն որ ընդ նմայն էին՝ են ոմանք որ փախեան յիւրաքանչիւր տեղիս, և բազումք այն են որ զհետ մոլորեցան նորա ամբարշտութեանն:

Չու արարեալ ի տեղոջէ անտի՝ դառնալ անդրէն յաշխարհն Հայոց մեծաւ ստիպով և բազում աւարաւ և անչափ մեծութեամբ, և անտրտում ուրախութեամբ երգս ի բերան առեալ և ասէին ձայնիւ. «Սոստովան եղերուք Տեառն, զի բարի է, զի յաւիտեան է ողորմութիւն նորա»

ո եհար զազգս մեծամեծս և սպան զիշխանս հօրս, զի բարի է, զի յաւիտեան է ողորմութիւն նորա»: Եւ զայս սաղմոս երգելով մինչև ի վախճան կատարեալ աղօթիւք փառապաշտութիւն սուրբ Երրորդութեանն մատուցանէին: Անդ յանձանձէր ածէր զօրավարն զկաց և զմնաց զօրականին առաջապահօք և վերջապահօք, կողմապահօք ողջ և առողջ հասուցեալ յաւուրս երեսուն մերձ ի սահմանս հայրենի աշխարհին:

Ազդ եղև ուրացեալն Վասակայ և իշխանացն որ ընդ նմա էին՝ քաջութիւն նահատակութեան գնդին Վարդանայ յաշխարհին Աղուանից, և միաբանութիւնն ևս Հոնաց: Մինչև յանդիման եղեալ էին միմեանց, զգիշեր մի օգնական գտեալ նորա՝ փախստեայ անկանէր յամուրս իւրոյ աշխարհին, և այնպէս տաղնապաւ մերժեցաւ. զգերի և զաւարն զոր առեալ էր յԱյրարատ գաւառէ, ահամայ զիւրն ևս ի վերայ եթող և փախեաւ:

Եւ քանզի ժամանակ ձմերայնուոյ հասեալ էր, և զոտճիկս՝ թշնամեաց գնդին հարեալ էր, ոչ կարէր գմիով տեղեաւ համագունդ զօրսն գարմանել. այլ սիռէր տարածանէր ընդ գաւառս գաւառս աշխարհին առ ի հանգիստ ձմերոցի: Պատուէր հրամանի տայր պատրաստական լինել կազմութեամբ առ ժամանակ գարնայնոյն: Եւ զսակաւս ի գնդէն յաւագ նախարարացն գործա-

կից իւր թողեալ, բոնանայր ի վերայ՝ ունելով զթագաւորանխատ տեղիսն:

Եւ գունդս գունդս արձակէր յաշխարհն Սիւնեաց, առնոյր և աւերէր զբազում գաւառս. և այնպէս ի նեղ արկանէր զնա և զամենայն զօրսն որ ընդ նմա էին, զի զէշս և զձիս մեռելոտի առ սովոյն վտանգի անխտիր ուտէին: Եւ բազում հարուածս հասուցանէին ի վերայ ուրացելոցն. մինչև ժողով սուրբ եպիսկոպոսոսցն և ամենայն ուխտ քահանայութեանն զառնապէս արտասուս իշուցանէին ի վերայ չարաչար վշտացելոցն, որ բոկ և հետի վարէին զարս և զկանայս փափկասունս, և բազում տղայք զբարի հարեալ ընկեցան յանցս ճանապարհաց:

Իրբև այս ամենայն աջողութիւն լինէր երկիւղածացն Աստուծոյ, ամենայն եպիսկոպոսունք և երէցունք պատուէր հրամանի տուեալ աշխարհին, զողջոյն ամիսն Քաղոց պահօք և աղօթիւք առնել խնդրուածս առ Աստուած, և զտօն պատերազմացն յաղթութեան խառնել ի սուրբ տօն յայտնութեանն Քրիստոսի, զի անխափան կացցէ մեծ յիշատակարանս այս ընդ աստուածային անանց տօնին:

Եւ զսոյն զայս ամենայն այցելութիւնս Աստուծոյ որ ի վերայ աշխարհին Հայոց մեծապէս երևեցաւ՝ զրէցին սուրբ եպիսկոպոսունքն և ետուն տանել յաշխարհն Յունաց ի մեծ քաղաքն

առ սուրբ ուխտ եկեղեցւոյն. զի և նորա աղօթաւ  
առնելով խնդրեացեն յԱստուծոյ, որպէս սկսաքս՝  
ի նմին և կատարեսցուք:

Եւ զոմն յառաջին կապելոցն Պարսկաց լու-  
ծեալ և ածեալ զառաջեալ նախարարացն, խո-  
սէին ընդ նմա և ցուցանէին զամենայն փասան  
որ եղև՝ կամ աշխարհացն աւերել, կամ զօրացն  
արքունի հարկանել, և կամ որ այլ իրք առաջոյ  
լինելոց էին: Եւ իբրև զայս ամենայն բովան-  
դակ ցուցին նմա, միաբան լինէր ամբաստանու-  
թիւն երկոցունց կողմանցն՝ առաքինեացն և յետս  
կացելոց. որպէս զուր և տարապարտուց նեղե-  
ցան ի հայրենի օրինացն յետս կալ, և զխա-  
բէութիւն ապստամբին Վասակայ, որպէս Հայոց  
բանիւ խաբեաց զԹագաւորն, յանձն առնուլ զմո-  
գութիւն. իբրև չէր ուրուք ընդ նմա բանս ե-  
ղեալ, նա յանձնէ սուտակասպաս լինէր:

Իբրև լիով զայս ամենայն իմացուցին, ար-  
ձակեցին զնա հրեշտակութեամբ յողերս ապա-  
բանութեան և ի հնարս հայթայթանաց, թերևս  
կարասցեն զեղբարս իւրեանց ի նեղութենէն գո-  
զանալ:

Այլ առ նա՝ անօրէնն Վասակայ գուժկանքն  
յառաջագոյն հասեալ էին, պատմել զաղէտս տա-  
րակուսանացն զոր անցուցեալ էր ընդ զօրսն ար-  
քունի. և ամենայն ամբաստանութիւնն ի սուրբ  
ուխտ եկեղեցւոյն կրթեալ էր: Քանզի այն իսկ

կամք էին անօրինին՝ եթէ զմիաբանութիւն ե-  
պիսկոպոսացն քակեսցէ ի նախարարացն. և զայս  
ոչ էր տեղեկացեալ տակաւին, եթէ հոգի և մար-  
մին բաժանիցին առ ժամանակ մի՝ դոյ տեսա-  
նել ի բնութեանս, այլ որ սիրովն Աստուծոյ  
յուխտ մտեալ է՝ այսմ անհնար է լինել:

Արդ երթեալ այրն ի տեղի ձմերոցին, պատ-  
մեաց զայս ամենայն յականջս Թագաւորին, շար-  
ժեալ դողացոյց, որ և յամենայն գօրութենէն  
պակասեալ գտաւ. մանաւանդ զի յարևելից պա-  
տերազմէն կորակոր և ոչ բարձրագլուխ էր դար-  
ձեալ: Իբրև ստուգեալ հաստատեաց ի վերջին  
հրեշտակէն որ եհաս առ նա, զամենայն փասանս  
զիւր գործոցն զխորհրդակցօքն արկանէր: Եւ ան-  
դէն շիջանէր ի բազմաբոց բորբոքմանէն. քանզի  
խցաւ բերան շար խրատուցն որ անդադար յոր-  
դորէին զնա ի գործ դառնութեան: Խոնարհեցաւ  
ի բարձր հպարտութենէն, և զվայրենացեալ սիրտն  
դարձոյց ի մարդկային բնութիւն. հայեցաւ և  
ետես զինքն լի տկարութեամբ. զիտաց եթէ զա-  
մենայն զոր կամի առնել՝ ոչ կարէ կատարել.  
Վասն այնորիկ և դադարեաց յանդուզն յարձակ-  
մանէն, և լոցոյց զմոլեգնոտաբար գոչումնն:

Եւ որ մեծածայն բարբառով որոտայր, և ևս  
ահազին հրամանօքն զհեռաւորս և զմերձաւորս  
դողացուցանէր, սկսաւ քաղցր և աղերս բանիւք  
խօսել ընդ ամենեսեան և ասել. «Զի՞նչ ինչ փասս

գործեալ է իմ, և կամ զոր յանցս յանցուցեալ կամ առ ազգս կամ առ լեզուս կամ առ անձն իւրաքանչիւր: Ո՞չ ահա բազում ուսմունք են յաշխարհիս Արեաց, և իւրաքանչիւր պաշտամունք յայտնի են. ս երբէք նեղեաց սնուցեաց դարձուցանել ի մի օրէնս մոգութեան. մանաւանդ վասն օրինաց քրիստոնէութեանն, որպէս հաստատուն և ճշմարիտ կացեալ են յիւրեանց դենին, նոյնպէս և առ մեզ լաւագոյն քան զամենայն կեշտան նոքա երեւայն են: Եւ բիժ իսկ ոչ կարէ ոք զնել ընտրեալ օրինաց նոցա. այլ զոյգ և հաւասար համարիմ զենիս մազդեզանց, որպէս և յարգեալ իսկ էին նոքա առ նախնեօքն մերովք, զոր ես ինձէն իսկ յիշեմ առ հարբն իմով՝ որ նստէր ի մեծ գահոյս յայսմ:

«Յորժամ սկսաւ անդաճել և քննել զամենայն ուսմունսս և հաստատութեամբ ի վերայ եհաս, առաւել վեհ գտանէր զօրէնս քրիստոնէից քան զամենեցուն. վասն այսորիկ մեծարեալք ելանէին ի Դրան արքունի, և առատաձեռնս պարգեօք երահք լինէին ի նմանէ, և համարձակութեամբ շրջէին ընդ ամենայն երկիր: Նա և որ գլխաւորքն էին քրիստոնէից, զոր և եպիսկոպոսս անուանեն, ընծայից և պատարագաց արժանիս առնէր զնոսա՝ իբր հաւատարիմ ոստիկանս: Յանձն առնէր նոցա զհեռաւոր մարդսն, և ոչ երբէք սխալ լինէր ի մեծամեծ իրացն արքունի:

«Եւ դուք զմի գայն երբէք ոչ յիշեցէք, այլ հանապազօր ձանձրացուցէք զսելիս իմ, խօսելով զնոցանէ զամենայն չարութիւն: Տեսէք զի ետուք գործել ինձ զոր ինչ ոչ կամէի, և եղեն վրասք մեծամեծք ի սանմանսն ի մէջ երկուց անհաշտ թշնամեաց: Եւ մեք դեռ ի հեռաւոր ձանապարհի, և ոչ մի ինչ գործ ի պատերազմիս ի գլուխ երթեալ, և դուք աստէն յիմուժ տանս յարուցէք ի վերայ պատերազմ՝ որոյ չարագոյն ևս լինելոց է կատարածն իւր քան զարտաքին թշնամեացն»:

Զայս ամենայն և առաւել քան զսոսէր ընդ ամենայն աւազանին, և զվրասս յանցանացն արկանէր զմոգպետաւն և զմոգօքն: Եւ ամենայն վզուրկքն և պատուական նախարարք— որ նստէին յատենին և ունին զնէին յեղյեղուկ լեզուի նորա— ամաչեցեալ կորանային և ընդ երկիր պշնուին, և զգլուխ ի վեր ոչ կարէին համբառնալ:

Բայց սակաւք ի նոցանէ զմիտս հաճելով՝ ասէին զայս. «Այս, արքայ քաջ, արքայից արքայ, այդ այդպէս է որպէս ասացերդ, և արդ կարես զամենայն ուղղութեամբ նուաճել. չիք ինչ այն որ ըստ քո կամսդ արտաքս կարէ ելանել. զի տուեալ է քեզ աստուածոցն, զի զամենայն զոր և կամիս՝ կարես առնել: Մի նեղեալ տագնապիր յանձն քո և հարկաներ զմիտս մեք

ամենեցուն. թերևս և դիւր իցեն հնարք իրացն կատարածի: Երկայնամիտ լեր, և համբերութեամբ թողացո մարդկանդ անդրէն զքրիստոնէութիւն, և դոքօք զստամբական ածցես ի հաւանութիւնս:

Հաճոյ թուեցան բանքն առաջի թագաւորին. և անդէն վաղվաղակի կոչէր զառաջեալ յամենայն ազգացն որ ունէին զքրիստոնէութիւնն, որ ի զօրու նորա էին, և բունաբար արգելեալ էր զնոսա, զի մի ոք իշխան լիցի յանդիման պաշտել զԱստուած: Քանզի որ ընդդէմ կացին՝ չարչարեաց. և արգել ի նոցանէ զյայտնի պաշտօնն, և ոմանց ոմանց ակամայ երկիր ետ պագանել արեղական, և նստոյց ի սուգ տրամութեան զամենայն զօրականսն. իսկ այն որ հրամայէր անդրէն համարձակութեամբ ըստ առաջին կարգին հաստատուն կալ յօրէնս քրիստոնէութեանն. իսկ որք յանցաւորքն էին՝ ոչ կամէին վաղվաղակի առանց մեծի ապաշխարութեանն դալ և խառնել ի կարգ քրիստոնէութեան, հրամայէր թագաւորն՝ զի բունի կայցին և տարցեն յեկեղեցին իւրեանց: Եւ երկցանցն համարձակէր, որպէս զհարդ և զխտիցեն՝ ըստ կարգին իւրեանց արասցեն: Եւ զհատեալ ոռճիկսն կարգէր անդրէն իւրաքանչիւր. և զարգելեալ բաղձականսն ի նոցանէ՝ ի տեղի հրամայէր մատուցանել, և հանապազորդ յարքունիս մտանել ոչ

արգելոյր զնոսա. և զամենայն որ զհարդ և կարգեալ էին յառաջագոյն՝ անդրէն յօրինէր: Խնարհէր և խօսէր ընդ նոսա սիրով ըստ առաջին սովորութեանն:

Եւ իբրև զայս ամենայն արար և կարգեաց, յանդիման նոցա թողութեան հրովարտակս առաքէր ընդ ամենայն երկիր իշխանութեան տէրութեան իւրոյ վասն քրիստոնէից:

Եթէ ի կապանս ոք կայցէ, արքունի հրամանաւ արձակեալ լիցի. և եթէ ինչք ուրուք յափշտակեալ իցեն, դարձցին անդրէն: Այնպէս և երկիրք, եթէ հայրենիք, եթէ պարզակահանք և եթէ քսակազինք, և հանեալ ուրուք իցէ, հրամայեցաք զի դարձցին:

Եւ իբրև այսմ ամենայնի զնոսա տեղեակ առնէր, խնդրէր ի նոցանէ վկայութիւն հաւատարմութեան յերկիրն Հայոց, և երդմամբ յուխտ մտանէր առաջի նոցա՝ հաստատութեամբ ամենայն մեծամեծաց իւրոց, եթէ «Ոչ ինչ յիշեցից ամենևին զքէն վրիժուցն խնդրելոյ: Որպէս ունէիք յառաջ ճշմարտութեամբ զօրէնս ձեր, այսուհետև առաւել կալարուք. բայց միայն ի ծառայութենէ մերմէ մի ելանէք»:

Չայս ամենայն զրէր և ցուցանէր յերկրին Հայոց և ի բազում յայլ աշխարհս՝ որ ունէին զօրէնս քրիստոնէութեան. և ինքն զաղտ խորամանկեալ փութացեալ դեսպանս առաքէր առ Մար-

կիանոս կայսր: Եւ իբրև ստուգեալ ճշմարտեաց՝ եթէ Հոռոմք ի բաց կացին ձեռնտու լինել քրիստոնէութեանն ոչ զօրու օգնականութեամբ և ոչ այլ իրօք, դարձեալ անդրէն ի նոյն յառաջին կարծիս մոլորութեանն շրջեցաւ: Զանյաջողութիւն իրացն ի ձեռն իւրոց պաշտօնէիցն համարէր. և այնպէս ածէր զմտաւ՝ եթէ ըստ առաջին կարծեացն կատարեցից զամենայն:

Իսկ Հայք թէպէտ և ընկալան զգիրն խարերայ ողորմաց թագաւորին, որ ի վերոյ ունէր զաւետիս կենաց և ի ներքոյ զդառնութիւն մահու, զարմացեալ էին ընդ թերի խորհուրդան. ասէին ցմիմեանս. «Քանի լիրք է խորամանկ խաբէութիւն նորա, զի երկիցս և երկցս զփորձ առեալ կշտամբեցաւ և ոչ ամաչէ: Եւ տեղեակ եղեալ մերոյ անքակ միաբանութեանս, տակաւին լրբի և լկնի. զհետ մտեալ՝ կամի զմեզ լքուցանել:

«Իսկ հաւատացո՞ւք անհաստատ հրամանի նորա. զոր բարեգործութիւն տեսաք առ ամենայն եկեղեցիս որ են յաշխարհին Պարսից: Զի որ ինքն իւր չար է, այլում բարի ոչ կարէ լինել. և որ ինքն ընդ խաւար գնայ, այլում ոչ առաջնորդէ ճշմարտութեան լուսով: Որպէս զի չիք յանիրաւութենէ արդարութիւն, այսպէս և ոչ ի ստութենէ ճշմարտութիւն, սոյնպէս և ի խոռվասէր մտաց՝ ակնկալութիւն խաղաղութեան:

«Այլ մեք ապրեալքս զօրութեամբն Աստուծոյ. և հաստատեալք հաւատովքն ի յոյն Քրիստոսի, որ եկն և էառ ի սուրբ Կուսէն զմարմին մերոյ բնութեանս և միացեալ անբաժանելի աստուածութեամբն՝ ընկալաւ զչարչարանս մերոյ մեղաց ի յիւր մարմինն, և նովին խաչեցաւ և թաղեցաւ և յարուցեալ երևեցաւ բազմաց, և վերացաւ յանդիման աշակերտացն առ Հայր իւր, և նստաւ ընդ աջմէ զօրութեանն, զսոյն հաւատամք Աստուած ճշմարիտ. և նմին ակն ունիմք, որ փառօք Հօր և զօրութեամբ զայ յարուցանել զամենայն ննջեցեալս, և նորոգել զհնութիւն արարածոց, առնել համառօտս յաւիտենից ի մէջ արդարոց և մեղաւորաց:

«Ոչ պատրիմք իբրև զտղայ, և ոչ մոլորիմք իբրև զանտեղեակս, և ոչ խաբիմք իբրև զողէտս, այլ պատրաստ եմք ամենայն փորձութեանց: Եւ աղաչեմք զԱստուած, և անուղար խնդրեմք ի բազում ողորմութենէ նորա, զի յորում սկսաք՝ ի նմին և կատարեսցուք քաջութեամբ, և ոչ վատութեամբ: Զի արդ արևելք և արևմուտք զիտացին զձեր աստուածամարտդ լինել, և զմեզ ի զուր սպանանել ի վերայ ամենայն վաստակոցն մերոց: Վկայեն մեզ երկինք երկնաւորօք և երկիր երկրաւորօք, եթէ չեմք ինչ մեղուցեալ ի միտս մեր անգամ. և ի վերայ պարգևաց և բարիս առնելոյ մեզ՝ զճշմարիտ կեանս կամիք հա-

նել ի մէնջ, որում չիք հնար, և այլ մի լիցի:  
 «Իսկ արդ հաւատասցո՞ւք անարժան բերա-  
 նոյ նորա, որ ստիպէր չարաչար յուրացութիւն,  
 և այսօր առանց մի ինչ բարիս գործելոյ լինիցի  
 նա քարոզիչ աւետեաց: Եւ որ հայրոյէրն գիբրիս-  
 տոս, և ուրացուցանէր ի նմանէ գհաւատացեալս,  
 այսօր ահամայ խոստովանութեանն ոչ կարեմք  
 վաղվադակի յանձն առնուլ: Եւ որ երդնոյրն ի  
 սնտոի պաշտամունս իւրոյ մոլորութեանն՝ ան-  
 ցուցանել զամենայն չարչարանս ընդ պաշտօ-  
 նեայս եկեղեցւոյ, արդ եկեալ զողանալով գո-  
 հութիւն մատուցանէ, և այնու կամի զամենայն  
 շարութիւն իւր ի մեզ հեղուլ: Ոչ այդմ հաւա-  
 տամք, և ոչ գտուտ հրամանդ յանձն առնումք»:  
 Իսկ նա իբրև գիտաց՝ եթէ ոչ կարեմ քա-  
 կել գհաստատութիւն միաբանելոցն, յայնժամ  
 քակեաց յինքենէ զծերն լի դառնութեամբ, յո-  
 րում հանգուցեալ էր սատանայ զօրութեամբ  
 իւրով, և բազում գործեալ էր նորա նախճիրս.  
 որոյ կերակուր կամաց իւրոց էր ի մանկութենէ  
 անարատ մարմին սրբոց, և ըմպելի անյագու-  
 թեան նորին՝ արիւն անմեղացն: Յաւելոյր ևս ի  
 վերայ շարութեան նորա և զիւր մահաբեր հրա-  
 մանն՝ գունդս գունդս յամենայն աշխարհացն  
 գումարէր ընդ նմա, և բազում երամակս փղաց  
 յղէր ընդ նմա:

Հասեալ մերձ ի սահմանս Հայոց՝ մտանէր ի  
 քաղաքն Փայտակարան, և զգօրսն ամենայն սրփ-  
 ոէր տարածանէր շուրջ զքաղաքաւն առ ի զգու-  
 շութիւն պատրաստութեան իւրոյ չարահնար  
 խորհրդոցն: Եւ յամուր որջն մտեալ հին վիշապն  
 չարաթոյն, և բազում կեղծաւորութեամբ զինքն  
 թաքուցանելով յաներկիւղութիւն, հեռաւորացն  
 ահագին ձայնիւ սաստէր. և ի մերձաւորսն իբրև  
 զօձ սողալով փչէր: Սա էր իշխան և հրամանա-  
 տար ամենայն տէրութեանն Պարօից, որում ա-  
 նուն էր Միհրնբրսեհ, և չէր ոք ամենևին՝ որ  
 իշխէր ըստ ձեռն նորա ելանել: Եւ ոչ միայն  
 մեծամեծք և փոքունք, այլ և ինքն թագաւորն  
 հրամանի բերանոյ նորա անսայր. որոյ և ձախող  
 իրացն իսկ բուռն հարեալ էր նորա:

## ԶՈՐՐՈՐԴ ՅԵՂԱՆԱԿ

### ԵՐԿՊԱՌԱԿՈՒԹԻՒՆ ԲԱԺԱՆԵԼՈՅՆ

#### Ի ՍՈՒՐԲ ՈՒԽՏԷՆ

Մինչև ցայս վայր ոչ ինչ կարի զանգիտէի պատմել զհարուածս ազգիս մերոյ՝ որ յարտաքին թշնամեացն ճշմարտութեան չարաչար յարեան ի վերայ մեր. որք սակաւագոյնք հարին զմեզ, և յոլովագոյնք հարեալ գտան ի մէջ, քանզի պե՞ն ևս միաբանք և հաւասարք էաք թէ պէտ և ոմանք ի ծածուկ ունէին զերկմտութիւն նենգութեանն, սակայն յաչս արտաքնոցն ահաւոր երևէր միաբանութիւնն. որպէս յերկուս և յերիս տեղիս ոչ կնքացին կալ առաջի:

Արդ յայսմ հետէ և անդր, ուր սպրդեալ անկանի երկայտաակութիւն ի ներքս, ընդ քակել միաբանութեանն՝ և երկխաւոր առաքինութիւնն հեռանայ, և անձնընտիրք լինելով յոյժ բազմանայ լալումն ողբոյս: Բանզի հատեալ անկան անդամքն՝ որ յառաջագոյն սորուն սուրբ մարմնոյս

էին, վասն որոյ դառնայ մարդ յարտասուս տառաջի մերձակայ դիականն. եւս առաւել լնու դառնութեամբ ի վերայ այնորիկ որ յոգի և մարմին առ հասարակ դիակնանայ: Եւ եթէ ի վերայ միոյ անձին այսպէս, սրչափ ևս առաւել ի վերայ ողջոյն ազգի միոջ:

Այլ յայսմ տեղուջ ոչ միայն ի վերայ միոյ ազգի է ողբուհնս մեր, այլ ի վերայ ազգաց և աշխարհաց. զոր և յառաջ մատուցեալ ասացից ըստ կարգի, թէպէտ և ոչ խնդութեան մտօք: Անա ակամայ նշանագրեմ զբազումս որ կորեան ի ճշմարիտ կենացն իւրեանց, և պատճառք եղեն և այլոց բազմաց կորստեանն, ոմանց՝ երեւելեացս միայն, և այլոց՝ երեւելեաց և աներևութից: Եւ այն՝ եւս չար է քան զամենայն. դուռն՝ զոր բացին կորստեան՝ Աստուծոյ միայն կարողութիւն է փակել զնա. այլ ըստ մարդկան սահման՝ ահա անցեալ է հնար:

Այս անօրէն Միհրնեքսէն, քանզի յառաջագոյն ստուգեալ գիտէր զամբարշտութիւնն Վասակայ, և յայնմ ժամանակի ևս յղէր և կոչէր զնա առ ինքն: Որպէս նորա իսկ յառաջագոյն զատեալ և որոշեալ էր ի միաբանութենէն Հայոց, եկն և յանդիման եղև. և ստուգէր զիւր հաւատարմութիւնն և զՀայոց անիրաւապատամբութիւնն: Յաւել և պատմեաց ևս առաւելաբանութեամբ զոր ինչ ոչ էր գործեալ Հայոց, և

կամէր ընտանեբար ընդ միտ մտանել անօրինին: Բայց նա թէպէտ և ի ներքոյ յոյժ դարովէր զնա, այլ արտաքին դիմօք մեծարեաց, և եղ առաջի նորա զմեծամեծ պարգևս երկրաւորս: Եւ խոստացաւ նմա իշխանութիւն աւելի քան զոր ունէրն, և հայեցոյց զնա ի կարծիս սնտախ՝ որ ի վեր էր քան զիւր տէրութիւնն. իբր թէ անկ իցէ նմա հասանել մինչ ի թագաւորական վիճակն. բայց միայն հնարս իրացն խնդրեսցէ, թէ սրպէս քակտեսցի միաբանութիւն ուխտին Հայոց, և թագաւորին կամքն կատարեսցին յաշխարհին:

Եւ իբրև յանձն էառ զամենայն ինչ՝ երթալ զկնի կամաց նորա, գիտաց և ծերն դառնացեալ եթէ թմրեալ և ցնորեալ և քակեալ է ի հաստատութենէ միաբանելոցն. յոյժ մխիթարեցաւ ի միտս իւր տրտմեալս, և ած զմտաւ՝ թէ և զամենեսեան այսպէս կարիցեմք որսալ յանգիւտ կորուստն: Եւ իւրոյ հնարագիտութեանն տայր զանիմաստութիւն առնն. և այնմ ոչ էր տեղեակ՝ թէ նա իւրովի զիւր անձն զատեալ և որոշեալ է ի սուրբ եկեղեցւոյն, հեռացեալ և օտարացեալ ի սիրոյն Քրիստոսի:

Քանզի մոռացօնք եղեն նմա գալուստ Որդւոյն Աստուծոյ, և ոչ յիշեաց զքարոզութիւն սուրբ աւետարանին. և ոչ ի սպառնալեացն զանգիտեաց, և ոչ յաւետիան մխիթարեցաւ: Ուրա-

ցաւ զաւարտանն որ յղացաւ զնա, և ոչ յիշեաց զընկալուչ սնորբ Հողին որ ծնաւ զնա: Անարգեաց զմարմինն պատուական՝ որով սրբեցաւն, և առ ոտն եհար զարիւնն կենդանի՝ որով և քաւեցաւն ի մեղաց: Զնշեաց զգիր որդէգրութեանն, և իւրովք ձեռօք խորտակեաց զհաստատուն կնիք մատանւոյն: Ել ի թո՛ւոյ երանելեացն, և ապրտամբեցոյց ընդ իւր զբազումս:

Ձեռն արկ կամակորութեամբ և եմուտ յորդէգրութիւն զիւրապաշտութեանն, և եղև աման չարին, և ելից զնա սատանայ ամենայն խորամանկութեամբ: Ի ձեռն էառ իբրև զվահան, և ազաւ զնա իբրև զգրահս, և եղև իբր զինուոր կատարեալ կամաց նորա: Մարտեաւ հնարիւք ընդ իմաստունս, և յոյժ խորագիտութեամբ ընդ զիտունս, յայտնի ընդ սնմեղս, և ի ծածուկ ընդ խորհրդականս. ձեռն էարկ և եհան զբազումս ի զնդէն Քրիստոսի, և խառնեաց ի գունդս զիւաց: Եւ ի բազում յայլ տեղիս զողաբար սողեցաւ և եմուտ իբրև զօձ ի մէջ ամրացելոցն. և խրամ հատեալ յափշտակեաց և էառ և եհան յայտնութեամբ զբազումս յազատաց և զբազմագոյնս ի շինականաց, և զայլ ոմանս յանուանեալ քահանայից:

Որոց անուանքն են այս՝ գործակցաց նորա. Իշխանն Ռըշտունեաց՝ Արտակ անուն. Իշխանն Սորխոունեաց՝ Գաղիշոյ անուն.

Իշխանն Վահեւունեաց՝ Գիւտ անուն. Իշխանն Բագրատունեաց՝ Տիրոց անուն. Իշխանն Ապահունեաց՝ Մանէճ անուն. Իշխանն Գաբեղենից՝ Արտէն անուն. Իշխանն Ակէոյ՝ Ընջուղ՝ անուն. Իշխանն Ուրծայ՝ Ներսէհ անուն. Իշխանն մեւս ևս Պալունեաց՝ Վարազշապուհ անուն.

Սեպուհ մի Ամատունեաց Մանէն անուն. Բազում և այլ ազատ մարդիկ, որ Ոստանիկան անուանեն՝ յարքունի տանէ:

Եւ բովանդակ զիւր բոլոր աշխարհն ապրտամբեցոյց յուրացութիւն, ոչ միայն ըստ աշխարհիկ բազմութեանն, այլ և զբազումս յուխտէ եկեղեցւոյն. մանաւանդ սուտ երիցամբքն՝ որով գործէր զչարիսն. երէց մի Զանգակ անուն, երէց մի Պետրոս անուն, սարկաւադ մի Սահակ անուն. զորս յղէր առ անմեղ մարդիկ, խաբէր և պատէր. սուրբ աւետարանաւն երզնուին և ասէին, եթէ «Ի թագաւորէն շնորհեսցի ամենեցունց քրիստոնէութիւնդ»: Եւ այսպէս խորամանկութեամբ հանէին զբազումս ի սուրբ միաբանութենէն, ածէին և խառնէին ի գունդս ուրացողացն:

Եւ ժողովեաց զամենայն գայթակղութիւն, և արար գունդ զորաց բազմաց. զրեաց և եցոյց զբազումս ի նոցանէ յականէ յանուանէ մեծ հա-

զարապետին, և զիւր քաջութիւնն արութեանն, մեծապէս պարծելով՝ հրպէս աշակերտեաց ի մոլորութիւնն խաբէութեան, և բաժանեալս և երկցեղս երևեցոյց զգօրսն Հայոց:

Եւ իբրև այս ամենայն չարիք յաջողեցան նմա, քակեաց և զմիաբանութիւնն աշխարհին Վրաց ի Հայոց, և Աղուանիցն ոչ ետ յառաջ խազալ. և զաշխարհն Աղձնեաց ըստ նմին իսկ օրինակի յետս կալաւ: Գրեաց հրովարտակ և աշխարհին Յունաց, ցուցանելով նոցա այլ ընդ այլոյ ստութեամբ, առ այր մի, որոյ Վասակ անուն էր, յայնց Մամիկոնենից՝ որ կան ի ծառայութեան Յունաց: Եւ ի թշուառութեան ժամանակին այրն այն սպարապետ էր ստորին Հայոց, և հաւատարիմ զօրացն Հռովմոց ի սահմանին Պարսից, և արտաքոյ էր օրինացն Աստուծոյ գործովք իւրովք: Եզիտ այս Վասակ զայն Վասակ իւր գործակից ի մեծամեծ չարիսն՝ յոր միաբանեցին երկոքեանն:

Գրէր նա և ցուցանէր հանապազօրոգ, իբր թէ ամենայն Հայք զկնի իւր միաբանեցին. Եւ զնոյն զիր մեծաւ զգուշութեամբ ներքին Վասակն տայր տանել ի թագաւորանիստ քաղաքն կայսեր. մինչև զսուրբ եպիսկոպոսացն զմիտս ևս ուծացոյց ի նոցանէ, և զամենայն զօրսն Յունաց յերկրայս արար յուխտէն:

Մանաւանդ զի ի ձեռն սուտ քահանայիցն պատրէր և խաբէր իբրև ճշմարիտ մարդովք. աւետարան հանդերձ խաչիւ տայր տանել, և զիւր զամենայն սատանայական ստութիւնն նորօք ծածկէր: Դնէր զինքն յաստուածպաշտութեան կարգի, և զամենայն կողմ ուրացելոցն. առաւել զինքն հաւաստէր հաստատուն քան զամենայն զօրսն Հայոց. երդնոյր և հաստատէր, ևս և զամենայն հրամանս թողութեան յարքունուստ ցուցանէր:

Այն էին և կամք Յունաց աշխարհին, լսել զայն ախորժութեամբ. այլ ի ձեռն նորա առաւել ևս ի նոյն յեղեալ տապալեցան:

Սոյնպէս առնէր և ընդ ամենայն կողմանս ամրականաց աշխարհին, ի Տմորիսն և ի Կորդիսն, յԱրցախ և յԱղուանսն, ի Վիրս և յաշխարհն Խաղտեաց. յղէր պնդէր՝ զի ասպնջակառութեան ոք արժանի մի արասցէ:

Եւ ըստ մեծի չարութեան նորա առաւել ևս ժամանակն եբեր նմա զյաջողութիւնն իրացն. զի ամենևին արտաքուստ օգնական ոք ոչ գտաւ գնդին Հայոց, բաց յայնց Հոնաց՝ որոց բանս եզեալ էր: Սակայն և վասն նոցա կուտեաց զբազում այրուծին Արեաց, արգել և փակեաց զգրունս ելի նոցա. քանզի ոչ տայր զադար ամենևին թագաւորին Պարսից, այլ յղէր և կոչէր զգունդս բազումս ի պահակն ճորայ և զՎրաց աշխարհին

բովանդակ զուժարէր, զգօրսն Լփնաց և զՃղբաց, և զՎասն, զԳաւն, և զԳրուարն և զՍրսանն և զՀեճմատակն, զՓասխն և զՓոսխն և զՓիւքուան և զամենայն գօրսն Թաւասպարանն, զԵռնայինն և զդաշտայինն, և զամենայն ամրակողմն լեռանցն: Էր զոր կարասեալ, մեծաւ պարգևօք և առատաձեռն բաշխելով զգանձսն արքունի, և էր զոր հրամանաւ թագաւորին սաստիւ տագնապէր:

Չայս ամենայն իբրև արար և կատարեաց ըստ հրամանի թագաւորին, օր ըստ օրէ գրէր և ցուցանէր մեծ հազարապետին Պարսից, որ զօղեալ և թաքուցեալ էր ի քաղաքն Փայտակարան: Համարձակեցաւ այնուհետև և նա ցուցանել զինքն բազում ազգաց. էր որոց ահ արկանէր, և էր որոց սիրով պարգևս բաշխէր: Կոչէր առ ինքն զՎասակ, և որք ընդ նմա իշխանքն ամենեքեան, բազում պարգևս շնորհէր նոցա յարքունուստ, և զօրացն որ ի նորա բանի էին: Տարեալ էր զառաջեալ և զուրացեալ երիցունան. ցուցանէր, հաստատէր և յայտ առնէր, եթէ սօքօք որսացայց զնոսս՝ քակտել ի միաբան ուխտէն: Իսկ հազարապետն իբրև զայն լսէր՝ յոյժ շնորհակալ լինէր երիցանցն, և յոյս առաջի դնէր նոցա. «Եթէ լիցի մեր յաղթութիւնդ զայլոց քահանայից կեանս զոցա շնորհեցից, և զմեծ վաստակ դոցա ցուցից թագաւորին»:

Եւ այսպէս շարժեաց և շփոթեաց զաշխարհն Հայոց, մինչև զբազում եղբարս հարազատս քակեաց ի միմեանց. ոչ եթող միաբան զհայր և զորդի, և ի մէջ խաղաղութեան արար խռովութիւն:

Եւ անդէն իսկ յիւրում աշխարհին եղբօրորդիք երկու էին նորա ի սուրբ ուխտին առաքինութեան. գրեաց և եցոյց վասն նոցա յարքունիս, և էառ իշխանութիւն ի վերայ կենաց նոցա, մերժեաց և եհան զնոսս յաշխարհէն. զի մի այլ դարձցին անդրէն: Հալածեաց և փախոյց զամենայն միայնակեացս աշխարհին, ոչք հայհոյէին զանդարձ ամբարշտութիւն նորա: Արաբ և կատարեաց զամենայն չարիսն ընդդէմ ճշմարտութեանն. և զոր ինչ ոչ գիտէին անօրէն հեթանոսքն՝ իմացուցանէր նոցա, և վասն ուխտին քրիստոնէութեան՝ եթէ սրպէս հնարիւք կարացէ բառնայ յաշխարհէն Հայոց:

Չայս ամենայն չարիս իբրև ետես ի նմա Միհրնեբսէհ, քան յանձն իւր՝ առաւել ի նա էր յուսացեալ: Հարցանէր և ստուգէր՝ թէ քանի այր կայ ի Հայոց աշխարհին ի գնդին Վարդանայ ընդ ամենայն բազմութիւնն: Իբրև լուաւ ի նմանէ՝ թէ աւելի քան զվաթսուն հազար են, խնդրէր ևս տեղեկութիւն վասն իւրաքանչիւր անձին քաջութեան, և կամ քանի այն ոք իցեն որ սպառազէնքն իցեն, և կամ քանի այն ոք իցեն

որ մերկ առանց զինու ազեղնաւորք իցեն. սոյն-  
պէս և վասն վահանաւոր հետեակցացն:

Եւ իբրև լուաւ զթիւ համարոյ բազմու-  
թեանն, առաւել ևս փութացաւ ուսանել՝ թէ  
քանիք իցեն պարագլուխք քաջ նահատակացն,  
զի երիս ընդ միոյ պատրաստեսցէ առ մի մի  
ի նոցանէ. թող զայլն ամենայն: Այլ և դրօշից  
անգամ իւրաքանչիւրոց տեղեկանայր ի նմանէ.  
և թէ քանի գունդ զգորսն բաժանիցեն, և որ ոք  
ի նոցանէ սողարք լինիցին, և որ գորագլուխ  
յորմէ կողմանէ յազմ մտանիցէ, և զինչ անուանք  
իւրաքանչիւր համհարզացն իցեն, և քանի փո-  
ղահարք ի մէջ գնդին ձայնիցեն: Ղակիջ գոր-  
ծիցեն արդեւք, եթէ արձակ բանակեսցին. ճա-  
կատ առ ճակատ գործիցեն, եթէ համագունդ  
ընդ մի տեղի դրդիցեն: Ո՞ ոք ի նոցանէ յերկ-  
բայս կայցէ, և կամ ո՞ ոք ի նոցանէ գանձն ի  
մահ դնելով գուն գործիցէ:

Եւ իբրև զայս ամենայն տեղեկացաւ ի նմա-  
նէ, կոչէր զամենայն զօրագլխեանն, պատուէր  
հրամանի տայր ամենեցուն յանդիման նորա, զի  
խրատու նորա լուիցեն ամենեքեան: Եւ զամե-  
նայն զօրսն զօրագլխօքն հանդերձ յանձն առնէր  
առն միում յաւազացն՝ որում անուն էր Մուշ-  
կան Նիսալաւուրտ:

Եւ ինքն խաղայր անդէն գնայր յերկիրն ա-  
րեւից. և յանդիման եղեալ մեծի թագաւորին,

պատմէր զամենայն անցս իրացն, զիւր հնարա-  
ւոր իմաստութիւնն և զՎասակայ խաբերայ պատ-  
րանս հայթայթանացն. որպէս զառաջինն զիւր  
զամբարշտութիւնն կամեցաւ ծածկել այնու՝ զի  
քակեալ երկպառակեաց զգունդն Հայոց:

Իբրև լուաւ զայս ամենայն թագաւորն ի  
բերանոյ մեծ հազարապետին, դառնացաւ յանձն  
իւր, և ասէ անսուտ երդմամբ. «Եթէ ապրեսցի  
անօրէնն այն ի մեծ պատերազմէն, մեծաւ ա-  
նարզանօք տամ ըմպել նմա զբաժակն դառնու-  
թեան մահու»:

## ՀԻՆԳԵՐՈՐԴ ՅԵՂԱՆԱԿ

### ՅԱՐՁԱԿՈՒՄՆ ԱՐԵՒԵԼԵԱՅՑ

Մեծ է սէրն Աստուծոյ քան զամենայն մեծութիւն երկրաւոր. և այսպէս աներկեւզաւուն է զմարդիկ՝ իբրև զանմարմին զօրս հրեշտակաց. որպէս անդատին ի սկզբանէ է տեսանել զբազումս բազում անգամ ի բազում տեղիս: Մարդիկ, որ սիրոյն Աստուծոյ իբրև զինու վառեալք էին, ոչ ինչ խնայեցին զանգիտելով իբրև զանարի՛ գոլով վատասիրտք, կամ ի մահ անձանց, կամ յափշտակութիւն ընչից, կամ ի խողխողումս սիրելեաց, կամ ի գերութիւն ընտանեաց, ելանել ի հայրենի երկրէն և անկանել ի ստրկութիւն յօտարութեան. առ ոչինչ համարեցան զայս ամենայն անցս չարչարանացն. այլ միայն միաբան կալ ընդ Աստուծոյ, զի ի նմանէ միայն մի գերի ելցեն. և ամենայն երևելի մեծութեանս զնա բաւական համարեցան՝ ընտրեալ ի միտք իւրեանց: Եւ զուրացութիւնն մեռելութիւն վարկանէին, և զմահ վասն Աստուծոյ՝ անանց կեն-

զանութիւն, և ծառայել յերկրի՝ ազատութիւն  
կենաց իշրեանց, և ընկենուլ զանձինս յօտարու-  
թիւն՝ ընդ Սատուծոյ գիւտից:

Որպէս յայսմ ժամանակի տեսաք աչօք մե-  
բովք, զի զնոյն նահատակութիւն նահատակեցաւ  
և աշխարհս Հայոց:

Քանզի իբրև ետես մեծն Վարդան գերկպա-  
ռակութիւն աշխարհին իւրոյ, ոչ ինչ թերահա-  
ւատութեամբ զանգիտեաց: Թէպէտ և ստուգեալ  
գիտաց զբազմաց այլոց ևս՝ գերկմտութիւն՝ որ  
դեռ ևս ընդ նմա միաբանեալք էին, քաջալերե-  
ցաւ յանձն իւր և քաջալերեաց զգօրսն իւր:  
Քանզի ինքն իսկ բռնացեալ ունէր զթագաւորա-  
նիստ տեղիսն միաբանութեամբ նախարարացն,  
որ ոչ քակեցան ի սուրբ ուխտէն: Հրաման տուեալ  
ամենայն զօրացն ժողովել յԱրտաշատ քաղաք,  
փոխանակ յետս կացելոցն որ ելին գնեա իշխա-  
նին Սիւնեաց, զեղբարս կամ զորդիս կամ զեղ-  
բարցն որդիս ի տեղի նոցա մատուցանէր, և զիւ-  
րաքանչիւր զօրս տայր նոցա, զի դեռևս ինքն  
ունէր զամենայն աշխարհն:

Եւ փութով ամենեքեան ի տեղի պատերազ-  
մին եկեալ հասանէին իւրաքանչիւր զօրօք և ա-  
մենայն պատրաստութեամբ, նոքա և որ բունքն  
հաստատուն կացեալ էին ի տեղւոջն:

Ներշապուհ Արծրունի,  
Եւ Խորէն Խորխոռունի,  
Եւ ինքն Սպարապետն,  
Եւ Արտակ Պալունի,  
Եւ Վահան Ամատունի,  
Եւ գունդն Վահուհեաց,  
Եւ Քաթուլ Դիմաքսեան,  
Եւ Արշաւիր Արշարունի,  
Եւ Շմաւոն Անձաւացի,  
Եւ Տաճատ Գնթունի,  
Եւ Ատոմ Գնունի,  
Եւ Խոսրով Գաբեղեան,  
Եւ Կարէն Սահառունի,  
Եւ Հմայեակ Դիմաքսեան,  
Եւ մեւս ևս այլ Դիմաքսեան Գաղղիկ,  
Եւ Ներսէս Քաջբերունի,  
Եւ Փարսման Մանգակունի,  
Եւ Արսէն Ընձայացի,  
Եւ Այրուկ Սլկունի,  
Եւ Վրէն Տաշրացի,  
Եւ Ապրսամ Արծրունեացն,  
Եւ Շահխոռապետն արքունի,  
Եւ Խուրս Արուանձտեաց,  
Եւ Քողեանքն և Ակէացիքն և Տրպատունիքն,  
և զօրքն Ռըշտունեաց, և ամենայն գործակալքն  
արքունի իւրաքանչիւր զօրօքն հանդերձ:  
Սոքա ամենեքեան համագունդք հասանէին

ի գործ նյատերագմին ի դաշտն Արտազու և լինէր հանդէս համարուն վաթսուն և վեց հազար այր ընդ հեծեալ և ընդ հետեակ:

Եկին ընդ նոսա սուրբքն Յովսէփ և Ղևոնդ երէց, և բազում և այլ քահանայք, և ևս բազմագոյն պաշտօնեայք: Քանզի ոչ ինչ զանգիտեցին և նոքա գալ ընդ նոսին ի գործ պատերագմին. զի ոչ եթէ մարմնական համարէին զկոբւն, այլ հոգևոր առաքինութեան. ցանկային մահակից լինել քաջ նահատակացն:

Սկսաւ սպարապետն խօսել միաբանութեամբ նախարարացն ընդ զօրսն և ասէ.

«Ի բազում պատերագմունս մտեալ է իմ, և ձեր ընդ իս. է ուրեք զի քաջապէս յաղթեցաք թշնամեացն, և է ուրեք զի նոքա մեզ յաղթեցին. և բազում այն է որ յաղթող գտեալ եմք և ոչ յաղթեալք: Եւ միանգամայն այն ամենայն էին մարմնոյ պարծանք. քանզի հրամանաւ անցաւոր թագաւորին մարտնչէաք: Որ փախչէր՝ վատանուն յաշխարհի երևէր, և անողորմ մահ ի նմանէ գտանէր. իսկ որ քաջութեամբ յառաջ մատչէր՝ քաջ անուն ազգի ժառանգէր, և պարգևս մեծամեծս յանցաւոր և ի մահկանացու թագաւորէն ընդունէր: Եւ մեք իսկ աւասիկ յիւրաքանչիւր մարմինս ունիմք վէրս և սպիս բազումս և բազում այն քաջութիւն իցէ՝ վասն որոյ առեալ իցէ և պարգևս մեծամեծս: Անարգ

և անօգուտ զքաջութիւնսն համարիմ, և առ ոչինչ զպարգևսն բազումս. վասն զի ամենեքեան խափանելոց են:

«Իսկ արդ եթէ վասն մահկանացու հրամանատուին զայն արութիւնս կատարէաք, որչափ ևս առաւել վասն անմահ թագաւորին մերոյ, որ տէրն է կենդանեաց և մեռելոց, և դատելոց է զամենայն մարդ ըստ գործոց իւրոց: Ապաքէն եթէ կարի շատ յառաջ մատուցեալ ծերացայց, սակայն ելանելոց եմք ի մարմնոյ աստի, զի մտցուք առ Աստուած կենդանի, որ ոչ ևս ելանիցեմք ի նմանէ:

«Արդ աղաչեմ զձեզ, ով քաջ նիզակակիցք իմ. մանաւանդ զի բազումք ի ձէնջ լաւագոյնք էք քան զիս արութեամբ, և գահու ի վեր ըստ հայրենի պատուոյն. բայց յորժամ ձերով կամօք և յօժարութեամբ առաջնորդ և զօրագլուխ ձեզ կացուցէք, հեշտ և բաղձալի թուեսցին բանք իմ ի լսելիս մեծամեծաց և ի փոքունց: Մի երկուցեալ զանգիտեսցուք ի բազմութենէ հեթանոսացն, և մի յահագին սրոյ առն մահկանացուի զթիկունս դարձուցուք. զի եթէ տացէ Տէր յաղթութիւն ի ձեռս մեր, սատակեսցուք զգօրութիւն նոցա, զի բարձրացի կողմն ճշմարտութեան. և եթէ հասեալ իցէ ժամանակ կենաց մերոց սուրբ մահուամբ պատերագմիս, ընկալցուք խնդութեամբ սրտիւ. բայց միայն յարու-

Թիւնս քաջութեան՝ վատութիւն մի խառնեացուք:

«Մանաւանդ զի անմոռաց է ինձ, յիշելով զիմ և զոմանց ի ձէնջ, ի ժամանակին՝ զի զանօրէնն իշխան խաբեցաք՝ պատրեցաք իբրև զմանուկ մի տղայ անպիտան. իբր այն եթէ ի վերին երեսս զկամս նորա ամբարշտութեանն կատարեցաք. բայց ի ծածուկ զխորհուրդս Տէր ինքնին վկայէ մեզ, որպէս անքակ կացեալ եմք ի նմանէ: Զոր և զուք ինքնին իսկ գիտէք, վասն սիրելեաց մերոց որ ի մեծի նեղութեան էին՝ հնարս խնդրէաք վասն յանդորր հանելոյ. զինոքօք հանդերձ մարտ եղեալ կուուեսցուք ընդ անօրէն իշխանին վասն հայրենի աստուածատուր օրինացն: Եւ իբրև նոցա ոչ ինչ կարացաք օգնել, անհնար լիցի այս՝ եթէ վասն մարմնաւոր սիրոյ զԱստուած ընդ մարդկան փոխանակիցեմք:

«Իսկ արդ յերկուս և յերիս կռիւս Տէր ինքնին մեծաւ զօրութեամբ օգնեաց մեզ, որպէս զի զանուն քաջութեան ժառանգեցաք, և զգօրսն արքունի շարաշար հարաք, և զմոզսն անողորմ սատակեցաք, և զպղծութիւն կռապաշտութեանն ի տեղեաց տեղեաց սրբեցաք, զանօրէն հրաման թագաւորին եղձաք ապականեցաք, զխռովութիւն ծովուն ցածուցաք, լեռնացեալ ալիքն դաշտացան, բարձրադէզ փրփուրն սպառեցաւ, գազանացեալ սրտմտութիւնն դադարեաց:

Որ ի վերայ ամպոց որոտայր, նկուն եղեալ՝ քան զսովորական բնութիւնն ի վայր գտաւ՝ ընդ մեզ խօսելով: Որ բանիւ հրամանաւ կամէր կատարել զչարութիւնն իւր ի վերայ սուրբ եկեղեցւոյ, արդ աղեղամբ և նիզակաւ և սրով կուռի: Որ իբրև զհանդերձ կարծէր ունել մեզ զբրիստոնէութիւնն, արդ իբրև զգոյն ի մարմնոյ՝ չկարէ շրջել, թերևս և ոչ այլ կարացէ մինչև ի կատարած: Քանզի հիմունք սորա հաստատութեամբ եղեալ են ի վերայ վիմին անշարժութեան, ոչ ի վերայ երկրի, այլ ի վեր յերկինս, ուր ոչ անձրևք իջանեն և ոչ հողմք շնչեն և ոչ հեղեղս յարուցանեն: Եւ մեք թէպէտ և մարմնով յերկրի եմք, այլ հաւատով յերկինս եմք շինեալ, ուր ոչ ոք կարէ հասանել յանձեռագործ շինուածն Քրիստոսի:

«Հաստատուն կացէք յանշուշտ զօրադլուխն մեր, որ ոչ երբէք մոռացի զգործս նահատակութեան ձերոյ: Ո՛վ քաջք, մեզ այս մեծապէս է՝ զոր կատարեաց Աստուած ի ձեռն մերոյ բնութեանս, յորում և զօրութիւնն Աստուծոյ մեծապէս երևի: Զի եթէ զայլս կոտորելով ի վերայ աստուածային օրինացն՝ պարծանս անձանց ժառանգեցաք, և զքաջ անուն ազգատոհմին մերոյ թողաք եկեղեցւոյ, և վարձուց ակնկալութիւն ի Տեառնէ է՝ որ պահի իւրաքանչիւր ումեք ի մէնջ ըստ սրտին յօժարութեան և ըստ գործոց առա-

Չարկութեան, սրչափ ևս առաւել եթէ մեր մե-  
ռանիցիմք ի վերայ մեծի վկայութեան Տեառն  
մերոյ Յիսուսի Բրիտտոսի, որում և երկնաւորքն  
են ցանկացեալ, եթէ գոյր հնար: Եւ զի այս  
պարգևք ոչ ամենեցուն է անկ, այլ որում պատ-  
րաստի ի բարերար Տեառնէն, և մեզ այս ոչ եթէ  
յարդար գործոց ինչ պատահեաց, այլ յաննախանձ  
պարզեատուէն. որպէս և ասէ իսկ ի սուրբ կոա-  
կարանին. «Ուր առաւել նդեն մեղքն, անդէն ա-  
ռաւելան շնորհքն Աստուծոյ»:

«Եւ մեզ կարի քաջ ի դէպ ելանէ հրաման  
պատասխանուոյս այսորիկ. որպէս և առաւելապէս  
երևեցաք մարդկան ամբարշտեալք, կրկին առա-  
ւելապէս երևեսցուք արդարացեալք մարդկան և  
հրեշտակաց և Հօրն ամենեցուն: Զի որ օր լուան  
սպաքէն զմէնջ մարդիկ ի գործ ամբարշտու-  
թեանն, արտասուս բազում հեղան ի սուրբ ե-  
կեղեցւոյն, և ևս բազմագոյն ի մէջ սիրելեացն  
մերոց: Նա և ընկերք մեր սրով սրտմտեալ սպառ-  
նային մեզ, և մահ դառնութեան ի վերայ հա-  
սուցանել կամէին. և ծառայքն մեր սարտուցեալ  
փախչէին ի մէնջ: Եւ հեռաւորաց, որոց լուեալ  
էր զանուն քրիստոնէութեան մերոյ, քանզի ոչ  
էին տեղեակ խորհրդոցն մերոց, ողբս ի բերան  
առեալ անդադար աշխարէին զմեզ, և անգիտու-  
թեամբ հայիոյութիւնս բազումս խօսէին զմէնջ:  
Եւ որ մեծն քան զամենայն ասացից, ոչ միայն

մարդիկ յերկրի՝ այլ և հրեշտակք յերկինս գե-  
րեօս իւրեանց դարձուցին ի մէնջ, զի մի տխուր  
դիմօք հայեսցին ի մեզ:

«Եւ անա եկն եհաս ժամանակ, զի զամե-  
մենայն զկեղտ անուն ի մէնջ ի բաց բարձցուք:  
Յայնժամ իբրև զթախծեալ սգաւոր՝ յոգի և մար-  
մին էաք տրտմեալք, այսօր զուարթացեալ և  
զգաստացեալք յերկոսեան առ հասարակ եմք  
լրջացեալք. քանզի և զՏէրն բարերար ընդ մեզ  
տեսանեմք յառաջնորդութիւն. չէ մեր մարդ զօ-  
րավար, այլ զօրագլուխն ամենայն մարտիրոսաց:  
Երկիւղ՝ թերահաւատութեան է նշանակ. զթե-  
րահաւատութիւն մեք ի մէնջ վաղ մերժեցաք,  
ընդ նմին և երկեւղն փախիցէ ի մտաց և ի  
խորհրդոց մերոց»:

Զայս ամենայն առաքինի զօրավարն խօսե-  
ցաւ ընդ ամենայն բազմութեանն. դարձեալ և  
զմի մի ի նոցանէ քաջալերէր ի ծածուկ և սր-  
տապնդէր, և զամենայն պակասութիւն աղքա-  
տութեան յնոյր: Որոյ ոչ ինչ գոյր զօրականին՝  
յանձնէ և յրնկերաց մատուցանէր. որոյ զէն  
չէր՝ զէն պատրաստէր. և որում հանդերձ պիտոյ  
էր՝ հանդերձ զգեցուցանէր, և որում երիվար՝  
երիվար տայր: Եւ առատ ոռոկօք ուրախ առնէր  
զամենեսեան, և զուարթագին զինքն ցուցանէր  
ամենեցուն: Եւ ըստ պատերազմական կարգին՝

զքաջ արանց զյիշատակարանս հանապազ երկրորդէր առաջի նոցա. զի և ինքն իսկ տեղեակ էր ի մանկութենէ իւրմէ սուրբ կտակարանաց: Զոր և ի ձեռն առեալ զքաջ նկարագիրն Մակարայեցոց ընթեռնոյր ի լսելիս ամենեցուն, և յորդառատ բանիւք զելս իրացն իմացուցանէր նոցա, որպէս մարտուցեալ կռուեցան ի վերայ աստուածատուր օրինացն ընդդէմ թագաւորին Անտիոքացոց: Զի թէպէտ և ի նմին կատարեցան մահուամբ, սակայն անուն քաջութեան եկաց մինչև ցայսօր ժամանակի, ոչ միայն յերկրի՝ այլ և անմոռաց յերկինս: Նա և զայն յուշ առնէր զօրականին, որպէս ազգատոհմն Մատաթեայ քակտեալ բաժանեցան ի միութենէ նորա, դարձան ի հրաման թագաւորին, շինեցին մեհեանս, մատուցին զոհս պղծութեան, խոտորեցան յԱստուծոյ, և ընկալան զպատիժս պատուհասի մահուան ի սուրբ միաբանելոցն. իսկ Մատաթի և որք ընդ նմայն էին՝ ոչ ինչ լքեալ թուլացան, այլ ևս առաւելապէս պնդեցան, և ձեռնամուխ եղեն ի զործ պատերազմին բազում ժամանակս: Զայս ասէր, և անդէն ի դաշտին զտեղի առեալ՝ զգօրսն զտեղէր, և յամենայն կողմանց տակաւ զայրուծին կազմէր:

Իսկ յետ ոչ բազում աւուրց զօրագլուխն Պարսից խաղայր զայր ամենայն հեթանոսական բազմութեամբն. և եկեալ հասանէր յաշխարհն

Հայոց ի Հեր և ի Զարեւանդ գաւառ: Եւ անդէն զտեղի առեալ նորա ի գաւառին՝ բանակ բոլորէր, փոս հատանէր, պատնէշ կանգնէր, շերտաւոր փակէր, ամրացուցանէր իբրև զքաղաք ամենայն պատրաստութեամբ: Գունդ բազում հատանէր ի զօրաց նորա, ասպատակաւ արշաւէր, յաւարի առնուլ կամէր զգաւառս բազումս:

Զայն իբրև լուան զօրքն Հայոց, սեպուհ մի յազգէն Ամատունեաց Առանձար անուն ընտրեցին յամենայն զօրականէն՝ լի իմաստութեամբ և քաջութեամբ: Եւ ընդ առաջ նորա հազարօք երկու, հար սատակեաց զբազմութիւն գնդին, և զմնացեալսն ի նոցանէ անդրէն փախստական ի բանակն արկանէր: Եւ ինքն ողջանդամ այսրէն ղառնայր, և լինէր աօն ուրախութեան մեծ յաւուրն յայնմիկ զօրացն Հայոց:

Դարձեալ միւսանգամ ուրացեալն Վասակ անդրէն ի հնարս հայթայթանաց մտանէր ըստ առաջին կեղծաւորութեանն իւրոյ. շրջեցաւ ի ձեռն սուտ երիցանցն՝ զոր յառաջագոյն ասացաք, նոքօք հրամանաւ արքունի ի պատգամաւորութիւն խօսէր, և երդմամբ հաստատէր զբրիտոնէութիւնն անդրէն ունել:

Եւ զայս արարեալ զբազում աւուրս՝ ոչ կարաց զմիաբանութիւնն քակտել, մանաւանդ զսուրբ ուխտ եկեղեցոյն, որ ոչ էր հեռացեալ ի զօրականէն:

Որպէս երանելի երէցն Ղեւոնդ հրաման առեալ ի սուրբ ընկերացն՝ ի մեծէն Յովսէփայ և յամենայն մեծամեծացն, ի քահանայիցն և ի զօրադիւսացն, եբայ զբերան իւր և ասէ բարձր բարբառով առաջի հրեշտակացն.

«Յիշեցէք ամենեքեան զհարսն զառաջինս, որ յառաջ քան զծագումն Որդւոյն Աստուծոյ յիւրաքանչիւր ժամանակս:

«Քանզի իբրև մերժեաց և ընկէց զմեզ չարն յաստուածային տեղւոյն, զտաք մեք անկեալք ընդ անողորմ դատաստանօք ըստ մեղացն յանցաւորութեան, որ ի կամս ազատութեան մերոյ զորժեցաք զանարժանս, և զարարչական զօրութիւնն շարժեցաք ի վերայ մեր ի ցասումն բարկութեան, և զոյորմած դատաւորն յուզեցաք վրէժ առնուլ անաչառութեամբ յարարածոցս. մինչև հրաման տուեալ երկնային ծովուն հեղուլ ի վերայ ցամաքիս, և հաստատուն յատակք երկրիս ծակոտեալ՝ ընդդէմ զհակառակին զորժեցին: Վերինք և ներքինք եղեն մեզ զորժիք տանջանաց՝ առանց բարեխօսի վրէժ առնուլ յանցանաց մերոց:

«Ապաքէն արդարն Նոյ միայն գտաւ կատարեալ յազգի մարդկութեանս, որ ցածոյց զսրտմտութիւն բարկութեան տերունեան ցասմանն, և եղև սկիզբն առաջարկութեան առ ա-

ճուռն բազմութեան մարդկային ազգիս: Դարձեալ և Աբրահամ ի փորձութեանն իւրում քրտաւ առաքինի, և զընկալեալ պարգևան յԱստուծոյ՝ ինքեան ձեռօք փոխ անդրէն նմին մատուցանէր. վասն այսորիկ և յառակս ընկալաւ զնս Աստուած, զի ի նմա տպաւորեալ տեսանէր զաներևոյթ գալուստ Որդւոյն Աստուծոյ, և զըմբռնումն անըմբռնելոյն և զզենումն անմահին, որ իւրով մահուամբն խափանեաց զիշխանութիւն մահու: Եւ եթէ մահուամբ մահ մեռանի, մի երկիցուք մահակիցք լինել Քրիստոսի. զի ընդ որում մեք մեռանիմք, ընդ նմին և կենդանանամք:

«Յիշեցէք, առաքինիք, զմեծն Մովսէս, որ մինչև հասեալ էր յարութեան հասակն՝ խորհուրդ սուրբ նահատակութեանն ի տիս տղայութեանն երևէր նմա. և տուն թաղաւորին Եգիպտացւոց ի ծառայութիւն մտանէր նմա, և ակամայ դայեկութեամբ սնուցանէր զնա. և ի ժամ փրկելոյ զժողովուրդն ի նեղութեանն՝ միջնորդ եղև երկնի և երկրի, միանգամայն և աստուած անուանեցաւ ի վերայ Եգիպտացւոցն: Քանզի ուր գտաւ սուրբ խորհուրդն զօրացեալ՝ անձամբ իւրով վրէժ առնոյր յԵգիպտացւոցն. իսկ ուր աստուածային յայտնութիւնն ի վերայ նորալինէր, ի ձեռն գաւազանին զորժէր զմեծամեծ սքանչելիսն: Եւ վասն սուրբ նախանձուն զոր

ունէր՝ եհար զՅգիպտացին և ընդաւագեաց. վասն որոյ զմեծ անուն զնէր նմա, և առաջնորդ ժողովրդեանն զնա կացուցանէր: Եւ բազում այն է՝ որ հեղմամբ արեամբն արդարացաւ, և անուանեցաւ մեծ քան զամենայն մարգարէս. ոչ միայն զարտաքին թշնամիան կոտորելով, այլ և զազգաստոհման՝ որ փոխանակեցին զԱստուած ընդ որթուն յանապատին:

«Եւ եթէ նա ի հեռուստ այնպիսի վրէժ խնդրէր զալստեան Որդւոյն Աստուծոյ, մեք որ ականատեսք եղաք, և մեծապէս վայելեցաք յերկնաւոր պարզեան շնորհաց նորա, ևս առաւել պարտիմք վրէժխնդիր լինել մօտակայ ճշմարտութեանս: Որ եդ մահուամբ զանձն իւր ի վերայ մեղաց մերոց, արդարացոյց զմեզ յանհարիւրի դատապարտութենէն, դիցուք և մեք զանձինս մեր մահուամբ ի վերայ անմահ զօրութեանն, զի մի նուազք քան զվրէժխնդիրսն առաջինս գտանիցիմք:

«Յիշեցէք զմեծ քահանայն Փենեհէզ, որ սպանմամբ երարձ դպրոցութիւնն ի ժամ պատերազմին, և ազգէ յազգ երդմամբ հաստատեաց զքահանայութիւնն: Մի մոռանայք և զսուրբ մարգարէն զՆիսիաս, որ ոչ կարէր հանդարտել հայել ի կռապաշտութիւնն Աքաբու. և արդար նախանձուն լւրոյ զութ հարիւրսն ինքեան ձեռք սատակեաց, և գերկուս յիսունսն անշէջ

հրոյն մատուցանէր լուցկիս. և զաստուածային վրէժն խնդրելով՝ անըմբռնելի և անազին կառօքն յերկրէ ի յերկինս վերացաւ: Ի ուրք՝ եւս մեծի մասին վիճակի հասեալ էք. զի ոչ ևս կառք առաքին ձեզ ի վերացումն, այլ ինքնին Տէրն կառաց և երկվարաց հզօր զօրութեամբ և սրբովք հրեշտակօք ընդ առաջ եկեալ՝ ձեզ իւրաքանչիւր թեալ բուսուցանէ. զի նորա ուղեկիցք լինիցիք և նմին քաղաքակիցք:

«Եւ այլ զի՞նչ ևս երկրորդեցից առաջի ձերոյ քաջ նահատակութեանդ. զի քան զիս տեղեկագոյնք և հմուտք էք սուրբ կտակարանացն: Դաւիթ ի մանկութեան ժամանակին քարիւ կործանեաց զմեծ բլուրն մսեղէն, և ոչ ինչ զանգիտեաց յահագին սրոյ հսկային. ցրուեաց զգունդրս այլազգեացն, և սարեցոյց զգօրսն ի մահուանէ, և զժողովուրդսն ի գերութենէ. և եղեւ անդրանիկ թագաւորացն Իսրայելի, և անուանեցաւ հայր Որդւոյն Աստուծոյ: Նա անուանեցաւ առ ի պէտս ժամանակին, և դուք ճշմարիտ ծնեալք ի սուրբ Հոգւոյն՝ որդիք էք Աստուծոյ. և ժառանգակիցք Բրիստոսի: Մի ոք զձեր բաժինն ի ձէնջ հատանիցէ, և զձեզ օտարախորթս արարեալ՝ տարաբաժին հանիցէ:

«Յիշեցէք զամենայն զօրավարսն զառաջինս Իսրայելի, զՅեսու, զԳեղէոփն, զՅփթայեա և զայլս ամենեսեան, որք ճշմարիտ հաւատովք էին, հա-

րին կոնտրեցին զգօրան հեթանոսաց, և սրբեցին զերկիրն ի պիղծ կռապաշտութենէն: Եւ վասն հաստատունն արդարագործութեանն՝ որ ոչ ինչ երկմտեցին ի խորհուրդս իւրեանց, արեգակն և լուսին առանց ականջաց լուան և կատարեցին զբան հրամանի նոցա. ծով և գետք ճանապարհ գործեցին առաջի նոցա ըստ ոչ սովորութեան: Եւ բարձրացեալ պարիսպք քաղաքին երիքովի ձայնիւ լոկով անկեալ կործանեցան ի վրէժխնդրութիւն օրինացն արդարութեան: Եւ այլքն ամենայն՝ որ ըստ հաւատոց քաջութիւնս կատարեցին ի դարս իւրաքանչիւր, գովեցան ի մարդկանէ և արդարացան յԱստուծոյ:

«Ապաքէն նոյն Տէր է ի սկզբանէ և մինչեւ ցայսօր և առ յապա, և յաւիտենից յաւիտեանս, և անդր քան զամենայն յաւիտեանս: Ոչ նորոզի, զի ոչ հնանայ. ոչ մանկանայ, զի ոչ ծերանայ. ոչ փոփոխի անյեղեղուկ բնութիւնն Աստուծոյ. որպէս և ինքն ասէր բերանով սուրբ մարգարէիցն. «Ես եմ, ես եմ, ես նոյն եմ ի սկզբանէ մինչև յաւիտեան. ոչ տամ զփառս իմ այլում, և ոչ զքաջութիւնս իմ գրօշերոց»:

«Չայս գիտելով, եղբարք, մի թուրութեամբ լքանիցիմք, այլ սնդութեամբ, սրտիւ և հաստատուն հաւատովք կամակար յարձակեսցուք ի վերայ թշնամեայն՝ որ յարուցեալ գան ի վերայ

մեր: Մեր յոյսն մեզ կրկին երևի. եթէ մեռանիմք՝ կեանք, և եթէ մեռուցանեմք՝ մեզ նոյն կեանք առաջի կան: Յիշեսցուք զբանն Առաքելոյ, որ ասէ, թէ «Փոխանակ ուրախութեան որ նմա առաջի կայր՝ յանձն էառ զհամբերութիւն մահու, և մահու խաչի. վասն այսորիկ և Աստուած զնա առաւել բարձրացոյց, և ետնմա անուն՝ որ ի վեր է քան զամենայն անուն. զի յանուն Յիսուսի Բրիստոսի ամենայն ծունր կրկնեսցի երկնաւորաց և երկրաւորաց և սանդարամետականաց»:

«Եւ քանզի որ ճշմարտութեամբ միացեալ է ընդ Որդւոյն Աստուծոյ, հողոյն աչօք տեսանէ զաներևոյթ յստակ լոյսն ճառագայթից իմանալի արեգական, որ յամենայն ժամ և յամենայն օր գեր ի վերոյ ծագեալ երևի ամենեցուն. և սրբատեսիլ և սրբահայեացս անպատոր յստակութեամբ ձգտեցուցանէ զհայեցուածս, և թափանցանց եղեալ ընդ երկինս՝ յանմատոյց տեսիլն մերձեցուցանէ, և կորովութեամբ կշռէ գերկրպագութիւն զերից հատուածոցն միաւոր զօրութեան: Եւ արդ որ ընդ Աստուծոյ աստիճանսն ոտնփոխ եղեալ իցէ, և բարձրութեամբ յարքունիսն հասեալ, և զամենայն մեծութիւն բովանդակ տեսեալ, նա միայն է որ ժառանգէ զանանց ուրախութիւնն և զանարտմական մխիթարութիւնն:

«Մի, տեարք իմ պատուականք, մի յես աշխարհ ի բարձունս վերանալոյ՝ այսրէն յերկիր անկեալ թաւալիցիմք, այլ գտեղի առեալ անդրէն ի բարձրութեանն հաստատեսցուք: Թէպէտ և հայեսցուք ի ստորին կողմ երկրիս, տեսանեմք զսալի ամենայն ապականութեամբ և անսուրբ պղծութեամբք: Քանզի զի՞նչ աղէտք տարակուսի են որ ոչ գործին յերկրայինս ակտարերս. թշուառութիւնք աղքատաց և անթիւ չարչարանք նոցուն, աղցաւոր ծանրութիւնք հարկահանաց, զգուանք և կռփանք ի բռնաւոր ընկերակցաց, քաղց և ծարաւ ըստ կարօտութեան ընութեանս: Սառնամանիք ձմերայնոյ և խորշակք ամարայնուոյ, հիւանդութիւնք տարաժամք և ախտք մահաբերք հանապաղ տանջեն զմարդիկ. երկեւղ արտաքնոց, արհաւիրք ի ներքնոց անդադար ի վերայ հասանեն. ցանկան մահու յառաջ քան զժամանակն. և ոչ գտանեն. և բազումք են որ փորեն և խնդրեն, և խնդալից լինին յորժամ գտանեն: Իսկ որ թուին մեզ եթէ յաջողեալ իցեն ի մեծութեան և փափկանան: ուրախութեամբ ի պակասելի կեանս, մեծամտեալ հպարտանան յանցաւոր մասունս աշխարհիս, նոքա են որ կուրացեալ են ի ճշմարիտ կենացն: Իսկ արդ զի՞նչ այն չարիք իցեն որ ի նոսա ոչ գործիցին. ընդ մեծութիւն խառնեալ է յափշտակութիւն ընչից աղքատաց, ընդ սուրբ ամուսնութիւնն գէճ պղղ-

ծութիւն: Յորս վայելենն՝ անընտրութեամբ, նոցուն երկրպագութիւնս իբրև Աստուծոյ մատուցանեն, մոլորեալք ի ճշմարիտ կենացն:

«Ո՛չ ահա ամենայն աշխարհս՝ արարչին բուրեցուն է գոյացութիւն. և զոր նոքայն պաշտեն և պատուեն՝ ապաքէն ի սմին նիւթոյ է մասն. իսկ արդ մասունքն մասանց կան ի ծառայութիւն: Զի եթէ մի մասն աշխարհիս ապականացու է, հարկ է թէ և ամենայն մասունքն ընդ նմին ապականին: Նա և ի մասանց անտի՛ պարտ է թէ և ընտրութիւնք երևեսցին. իսկ արդ որ լաւ է՝ յայտնի է ամենեցուն, և որ գիտեն իմանալ՝ նա է ընտիր ի մասանցն: Ապա թէ այդ այդպէս է, քան զամենայն պաշտամունս հեթանոսաց որում երկիր պագանեն՝ երկրպագութեն քառաւելեալք քան զանբան տարերսն՝ որոց չարաչար կան ի ծառայութեան. և զէն Աստուած որ ի մարդ կերպարանեցաւ՝ չպաշտեն, այլ արարածոց տանին երկրպագութիւն. որոց մեղաց չիք քաւութիւն յարդար ատենին:

«Մն անդր ի բաց թողցուք զխաւարային խորհուրդս մոլորելոցն. եղկելիս և ողորմելիս քան զամենայն մարդիկ զնոսա համարեսցուք. մանաւանդ զի կամօք են կուրացեալք և ոչ ի հարկէ, և ոչ երբէք գացեն զճանապարհն ճշմարտութեան: Այլ մեր բացահայեաց աչօք տեսեալ զլոյսն երկնաւոր, մի պատահեսցէ մեզ խաւարն արտա-

քին: Զի ոյք էին ի խաւարի, եկն առ նոսա յոյան ճշմարիտ. կուրացեալք վրիպեցան ի կե- նացն: Իսկ որք ընկալայքդ հաւատովք՝ որդիք էք և ոչ օտարախորթք, սիրելիք և ոչ թշնամիք, բա- ժանորդք և ժառանգորդք վերին իմանալի քա- ղաքին:

«Անդ է առաջնորդ փրկութեան մերոյ, աստ քաջութեամբ նահատակեցաւ, և զնոյն ուսոյց ամենայն նիգակակից. գործակցաց իւրոց Առաքե- լոց. ընդ որս և դուք էք այսօր կրկին երևեալ, օրհնեալք հաւատովք ընդդէմ աներևոյթ թշնամ- լոյն, պատենազէն զբահիւք դէմ ընդ դէմ ընկե- րակից սապանայական գործոյն: Եւ եթէ այս- պէս և եթէ այնպէս, գերկոսեան կողմանսն ի պարտութիւն մատնէք, որպէս և Տէրն ինքնին արար աշխարհի. թուեցաւ թէ մեռաւ, այլ նա յայնժամ տարաւ զկատարեալ նահատակ առա- քինութեանն. զախոյեանն ընկէց, զպատերազմն եհար, զթշնամիսն ցրուեաց, զաւարն ժողովեաց, զգերիսն դարձոյց, զպարզևսն բաշխեաց ամենայն սիրելեաց իւրոց ի ձեռն իւրաքանչիւր առաքի- նութեանց:

«Գիտէք դուք ամենեքեան. յառաջ ժամա- նակաւ հասեալ ձեր ի գործ պատերազմի, թէ- պէտ և էր ձեր սովորութիւն՝ քահանայից հանա- պազորդել ի մէջ բանակիս, ի ժամ ճակատուցն յանձնեալ ձեզ ի նոցանէ աղօթիւք յամուր տեղ-

ւոյ ուրեք թողուիք զնոսա, իսկ այսօր եպիսկո- պոսք և երիցունք և սարկաւազունք, սաղմոսեր- գողք և զբախարդացք իւրաքանչիւր կարգեալ կա- նոնաւ՝ իբր վառեալք զինու և սլատրաստեալք ի պատերազմ, կամին ընդ ձեզ յարձակել հարկա- նել զթշնամիսն ճշմարտութեան: Եւ եթէ մեռա- նել ևս հասանէ ի նոցանէ, սակայն և յայնմանէ ոչ են զանդիտելոց. քանզի լաւագոյն զմեռանելն կամին քան զմեռուցանելն:

«Որպէս զի կրկին աչս ստացեալ ունիցին. հաւատոյ աչօք զբարկոժանս մարգարէիցն տե- սանեն, և մարմնոյ աչօք զքաջութիւն ձերոյնա- հատակութեանդ: Մանաւանդ թէ ի ձեզ գերկո- սեան իսկ տեսանեմք. քանզի և դուք իսկ տե- սանէք զչարչարանս սուրբ առաքելոցն և զսպան- մունս զամենայն քաջ մարտիրոսացն, որոց մա- հուամբն հաստատեցաւ սուրբ եկեղեցի, և հե- դումն արեան իւրեանց եղև ի պարծանս վեր- նոցն և ներքնոց: Արդ մինչև ի գալուստն երկ- բորդ՝ նոյն նահատակութիւն կատարի չարչա- րանօք առաքինեացն և ընտրելոց նահատակաց՝ յորոց միջի և դուք էք հանդիսացեալ այսօր, և հրաւիրեալ ի լուսաւորչոյցն ձեր սրբոց հասանել ի գունդս նոցա և ժառանգորդս խոստացելոցն լինել անանց բարութեանց ի Քրիստոսէ Յիսու- սէ, որ է օրհնեալ յաւիտեանս»:

Յայս վայր խօսեցաւ ի գիշերին յայնմիկ սուրբ երէցն Ղևոնդ, և փառատրելով կատարեաց՝ զԱմէնն ասելով: Եւ սեղան ուղղեալ՝ զամենասուրբ խորհուրդն կատարեցին. ուղղեցին և աւագան, և եթէ գոյր ոք երախայ ի բազմութեան զօրուն՝ զգիշերն ամենայն մկրտեցին. և ընդ առաւօտս սուրբ օրինացն հաղորդեցան, և այնպէս լուսազգեստ եղին՝ որպէս ի տերունեան մեծի սուրբ զատկին:

Եւ մեծաւ զուարճութեամբ և յոյժ խնդութեամբ աղաղակեաց ամենայն բազմութիւն զօրացն և ասեն. «Հաւասարեացէ մահ մեր ընդ մահու արդարոցն, և հեղումն արեան մերոյ ընդ արեան սուրբ մարտիրոսացն. և հաճեսցի Աստուած կամաւոր պատարագաւս, և մի տացէ զեկեղեցի իւր ի ձեռս հեթանոսաց»:

## ՎԵՅԵՐՈՐԴ ՅԵՂԱՆԱԿ

Պ Ա Տ Ե Ր Ա Չ Մ Ն Հ Ա Յ Ո Յ

Յետ այսորիկ իբրև ետես զօրավար զնդին Պարսից՝ եթէ հատան պատգամաւորքն ի միջոյ խաբել զնոսա, և բարձաւ յոյս ակնկալութեան իւրոյ ցրուել զնոսա յանքակ միաբանութենէն, յայնմ ժամանակի յառաջ կոչէր զանօրէնն Վասակ և զամենայն ուրացեալ իշխանսն, որ էին ընդ նմա յաշխարհէն Հայոց. հարցանէր զնոսա, և ուսանէր ի նոցանէ զհնարագիտութիւն յաղթութեան: Եւ իբրև հասեալ տեղեկացաւ զառն առն իւրաքանչիւր քաջութիւնս, կոչէր և զբազումս ի զօրագլխացն՝ որ էին ընդ իւրով ձեռամբ, և հրամայէր ածել զառաջեաւ զերամակս փղացն, և ի գունդս գունդս զգազանսն բաժանէր, և առ մի մի փիղ երեք հազար սպառազէնք, թող զայլ զօրս ամենայն:

Ծօսէր և ընդ մեծամեծսն արքունի հրամանաւ և ասէր. «Յիշեցէք այր իւրաքանչիւր զպատուէր մեծի թագաւորին, և զիք առաջի

զանունն քաջութեան. ընտրեցէք զմահ քան  
զկեանս վատութեամբ: Մի մոռանայք զեւզն և  
զպսակն և զուռսն և զառատածեուն պարզևն՝  
որ շնորհի ձեզ յարքունուստ: Տեսարք էք իւրա-  
քանչիւր զաւառաց, և ունիք իշխանութիւն բա-  
զում. զուք ձեզէն գիտէք զքաջութիւն աշխար-  
հին Հայոց, և զառն առն իւրաքանչիւր նահա-  
տակութիւն արութեան զփորձ առեալ ճանաչէք.  
զուցէ ձեր ի պարտութիւն մասնեալ՝ կենդա-  
նեաւ վրիպեցիք ի մեծ կենացն զոր ունեցիք:  
Յիշեցէք զկիրն և զորդիս ձեր, յիշեցէք զսիրելի  
բարեկամս ձեր. զուցէ ոտնհար լինիցիք յարա-  
քին թշնամեացն և ողբակիցք ի ներքին սիրե-  
լեացն»:

Նա և յուշ ևս առնէր նոցա զբազում ըն-  
կերակիցս փախուցեալս, որք թէպէտ և ի պա-  
տերազմէն ապրեցան, սրով ընկալան գվճիռ  
մահուն իւրեանց. ուստերք և դստերք և ամե-  
նայն ընտանիք իւրեանց յանաշխարհիկս գրե-  
ցան, և ամենայն հայրենի դաւառք հատան ի  
նոցանէ:

Զայս ասէր, և առաւել քան զսոյն սաստ-  
կացուցանէր զհրամանն արքունի: Կարգէր կազ-  
մէր զզօրսն ամենայն, և տարածանէր երկայնէր  
զճակատն յերկայնութիւն դաշտին մեծի: Եւ  
իւրաքանչիւր զազանացն յաջմէ և յահեկէ գե-  
րեքհազարեան սպառազէնսն սլատրաստէր, և

զընտիր ընտիր նահատակացն շուրջ զիւրեաւ  
զումարէր. և այսպէս ամրացուցանէր զգունդն  
Մատեան իբրև դաշտարակ մի հզօր և կամ իբրև  
զբերդ մի անմատոյց: Նշանս բաշխէր, դրօշս ար-  
ձակէր, և ի ձայն մեծի փողոյն սլատրաստհրա-  
մայէր լինել: Իսկ զգունդն զԱպարհացի, և զկատ-  
շացն և զՀոնաց և զԳեղաց, և զայլս ևս ամենայն  
զընտիր ընտիր զօրուն մարդիկ ի մի վայր ժո-  
ղովէր, և հրաման սլատուիրանի տայր ընդ աջմէ  
կողմանէ գնդին իւրոյ սլատրաստ լինել ընդդէմ  
Հայոց զօրավարին:

Իսկ արին Վարդան յառաջ մատուցեալ և  
զաւազանին հարցանէր, և միաբան ամենեցուն  
խրատու զօրագլուխսն կարգէր այսպէս:

Զգունդն առաջին տայր ի ձեռն իշխանին  
Արծրունեաց, և նիզակակից նմա զմեծ իշխանն  
Մոկաց. և զայն ամենայն նախարարեան համ-  
հարցս երկոցունցն, և զամենայն բազմութիւն  
գնդին թևս աստի և անտի կազմէր նոցա:

Եւ զգունդն երկրորդ տայր ի ձեռն Թորե-  
նայ Թորխոռունեաց, և նիզակակից նմա զԷնծա-  
յինն և զՆերսէհ Քաջբերունի:

Եւ զգունդն երրորդ մատուցանէր ի ձեռն  
Թաթրոյ Վանանդեցուց, և նիզակակից նմա հրա-  
մայէր զՏաճատ Գնթունի, և զբազումս ի քաջ  
արանց աստի և անտի ի թևս նոցա:

Յանձն իւր առնոյր զգունդն չորրորդ, և նի-  
զակակից իւր զքաջն Արշաւիր և զհարազատ եղ-  
բայր իւր զՀամազասպեան:

Կարգէր և կաղմէր զճակատն յորդորելով ընդ  
ամենայն երեսս դաշտին դէմ յանդիման Արեաց  
զնդին, առ աին Տղմուտ գետոյն:

Եւ իբրև այս այսպէս պատրաստեցան, եր-  
կոքեան կողմանքն լի սրամտութեամբ և մեծաւ  
բարկութեամբ զայրանային, և գազանացեալ  
զօրութեամբ յիրեարս յարձակէին երկոքեան. և  
ամբոխ աղաղակին երկոցունց կողմանց՝ իբրև ի  
մէջ ամպոց շփոթելոց՝ ճայթմունսս գործէր, և  
հնչումն ձայնից զքարանձաւս լերանցն շարժէր:  
Ի բազմութենէ սաղաւարտիցն և ի փայլուն պա-  
տենագէն վառելոցն իբրև նշոյլք ճառագայթից  
արեգական հատանէին: Նա և ի բազում սուսե-  
րացն շողալ, և ի ճօճել բազմախուռն նիզակացն  
իբրև յերկնուստ ահագին հրաձգութիւնք եռա-  
յին: Քանզի ո՞վ իսկ է բաւական ասել զմեծա-  
մեծ տազնապ ահաւոր ձայնիցն, որպէս կովիւնք  
վահանաւորացն և ճայթմունք լարից աղեղանցն  
զլսելիս ամենեցուն առ հասարակ խլացուցանէին:

Անդ էր տեսանել շտապ մեծի տազնապին  
և զաղէտս անբաւ տարակուսանացն երկոցունց  
կողմանցն, առ ի յանդուզն յարձակմանէն զմի-  
մեանս բախելով. քանզի թանձրամիտքն յիմարէին  
և վատասիրտքն լքանէին. քաջքն խիզախէին և նա-

հատակքն գոչէին: Եւ խումբ արարեալ ամենայն  
բազմութեանն՝ զգետն ի մէջ փակէին, և զան-  
գիտեալ գունդն Պարսից ի դժուարութենէ գե-  
տոյն՝ գտեղեաւն գեռալ սկսան: Իսկ գունդն Հա-  
յոց հասեալ անցանէին, ձի ի վերայ առեալ յար-  
ձակէին մեծաւ զօրութեամբ: Սաստկապէս բա-  
խեալք ընդ միմեանս, յերկոցունց կողմանց բա-  
զում վիրաւորք յերկիր անկեալ զիաթաւալ խա-  
պային:

Յայնմ մեծ տազնապի ի վեր հայեցաւ քաջն  
Վարդան, և տեսանէր զընտիր ընտիր քաջ նա-  
հատակաց Պարսից զօրուն՝ զի զճախակողմն շար-  
ժեցին զՀայոց զնդին, մեծաւ ուժով յարձակէր  
ի տեղին, և զաջ թևն Պարսից զնդին բեկեալ՝  
արկանէր զգազանօքն, և շրջան առեալ կոտորէր  
մինչև ի նոյն տեղի: Եւ այնպէս շտապ տազնա-  
պի ի վերայ հասուցանէր, մինչև գունդն Մա-  
տեան քակեալ բաժանեցան ի մեծամուր պաա-  
րատութենէն, դեռ ևս քաջ քաջ ի փախուստ  
դառնային:

Ապա դէտ ակն ի վեր համբառնայր Մուշ-  
կան Նիսալուուրա, քակեալ գոմանս տեսանէր  
ի դնդէն Հայոց, և զկնի միացեալ ի հովիտս լե-  
րանցն: Վասն որոյ զաղաղակ բարձեալ՝ քաջա-  
լերէր շուրջ զիւրեաւ զգօրս Արեաց, որք գտեղի  
առեալ կային ընդդէմ զնդին Վարդանայ: Եւ ան-  
դէն ի տեղուջն երկոքին կողմանքն զպարտու-

Թիւն խոնտովանէին, և առ յոյժ Թանձր անկեալ դիականց իբրև զբարակոյտս դերբկաց երևէին:

Չայն իբրև ետես Մուշկան Նիսալաուրտ, մնայր գազանացն Արտաշրի, որ ի վերայ նոցա նստէր ի բարձր դիտանոցին իբրև յամուր քաղաքի. և ի ձայն մեծ գալարափողոցն զիւր գունդսն ստիպէր, և յառաջամարտիկ զօրօքն զնա ի մէջ փակէր:

Իսկ կորովին Վարդան իւրովք քաջ նիզակակցօքն ոչ սակաւ նախճիրս ի տեղուջն գործեաց, յորում տեղուջ և ինքն իսկ արժանի եղև առնուլ զկատարեալ նահատակութեանն պսակ:

Եւ յերկարեալ գործոյ պատերազմին՝ օրն տարաժամէր, և մօտ առ երեկս կարճատէրբազմաց օրահասք մահու հասանէին. մանաւանդ ի Թանձրութենէ դիականց մօտ առ մօտ խտացեալ իբրև զփայտահարս մայրաւորաց:

Անդ էր տեսանել զբեկումն նիզակացն և զխորտակումն աղեղանց. վասն այնորիկ և ոչ կարէին կալ ճշմարտիւ ի վերայ սուրբ մարմնոյ երանելեացն. և սաստիկ խուճապ տազնապի էր կողմանցն երկոցունց անկելոց: Եւ որք մնացեալքն էին՝ վատնեալք և ցրուեալք լինէին ի լեռնադաշտս ամուր ձորոցն. և յորժամ պատահէին միմեանց՝ դարձեալ միւսանգամ զմիմեանս սատակէին: Եւ մինչև ի մուտս արեգականն անդադար լինէր գործ դառնութեանն:

Եւ քանզի դարնանային էր ժամանակն, ծաղկալից դաշտքն դառնային յորդահոսանս արեանց բազմաց: Մանաւանդ յորժամ տեսանէր ոք զբազմակոյտ դիականցն անկելոց, սիրան բեկանէր և աղիքն գալարէին՝ լսել զմնչիւն խոցելոցն և զմոնչիւնս բեկելոցն, զթաւալզլոր խաղալ սողալ վիրաւորացն, զփախուստ վատացն, զթաքուստ լքելոցն, զսրտաթափումն զանարի արանցն, զճչիւն կանացեացն, զողբս սիրելեաց, զաշխարումն մերձաւորաց, զվայ և զաւաղ բարեկամացն: Քանզի ոչ եթէ կողմ էր որ յաղթեաց, և կողմ էր որ պարտեցաւ, այլ քաջք ընդ քաջս ելեալ՝ երկօքն կողմանքն ի պարտութիւն մատնեցան:

Բայց քանզի անկեալ էր մեծ սպարապետն Հայոց ի պատերազմին, ոչ ոք գոյր այնուհետև ի մէջ զլխաւոր՝ յոր յեցեալ ժողովէն գունդն մնացելոցն: Թէպէտ և բազում այն էր որ ապրեցան՝ քան թէ որ մեռանն, սակայն ցանեալ ցրուեցան, և հասեալ անկանէին չի տեղիս տեղիս յամուրս աշխարհին, և բռնանային ի վերայ բազում դաւառաց և բերդից, զոր և ոչ առնուլ իսկ ոք կարէր:

Եւ այս անուանք են քաջ նահատակացն՝ որ անդէն ի տեղուջն կատարեցան:

Յագգէն Մամիկոնէից ՔԱԶՆ ՎԱՐԴԱՆ հարեւր երեսուն և երեք արամբք:

Յազգէն Խորխոռունեաց ԽՈՐԷՆՆ ԿՈՐՈՎԻ  
իննևտասն արամբք.

Յազգէն Պալունեաց ԱՐԻՆ ԱՐՏԱԿ յիսուն  
և եւթն արամբք.

Յազգէն Գնթունեաց ՋԱՐՄԱՆԱԼԻՆ ՏԱՃԱՏ  
իննևտասն արամբք.

Յազգէն Դիմաքսենից ԻՄԱՍՏՈՒՆՆ ՀՄԱ-  
ՅԵԱԿ քսան և երկու արամբք.

Յազգէն Քաջբերունեաց ՀՐԱՇԱԿԵՐՏՆ ՆԵՐ-  
ՍԵՀ եւթն արամբք.

Յազգէն Գնունեաց ՄԱՆՈՒԿՆ ՎԱՀԱՆ երիւր  
արամբք.

Յազգէն Ընծայնոց ԱՐԴԱՐՆ ԱՐՍԷՆ եւթն  
արամբք.

Յազգէն Սրուանձտայ ՅԱՌԱՋԱԴԷՄՆ ԳԱ-  
ՐԵԳԻՆ երկու հարազատօքն և ութուտասն ար-  
ամբք:

Այս երկերիւր ութսուն և եւթն նահատակք,  
ընդ ինն մեծամեծ նախարարսն անդէն ի տեղ-  
ւոջն կատարեցան: Եւ յարքունի տանէն և ի տա-  
նէն Արծրունեաց և յիւրաքանչիւր նախարարաց  
տանէն. թող զայս երկերիւր ութսուն և եւթնս,  
և այլ ևս եւթն հարեւր և քառասուն այր, որք  
զանուանս իւրաքանչիւր ի գալութիւն կենաց  
գրեցին ի նմին աւուր ի մեծ պատերազմին: Եւ  
միահամուռ լինի ամենայն հազար և երեսուն և  
վեց:

Իսկ ի կողմանէ ուրացելոցն և հեթանոսաց  
անկանէր յայնմ աւուր երեք հազար հինգ հա-  
րեւր քառասուն և չորք այր: Ինն այր ի նոցա-  
նէ ի մեծ պատուաւորացն էր, վասն որոյ և կա-  
րի յոյժ ի խոր խոցեցաւ Մուշկան նիսալաւուրտ:  
Մանաւանդ իբրև ետես զանհնարին հարուածան  
եռապատիկ զիւրոյ գնդին քան զՀայոցն, բեկաւ  
անկաւ զօրութիւն ուժոյն իւրոյ, և ոչ հանդարտէր  
կալ ի վերայ խորհրդոց մտացն. քանզի ոչ որ-  
պէս կարծէր զպատերազմն՝ կատարեցաւ: Մա-  
նաւանդ իբրև հայէր տեսանէր զբազմութիւն ան-  
կելոց իւրոյ կողմանն, և թիւ համարոյ ևս առ-  
նէր, և իբրև այնչափ յոլով դտանէր զիւր ան-  
կեալսն քան զՀայոց գնդին, ևս առաւել վասն ե-  
րևելի արանցն՝ զորս յականէ յանուանէ գիտէր  
թագաւորն, ի մեծ տագնապի լինէր այրն յանձն  
իւր: Արգարութեամբ զիրսն գրել և ցուցանել՝  
ի թագաւորէն երկնչէր. դարձեալ և թաքուցա-  
նել ևս ոչ կարէր, քանզի ոչ ծածկէր այնպիսի  
մեծ կոխ:

Եւ մինչդեռ յայսմ մտաց խորհրդի էր յանձն  
իւր և նեղէր ի միտս իւր, ուրացեալն Վասակ՝  
որ զանձն իւր ի մէջ զազանացն թագուցեալ  
ապրեցուցանէր՝ մխիթար մատուցանէր մտացն  
լքելոց, և ուսուցանէր նմա հնարսնենգութեամբ,  
թէ որպէս կարասցէ մարտնչել ընդ ամուրսն  
խարէութեամբ: Երգմունս կնքէր արքունի հրա-

մանաւ և վկայութեամբ անձին իւրոյ և խաբե-  
բայ երիցամբքն որ ընդ նմայն էին. սլատգա-  
մաւորս առնէր գնոսս, և երևեցուցանէր զթո-  
ղութիւն աստամբութեանն առ ի շինութիւն  
եկեղեցւոյ շնորհել անդրէն, և զամենայն կարգս  
անդրէն յարմարել ըստ առաջին սովորութեանն:  
Թէպէտ հրաման թագաւորին հաստատութեամբ  
էր տուեալ—վասն զի յոյժ բեկաւ զօրութիւն  
նորա, որպէս զի երկոքին կողմանք նորա հա-  
րան—սակայն զօրքն Հայոց վասն նենդութեանն  
Վասակայ, որ բազում անգամ հասեալ էին ի  
վերայ ստութեան նորա, վասն այնորիկ և հրա-  
մանի թագաւորին վազվազակի ոչ կարէին հա-  
ւատալ:

## ԵՆԻԹՆԵՐՈՐԴ ՅԵՂԱՆԱԿ

### ՅԵՐԿԱՐՈՒՄՆ ԻՐԱՅՆ ԽՌՈՎՈՒԹԵԱՆ

Արդ դարձեալ յայնժամ զրդեաց զՄուշկան  
Նիսալաւուրտ և զամենայն աւագանին Արեաց.  
առեալ զգօրսն հասանէր ի վերայ ամրոցին՝ յոր  
անկեալ էին գունդ մի ի գօրացն Հայոց հան-  
դերձ սուրբ քահանայիւքն, և մարտ եղեալ կը-  
ռուէին շուրջ զբերդաւն: Եւ իբրև ոչինչ կարա-  
ցին ազդել նոցա, դարձեալ յերդմունս ապաս-  
տան եղեալ, զի ուխտիւ իջուսցեն գնոսս առանց  
դաւ ինչ գործելոյ, և երկիցս և երիցս անգամ  
ետուն տանել զաւետարանն: Թէպէտ և քահա-  
նայքն յանձն առնուին զիջանելն կալ առաջի,  
բազումք ի գօրականացն ոչ կարէին հաւատալ  
սուտ ուխտին Վասակայ. քանզի սկսաւ երթալ  
Մուշկան Նիւսալաւուրտ զհետ չար խրատուն  
Վասակայ:

Մի ոմն ի քաջ գօրականէն Հայոց, որ ան-  
կեալ էր ի բերդն փախստեամբ՝ Բակ անուն, ե-

լեալ ի պարխապն թշնամանս զնէր անօրինին, և ցուցանէր առաջի Պարսից զօրագլխին դամենայն չարիան զոր անցուցեալ էր նորա ընդ աշխարհն Հայոց: Զոր և բազումք լուեալ՝ արգարացուցանէին դամբաստանութիւնն, ոչ միայն ի Հայոց կողմանէն, այլ ևս առաւել զօրքն Պարսից: Սոյն այրս այս ի նմին գիշերի եւթն հարեւր արամբք ել գնաց ի բերդէ անտի, և ոչ կարացին ձեռն արկանել ի նս:

Իսկ որ ի ներքս յամրին մնացին, թէպէտ և դիտէին ճշմարտիւ զխաբեբայ երգմունս նոցա, ոչ ունէին համբար ի ներքս: Իբրև ոչ կամաւ իջեալ կացին առաջի, հրամայեաց սպանանել ի նոցանէ երկերիւր և երեքտասան այր: Ազազակեցին ամենեքեան և ասեն. «Գոհանամք զքէն Տէր Աստուած մեր. մինչդեռ շէն են եկեղեցիք և անքակ տաճարք վկայից և միաբան սուրբ ուխտ եկեղեցւոյ և առաքինացեալ, արժանի արարեր զմեզ կոչմանդ երկնաւորի: Հաւասարեսցէ մահս մեր ընդ մահ քաջ նահատակացն, և խառնեսցի արիւնս մեր ընդ արիւն անկեալ վիրաւորացն, և հաճեսցի Տէր ընդ եկեղեցիս իւր՝ բազմութեամբ կամաւոր զուարակացն որ ելանեն ի վերայ սուրբ սեղանոյս»: Զայս ասելով ի տեղւոյն կատարեցան երկերիւրքն և երեքտասանք:

Իսկ սուրբ քահանայքն՝ որ անդ դիպեցան յամուրսն, երանելիքս այս Յովսէփ և Ղևոնդ՝

բազում ընկերակցօքն իւրեանց, մասուցին և նոքա զպարանոցս իւրեանց առաջի սրոյ դահճապետին, ասելով զնոյն բանս՝ զոր խօսեցան երկերիւրքն: Քանզի ոչ եթէ ակնկալութիւն ինչ էր երանելեացն ըստ մարմնաւոր կենացն, այլ իմաստութեամբ հնարս խնդրէին լինել փոխանակ ամենայն աշխարհին շինութեան: Վասն որոյ և բողոք ի Դուռն կարգային, և զամենայն ամբաստանութիւն արկանէին զանօրէնն զՎասսակաւ: Զայս իբրև լուաւ Մուշկան Նիսալաւուրտ, ոչ իշխեաց ի նոսա ձեռն արկանել մահուամբ. այլ զՅովսէփ և զՂևոնդ զան հարեալ, հրամայեաց պահել զգուշութեամբ, քանզի բողոք ի Դուռն կարգացին. իսկ զայլ քահանայսն արձակեցին յիւրաքանչիւր տեղիս, հրաման տուեալ վասն շինութեան և խազազութեան աշխարհին:

Այլ մարդիկն Հայոց, որ հասեալ էին ի վերայ յեղյեղուկ հրամանաց թագաւորին և ուրացեալ չարիմացին Վասսակայ, ոչինչ հաւատային սուտ թողութեանն. այլ քաջալերէին զմիմեանս և ասէին. «Զի պիտոյ է մեզ բնաւ կեանք անցաւոր աշխարհիս, և կամ ընդէր տեսանեմք զարև յետ մերոց սիրելեացն: Զի եթէ քաջնահատակքն մեր անկան ի մեծ պատերազմին, և բազում վիրաւորք տապալեցան յարիւն յապաժոյժ ի մէջ դաշտին, և ամենեցուն մարմինքն եղեն դէշ թռչնոց և կերակուր զազանաց, և պատուա-

կան նախարարքն մեր հասին յանարգութիւն թշուառութեան, լքին զիւրաքանչիւր իշխանութիւն և են ի հալածանս նեղութեան, որ և ամենայն փափկութիւնն Հայոց եհաս ի վիշտս վտանգի և յանհնարին ապականութիւն, ոչ անսամք խաբեբայ հրամանացդ և անկանիմք ի ձեռս անօրէն իշխանացդ»:

Թողին այնուհետև իւրաքանչիւր զգեւղս և զաւանս և զագարակս: Ելին հարսուէք յառագաստից և փեսայք ի սենեկաց, անկան ծերք յաթոռոց և տղայք ի զրկաց. երթային երիտասարդք և կուսանք և ամենայն բաղմութիւն արանց և կանանց, հասեալ ունէին զամուրս անապատին և զանխաբ տեղիս բազում լերանց: Լաւ համարէին զգազանաբար բնակութիւնն աստուածպատութեամբ ի քարանձաւս կելոյ, քան ուրացութեամբ փափկանալ յիւրաքանչիւր շինուածս: Առանց տրտնջելոյ համբերէին խոտաբուս կերակրոցն, և ոչ յիշէին զսովորական խորտիկան: Համարեալ էին նոցա զարափորքն իբրև զյարկս բարձրաբերձ շինուածոց, և զետնանկողինքն իբրև զնկարեալ պատշգամս:

Սաղմոսք էին նոցա մրմնջունք երգոց, և ընթերցուածք սուրբ գրոց կատարեալ ուրախութիւնք: Ամենայն մարդ յանձն իւր, եկեղեցի էր, նոյն ինքն քահանայ. մարմինք իւրաքանչիւր՝ սուրբ սեղան, և ոգիք նոցունց՝ պատա-

րագ ընդունելի: Քանզի ոչ ոք ի նոցանէ ողբայր յուսահատութեամբ զանկեալան ի սրոյ, և ոչ ոք հեծեծելով հառաչէր ի վերայ մերձաւոր սիրելեաց իւրոց: Խնդութեամբ ընկալան զյափշտակութիւն ընչից բազմաց, և ոչ յիշէին ամենևին՝ եթէ եղեալ իցեն նոցա ստացուածք: Համբերութեամբ ճգնէին և մեծաւ առաքինութեամբ տանէին զքաջ նահատակութիւնն: Զի եթէ ոչ բացաւ աչօք տեսանէին զյոյսն խնդալից, և ոչ կարէին զործել զայնպիսի մեծ առաքինութիւն:

Քանզի բազումք յազգէ ի մեծ նախարարացն էին, և եղբարք և որդիք և դստերք, հանդերձ ամենայն սիրելեօք իւրեանց ի մէջ ամրական վայրացն, ոմանք յանլոյս երկիրն Թաղտեաց, և այլ բազումք ի կողմանս հարաւոյ՝ յանմատոյց ամուրսն Տմորեաց, և կէսքն ի թանձրախտ մայրիսն Արցախոյ, և այլ ոմանք անդէն ի միջոց աշխարհին բռնացան ի վերայ բազում ամրոցացն: Եւ ամենեքին մեծաւ համբերութեամբ տանէին զբազում նեղութիւնն վասն սիրոյն Քրիստոսի, և զայս միայն ազաչելով խնդրէին յԱստուծոյ, մի տեսանել նոցա զաւեր եկեղեցեաց:

Այլ որպէս ցուցաք բազում անգամ դամբարտին չարութիւն, յորդորէր և ստիպէր զգօրսն Պարսից ի մօտաւոր կողմանց աշխարհին, զի հրամանաւ արքունի զօր եկեսցէ յօգնականութիւն նոցա: Եւ հասեալ բազում այրուծի յաւե-

լոյլը ի թիւ անկելոցն, և լինէր գունդ բազմութեան իբրև զառաջինն: Եւ յառաջ խաղային ի միջոց աշխարհին, մարտ եղեալ կռուէին ընդ մեծ ամուրս Կապոյտ լերինն: Իսկ որ ի ներքան էին՝ քաջութեամբ մարտուցեալ հարկանէին զբազումս ի գնդէն Պարսից, և զմնացեալսն փախստական ի բանակն արկանէին: Իսկ նոքա դամձեալ յողոքանս մատուցեալ, նուաճել խաբէութեամբ կամէին:

Իբրև ոչ ոք հաւատաց իջանել առ նոսա, զի մի մատնեացին չարաչար ի ձեռս թշնամեացն, սակայն վասն երդմանցն հարկ եղեւ քահանայի մի իջանել առ նոսա, որում անունն էր Արշէն: Թուէր ընդ նոսա յաղերս ընտանութեամբ, և ցուցանէր զանմլաս փախուստ անմեղացն, արկանէր գութ առաջի ուրացելոյն Վասակայ, և սլաղատելով յիշեցուցանէր նմա զառաջին կարգ ուխտին քրիստոնէութեան, զի թերևս սակաւիկ մի քաղցրասցի յանհնարին դառնութենէն: Այլ նա ոչ ինչ լուաւ և անսաց բազում բանիցն նորա, կապեաց և խաղացոյց զերանելին և որք ընդ նմա իջեալ էին:

Մանաւանդ իբրև ետես եթէ երթայ զօրավարն զհետ խրատու կամաց նորա, սկսաւ այնունհետև ի բազում տեղիս արձակել զասպատակաւորն, և զոր արտաքոյ քան զամուրսն գտանէր զբազմութիւն մարդկանն՝ վարեցին ի գե-

րութիւն. և դամբար ի ձեռն առեալ հրձիգ անէին զբազում տեղիս:

Իսկ որք էին յամուրս Տմորեաց, իբրև լուան զայս ամենայն չարիս զոր գործեցին զօրքն արքունի, ոչինչ շահ օգտի համարէին զկալն ի մէջ ամրականացն: Քաջութեամբ ելեալ յարձակեցան օգնականութեամբ ամրականացն, և հասեալ ի մօտաւոր աշխարհն Պարսկաց, յանխնայ կոտորելով նախճիրս արեան գործէին, և զմնացեալսն գերի առեալ տանէին, և անդէն յամուրսն արկանէին, և զշինուածան աշխարհին՝ դամբար ի ձեռն առեալ հրոյ ճարակ տային:

Իարձեալ և որք էին ի լերինս Թաղտեաց, իբրև տեսին եթէ յանդգնաբար զօրքն Պարսկաց յաներկեւդս իջանէին յամուրս աշխարհին Հայոց, յարձակեցան և նոքա մեծաւ զօրութեամբ ի ձորագաւառն Տայոց: Եւ գտին անդ գունդ բազում ի զօրացն արքունի, որ գերի առնուլ կամէին զամրականս աշխարհին. դարձեալ և կարծէին ևս եթէ զանձք նախարարացն անդ իցեն, վասն այնորիկ և յանխնայ յուզէին ըզվայրսն:

Նա և տեսին ևս անդ ի գեւդս երկուս, որ զեկեղեցիսն այրեցեալ էր. առաւել ևս վասն այնր ի նախանձ բրդեցան բարկութեամբ: Յարձակեցան, հարան ի դիմի միմեանց, և կամակարութեամբ յաղթեալ, բեկեալ արկին զգօրութիւն

ի՞նչին Պարսից, և կոտորեցին զբազումս ի նոցանէ, և զմնացեալսն փախստալեան հանէին յաշխարհէն:

Եւ յայնչափ յանդուզն յարձակմանէն՝ միայն երանելին Հմայեակ, եղբայր սպարապետին Հայոց Վարդանայ, յանխնայ քաջութեամբ մարտուցեալ՝ կատարեցաւ նահատակութեամբ ի վերայ սուրբ ուխտին միաբանութեան: Եւ այլքն ամենայն ողջանդամ ապրեալք երթալին գհետ փախստականին:

Եւ իբրև այս այսպէս կատարեցաւ, դադարեցին գորք թագաւորին խառնամուխ լինել յամենայն տեղիս անխտրութեամբ, և ևս առաւել ձեռնպահ լինել յեկեղեցեացն: Դարձեալ միւսանգամ անդրէն հարցանել սկսան յարքունիան:

Նա և որ յԱրձախայ մայրիսն անկեալքն էին փախստականք, ոչ ինչ լռեալ դադարեցին խաղաղութեամբ. այլ հանապազ յղէին յաշխարհն Հոնաց, շարժէին և յորդորէին զգունդն Հոնաց, և յիշեցուցանէին նոցա զուխտն զոր եղեալ էր ընդ Հայս և անսուտ երդմամբ հաստատեալ: Հաճոյ թուէր բազմաց ի նոցանէ լսել զբանանքաղարութեամբ: Նա և մեղադիր ևս յոյժ լինէին նոցա, եթէ «Ի կռիւն ընդէր ոչ եկիք պատրաստութեամբ»: Եւ իբրև յառաջումն ինչ ոչ հնարէին զմիմեանս հաւանեցուցանել, ապա գունդ բազում գումարէին՝ և անդէն յարձակեալ հասա-

նէին ի սահմանս տէրութեանն Պարսից. և զբազում գաւառս հարեալ, բազմագոյն ևս գերի առեալ տանէին յաշխարհն իւրեանց, և յայտնի ցուցանէին թագաւորին զմիաբանութիւն զոր ունէին ընդ գնդին Հայոց:

Իսկ իբրև այս ամենայն ազդումն հասանէր առ զօրավարն Պարսից, սրտմտեալ զայրանայր, և մեծաւ բարկութեամբ կուտէր զմասն ի վերայ անօրինին Վասակայ. իբր թէ նա իցէ սկիզբն և առաջնորդ ամենայն չարեացն որ գործեցան: Եւ անդէն շու արարեալ գնայր, խաղայր հասանէր յաշխարհն Պարսից. գրէր և ցուցանէր յարքունիս զամենայն ստուգութեամբ, և զմասս զործոյն արկանէր զուրացելովս:

Իբրև լուաւ թագաւորն զամենայն աւեր աշխարհին, և ստուգեաց զիրս մեծի պատերազմին, բեկանէր անկանէր ի մեծ իրոխտալոյն, և լռեալ դադարէր ի հանապազորդ և ի խաբեբայ խորհրդոցն. յուղէր և քննէր զվրիպումն անհանձար գործոյն, և կամէր տեսանել՝ ասելով. «Ո՞ ոք իցէ որ զիս ճշմարտութեամբ ի վերայ իրացդ հասուցէ»: Իսկ որ էր գիտակ անօրէն գործոյն, անդէն ի Դրան արքունի, նոյն հազարապետն Միրնեբսեհ, յառաջ մատուցեալ ասէ ցթագաւորն. «Չայդ ես ասեմ քեզ, արքայ քաջ. եթէ կամիս ստուգութեամբ լսել զարդարն, որք գլխաւորք քրիստոնէիցն են ի Հայս՝ տուր կոչել,

և զան յօժարութեամբ և ասեն քեզ զամենայն արդարութեամբ»:

Յայնժամ զմի ոմն յաւագ նախարարացն՝ Ատորոմիզդ անուն, որոյ իշխանութիւնն իսկ խառն էր ընդ Հայոց աշխարհին և գործակից էր զօրավարին ի նմին պատերազմի, զրէր և յանձն առնէր նմա զաշխարհն Հայոց մարզպանութեամբ: Եւ զՄուշկան Նիսալաւուրտ հանդերձ ամենայն մնացեալ զօրուն գումարէր յաշխարհն Աղուանից և Լփնաց և Ճղբաց և ի Հեճմատակաց և ի Թաւասպարաց և ի Խիբիովան, և յամենայն ամրականն՝ զորս աւերեալ էր զնդին Հոնաց վասն ուխտին Հայոց: Որպէս և յոյժ իսկ տրտմեալ էր թագաւորն, ոչ միայն ընդ աւեր աշխարհացն և ընդ անկանելն զօրացն, այլ ևս առաւել ընդ աւերել պահակին՝ զոր ի բազում ժամանակաց հաղիւ ուրեմն կարացին շինել. որ և յայնմ ժամանակի դիւրեալ առեալ քանդեցաւ, որում և չէր իսկ ակնկալութիւն շինութեան: Իսկ զՎասակ հանդերձ գլխաւոր քրիստոնէիւքն ի Դուռն հրամայեաց կոչել:

Արդ եկն եմուտ մարզպանն Ատորոմիզդ յաշխարհն Հայոց սիրով խաղաղութեամբ: Հրամանաւ արքունի կոչեաց առ ինքն զՍահակ սուրբ եպիսկոպոսն Ռըշտունեաց, ուսանել ի նմանէ զիրացն ամբաստանութիւն: Բայց թէպէտ և նորա աւերեալ էր ատրուշան մի, և բազում չար-

չարանօք հարեալ էր զպաշտօնեայս կրակին, ոչ ինչ զանգիտեաց զալ յատեան հրապարակին:

Դարձեալ և ի տանէն Արծրունեաց բարեպաշտօն երէց մի Մուշէ անուն, որ առաջնորդէր աշխարհին Արծրունեաց, աւերեալ էր և նորա զկրակատուն մի, և կապանօք և տանջանօք բազում չարչարանս անցուցեալ էր ընդ մոզան. և սա ինչ ոչ զանգիտեաց, այլ կամաւ եկն և յանդիման եղև մարզպանին:

Եւ երկու ևս այլ քահանայք երանելիք, որոց անուանքն են Սամուէլ և Աբրահամ. քանդեալ էր և սոցա զատրուշանն յԱրտաշատ և յառաջագոյն ըմբռնեալ էին ի կապանս յուրացեալն Վասակայ. ածին և զնոսա յառաքինի ընկերան:

Եւ ժողովեցին ևս ի նոյն տեղի զմեծն Յովսէփ և զԼևոնդ և զՔաջաջ և զԱրշէն: Եւ իբրև ուսաւ և տեղեկացաւ յամենեցունց մարզպանն, զրեաց և եցոյց յարքունիս զամենայն ճշմարտութեամբ որպէս զիարդ լուաւ ի բերանոյ նոցա:

Բայց Վասակ թէպէտ և յառաջագոյն հասեալ էր ի Դուռն, ըստ կամաց իւրոց այլ ընդ այլոյ երթեալ պատմէր զամենայն ստութեամբ, սակայն ի միտս թագաւորին ոչ կարէր զանձն արդարացուցանել. այլ պատասխանի արար նմա և ասէ: «Յորժամ քրիստոնէայքն ևս եկեացեն՝ հասարակ լուայց յատենի:

Իսկ զսուրբ քահանայան՝ վասն զի կապանօք սնանէին, յետ երկուց ամսոց և քսան աւուր հասանէին ի ձմերոցն արքունի: Իբրև լուաւ մեծ հազարապետն՝ եթէ ածին զնոսա ի քաղաքն, ինքնին իսկ ակնատես լինէր նոցա: Բայց թէպէտ և տեղեկութեամբ լսէր ի նոցանէ զամենայն, ոչ կարէր ձեռն արկանել և չարչարել զնոսա. քանզի բազումք ի նախարարացն Հայոց դեռ ևս բռնացեալ ունէին զամուրս աշխարհին, և դեռ ևս մարգպանն յերկիւղի էր: Վասն որոյ զգուշութեամբ հրամայեաց պահել զսուրբսն, և զաշխարհն հրամայէր սիրով նուաճել. վասն որոյ և ինքն իսկ շրջէր և ժողովէր և շինէր ուխտիւ հաստատութեան:

Եւ եպիսկոպոսացն. հրաման տայր ունել զիւրաքանչիւր իշխանութիւնս, և ըստ առաջին սովորութեանն պաշտել յայտնութեամբ, և համարձակ ևս զալ ի հրապարակ: Նա և ընծայից և պատարագաց արժանի առնէր զառաջեալ կոչելով: Եւ քանզի բազում զաւառս առեալ և աւերեալ էր զօրականին, թողուլ հրամայէր զհարկըս աշխարհին. և զայրուծին ևս զարքունի թեթեացոյց առ ժամանակ մի: Եւ միայնակեացք որք ելեալ և կորուսեալ էին՝ հրամայէր զալ և ունել զիւրաքանչիւր տեղիսն:

«Չամենայն կարգս աստուածպաշտութեանն, որպէս զիարգ և ունէին յառաջ ժամա-

նակաւ առ նախնեօքն, նոյնպէս. և այժմ, ասէ, կալցին: Եւ եթէ ոք ի հեռի աշխարհ ուրեք գընացեալ իցեն, ունիմ իշխանութիւն յարքունուստ, եթէ յազատաց իցեն, եթէ ի շինականաց իցեն, եթէ յեկեղեցւոյ, զինչ կեանս և թողեալ իցէ, եկեսցեն և կալցեն զիւրաքանչիւր զարարս»:

Չայս ասէր և երդմունս կնքէր և առաքէր ի կողմանս կողմանս: Որ և բազումք իսկ եկին և ժողովեցան, և կալան զիւրաքանչիւր կալուածս:

Նա և որ մեծն է քան զամենայն, որ ի բռնութենէ ոք՝ ակամայ կալեալ էր զմոգութիւնն, հրովարտակս առաքէր յարքունուստ՝ անդրէն ունել զբրիստոնէութիւնն: Եւ յանդիման խօսէր թագաւորն, որք էին ի տանն արքունի, եթէ «Որք ոչ սիրով ունին զօրէնս դենի մագդեզն, այնպիսեաց և աստուածք են ցասուցեալ, և ես ոչ ինչ եմ շնորհակալ. և այսօր զնոյն հրաման տամ ամենեցուն, ի կամս մարդոյն թողեալ ըստ իւրաքանչիւր մտաց. որպէս զինչ և կամի պաշտել՝ պաշտեսցէ. ամենեքեան իմ ծառայք են»: Չայս ասէր, և գրով հրաման տայր ամենայն աշխարհին:

Իբրև զայն լուան և տեսին բազումք՝ որ էին ցանեալ և ցրուեալք ի հեռաւոր տեղիս, գային և ունէին զիւրաքանչիւր արարս: Իսկ

Նախարարքն որ էին յամուրս աշխարհին և կամ ի հեռաւոր օտարութեան, իբրև տեսին զշինութիւն երկրին, մանաւանդ զեկեղեցւոյն հաստատութիւն, քաջալերեցան համարձակեցան և նոքա յանդիման լինել արքային: Վասն որոյ և պատգամ յղեցին առ մարգպան աշխարհին, զի ի Դուռն ցուցցէ զբանս նախարարացն: Իսկ նա վաղվաղակի յարքունուստ գիր ողորջանաց և ուխտ հաստատութեան տայր տանել առ նոսա հրամանաւ արքունի: Բայց թէպէտ և գիտէին նոքա զդառնութիւն տէրութեանն՝ թէ սուտ են յամենայնի, կամեցան չարչարակից լինել սրբոցն. զի եթէ մահ ևս առաջի կայցէ՝ ոչ ինչ զանգիտեցեն երկիւղիւ:

Եւ զայս լուեալ թագաւորին, ոչ կապանօք՝ այլ արձակ ոտիւք և արձակ ձեռօք հրամայեաց առ ինքն կոչել: Ածին վաղվաղակի՝ զկին և զորդիս, և զինչս իւրաքանչիւր ետուն ի ձեռս մարգպանին, և ինքեանք փութանակի գնացին ի ձմերոցն արքունի:

Եւ մինչ զեռ անդէն ի ձմերոցին էր թագաւորն, ատեան հարցափորձի ի մէջ նոցա հրամայէր լինել: Եւ նստաւ հազարապետն՝ զի լուրիցէ կողմանցն երկոցունց: Եւ իբրև յերկարեցաւ ամբաստանութիւնն զաւուրս բազումս, պարտաւորեցաւ կողմ ուրացելոյն:

Քանզի ցուցանէին զթուղթսն՝ զոր տուեալ

էր Վասակայ ամենեցուն որ ընդ նմա յուխտ սպստամբութեանն. թուղթ մի ի Վրաց աշխարհէն, և թուղթ մի յԱղուանից աշխարհէն. սոյնպէս և թուղթ մի յԱղճնիս, և հրովարտակ մի առ թագաւորն Յունաց, և թուղթ մի առ մեծ սպարապետն Անտիօքայ: Եւ ի բոլորեսին յայտոսիկ թուղթսն վաւերականն մատանի Վասակայ եղեալ էր: Սոյնպէս խառն էր նա և ի մահ մոգուցն ի Զարեհաւանի: Եւ զբազում բերդս՝ զոր հանին ի Պարսկաց, յայտ առնէին զնորա առ այն թուղթսն և զհրամանսն. քանզի նա էր մարգպան ի ժամանակին:

Որպէս և հրեշտակութեամբ իսկ զոր յղէր առ Յոյնս նախարար մի, որում անունն էր Ատոմ՝ յազգէն Գնունեաց, սա մատուցեալ յանդիմանէր զնա առաջի մեծի ատենին հրովարտակաւ իսկ զոր տուեալ էր նորա իւրով մատանեաւ:

Նա և ի մէջ իսկ բերէր զամբաստանութիւն նորա Մուշկան Նիսալաւուրտ, և յայտ առնէր պատերազմակից ընկերօքն իւրովք, որ և յետ վճարելոյ պատերազմին բազում արիւն ետ հեղուլ Վասակ. թէ որպէս սուտ երդմամբք խաբէր և իջուցանէր յամրոցաց սնտի. էր զոր կոտորէր, և էր. զոր գերի տանէր զժառայս և զաղախնայս արքունի: Եւ ի վերայ այսր ամենայնի փաստւ,

և գող ևս գտանէր հարկի աշխարհին՝ որ յարքունիսն երթայր:

Նա և յուրացեալ ընկերացն նորա բազումք էին որ յայտ արարին զչարիս նորա՝ զոր գործեալ էր ընդ աշխարհն Հայոց: Եւ ի մնացեալ մոզացն և ի փշտիպանացն՝ որք ի կապանսն ապրեալ էին և ապա ածին յարքունիս, հարցին և ցնոսա վասն նորա և ասեն. «Ի ուր էք ինչ տեղեակ վասն շարութեան նորա»: Ետուն պատասխանի և ասեն. «Ամենայն անցք շարչարանաց որ անցին ընդ մեզ, և բազում հարուածք որ եղեն ի զօրսն արքունի, և աւեր և գերութիւն աշխարհին Հայոց, և կորուստ հարկացն արքունի, սկիզբն և առաջնորդ շարեաց այրդ այդ եղեւ»:

Եւ մինչդեռ այս ամենայն ամբաստանութիւն գնմանէ կուտէր զայնչափ բազում աւուրս, յառաջ մատեան և իւր ազգականքն, որ ևս յառաջագոյն դատախազ լեալ էին գնմանէ առաջի արքային, սկսան կարգաւ ցուցանել և յայտ առնել, որպէս զի բարեկամացեալ էր նա ընդ Հեռանայ Հոնի միաբանութեամբ Բաղասական արքային, ի ժամանակին՝ զի կոտորեաց Հեռանայն զգօրսն Պարսից յԱղուանս, և ասպատակաւ եհաս յերկիրն Յունաց, և բազում գերի և աւար խաղացոյց ի Հոռոմոց և ի Հայոց և ի Վրաց և յԱղուանից. որպէս զի ի վերայ իսկ եհաս խորհրդոցն ինքն իսկ թագաւորն, և սպան զԲաղասա-

կանն արքայ: Եւ Վասակ մարդպան էր Հայոց ի ժամանակին, և թշնամեացն արքունի խորհրդակից գաաւ: Յուցին և յայտ արարին ազգականքն նորա, որպէս զի հմուտ և տեղեակ իսկ էին չար խորհրդոցն նորա. զամենայն ցուցանէին և յայտ առնէին առաջի թագաւորին. և զայլևս բազմագոյն խարդախութիւնսն, որ ստույթեամբ վարէր զկեանս իւր՝ ոչ միայն առ ընկերս, այլ և առ թագաւորն ինքնին գլխովին. զի ոչ երբէք արդարութեամբ վաստակեալ էր ի մանկութենէ:

Յայնմ ժամանակի հրաման ետ հազարապետն և ասէ. «Ածէք այսր և ի կապելոցն, որք են ի բանտի անդ»: Լուծին և ածին յերանելեացն զՍահակ եպիսկոպոս Ռըշտունեաց, և զուրբն Յովսէփ և Ղևոնդ երէց:

Եւ իբրև մերկացան ամենայն բանք ատենին առաջի նոցա, ետ պատասխանի Սահակ եպիսկոպոսն և ասէ. «Որ յայտնի ուրացեայն են ի ճշմարիտն Աստուծոյ, ոչ գիտեն զինչ գործեն և կամ զինչ խօսին. քանզի խաւարեալ է խորհուրդք նոցա. զտեսրս պաշտեն սուտ պատճառանօք, և ընդ ընկերս մտանեն յուխտ ստութեան: Եւ են նոքա դարանք սատանայի, զինօք իսկ կատարէ զդառնութիւն կամացն իւրոց, որպէս երևի իսկ ի դոյն յայդ Վասակ: Քանզի մինչ ունէր զանուն քրիստոնէութեան, վերին երեսօք կարծէր ծածկել և թագուցանել զամե-

նայն չարութիւն իւր առաջի ձերոյ անգէտ տէրութեանդ, և զամենայն նենգութիւնն իւր քրիստոնէութեամբն ծածկէր: Ուստի և ձեր իսկ կարծեցեալ՝ մեծապէս պատուեցէք զդա առաւել քան զարժանն իւր: Հաւատացէք դմա զաշխարհն Վրաց. հարցէք՝ եթէ զո՞ն իցեն զդմանէ: Ետուք դմա գտէրութիւնն Սիւնեաց. լուարո՞ք յազգականաց այտի դորա, զի՞նչ պատմեն զդմանէ: Արարէք զդա մարգպան Հայոց. զորնախնեացն ձերոց մեծաւ աշխատութեամբ գտեալ էր, դա ի միում ամի կորոյս զերկիրն ամենայն: Տեսէ՛ր, իբրև բարձաւ ի դմանէ պատուական անունն Աստուծոյ՝ զոր ունէր ստութեամբ, մերկ երևեցաւ ամենայն չարագործութիւն դորա: Զի եթէ առ Աստուածն իւր սուտ գտաւ, առ ո՞ ոք ի մահկանացուաց աստի դա արդար գտանիցի:

«Արդ ամենայն ամբաստանութիւն՝ որ այժմ յայտնի եղեւ զդմանէ, ո՞չ ահա ձեր իսկ յառաջագոյն լուեալ էր. բայց յոր դէմս ծածկեցէքն՝ դուք ձեզէն իսկ քաջ զիտէք: Ինձ այսպէս թուի, եթէ սուտ յուսով դա զձեզ խնդացոյց: Այլ ոչ դուք և ոչ դա, և ոչ որ զկնի ձեր գալոցն է՝ զայն ի մեզ ոչ կարէ տեսանել: Արդ արարէք ընդ դա որպէս և կամիք. ցմեզ զի՞ հարցանէք»:

Զարմացաւ մեծ հազարապետն ընդ միտս իւր, և ի խորհուրդս իւր քննէր զամենայն բանս ասեմին: Քանզի հասեալ էր ի վերայ՝ եթէ յի-

րաւի դատապարտեցաւ այրն ըստ արժանի գործոցն իւրոց, եմուտ և եցոյց զամենայն բանս ասեմին յարքունիս: Եւ իբրև լուաւ թագաւորն և ստուգեաց ի հազարապետէն զառնն պարտաւորութիւն, բարկացաւ յոյժ և ի խոր խոցեցաւ. բայց միայն երկայնամտութեամբ կամեցաւ հասուցանել զնա ի մեծ անարգութիւն: Լուռ եկաց աւուրս երկոտասան, մինչ ի գլուխ չոգաւ փուրսիչ ամբաստանութեանն:

Եւ եղեւ յաւուր միոջ մեծի զամենայն երևելի և զպատուականսն հրամայէր յընթրիս կոչել: Կոչեցին և զուրացեալն. և նա ըստ առաջին կարգի օրինացն արքունի արկանէր զպատուական հանդերձն զոր ունէր ի թագաւորէն. կապէր և զպատիւ վարսին և զխոյրն ոսկեղէն զնէր ի վերայ, և զկռանակուռ ձոյլ ոսկի կամարն ընդելուզեալ մարգարտով և ակամբք պատուականօք ընդ մէջ իւր ածէր, և զզինդսն յականջն. և զգումարտակն ի պարանոցին, զսամոյրսն զթիկամբն, և զամենայն օրէնս պատուոյն զանձամբ արկեալ՝ երթայր յարքունիս. շքեղ և երևելի քան զամենեսեան երևէր բազմութեանն:

Իսկ նախարարքն որք կամօք ի Հայոց չոգան՝ անձամբ տուեալ զանձինս ի փորձութիւնն, և սուրբքն որ յառաջագոյն հասեալ էին, կապանօք ունէին զամենեսեան առ Դրանն արքունի: Իբրև տեսին զնա զարդարեալ և շքեղացեալ, և

բազմամբոխ գնդաւ գայր յարքունիս, ի միտս իւրեանց սկսան այպանել և ասել. «Ով անմիտ վաճառական, զանմահ և զանանց պատիւ ետուր, և զանցաւորդ գնեցեր, զոր և զայդ ևս ընդ մօտոյ աւուրս կորուսանելոց ես»:

Եհաս և նստաւ ի ներքին զահլիճսն, որ էր հրապարակ մեծամեծացն: Արդ եկն ել սենեկապանն յարքունուստ, հարցանէր ցնա և ասէ. «Արքայ յղեաց առ քեզ, յորմէ՞ գտեալ է քո զայդ ամենայն պատուական պատիւդ, ասա վաղ՝ վաղակի, վասն որոյ արդար վաստակոց»:

Եւ յուշ առնէր նմա զամենայն բանս ատենին յորում դատապարտեցաւն, նա և զոր ոչ ևս անդ խօսեցաւն՝ զայն ևս յայտնէր նմա: Զի ոչ ըսա կարգի ունէր՝ նա զտէրութիւնն Սիւնեաց աշխարհին, այլ նենգութեամբ և քսութեամբ ևս սպանանել զհօրեղբայր իւր զՎաղինակ, և յինքն տարաւ զտէրութիւնն՝ իբրև քքտիկեար յարքունիս: Նա և այլ ևս բազում բանիւք դատապարտեցին ցնա, որում ամենայն աւագանին վկայ գային: Պապանձեցաւ ամենևին, և չգտաւ բան ճշմարիտ ի բերան նորա: Իբրև կրկնեցին և երեքկնեցին ցուցանելով ի ներքս յարքունիսն, հատաւ վճիռ մահու ի վերայ նորա:

Արդ եկն ել զահճապետն, և մատեաւ առաջի ամենայն մեծամեծացն, մերկեաց ի նմանէ զպատիւն զոր ունէր յարքունուստ, և զգեցոյց

նմա հանդերձ մահապարտի: Կապեցին զոտս և զձեռս, և կանանցաբար նստուցին ի ձի մատակ տարան և ետուն յայն զընդան՝ ուր կային մահապարտք ամենայն:

Իսկ նախարարքն Հայոց և սուրբ եպիսկոպոսքն հանդերձ երիցամբքն, թէպէտ և էին ի մեծի պատուհասի, ոչինչ յիշէին զնեղութիւնն որ անցեալ էր ընդ նոսա, և կամ որ այլ ևս ակնկալութիւն էր գալ ի վերայ. այլ զարմացեալ էին ընդ մեծ յայտնութիւնն որ եղև յԱստուծոյ: Մի թիթարէին զմիմեանս և ասէին. «Քաջութեամբ պատերազմեցաք, առաւել ևս համբերութեամբ ճգնեսցուք: Լուեալ է մեր ի սուրբ հարցն մերոց՝ եթէ գլուխ ամենայն առաքինութեան համբերութիւն է, և իմաստութիւն երկնաւոր՝ կատարեալ աստուածալաշտութիւն. և զայս ոչ ոք կարէ դտանել առանց չարչարանաց: Իսկ չարչարանքն յորժամ ընդերկարանայ ի վերայ՝ յայնժամ բազմանայ վարձ հատուցմանց պարգևին: Ապա թէ այդ այդպէս է, զայս միայն աղաչեսցուք զԱստուած՝ զի համբերել կարասցուք ամենայն փորձութեանց. և Տէր ինքնին արասցէ հնարս մերում փրկութեան:

«Լուեալ է մեր զդատաստան քառասուն զինուորացն Քրիստոսի, որք բազում հարուածս տանջանաց ընկալան: Մինն ի նոցանէ փութացաւ ի բաղանիսն, և վրիպեաց ի պսակէն. իսկ

երեսուն և ինն համբերութեամբ կատարեցան, և հասին այնմ աւետեացն, որում ցանկացեալն էին: Իսկ մեր ընկերակիցն աւանիկ՝ որ յառաջագոյն որոշեցաւ ի մէնջ, ահա եղև գործակից սատանայի: Մինչ դեռ ոգիք ի մարմնին են՝ ընկալաւ զառհաւատչեայ գեհեհինն տանջանաց, որ ոչ միայն սրբոց է ողբալի, այլ և ամենայն գազանաբարոյ մարդկան»:

Ձայս ասէին, և բազում արտասուս ի վերայ կորուսելոյն հեղուին. և անդէն զերգս հոգևորս ի բերան առեալ ասէին. «Բարի է յուսալ ի Տէր քան յուսալ ի մարդիկ. բարի է յուսալ ի Տէր քան յուսալ յիշխանս. ամենայն ազինք շրջեցան զինեւ, և անուամբ Տեառն յաղթեցի նոցա»: Քաջալերէին զմիմեանս և ասէին. «Ձայս գիտելով, եղբարք, մի երկիցուք յանաստուած ազգէս հեթանոսաց, որ քան զմեղուս վատթարագոյն ևս են ի զայրանայն իւրեանց, զի և նոցա ցասումն ի սատակումն անձանց իւրեանց լիցի. այլ մեք զանուն Տեառն կարդասցուք և վանեացուք զամենեսեան»:

Իսկ ուրացեալն Վասակ հայէր ի միաբանութիւն սուրբ կապելոցն, որք մեծաւ խնդութեամբ ընդունէին զչարչարանսն, և զուարթագոյն և պայծառք երևէին որպէս յառաջագոյն յարքունիան, հայէր և կարօտէր, և ոչ ոք խառնեաց զնա ի նոսա, այլ ուրոյն նովին կապանօք պա-

հէին: Եւ օր ըստ օրէ բերէին իբրև զգէշ ընկենուին ի մեծ հրապարակին, ձաղէին և այլանէին, և տեսիլ ամենայն կարաւանին զնա առնէին: Կողոպտեցին հանին և ոչ ինչ թողին զոր ընդ իւրն ունէր. այնպէս ձաղեցին. աղքատութեամբ, մինչ հաց մուրանային և բերէին նմա իւր ծառայքն: Եւ այնպէս սաստիկ արկին զպարտերս հարկաց աշխարհին ի վերայ տան նորա, որ մինչև զհարց և զհաւուց և զիւր արարս և զգարդս կանանց ևս եղ ի վերայ, և ետ և տուժեցաւ, և ոչ կարաց հասուցանել զպարտան արքունի: Եւ յայն տեղի հասուցին՝ մինչև հարցանել նմա «Եթէ կայցէ ինչ գանձ ի գերեզմանըս նախնեացն մերոց»: Եւ եթէ գտեալ էր նորա, հանէր և տայր ընդ իւր և ընդ ընտանեացն տուգանս. որպէս զի բազում մարդիկ իսկ չոգան ի տուժի:

Եւ իբրև այսպէս յամենայն կողմանց հարեալ վատթարացաւ, անկաւ յախտս դժնդակս անդէն ի կապանսն: Ձեռաւ փոր նորա, և հարան և տրորեցան զոգք նորա, և քաճեալ մզեցաւ թանձրամսութիւն նորա: Եռացին որդունք ընդ աչս նորա, և ի վայր սորեցին ընդ ոնգունս նորա. խցան լսելիք նորա, և ծակոտեցան չարաչար շրթունք նորա. լուծան ջիւք բազկաց նորա, և յետ կոյս կորացան կրկունք ոտից նորա: Բղխեաց ի նմանէ հոտ մահու, և փախստական

եղեն ի նմանէ ձեռնասուն ծառայք նորա: Լե-  
զուն միայն կայր կենդանի ի բերան նորա, և  
ոչ գտաւ խոստովանութիւն ի շրթունս նորա:  
Ճաշակեաց զմահ հեղձամղձուկ, և էջ ի դժոխս  
անհնարին դառնութեամբ: Ոտնհար եղեն նմա  
ամենայն սիրելիք նորա, և ոչ յագեցան սաստիկ  
հարուածովք ամենայն թշնամիք նորա:

Եւ այն որ կամէրն թագաւոր լինել մատ-  
նութեամբ՝ Հայոց աշխարհին, և ոչ գերեզմանի  
նորա տեղի երևեցաւ ի նմին. քանզի իբրև զշուն  
մեռաւ և իբրև զէջ քարշեցաւ:

Ոչ յիշեցաւ անուն նորա ի մէջ սրբոց, և  
ոչ մատեաւ յիշատակ նորա առաջի սուրբ սեղա-  
նոյն յեկեղեցւոջն: Ոչ ինչ եթող չարիս՝ զոր ոչ  
գործեաց ի կեանս իւր, և ոչ ինչ մնաց ի մե-  
ծամեծ չարեաց՝ որ ոչ անցին ընդ նա ի մա-  
հուան նորա:

Գրեցաւ յիշատակարանս այս վասն նորա,  
առ ի կշտամբումն յանդիմանութեան մեղաց նո-  
րա. զի ամենայն՝ որ զայս լուեալ զիտասցէ,  
նզովս ի հետ արկցէ, և մի լիցի ցանկացող գոր-  
ծոց նորա:

ԱԻՍՐՏԵՑԱՆ

ԵՒԹՆ ՅԵՂԱՆԱԿԻՆ

ԱՐՏԱՔՈՅ

ԵՒԹՆ ՅԵՂԱՆԱԿԻՆ

ՈՒԹՆԵՐՈՐԴ

ՎԱՍՆ ՉԱՐՉԱՐԱՆԱՑ

ՍՈՒՐԲ ՔԱՀԱՆԱՅԻՑՆ ԵՒ ՆԱՀԱՏԱԿՈՒԹԵԱՆ

Արդ ի վեշտասաներորդի ամի տէրութեան  
նորին թագաւորի՝ դարձեալ անդրէն խաղայր  
գնայր յաշխարհն Քուշանաց մեծաւ սրտմտու-  
թեամբ ի գործ պատերազմի: Եւ գնացեալ ի  
Վրկանէ, և ելեալ յԱպար աշխարհ, նովին կա-  
պանօք գնախարարսն և զքահանայսն հրամայեաց  
պահել ի դղեակ քաղաքի ի Նիւշապուհ, և գեր-  
կուս յերանելի կապելոցն ընդ իւր խաղացոյց:  
Ահ արկանէր ամենայն քրիստոնէութեան ընդ որ  
անցանէր:

Իբրև զայն տեսանէր Հոն մի, որ էր յագգէ  
թագաւորացն ի Խայլանդրաց աշխարհէն, Բէլ ա-  
նուն, և ի ծածուկ խոնարհէր առ քրիստոնեայն,

և սիրով յօժարութեամբ ուսանէր ի նոցանէ զճըշմարտութիւնն, և կամօք իւրովք նուաճեալ էր ընդ իշխանութեամբ թագաւորին, և կարի յոյժ դառնանայր ի միտս իւր յորժամ տեսանէր չարչարեալ գտուրբան: Եւ իբրև այլ ոչ ինչ էր ձեռնհաս, փախստական անկանէր առ արքայն Քուշանաց: Երթայր և պատմէր նմա զամենայն անցս չարչարանացն, զոր անցոյց թագաւորն ընդ աշխարհն Հայոց. տեղեակ ևս առնէր զնա վասն խրամատութեանն պահակին Հոնաց. ցուցանէր և զերկպառակութիւն զօրացն, որ բազում ազգք բաժանեցան ի սիրոյ թագաւորին. ազգէր նմա և զարտունջ զԱրեաց աշխարհին:

Չայս իբրև լուաւ թագաւորն Քուշանաց, ոչ ինչ երկմտութեամբ թերանայր յառնէն, և ոչ կարծիք լրտեսի անկանէին ի սիրտսնորա: Քանզի սակաւ մի յառաջագոյն նորա լուեալ էր, դարձեալ իբրև ստուգեաց ի Բելայ գայն ևս եթէ խաղացեալ գայ ի վերայ աշխարհին Քուշանաց, փութացաւ վազվազակի զօր ժողովէր, գունդ կազմէր՝ ելանել նմա ընդ առաջ հզօր ձեռամբ: Ձի թէպէտ և ոչ կարէր յանդիման տալ պատերազմ ընդդէմ նորա, այլ ի վերջայս թեւոցն անկեալ՝ բազում հարուածս հասուցանէր ի վերայ զօրացն արքունի: Եւ այնպէս նեղեալ շտապէր՝ զի անձուկ լաշխարաւ վատախտարակ արարեալ՝ այսրէն դարձուցանէր, և ինքն ասպատակաւ զհետ

մտեալ աւերէր զբազում գաւառս արքունի, և ողջանդամ անդրէն յերկիրն իւր դառնայր:

Եւ թագաւորն իբրև ետես եթէ անարգանօք և վատթարութեամբ դարձեալ եմ ի պատերազմէս, զիջաւ փոքր մի ի հպարտութենէն, և զիտաց եթէ յերկպառակութենէ զօրացն եղեն չարիքն ամենայն: Եւ առ մղձկել սրտին՝ չգիտէր թէ յո՞ թափէր զթոյնս դառնութեանն: Իսկ մեծ հազարապետն յոյժ էր յերկիւղի, քանզի ինքն էր պատճառք ամենայն չարեացն որ զործեցան:

Սկաւ բանս ի բերան զնել մոգպետին և մոգացն, որք մատուցեալ յանդիման ասէին ցթագաւորն. «Արքայ քաջ, մեք ի դենէ իսկ զիտեմք, զի ոչ ոք ի մարդկանէ կարէ կալ առաջի քոյոյ մեծի զօրութեանդ. այլ վասն քրիստոնէից—որ են ընդդէմ օրինաց մերոց—բարկացեալ են մեզ աստուածքն, զի մինչև ցայսօր կենդանի պահեցեր զնոսա»: Եւ յիշեցուցանէին ևս նմա, որպէս նոքա ի բանտի անդ անիծանէին զքեզ: Եւ բազում և այլ հայհոյութիւնս խօսէին զարբոցն, և զօր հանապազ գնոսա յաչաց հանէին, և զմիտս թագաւորին ամէին ի ցասումն բարկութեան. մինչև փութացաւ վազվազակի հեղուլ զարիւն անմեղացն:

Եւ հրամանս վասն երկուցն որ անդէն ի կարուանին առ իւրն էին—Սամուէլ և Աբրահամ—

զի գաղտ կորուսցեն զնոսա: Իսկ որք էին ի դղեկ քաղաքին, հեռի էին ի կարաւանէն իբրև օթիւք հնգետասան: Հրամայեաց համբարակապետին, որում անունն էր Դենշապուհ, զի յառաջ քան զնա երթիցէ ի քաղաքն, ուր էին սուրբ քահանայքն Տեանն, և շարաշար տանջանօք իշխեսցէ դատել և հարցանել, և սրով վախճանել:

Այլ զնոսա մոգպետին յառաջագոյն—որում յանձն արարեալ էր—բազում անգամ աւելի քան զհրամանն արքունի շարշարեալ էր. քանզի իշխանն զենպետ էր Ապար աշխարհին, և առաւել ջերմագոյն էր ի մոգութեանն. քան զբազում գիտունսն ևս տեղեակ էր զբազեշտական օրինացն: Նա և զոր մեծ սլարժանս համարէին ըստ իւրեանց մոլորութեանն կարգին, Համակղեն անուն էր. գիտէր և զԱմպարտքաշն, ուսեալ էր և զԲողպայիտն, ունէր և զՊալհաւիկն և ըզՊարսկազենն: Քանզի այս հինգ կեշտք են որ զբաւեալ ունին զամենայն օրէնս մոգութեանն. բայց արտաքոյ սոցա է մեւս ևս այլ վեցերորդ, զոր Պետմոզն կոչեն:

Թուէր իմն անձին՝ եթէ կատարեալ իցէ ամենայն գիտութեամբ. հայէր ընդ երանելիսն, եթէ առ տգիտութեան մոլորեալ են ի մեծ գիտութեանէս մերմէ: Եղ մնտի կարծիս ի մտի՝ անդադար շարշարել զնոսա, զի թերևս առչժուժալ մարմնոյն նեղութեանց՝ լուայց ի նոցանէ

բանս ինչ ողորմաց: Վասն որոյ գատ և որոշեաց ի նախարարացն զքահանայսն, և հեռացոյց ի նոցանէ բացագոյն, և արկ զնոսա ի ներքնատուն մի գէճ խաւարչտին: Եւ հրամայէր վեց անն երկու քաշկէնս ժամէ ի ժամ, և դորակ և կէս ջուր. և ամենևին ոչ զոք թողոյր մօտ երթալ ի դուրս բանտին:

Եւ իբրև աւուրս քառասուն այսու նեղէր զնոսա, և ոչ լուաւ ի նոցանէ բան թուլութեան, այլ իմն ած զմտաւ, որպէս թէ ոք յիւրոց ծառայիցն գաղտ եզիտ ինչ ի նոցանէ և ի ծածուկ տայցէ նոցա կերակուր: Ինքն երթեալ կնքէր գերդ և զդուռն բանդին, և զկարգեալ ոռճիկն տայր յիւր հաւատարիմսն տանել նոցա. և արար զայս աւուրս հնգետասան:

Սակայն և այնպէս երանելիքն ոչ ինչ շտապեալ տագնապեցան. այլ մեծաւ համբերութեամբ տանէին զճգնութիւնն, և անդադար սաղմոսիւք կային ի հանապազորդ սլաշտամանն. և ի կատարել աղօթիցն զուարթագին գոհանալով, սակաւիկ մի հանգչէին ի գետնախշտի յանկողինսն:

Իսկ պահապանքն որ ի վերայ կապելոցն կային՝ յոյժ էին զարմացեալ ընդ առողջութիւն անհիւանդութեան նոցա, իբրև լսէին զանդադար հնչումն ձայնիցն: Վասն այնորիկ պատմեցին յականջս մոգպետին և ասեն. «Ոչ են արքն այն լոկ առանց մեծի զօրութեան. զի եթէ պղնձի

մարմինք ունէին նոքա, արդ լուծեալ էր ի գէճ խոնաւոյ անտի: Բազում ժամանակք են մեր՝ զի յանձն է մեզ պահպանութիւն բանտիս. ոչ յիշեմք՝ եթէ ի կապելոց ոք ամսօրեայ ժամանակ կեցեալ իցէ ի տանդ յայգմիկ: Արդ մեք ասեմք քեզ. եթէ առեր հրաման մահու նոցա և սպանանես՝ դու գիտես. ապա թէ ոչ, պահել յանձն արարաւ քեզ և ոչ դատել զնոսս՝ շարաշար վրտանդ է կապելոցն: Նա և մեք զահի հարեալ եմք և յոյժ երկնչիմք, յորժամ տեսանեմք զսոյսպիսի անհնարին նեղութիւնս»:

Եւ իբրև զայս լուաւ մոզպետն, յարուցեալ ինքնին երթայր ի մէջ գիշերին յերդ բանտին: Եւ հայեցեալ ի ներքս ընդ մութ գիշերոյն, այն ինչ լինէր նոցա ի պաշտամանէն հանգչել, և տեսանէր զանձն իւրաքանչիւր կապելոցն՝ զի իբրև զկանթեղ անշիջանելի վառեալ բորբոքէր: Զահի մեծի հարաւ, և ասէր ընդ միտս իւր. «Զի՞նչ է այս մեծ սքանչելիքս. աստուածք մեր ուրեմն եկեալ իջեալ են ի բանտս, և նոցա փառաւորութիւնն լուցեալ բորբոքի: Եւ եթէ նոքա առ սոսա ոչ մերձեանն, մարդոյ լոկոյ անհնարին է զայսպիսի պայծառութիւն լուսոյ զգեհուլ: Իմ այսպէս լուեալ էր վասն կեշտիս այսորիկ՝ եթէ առ յոյժ յիմարութեանն մոլորեալ են, և ստութեամբ կերպարանին ի յաչս տգէտ մարդկան. թերևս և այս տեսիլ այնպէս ինչ երևեցաւ ինձ»:

Եւ ոչ կարէր համօրէն կալ ի վերայ իրացն երևման: Եւ մինչդեռ յայսմ մտաց խորհրդի էր, դարձեալ սուրբքն յիւրաքանչիւր խշտեկացն կանգնեցան կացին ի սովորական պաշտամանն: Յայնժամ ճշմարտեալ գիտաց մոզպետն, եթէ ոչ այլ ընդ այլոյ տեսանէր՝ որ երևեցաւն նմա, այլ ի նոցունց յանձանց փայլէր լուսաւորութիւնն: Յայնժամ կրկին անգամ զահի հարաւ և ասէ. «Ո՞ւմ ի կապելոցն եղեւ այսպիսի յայտնութիւն. ես և ոչ զմի ոք ոչ զիտեմ, և ոչ լուեալ է իմ ի հարցն յառաջնոց»: Եւ քանզի անհնարին շարժեցաւ ի մեծ սքանչելեացն, և դողացին ամենայն մարմինքն, և թմբբեալ կիսամեռ լինէր ի վերայ տանեացն մինչև յառաւօտն. և ի ծագել լուսոյն իբրև զբազմօրեայ հիւանդ յարուցեալ երթայր ի վանս իւր, այլ և ոչ ումեք իշխեաց ամենևին պատմել զոր ինչ ետեսն:

Կոչեաց առ իւր զպահապանսն և ասէ ցնոսա. «Երթայք հանէք զկապեալսն ի վերնատուն մի ցամաքագոյն, և անդ պահեցէք զնոսա զգուշութեամբ, որպէս և ասացէքն»: Մի ոմն ի դահճաց անտի իբրև լուաւ զհրամանս մոզպետին, փութով ընթացեալ երթայր, իբրև մեծ իմն աւետիս տանէր նոցա: «Հրամայեաց ձեզ, ասէ, ելանել ի ցամաք վերնատուն մի. արիք վաղվազակի, և մի հեղգայք, քանզի և մեք իսկ պաղատեցաք վասն ձերոյ տառապանացդ»:

Իսկ սուրբն Յովսէփ հեզաբար սկսաւ խօսել ընդ զահճապետին և ասէ. «Երթ և ասացիմար առաջնորդն ձեր. չէ լուեալ քո վասն հանդերձեալ գալստեան Տեառն մերոյ և կամ վասն մերոյ հրաշակերս շինուածոցն՝ որք մեզ կան պահին ի սկզբանէ պատրաստութեամբ, վասն որոյ դիւրաւ համբերեմք մեծի նեղութեանս առ սէր այնր յուսոյ զոր տեսանեմք: Դու բարուք արարեր, զի արգահատեցեր մեծի նեղութեանս մարմնոյ. այլ ոչինչ եմք ձանձրացեալք իբրև զանաստուած ոք՝ որ չիք այլ ինչ յոյս ի միտս նորա քան որ երևինս: Այլ մեք առ սէր Քրիստոսին մերոյ՝ ընդ այս յոյժ եմք ինդացեալ. և կատարեալ պարզևս զսա իսկ համարիմք, զի ժամանակեայ վշտօքս զանժամանակ երանութիւնսն ժառանգեսցուք:

«Եթէ շինուածոց իցեմք ցանկացեալք, ունիմք շինուածս յերկինս առանց մարմնաւոր ձեռագործի, որ ոչ երևին ձեր արքունիքդ առ նոքօք: Նոյնպէս և հանդերձից և փառաց և անախտ կերակրոց. զոր եթէ ոք կամեսցի սսել ձեզ, չհանդարտէ լսել ձեր տկարութիւնդ. վասն զի կուրութեան հնութեամբն չտեսանէք և ոչ լսէք և ոչ իմանայք, յայն սակս զմեզ զուր և անիրաւ և առանց յանցանաց անողորմն դատիք: Այլ մեր թագաւորն առատ է և բարերար, և բաց է գուռն արքայութեան նորա. եթէ կամեսցի ոք դի-

մել՝ դիմեսցէ համարձակ. ի դարձելոց յապաշխարութիւն չնախանձի և ոչ ընդ ումեք երբէք:

Բայց վասն դիւրութեանս որ դու հրամայեցեր առնել մեզ, էր մեր իշխանութիւն անդրէն յաշխարհին մերում չանկանել մեզ ի ձեռս թագաւորիդ. որպէս և այլքն՝ զի ապրեցան յայսպիսի փորձանաց. այլ որպէս կամօք և յօժարութեամբ եկաք, իբրև թէ գիտէաք զվիշտս վտանդիս, ոչ ինչ զանդիտէաք յայսպիսի ճգանց, սոյնպէս և կամիմք՝ զի և այլ ևս ծանրացուցես ի վերայ մեր, մինչև քո չարութիւն կամացրդ յագեսցի ի մեզ: Զի թէ Աստուածն մեր, որ է արարիչ երկնի և երկրի և ամենայն երեւելեաց և աներևութից, և առ սէր իւրոյ բարերարութեանն խոնարհեցաւ առ ազգս մարդկան, և զգեցաւ մարմին չարչարելի, և անց ընդ ամենայն հանդէս առաքինութեան, և կատարեաց զամենայն գործ տնտեսութեան, ի կամս իւր մատնեցաւ ի ձեռս խաչահանուացն, մահու մեռաւ և եղաւ ի գերեզմանի, և զօրութեամբ աստուածութեանն իւրոյ յարուցեալ երեւեցաւ աշակերտացն և այլոց բազմաց. և վերացաւ առ Հայր իւր յերկինս, և նստաւ ընդ աջմէ հայրենի աթոռոյն, և շնորհեաց մեզ զօրութիւն երկնաւոր, զի ըստ նորա անմահութեանն՝ և մեք մերով մահկանացու մարմնովս կարիցեմք չար-

չարակից լինել անմահ մեծութեանն, և նա ոչ ևս իբրև զմահկանացու համարի զմեր մահն, այլ իբրև անմահակից հատուցանէ մեզ զվարձս վաստակոց մերոց: Արդ փոքր համարիմք մեք զչարչարանս զայս առ սէր փոխարինին զոր էարկ առ ազգս մարդկան»:

Իբրև լուաւ զայս ամենայն բանս մոգպետն ի դահճապետէ անտի, խռովեցաւ, պղտորեցաւ ի միտս իւր, և հատաւ քուն յաչաց նորա զբազում գիշերս: Իսկ յաւուր միտջ յերեկուն պահուն յարուցեալ երթայր առ նոսա միայնիկ լըռիկ, և ոչ զոք առնոյր ընդ իւր ի սպասաւորացն: Եւ իբրև եհաս ի դուրս տանն, հայէր ընդ ծակ մի ի ներքս և տեսանէր ըստ առաջին տեսլեանն. բայց նոքա ի քուն կային խաղաղիկ: Հեղաբար կարգաց յանուանէ գեպխակոպոսն, քանզի քաջ իսկ գիտէր պարսկերէն: Եկն ի դուրս և հարցանէր. «Ո՞վ ես դու:— Ես ինքն իսկ եմ, ասէ. կամիմ ի ներքս մտանել և տեսանել զձեզ»:

Եւ իբրև եմուտ ի մէջ սրբոցն, ոչ ևս երևէր նմա այլ նշանն. և պատմեաց նոցա զերկիցրս երևումն սքանչելեացն: Ետ պատասխանի Ղևոնդ երէցն և ասէ. «Աստուած, որ ասաց ի խաւարի լոյս ծագել, որ և ծագեաց և լուսաւորեաց իմաստութեամբ զաներևոյթ արարածս, նոյն զօրութիւն և այսօր ծագեաց ի խաւարեալ միտս քո, և բացան աչք կուրացեալ ոգւոյդ, և

տեսեր զանշիջանելի լոյս շնորհացն Աստուծոյ. փութա, մի հեղգար. գուցէ դարձեալ կուրացեալ ընդ խաւար գնայցես»:

Եւ զայս իբրև ասաց, յոտն կացին ամենեքեան ասելով ի քառասներորդ երկրորդ սաղմոսէն. «Առաքեա, Տէր, զլոյս քո և զճշմարտութիւն քո, զի նոքա առաջնորդեցցեն և ածցեն զմեզ ի լեռն սուրբ և ի յարկս քո: Արդարև ճշմարտիւ, Տէր, առաջնորդեցեր և ածեր զմուրեալս զայս յանանց ուրախութիւնդ և յանմերժելի հանգիստդ: Ահա նմանեալ է օրս այս սուրբ չարչարանացն քոց. որպէս ապրեցուցեր զմահապարտ աւագակն յերկրորդ մահուանէն, և նովաւ բացեր զաղխեալ դուռն Ադենայ, այսպէս գտեր և զայս կորուսեալս. որ էր պատճառք մահու բազմաց, արդ արարեր զսա պատճառք կենաց մեզ և անձին իւրում: Գոհանամք զքէն, Տէր, գոհանամք և ձայնակիցք լինիմք սուրբ մարգարէին. Մի մեզ Տէր, մի մեզ, այլ անուան քո տուր փառս վասն ողորմութեան և ճշմարտութեան քո. զի մի երբէք ասացեն ի հեթանոսս, թէ ուր է Աստուած նոցա. որպէս և այսօր իսկ յայտնի եղև զօրութիւն քո մեծ ի մէջ սպարասան խաւարազգեստ ազգիս»:

Իսկ որ ձրին եգիտ զաստուածատուր շնորհարն, սկսաւ և նա առանձինն ասել. «Տէր լոյս իմ և կեանք իմ, ես յումմէ երկեայց. Տէր ա-

պաւէն կենաց իմոց, ես յուժմէ՞ դողացայց: Քանզի զիտեմ ճշմարտիւ՝ եթէ բազում են այսուհետեւ թշնամիք իմ, և կամին մերձենալ և ուտել զմարմինս իմ. այլ դու, Տէր ամենայնի, եկիր վասն ամենեցուն կենաց, զի դարձցին և կեցցեն առաջի քոյոյ մարդասիրութեանդ: Մի որոշեր զիս ի սուրբ գառանցս յորս խառնեցայ, զի մի ըստ քո փարախդ արտաքս ելեալ՝ չար գազան դարձեալ բեկանիցէ զիս: Մի հայիր, Տէր, ի բազմամեայ ամբարշտութիւնս իմ, զի մի մոլորեալ ի ճշմարիտ կենացդ՝ զբազումս անդրէն ի կորուստ աշակերտիցեմ, այլ որոց եղէ պատճառք մահու՝ նոցին եղէց և պատճառք կենաց: Սատանայ՝ որ ինեւ խրոխտացեալ սարժէր ի մէջ մեծի կորստականացս, ինև կորացեալ ամաչեսցէ ի մէջ իւրոց աշակերտացն»:

Եւ զայս իբրև ասացին, նմին իսկ ետուն կատարել զաղօթսն, և դադարեցին նովաւ հանդերձ մինչև ի պահն երրորդ, և այնպէս խաղապացեալ կացին ի քուն ամենեքեան մինչև ի ժամ առաւօտուն:

Իսկ նորա յոտն կացեալ, և ի քուն ոչ մտանէր, այլ զձեռան իւր ի վեր համբարձեալ՝ կայր յաղօթս: Եւ մինչդեռ ընդ երդ պշուցեալ հայէր յերկինս, յանկարծակի տունն լի եղև լուսով. և երևեցան նմա սանդուղք լուսեղէնք՝ որ կանգնեալ էր յերկրէ ի յերկինս. և գունդք գունդք զօ-

րաց ելանէին ի վեր. և էր ամենեցուն տեսիլն նոր և չքնաղ և ահաւոր և սքանչելի իբրև գտեսիլ հրեշտակի: Ունէր և զթիւ համարոյ ի միտս իւր զիւրաքանչիւր գնդիցն զոր տեսանէր. էր որ զհազարի, էր որ զերեսուն և վեցից, էր որ զերկերիւրոց և զերեքտասանից: Եւ այնպէս մօտադոյնս մերձենայր, մինչև ճանաչել նմա զերիս ի նոցանէ, զՎարդան և զԱրտակ և զՍորէն: Եւ ունէին ինն պսակ ի ձեռին. խօսէին ընդ միմեանս և ասէին. «Ահա եկն եհաս ժամ, զի և սոքա խառնեսցին ի գունդս մեր. քանզի և մեք սոցա իսկ մնայաք, և առհաւատչեայ պատիւ սոցա բերաք: Եւ որում ոչ ևս մնայաք՝ եկրն երևեցաւ և խառնեցաւ, և եղեւ իբրև զմի ի զինուորացն Քրիստոսի»:

Այս երիցս անգամ երևեցաւ չքնաղ տեսիլն առն երանելոյ: Զարթոյց զսուրբսն ի քնոյ անտի, և պատմեաց նոցա զամենայն տեսիլն կարգաւ:

Իսկ նոքա յարուցեալ կացին յաղօթս և ասէին. «Տէր Տէր մեր, զի սքանչելի է անուն քո յամենայն երկրի. համբարձաւ մեծ վայելչութիւն քո ի վերոյ քան զերկինս. ի բերանոյ մանկանց տղայոց ստնդիացաց հաստատեցեր զօրհնութիւն, զի եղծցի թշնամին և հակառակորդն: Զի ոչ ևս է այսուհետեւ ասել, եթէ «Տեսից զերկինս զգործս մատանց քոց», այլ թէ

տեսից զքեզ Տէր երկնի և երկրի. որպէս երևեցար խիստ այսօր ի ձեռն սուրբ զօրականացն քոց հեռաւոր օտարիս, որ անցեալ էր ըստ ակնկալութիւն կենաց իւրոց:

«Ահա դու, Տէր, ողորմութեամբ քով պսակեցեր զսիրելիս քո, և զթուլթեամբ քով ելեր ի խնդիր կորուսելոյս, դարձուցեր և խառնեցեր ի դասս ընտրելոց քոց: Ոչ միայն ետես սա զերկինս՝ զգործս մատանց քոց, այլ ետես զերկինս և զքնակիչս նորա, և մինչդեռ է յերկրիս՝ խառնեցաւ ի գունդն բիւրաւոր հրեշտակաց քոց: Ետես և զոգիս արգարոց կատարելոց, ետես և զնմանութիւն փառաց աներևոյթ պատրաստութեանցն, ետես և ի ձեռին նոցա զանշուշտ ստեղծանայն՝ որ հանդերձեալ պահի ի ձեռն ճարտարապետին: Երանի սմա վասն սուրբ տեսչեանս, և երանի է մեզ վասն սորա մերձաւորութեանս առ մեզ. քանզի հաստատեալ զխտացաք սովաւ, եթէ որում այսպիսի սքանչելիք յայտնին՝ մեծ մասն ընկալաւ սա յանսպառ քոց բարութեանցդ: Անսպառ են պարգևքն քո, Տէր, և առանց խնդրելոյ տաս ում և կամիս քոյով յորդ և աննախանձ առատութեամբդ: Եւ եթէ որ ոչն խնդրեն՝ չարգելուս ի նոցանէ, բաց մեզ, Տէր, զդուռն ողորմութեան քո, որ ի մանկութենէ մերմէ ցանկացեալ եմք բարեմասնութեան սրբոց քոց: Զնորագիւտ դաստակերտս քո բարեխօս առնեմք

վասն անձանց մերոց. մի ընկղմեսցի նաւ հաւատոց մերոց ի մէջ արէկոծեալ ծովու մեղաց»:

«Եւ այսպէս յերկար կատարելով զաղօթան, յորդ և առատ արտասուս հեղուին ի վերայ անձանց իւրեանց: Գութ ողորմանաց արկանէին առաջի բարերարին՝ զի լսելի լիցի ձայն պաղատանաց նոցա, և հաստատուն կացցեն ի վիշտս ճգանցն, զի մի զրկեսցին ի ցանկալի պսակացն զոր ունէին սուրբքն ի ձեռս իւրեանց, որպէս և ազդեցաւ իսկ նոցա ի Հոգւոյն սրբոյ՝ զի մերձեալ էր ժամանակ կոչման նոցա. որպէս զի երթիցեն և աներկեղ դադարեսցին ի կասկածելի ակնկալութենէն. որում համբերէին բազում տառապանօք, զի առհաւատչէիւ փոքու հասցեն երկնաւոր մեծութեանն, որում ի վաղնջուց իսկ էին ցանկացեալք»:

Եւ քանզի ինքն իսկ մոզպետն իշխան էր աշխարհին, և նմա յանձն արարեալ էր զկապեալսն քաղաքին, վասն այնորիկ և համարձակութեամբ ընդ առաւօտն հանեալ տանէր յապարանան իւր: Լուանայր և սրբէր զնոսա ի չարչարանաց բանտին, առնոյր զշուր լուացման սրբոցն և արկանէր զիւր մարմնովն: Ուղղէր ի տան իւրում աւագան, և ընդունէր ի նոցանէ զսուրբ մկրտութիւնն, հաղորդէր ի կենդանարար մարմինն ի քաւիչ արիւնն Տեառն մերոյ Յիսուսի Քրիստոսի: Բարձր բարբառով աղաղա-

կէր և ասէր. «Մկրտութիւնս այս լիցի ինձ ի լուացումն մեղաց իմոց, և ի ծնունդս նորոգութեան վերստին Հոգւոյն սրբոյ, և ճաշակումն անմահ խորհրդոյս ի ժառանգութիւն երկնաւոր որդէզրութեանն»։ Դնէր և ըստ մարմնոյ առաջի նոցա սեղան կերակրոյ, և մխիթարութեան բաժակ մատուցանէր նոցա, և միաբանէր ընդ նոսա հացին օրհնութեան։

Այլ թէպէտ և ինքն եհաս յերկնաւոր բարին, և աներկեւղ էր ի մարդկանս հարուածոց, սակայն վասն ընտանեացն յոյժ ունէր կասկած, զի մի իբրև վնասակարք մատնեացին յիրս արքունի։ Վասն այնորիկ ի ծածուկ կոչէր ի զիշերի և գնախարարան՝ որ ի նմին քաղաքի էին ի կապանս, և առնէր ծախս մեծամեծս։ Եւ էին ամենեքեան ի մեծի խնդութեան վասն սքանչելեացն որ երևեցաւ նոցա։ Ոչ յիշէին ամենևին եթէ վիշտք ինչ անցեալ էին ընդ նոսա։

Ի այց ի ժամ բազմականացն կարծիք իմն եղեն ի միտս սրբոցն վասն երիցու միոյ՝ որ էր ընդ նոսա ի սուրբ կապանսն. զի ի մէջ շինական մարդկան կեցեալ էր, և տգիտագոյն ևս էր ի գրոց մխիթարութենէ։ Հրամայեցին ունել զգլուխ բազմականին. ետ պատասխանի երանելին և ասէ. «Զի՞նչ է այդ զոր դուքդ գործէք. և կամ յինէն զի՞ թաքուցանէք զծածուկս խորհրդոցդ։ Ես քան զկրսերս ձեր խոնարհագոյն եմ,

և քան զեւս փոքունս յաշակերտաց ձերոց տգիտագոյն եմ. զի՞նքդ կարացից այդմ տանել։ Այս իսկ մեծ էր ինձ, զի սուրբ կապանաց ձերոց հաղորդեալ եմ այսօր։ Եթէ արժանի համարիք ձերում սեղանոյդ, կալարուք դուք զիւրաքանչիւր տեղի բազմականիդ, և հրամայեցէք ինձ զիմ տեղին»։ Եւ բռնազատեաց մեծ եպիսկոպոսն Յովսէփ միաբանութեամբ ամենայն սրբոցն, և ի վերոյ քան զամենեսեան բազմեցուցին զնա։

Եւ իբրև բոլորեցաւ ակումբ բազմականին, և հաղորդեցան ամենեքեան ի կերակուլն զուարթութեամբ, յոսն եկաց սուրբն Յովսէփ, և սկսաւ զուրախութեան նուազն մատուցանել և ասել այսպէս.

«Ուրախ լերուք ամենեքեան ի Քրիստոս. քանզի վաղիւ այս ժամ իցէ՝ անա մոռացեալ իցէ մեր զամենայն նեղութիւնս և չարչարանս զոր կրեցաք։ Եւ փոխանակ սակաւ աշխատութեանս մերոյ՝ բազմապատիկ հանգիստ ընդունելոց եմք, և փոխանակ խաւարային արգելանի բանտիս՝ մտանելոց եմք յերկնից քաղաքն լուսաւոր, որոյ քաղաքի քաղաքապետ ինքն Քրիստոս է, և հանդիսապետ ասպարիսին՝ յորում նախ ինքն առաքինացաւ առնելով զնշան յաղթութեան։ Եւ այսօր նոյն Տէր է որ յաջողէ մեզ զնոյն նշան ընդունելով ի փրկութիւն անձանց մերոց և ի պարծանս մեծափառ սուրբ եկեղեցւոյ։

Եւ զոր օրինակ տեսէք դուք զեղբայրս զայս ի գլուխ բազմականիս մերոյ՝ սոյնպէս սա նախ ընդունելոց է վաղիւ զպսակն ի ձեռն կատարմանն իւրոյ: Զի ահաւասիկ եկն եհաս և մերձեձաւ առ մեզ թշնամին կենաց մերոց և պսակիչ սուրբ չարչարանաց ծառայիցս Քրիստոսի»:

Զայս իբրև ասաց, լուաւ ի նմանէ բանս պընդութեան, որով յոյժ մխիթարեցան ամենեքեան:

Ասէ. «Ի սուրբ աղօթից ձերոց այդպէս արացէ ինձ Քրիստոս, և կատարեցէ զելս վախճանին իմոյ յաշխարհէս ըստ բանի քու: Եւ ահա ընդ ասելդ քո ազգունն եղև հոգւոյս իմոյ, և յիշեցի ես զմարդասիրութիւնն Քրիստոսի, որոյ և զայլուստ իսկ նորա յաշխարհս վասն մեր մեղացն եղև: Գթացի յիս որպէս և յաւազակն ի ժամ խաչին. զոր օրինակ նովաւ զգրունս փակեալ դրախտին եբաց, և յառաջեցաւ լինել կարապետ այնոցիկ՝ որ անդրէն ի նոյն տեղի դառնալոց էին յուրախութիւն, արացէ և զիս այսօր Տէր Յիսուս Քրիստոս սպասաւոր ձերում մեծաշուք զնդիդ:

«Աւանիկ վասն միոյ մեղաւորի որ դառնայ յապաշխարութիւն՝ անվախճան լինի ուրախութիւն հրեշտակաց յերկինս. որպէս զի զիտեն իսկ զկամս Տեառն իւրեանց: Քանզի վասն միոյ կորուսելոյ ոչխարին եկն ի խնդիր, վասն այնորիկ և նոքա խնդակիցք լինին վասն միոյ դար-

ձելոյ յապաշխարութիւն: Թերևս վասն իմ եկեալ էր մեծ զօրավարն Հայոց բազում սուրբ ընկերակցօքն իւրովք. զպսակն վասն ձեր բերեալ էր, այլ քուրախութեան աւետիսն հասարակաց տայր: Եւ առաւել ևս ընդ իս էին՝ զարմացեալ. զի ոչ ճանաչէին զիս ի կեանս իւրեանց, ահա ի սուրբ մահն իւրեանց՝ կամէին զի և ես մասն ընկալայց ընդ երանելիսն:

«Աղաչեմ զձեզ, տե՛ւրք իմ և հարք, աղօթս արարէք ի վերայ անարժանութեանս իմոյ, զի արժանի եղէց մեծի աւետեացն հասանել՝ որ յանսուտ ձերոց բերանոցդ բարբառեցաւ ի լսելիս իմ: Արդ փութամ տեսանել զօրն, և յաւուր անդ զժամն եկեալ հասեալ ի վերայ մեր:

«Ե՞րբ իցէ զի ելից ի Թանճրադանդաղ ձանձրալի մարմնոյս այսորիկ. երբ իցէ զի տեսից զքեզ Տէր Յիսուս. երբ իցէ զի տգիտութիւնս իմ հասցէ ի կատարեալ դիտութիւն: Օգնեա ինձ, Տէր, օգնեա ինձ, և կարկառեա զամենազօր աշդ յօգնականութիւն. զի ըստ խոստման բանիցս իմոց և զորժք արդեամբք կատարեսցին ի վերայ . և փառաւոր լիցի յիս ի մեղաւորս անուն Տեառն մերոյ Յիսուսի Քրիստոսի»:

Զայս իբրև ասաց երանելին՝ յոտն կացին ի բազմականացն անդ, գոհանային ասելով. «Փառք քեզ, Տէր, փառք քեզ թագաւոր, զի ետուր մեզ կերակուր ուրախութեան. լցո՛ զմեզ

Հոգևովդ սրբով, զի գտցուք առաջի քո հաճոյք և մի ամաչեցեալք, զի դու հատուցանես իւրաքանչիւր ըստ գործս իւր»:

Ի նմին ժամու եղև խորհուրդ մեծ ի մէջ նոցա, թէ զի՞նչ օրինակաւ կարացեն ապրեցուցանել զմոզպետն, զի մի լուեալ յարքունիսն՝ իբրև գհուր բորբոքեսցի ի վերայ մնացելոցն: Իբրև ոչ ինչ կարացին ի ժամուն վճարել, միաբանութեամբ աղօթս արարեալ՝ յԱստուած ապաստան առնէին զկեանս առնն հաւատացելոյ:

Իսկ նախարարքն հրաժարեցին ի սրբոցն յորդառատ արտասուօք, և ողբալից ուրախութեամբ անկեալ յոտս նոցա աղաչէին մեծաւ պաղատանօք՝ յանձն առնել զնոսա Հոգւոյն սրբոյ. «Զի մի ոք ի մէնջ, ասեն, թուլացեալ և ելեալ արտաքս ի հաւասար միաբանութենէս, կերակուր լիցի չարաբարոյ գազանին»:

Իսկ երանելիքն միաբան քաջալերէին զնոսա և ասէին. «Զօրացարուք, եղբարք, ի Տէր. մխիթարեցարուք ի մարդասիրութիւնն Աստուծոյ, որ ոչ թողու զձեզ որբս, և ոչ ի բացէ առնէ զողորմութիւնն իւր ի մէնջ հաւատով ի Քրիստոս. բազում բարեխօսիւքն զոր ունիմք առնա, ոչ շիջանի վառումն կանթեղաց ձերոց, և ոչ ուրախ լինի խաւարասէր թշնամին կենաց ձերոց: Այլ նոյն Տէր է որ զօրացոյց զառաջին նահա-

տական՝ խառնելով զնոսա ի գունդս հրեշտակաց իւրոց. նոցուն սուրբ ոգիք և ամենայն դասք արդարոց հասցեն ձեզ յօգնականութիւն համբերութեան, զի ընդ նոսին նոցունց պսակացն արժանի լինիլիք»:

Զայս խօսէին ընդ նոսա, և զգիշերն ամենայն սաղմոսիւք ի զլուխ տանէին. իսկ ի ժամ առաւօտուն ասէին ամենեքեան. «Ծագեա, Տէր, զողորմութիւնս քո՝ ոյք ճանաչեն զքեզ, զարդարութիւնս քո՝ ոյք ուղիղ են սրտիւք: Մի եկեսցէ ի վերայ մեր ոտն ամբարտաւանից, և ձեռք մեղաւորաց մի զողացուցեն զմեզ: Անդ անկցին ամենեքեան որ գործեն զանօրէնութիւն, մերժեցան, և այլ մի կարացեն հաստատել»:

Եւ անդէն վազվազակի հասին դահիճքն ի դուռն բանտին, մտին ի ներքս և տեսին՝ զի որ յառաջ մոզպետն էր, և նմա իսկ յանձն արարեալ էր պահել զնոսա, նստէր ի մէջ նոցա և լսէր ի նոցանէ, նա և քաջալերէր ևս զնոսա չերկնչել ի մահուանէ: Իբրև տեսին զմեծ սքանչելիսն դահիճքն՝ յոյժ զարմացան ընդ իրան, այլ ոչ ինչ իշխէին հարցանել ցնա. բայց չոքան և պատմեցին Դենշապհոյ, որում յանձն արարեալ էր զչարչարանս սրբոցն:

Իսկ նա իբրև լուաւ ի դահճացն արքունի, զահի մեծի հարաւ ի միտս իւր, թէ գուցէ և ինքն անձամբ ի ներքս լիցի, քանզի և ծանօ-

Թագոյն ևս էր առնն: Հրամայեաց հանել ի բանտէ անտի գամենեսեան կապանօքն, և հեռացուցանէր ի քաղաքէ անտի երկոտասան պարսիկ հրատախաւ: Եւ ի ծածուկ խօսէր ընդ մոզպետին՝ եթէ զինչ պատճառք իցեն զառանցանաց նորա: Ետ պատասխանի այրն և ասէ ցնա. «Մի խօսիր ընդ իս ի ծածուկ, և մի լսեր զխորհուրդս լուսոյ ի մէջ խաւարի, զի բացան աչք իմ արդ, քանզի տեսի զլոյսն երկնաւոր: Եթէ կամիս լինել խորհրդակից կենաց, հարց ցիս յանդիման, և պատմեմ քեզ. զի տեսի զմեծամեծսն Աստուծոյ»:

Եւ իբրև լուաւ ի նմանէ զամենայն, և ստուգեաց ևս վասն իւրոյ միաբանութեանն, եթէ ոչ քակտի ի սրբոցն հաւանութենէ, ոչ իշխեաց ձեռն արկանել ի նա, թէպէտ և ունէր հրաման յարքունուստ: Այլ փութացաւ, և ինքն երթեալ պատմէր Թագաւորին ի ծածուկ զամենայն որպէս զիարդ լուաւ ի նմանէ:

Ետ պատասխանի Թագաւորն և ասէ ցրենշապուհ. «Մի ոք ամենևին լուիցէ զայդ ի քէն, մանաւանդ վասն տեսլեանն մեծի որ երևեալ է նմա. զի մի տգէտ մարդիկ երկմտեալ՝ բաժանեսցին ի մեր հաստատուն օրինացս: Մինչ մեք զայլս կամէաք հնազանդեցուցանել՝ թերևս զոգիս գտցեն, իբրև նոցա ոչ ինչ կարացաք առ-

նել, մեր որ վարդապետ օրինացդ էին՝ զկնի նոցա մոլորութեանն խոտորեցան»:

«Նա և այն, եւս չար է մեզքան զամենայն, զի ոչ դուզնաքեայ ոք խոտորեցաւ ի նոցա օրէնսն, այլ այր մի Համակդեն, երևելի ընդ ամենայն վերին աշխարհս: Եթէ փայքարիմք ընդ նմա, նա տեղեկագոյն է քան զամենայն վարդապետս աշխարհիս. գուցէ ի հիմանէ խարխարեալ աւերէ զօրէնս մեր: Եւ եթէ դատիմք զնա ընդ այլ չարագործսն. նա և այնպէս հոշակեալ ելանէ համբաւ քրիստոնէութեան նորա, և մեծ անարգանք զկնի դենիս ձգին: Եւ եթէ սրով ևս վախճանեսցի, բազում են քրիստոնեայք ի կարաւանիս, ընդ ամենայն երկիր ցանեալ ցրուեսցեն զոսկերս նոցա: Սակաւիկ ինչ էին մեզ անարգանք առ ամենայն մարդիկս, ուր մեծարեալ պատուէին ոսկերք նածրացւոցդ. իսկ եթէ մոզացդ և մոզպետաց զնոյն պատիւ կրեսցեն, մեք մեզէն լինիցիմք քակտիչք օրինացն մերոց:

«Այլ այժմ իմ է քեզ երդումն տուեալ յանմահ դիան. նախ զգառնացեալ ծերն կոչեա առաջի քո. եթէ հաւանեսցի սիրով, և զղջացեալ ապաշաւեսցէ զկախարդութիւնս նոցա, մեծարես-

լ տուով ըստ առաջին կարգին. և մի ոք զիտասցէ զթշնամանս նորա ամենևին: Ապա թէ ոչ հաւանեսցի, և ոչ կամեսցի անսալ բանից իմոց, յարուսջիր ի վերայ նորա

բազում ամբաստանս յաշխարհէ անտի, զի վնասակար գտցի յիրս արքունի. և աշխարհաւ փուրսիշն ի վերայ յարուսջիր, և շկօթակ արասջիր յայնկոյս քան զԿուրան և զՄակուրան. և անդ ընկեցեալ զնա ի վիրապ մի, և ընկալցի զմահ թշուառութեան: Եւ զայլադեանսն փութանակի կարճեա ի կենաց աշխարհիս, զի մի զղրդեսցեն զօրէնս մերոյ աշխարհիս: Զի եթէ զճարտար մոգպետն այնպէս արագ աշակերտեցին, տգէտ մարդիկ զիմրդ կարասցեն կալ առաջի նոցա պատիր խաբէութեանն»:

Արդ ել նստաւ Դենշապուհ արտաքոյ բանակին յատենի, որպէս ասացաք, հեռի երկոտասան հրասախաւ: Հարցանէր ցմոգպետն և ասէր. «Իշխանութիւն առի վասն քո, ոչ միայն բանիւ հարցանել, այլ և ամենայն հարուածովք տանջանաց: Մինչև ձեռն արկեալ է իմ ի քեզ, ընկալ զմեծարանս և արհամարհեա զանարգանս, և խնայեա ի պատուական ալիսդ: Թող անդր ի բաց զքրիստոնէութիւնդ՝ զոր ոչ ունէիր ի բնէ, և դարձիր անդրէն ի մոգութիւնն, որպէս զի վարդապետ էիր բազմաց»:

Ետ պատասխանի երանելին և ասէ. «Աղաչեմ զքեզ, տէր, որ յառաջ իբրև զհարագատ եղբայր համարեալ էիր յաչս իմ, և այսօր թշնամի կատարեալ մի ըստ առաջին սիրոյն զթար դու յիս, այլ կատարեա ի վերայ իմ զկամս չա-

րութեան թագաւորին ձերոյ. և որպէս առեր իշխանութիւն ի վերայ իմ՝ դատեա զիս»:

Յայնժամ իբրև ետես Դենշապուհ՝ եթէ առ ոչինչ զսպառնալիսն արքունի համարեցաւ, և ոչ ողորջանացն երեսս ինչ արար, և քան ի ծածուկ՝ յայտնի ևս կամէր զի խօսեսցի, կատարեաց ի վերայ նորա ըստ խրատուն արքունի: Եւ գաղտագողի ընկեցաւ ի հեռաւոր օտարութիւն. որպէս զհարդ և ուսաւ ի վարդապետէն՝ և արար:

Եւ հրամայեաց ևս Դենշապուհոյ երկուս ևս ընկերակիցս օգնականս յաւագ գործակալացն. զՋնիկանն, որ էր մարգպետ արքունի, և զՄովան հանդերձապետ՝ ի ձեռանէ Մովպետան մովպետի:

Արդ երկոքեան սոքա իւրաքանչիւր սպասաւորօք առին զսուրբսն յայնմ անապատէ, և փոխեցան նոյնչափ ևս հեռագոյն ի մեւս ևս դժբնդակ տեղի ի նմին զիշերի: Եւ զոք ի կարաւանէ անտի ոչ թողին տեսանել, ոչ ի Հայոց և ոչ յամենայն քրիստոնէից, և ոչ բնաւ յարտաքին հեթանոսաց: Եւ սպասաւորքն որ էին ի վերայ կապելոցն անդէն ի քաղաքին, հրամայեցին պահել զգուշութեամբ, զի զհետս նոցա մի ոք գիտասցէ՝ ընդ որ տանիցեն ի մահու տեղի, մի նոքա և մի ամենևին ոք ի մարդկանէ:

Բայց այր մի Թուժիկ անուն ի զօրացն արքունի—որ ի ծածուկ ունէր զքրիստոնէութիւնն,

և վիճակեալ էր ի դասս դահճացն, և կայր ի սպասուռ օրնապահացն հանդերձ գործիական տանջանարանօքն, եկն եմուտ ի մէջ գիշերին և խառնեցաւ ի դասս նախարարացն: Առաջին դասն ի միջնոյն կարծէր զնա, և միջինն երրորդին, և երեքեանն միմեանց համարէին զնա. և ոչ ոք ի նոցանէ եհարց՝ եթէ «Դու ո՞վ ես ընդ մեզ», ոչ ի տերանցն և ոչ ի սպասաւորացն:

Իբրև հասին ի տեղի անապատին՝ որ ամենեկին անբոյս էր ի դալարւոյ, և այնպէս էր ապառաժ դժնեայ՝ զի և ոչ նստելոյ անգամ տեղի գտաւ անդ նոցա, իջին հեռագոյն նախարարքն երեքեան, և հրամայեցին դահճացն իւրեանց կապել զոտս և զձեռս նոցա: Եւ արկին պարանս երկայնս յոտս նոցա, և երկու երկու լծեցան և առին ի քարշ: Եւ այնպէս ձգեցին և ճողքեցին ընդ ապառաժ տեղիսն քարշելով, զի ամենեկին խայծ ոչ մնաց ի մարմինս երանելեացն: Եւ ապա լուծին և ածին ի մի տեղի:

Եւ թուէր իմն նոցա այսպէս՝ եթէ կակղեցաք զխստութիւն նոցա, և հնազանդեցուցաք զբիրտ ապատամբութիւն նոցա. և արդ զինչ և խօսիցիմք՝ անսայցեն բանից մերոց, և առնիցեն զկամս թագաւորին, և ապրեալ լիցին յանհնարին տանջանացն: Եւ զայն ոչ կարացին քաջ իմասնալ՝ եթէ իբրև զքաջ զինուորս վառեցին զնոսա, և ի հրահանգս կրթութեան վարժեցին զնոսա, և

իբրև զգազանս վայրենիս արիւնախանձս ուսուցին զնոսա: Եւ եթէ ունէին սակաւ ինչ կապած յառաջագոյն, հայեցեալ նոցա ի չարաչար վէրս մարմնոյն իւրեանց՝ զառաջին երկեւղն ի բաց մերժեցին: Սկսան իբրև արբեալք անգալք զմիմեամբք ելանել ի բանից պատասխանիս, և փութային իբր ծարաւիք յաղբեր՝ եթէ ո՞ նախ վաղ զիւր արիւնն հեղցէ յերկիր:

Եւ մինչդեռ յայսմ պատրաստութեան էին սուրբքն, խօսել սկսաւ ընդ նոսա Դենշապուհ և ասէ. «Արքայ յղեաց զիս առ ձեզ. ամենայն աւեր աշխարհին Հայոց, ասէ, և կոտորածք զօրացն՝ որ հասին ի վերայ, ի ձէնջ եղեն փասքն ամենայն. և բազում նախարարք՝ որ այժմ կան կապանօք չարչարեալ, վասն ձերոյ յամառութեանդ եղև այդ ամենայն: Այլ և արդ եթէ կամիք ինձ լսել՝ ասեմ ձեզ, որպէս եղերուք պատճառք ամենայն չարչարանաց մահուն՝ այսօր լերուք պատճառք կենաց ձերոց: Եւ նախարարքն՝ որ կան ի կապանս, ի ձեռն ձեր է իշխանութիւն արձակել զնոսա. և աւեր աշխարհին ձերոյ ձեւք շինի, և բազումք որ վարեալ են ի գերութիւն՝ անդրէն դառնան:

«Ահա դուք ձերոյն աչօքդ տեսէք այսօր, եթէ զորպիսի այր տոհմիկ, զոր թագաւորն ինքնին յականէ յանուանէ ճանաչէր վասն մեծի զիտութեան օրինացս մերոց, և կատարեալ էր յա-

մենայն ի դենիս և ամենայն մեծամեծաց սիրելի, և զբէթէ բոլոր աշխարհս կախեալ էր զնմանէ. և վասն զի անարգեաց զդենի մազդեզն, և պատրեցաւ ի ձեր տխմար գիտութիւնդ, ոչինչ խնայեաց թագաւորն ի մեծ պատիւ նորա, այլ իբրև զգերի մի զանաշխարհիկ շլօթակ արարի զնա յայնչափ օտարութիւն հեռաւոր, զի ընդ երթալն իսկ ոչ ժամանէ ի տեղի պատուհասին իւրոյ:

«Արդ եթէ ի բուն դայեկութիւնն վասն պատուական օրինացն ոչ խնայեաց ի նա, որչափ ևս առաւել ի ձեզ յօտարաշխարհիկսդ, որ մահապարտ իսկ էք յիրս արքունի: Եւ չիք ինչ ձեզ այլ հնար կենաց, բայց եթէ երկիր պազանիցէք արեգական, և կատարիցէք զկամս թագաւորին, որպէս և ուսոյց զմեզ մեծն Զրադաշտ: Եւ եթէ զայդ առնէք՝ ոչ միայն արձակիք ի կապանացդ և ապրիք ի մահուանէ, այլ և մեծամեծ պարգեւօք յուզարկիք յաշխարհն ձեր»:

Յառաջ մատուցեալ Ղևոնդ երէց և թարգման կացոյց զՍահակ եպիսկոպոս. «Զիմորդլուիցութեք, ասէ, երկդիմի հրամանացդ քոց. անազերկրպագութիւնդ նախ ետուր արեգական, և զկատարումն երկրպագութեան ի կամս թագաւորին ձգեցեր. մեծարեցեր զարեգակն՝ յառաջ ձայնելով զանուն նորա, և մեծացուցեր զթագաւորն աւելի քան զարեգակն. և յայտ արարեր՝ եթէ ա-

ռանց կամաց իւրոց սպասաւորէ արեգակնն արարածոց, իսկ թագաւորն ի կամս ազատութեանն իւրոյ՝ զոր կամի աստուածացուցանէ, և զոր կամի ծառայեցուցանէ. և ինքն ի ճշմարտութեանն վերայ չեւ է հասեալ: Մի խօսիր ընդ մեզ իբրև ընդ տղայս, զի հասակաւ կատարեալս եմք, և զգիտութեանն ոչ եմք անտեղեակ: Ուստի սկսար դու, այտի տաց քեզ պատասխանի:

«Ապաքէն զմեզ եղիր պատճառս աւերածոյ աշխարհին մերոյ և հարուածոց զօրացն արքունի. մեր օրէնքն զմեզ այդպէս ոչ ուսուցանեն, այլ յոյժ պատուել հրամայեն զերկրաւոր թագաւորս, և սիրել զնոսս յամենայն զօրութենէ մերմէ, ոչ իբրև զմարդ ոք զուզանքեայ ի մարդկանէ, այլ իբրև Աստուծոյ ճշմարտի կալ ի ծառայութեան. և եթէ զրկիմք ի նոցանէ, փոխանակ ընդ երկրաւորիս զերկնիցն խոստացաւ մեզ զարքայութիւն: Եւ ոչ միայն զարքանեկութիւն հպատակութեան պարտիմք հարկանել նոցա, այլ և մահու չափ զանձինս ի վերայ դնելսիրոյ թագաւորին: Եւ որպէս յերկրի ոչ ունիմք իշխանութիւն փոխանակել զնա ընդ այլում տեառն, նոյնպէս և յերկինս չունիմք իշխանութիւն փոխանակել զճշմարտ Աստուածն մեր ընդ այլում, որ չիք Աստուած բաց ի նմանէ:

«Բայց ասեմ քեզ՝ որում սակաւիկ մի տեղեկագոյն ես: Ո՛վ ի քաջ զօրականէն զկնի մտա-

նիցէ ի պատերազմ. և եթէ զայս արասցէ, ոչ քաջ անուանի նա, այլ յոյժ վատ: Եւ կամ ո՞ յիմաստուն վաճառականաց զպատուական մարզարիտն փոխանակիցէ ընդ անարգ թրուշայի, բայց եթէ յիմարեալ իցէ տգիտութեամբ, որպէս և ձեր մոլորութեան առաջնորդք:

«Միայն զտեր զմեզ ի բազում յառաքինեացն մերոց, և կամիս զողութեամբ աւերել զամուրս խորհրդոց մերոց. չեմք մեք միայն՝ որպէս և դուդ կարծես. չիք տեղի ունայն, ուր չիցէ Քրիստոս թագաւորն մեր. բայց միայն այննորքիկ են թափուր ի նմանէ՝ որ իբրև զքեզ և զչարագև իշխանն քո, որք ուրացեալ էք ի նմանէ: Զի և զինուորք աշխարհին մերոյ—որ աշակերտեալքն էին մեք ի Քրիստոս—առ ոտն հարին զահագին հրամանս թագաւորին ձերոյ, և զմեծամեծ պարգևս առ ոչինչ համարեցան, և զհայրենի տէրութիւնն ի բաց կողոպտեցան, չինսայեցին ի կին և յորդիս և ի գանձս մարմնաւորս կենաց աշխարհիս: Նա և ոչ զարիւնն իւրեանց ածէին զմտաւ ինչ վասն սիրոյն Քրիստոսի, այլ զերկրպագուս արեգականն—որ ձեր վարդապետք էին— շարաշար հարուածովք սատակեցին զնոսա, և մեծամեծ շարիս հասուցին ի վերայ զօրացն ձերոց, և բազումք ի նոցանէ անկանէին ի նմին պատերազմի, և այլք մատնեցան ի պէս պէս փորձութիւնս, և կէսքն ըն-

կեցան ի հեռաւոր օտարութիւն, և ևս բազմագոյնք վարեցան ի գերութիւն: Եւ ամենեքին նոքա յառաջեցին քան զմեզ յարքայութիւնն Աստուծոյ, և խառնեալ են ի գունդս վերին հրեշտակացն, և ցնծան ի պատրաստեալ յուրախութիւնս, յոր հասեալ խառնեցաւ երանելի այրն զոր դու ասես շիթակ արարի: Երանի տամնմա, և երանի երկրին՝ ընդ որ նայն անցանիցէ, և տեղոյն՝ ուր նայն վախճանեսցի. ոչ միայն զարքունեօք ձերովք անցանէ պատուականութեամբ, այլ և զերկնից լուսաւորօք՝ որում դուքդ երկիրպագանէք»:

Ես պատասխանի Մովան հանդերձապետ և ասէ ցնոսա. «Աստուածքն բարերար են, և երկայնատութեամբ ջանան ընդ ազգի մարդկան, զի գիտացեն և ծանիցեն զիւրեանց փոքրիկութիւնն և զնոցա մեծութիւն, և վայելեսցեն ի պարգևս աշխարհիս, զոր տուեալ է յիշխանութիւն ի ձեռս թագաւորի, և ի բերանոյ նոցա ելանեն հրաման մահու և կենաց: Եւ ձեզ ոչ է իշխանութիւն այդպէս ընդդիմանալ կամաց նոցա և ոչ առնուլ յանձն զերկրպագութիւն արեգական, որ ճառագայթիւք իւրովք լուսաւորէ զամենայն տիեզերս, և ջերմութեամբ իւրով հասուցանէ զկերակուր մարդկան և անասնոց. և վասն հասարակարաշխառատութեանն և անաշառ մատակարարութեանն անուանեցաւ Միհր աստուած, զի չիք ի նմա

նենգութիւն և անիմաստութիւն. Վասն որոյ և մեք երկայնամիտ լինիմք ի վերայ տգիտութեան ձերոյ. քանզի չեմք մարդատեացք իբրև զգազանս շաղղակերս և արիւնարբուս: Խնայեցէք յանձինս ձեր, և մի խառնէք զմեզ ակամայ յարիւնզ ձեր: Թողէք անզր զառաջին յանցանս ձեր, և զառաջիկայ իրս ուղղեցէք, զի և այլոցն վասն ձեր լիցի ողորմութիւն ի մեծ թագաւորէն»:

Առ այս ետ պատասխանի Մահակ եպիսկոպոս և ասէ. «Իբրև ուսեալ և յոյժ խրատեալ՝ զգեղեցիկ հոգ յանձին ունիս շինութեան աշխարհի և փառաց թագաւորին. բայց զայս կարի տրգիտաբար ուսուցանես, զի աստուածս բազումս խոստովանիս և զմի կամս ոչ ասես ամենեցուն: Եթէ վեհքն առ միմեանս մարտուցեալ են՝ մեք խոնարհագոյնք քան զնոսա զիմրդ կարասցուք հաւանել բանից քոց: Միաբանեա զՂուր և զկրակ, զի ուսցուք ի նոցանէ զխաղաղութիւն. կոչեա զարեգակն ի տուն որպէս կրակ, և եթէ նմա ոչ մարթի գալ՝ զի մի աշխարհ ի խաւարի մնացէ, յդեա զգա առ նա, զի ուսցի ի նմանէ զանկարօտութիւնն»:

«Եւ եթէ մի է բնութիւն աստուածոցն քոց, հաւասարեսցեն առ միմեանս զուգութեամբ. լիցի անկերակուր կրակ իբրև զարեգակն, և մի խափանեսցին ծառայքն արքունի ի ծախս ոռճկաց սորա: Արդ մինդ անյագ ուտէ, և հանապազ մե-

ռանի. և մինն որ չուտէ, առանց օդոյն նուազի լոյս ճառագայթից իւրոց. ցրտանայ ձմերայնի, և սառուցանէ զամենայն բոյսս գալար խոտոյ. տօթանայ յամարայնի. և հրակէզ առնէ զամենայն կենդանիս: Եւ որ ինքն յար ի փոփոխման կայ, ոչ կարէ հաստատուն կեանս ումեք շնորհել: Եւ քեզ ոչ կարեմ մեղադիր լինել, որոյ ոչ տեսեալ է զմեծ թագաւորն, պատուաւորացն մատուցանէ զերկրպագութիւն. իսկ եթէ ոք զայս ի հմուտ գիտնոցն արասցէ, վաղվաղակի մահ ի վերայ հրամայեն»:

«Այլ վասն արեգական, եթէ կամիցիս ուսանել, զճշմարիտն ասացից քեզ: Մասն է նա աշխարհիս արարածոց, ի բազում մասանց մի մասն որոշեալ է. կէսքն ի վերոյ են քան զնա, և կէսքն ի ներքոյ նորա: Ոչ է նա առանձին սուրբ յստակ լուսով, այլ ի ձեռն օդոյն հրամանաւն Աստուծոյ տարածանէ զճառագայթս իւր, և հրային մասամբ ջեռուցանէ զամենայն գոյացեալս ի ներքոյ իւրոյ կայանին: Իսկ վերինքն ոչ ինչ մասն ունին ի նորա ճառագայթիցն. քանզի իբրև յաման ինչ արկեալ է զլոյսն ի գունդ նորա, և ի վայր կոյս հեղու բերանացեալ՝ առ ի պէտս ներքնոցս վայելչութեան: Եւ զոր օրինակ նաւ մի թռուցեալ ի վերայ ծովային ջուրցն բազմութեան, անգիտութեամբ զնայ զուղևորութիւնն ի ձեռն հմուտ և ճարտար նաւապետին, այսպէս

և արեգակն ի ձեռն կառավարին իւրոյ ունի զփոփոխմունս շրջանին իւրոյ տարևոր ժամանակին:

«Եւ որպէս այլ մասունք աշխարհիս հաստատեալ են վասն մեր կենացն, և զնա իբրև զմի յայլոց մասանց տուեալ է մեզ յառաջնորդութիւն լուսոյ, որպէս զլուսին և զաստեղս և զօդս յարածուփս և զամպս անձրևաբերս. նոյնպէս և յերկրիս մասանց զծով և զգետս և զաղբեւըս և զամենայն պիտանացու շուրս, նոյնպէս և զցամաքայինս ամենայն պիտոյիւք իւրովք: Աստուած՝ և զմի ոք ի սոցանէ չէ արժան աւնուանել. և եթէ ժպրհիցի ոք ասել՝ զանձն ազիտաբար կորուսանէ, և աստուած անունն մեծաբելով զնոսա՝ նոքա ոչ ինչ օգտեցան: Միոյ իշխանութեան երկու թագաւորք ոչ լինին. և եթէ մարդ զայդ քեզ յանձն ոչ առնու, քանի ևս հեռի ի յԱստուծոյ բնութենէն՝ այդպիսի կարգ զփոթեալ:

«Արդ եթէ կամիս ուսանել զճշմարիտն, քաղցրացս զգառնութիւն սրտիդ, և բաց զաչս մտացդ, և մի յարթնութեան կուրութեամբ ընդ խաւար զնայցես. որ անկեալ ես ի խորխորատ. և զամենեսեան կամիս առ քեզ ձգել: Եւ եթէ քոյքն զան զկնի մոլար վարդապետութեանդ՝ որ ոչ տեսանեն և ոչ իմանան, մի և զմեզ կարծեր դոյնօրինակ. քանզի բաց են աչք մտաց մերոց և

սրատեսիլ եմք: Մարմնոյս աչօք զարարածս տեսանեմք, և իմանամք զսա յայմէ արարեալ. և ամենեքեան են ընդ ազականութեամբ: Իսկ արարիչն ամենեցուն աներևոյթ է ի մարմնաւոր աչաց, այլ մտաց իմանի զօրութիւն նորա:

«Եւ վասն զի ետես զմեզ ի մեծի տգիտութեան, և ողորմեցաւ մերում անուսուհնութեանն, յորում և մեք իբրև զձեզդ երբեմն զերևելիսս կարծէաք արարիչ և զործէաք զամենայն անառակութիւնս, վասն այնորիկ առ սէր իւր եկն մարմնացաւ ի մարդկանէ, և ուսոյց մեզ զաներևոյթ աստուածութիւնն իւր: Այն զի բարձրացոյց զինքն ի խաչն կախազանի, և զի մարդիկ զհետ լուսաւորացդ մոլորեցան, մերկեաց յարեգակնէ զլոյս ճառագայթիցն իւրոց, զի եղիցի խաւար սպասաւոր մարդկութեան նորա. զի որ իբրև զձեզ անարժանք իցեն, մի տեսցեն զկեանս իւրեանց ի մեծի անարգութեան: Որպէս և այսօր, որ ոչ խոստովանի զխաչելեալն Աստուած՝ նոյն խաւար մածեալ է զողով և մարմնով նորա. որպէս և դու իսկ այսօր ի նմին խաւարի կաս, և զմեզ դեռ ևս չարչարես: Պատրաստ եմք ըստ օրինակի Տեառն մերոյ մեռանել. որպէս զիարդ և կամիս կատարեա զկամս դառնութեան քո»:

Յայնժամ իբրև հայեցաւ ի նոսա անօրէնն Գենշապուհ, և ետես ի մեծի ուրախութեան

զուարթագին դամենեսեան, զիտաց եթէ ոչ զնան առ նոսա բանք սպառնալեաց և ողոքանաց: Հրամայեաց զմի ոմն ի կրսերագունիցն յառաջ մատուցանել, երէց մի Արշէն անուն, վասն որոյ յառաջ կասկածն իսկ եղև սրբոցն: Կապեցին զոտսրն և զձեռան, և մեծաւ ուժով պրկեցին, մինչև ճարճատիւն հատաւ ամենայն ջղացն. և այնպէս կայր մեծ ժամս յանհնարին պրկոցն:

Եբաց սուրբն զբերան իւր և ասէ. «Ահա շրջեցան զինև շունք բազումք, և ժողովք չարաց պաշարեցին զիս. ծակեցին զոտս իմ և զձեռս իմ, և փոխանակ բերանոյ իմոյ աղաղակեցին ամենայն ոսկերք իմ: Լուր ինձ, Տէր, և լուր ձայնի իմում, և ընկալ զոգի իմ ի ժողովս սուրբ զօրականին քո, որ երևեցաւ նորակերտ դաստակերտին քոյ: Ես որ կրսերս եմ յամենեսեան, ողորմութիւն քո գթացեալ յառաջեցոյց զիս»:

Եւ զայս իբրև ասաց, ոչ ևս կարէր բանալ զբերանն յանհնարին պրկոցաց գելարանին: Եւ անդէն վաղվաղակի զահիճքն հրաման առեալ յերից նախարարացն՝ սրով հատանել զպարանոց երանելոյն, և ընկեցին զմարմինն ի խորխորատ մի ցամաք:

Եւ անդէն ի տեղուջն սկսաւ խօսել Դենչապուհ ընդ եպիսկոպոսին և ասէ. «Յորժամ եկի ես յաշխարհն Հայոց՝ զտարի մի և վեց ամիս եհաս շրջել ինձ անդ. ոչ յիշեմ ես ամենևին՝ ե-

թէ բան մի տրտունջ յուսեքէ լուայ վասն քո, նոյնպէս և առաւել վասն Յովսէփայ. զի դա իսկ էր իշխան ամենայն քրիստոնէից, և հաւատարիմ յամենայն իրս արքունի: Նա և որ մարդպան աշխարհին լեալ էր յառաջ քան զիմ երթալն՝ մեծապէս զոհ էր զանէս զայսմանէ. և ես ինձէն աչօք իմովք տեսի, զի որպէս հայր հաստատուն համարեալ էր ամենայն աշխարհին, և անաշառութեամբ սիրէր զմեծամեծս և զփոքունս:

«Արդ փոխանակ ընդ ձեր՝ ես աղաչեմ զձեզ խնայեցէք ի պատուական անձինս ձեր, և մի մասնիք ի մահ չարչարանաց ըստ առաջնոյն կարգի, զոր տեսէք աչօք ձերովք: Քանզի թէ ի դոյն միտս յամառութեան կայք, և իմ եղեալ է ի մտի իմում. բազում չարչարանօք կարճել զձեզ ի կենաց ձերոց: Ես զիտեմ, զի ի հրապոյր առնդ այդորիկ ելեալ էք դուք. քանզի ինքն ախտացեալ է մարմնով, և ձեռնարկութեամբ բժշկաց չիք գտեալ առողջութիւն. և հիւանդոտ կենօք ձանձրացեալ է, և փափագէ ի մահ քան ի կեանս»:

Առ այս ետ պատասխանի սուրբն Յովսէփ և ասէ. «Գովութիւնդ՝ զոր ետուր դու նախ եպիսկոպոսիդ և ապա ինձ, յիրաւի արարեր և ըստ կարգի պատուեցեր վասն պիեացդ. այդպէս իսկ արժան է: Այլ ճշմարիտ ծառայից Աստուծոյ ոչ է օրէն զիմազարձ լինել երկրաւոր իշխանաց, և ոչ զոք ի ժողովրդոց տրտունջ առնել վասն մար-

մնաւոր զօշաքաղութեան. այլ ցածութեամբ և հեղութեամբ ուսուցանել զպատուիրանս Աստուծոյ, և առանց խարդախ խմաստութեան խաղաղասէր լինել առ ամենեսեան, և անաչառ վարդապետութեամբ առ մի Տէրն արարածոց առաջնորդել բոլորեցունց:

«Այլ վասն առնս այսորիկ հրատուրանաց՝ զոր ասացեր, և զայդ ոչ ստեցեր, այլ կարի զճճմարիտն ասացեր: Զի ոչ իբրև զօտար ոք հրապուրէ զմեզ, և ոչ իբրև զպատրոզ ոք խաբեբայ մոլորեցուցանէ զմեզ, այլ յոյժ սիրէ: Քանզի մի է մայր մեր եկեղեցի՝ որ երկնեացն զմեզ, և մի է հայր մեր սուրբ Հոգին՝ որ ծնաւ զմեզ. զիսորդ համահարք և միոյ մօր որդիք երկպառակք լինիցին, և ոչ միաբանք: Որ քեզ թուին՝ թէ հրապուրք իցեն, մեր ի տուէ և ի գիշերի դոյն խորհուրդ էր՝ զի անքակ ունիցիմք զկենաց միաբանութիւնս: Իսկ եթէ սա ձանձրացեալ իցէ ելանել յախտալից մարմնոյս, առաւել ևս մեք ամենեքեան. զի չիք ոք ամենեկին ի ծնունդս կանանց՝ որ ունիցի զմարմինս առանց ցաւոց չարանոց»:

Ետ պատասխանի Դենշապուհ և ասէ. «Զայդ ոչ զիտէք, սրչափ երկայնամիտ լինիմ ես ի վերայ ձեր. այս ոչ հրամանաւ արքունի է այսչափ երկայնաբան լինել ընդ ձեզ պայքարաւ, այլ յիմմէ քաղցրութենէ թողացուցի ձեզ. զի չեմ իբրև

զձեզ անագորոյն, զի անձանց ատելի էք և այլոց թշնամիք: Իմ զի ազ և հաց կերեալ է յաշխարհին ձերում, գութ և սէր ունիմ ընդ աշխարհն ձեր»:

Ետ պատասխանի Ղևոնդ երէց և ասէ. «Որ առ արտաքինսն գութ և սէր ունի, զպատուիրանսն Աստուծոյ կատարէ, այլ պարտի և յիւր ոգիսն խնայել. զի չեմք անձանց տեսք, այլ է որ համարս խնդրէ ի մէնջ և վասն արտաքնոց և վասն ներքնոց: Այլ որ ասացեր՝ յինէն անսամ ձեզ և ոչ հրամանաւ թագաւորին, եթէ գութ սովոր էք անցանել զհրամանաւ թագաւորին ձերոյ, զայդ բարիոք առնէք, զի աւերիչ աշխարհի է և սատակիչ անմեղ մարդկան, բարեկան սատանայի և թշնամի Աստուծոյ: Այլ մեք ոչ կարեմք անցանել զհրամանաւ մերոյ թագաւորին, և ոչ զանանց կեանսն մեր կարեմք փոխանակել ընդ ապականացու պատրանս աշխարհիս:

«Այլ վասն իմ զի ասացեր՝ չգտեալ զառողջութիւն ի բժշկաց, սիրէ զմասն քան զկեանս, այդ բանք ոչ այնոցիկ են որ տեսանեն զամենայն չարչարանս աշխարհիս: Աղէ ցածո զքեզ սակաւիկ մի ի զայրազին սրամտութենէդ, և եկ զհետ ճշմարիտ բանից իմոց, և հայեաց կարգաւ ընդ իրս աշխարհիս: Ո՞ք ի մահկանացուացս ունի կեանս անարտուունջս. ո՞չ անա ամենայն լի են ախտիւք,

է որ ի ներքոյ և է որ արտաքոյ. ցուրտ և տօթ,  
քաղց և ծարաւ և ամենայն աղքատութիւն կա-  
րօտութեան: Արտաքոյ՝ անխրաւութիւն, յափշտա-  
կութիւն, գէճ պղծութիւն անառակ յարձակմամբ.  
ի ներքոյ՝ ամբարշտութիւն, ուրացութիւն, տգի-  
տութիւն, անգարձ մոլորութիւն ի կամաւոր  
ազատութենէն:

«Բայց դու որ զբժիշկս խոտեալ անարգե-  
ցեր, թէ չիք իմ ի նոցանէ գտեալ զառողջութիւն,  
չեն ինչ զարմանք. վասն զի մարդիկ են նոքա.  
է ցաւ որում գտանեն հնարս առողջութեան, և  
է որ ապստամբէ ի հնարից նոցա. վասն զի ամե-  
նեքեան եմք մահկանացուք, այն որ բժշկէն և  
որ բժշկին: Այլ երանի թէ և դուք ըստ բժշկա-  
կան արուեստին բերէիք զնմանութիւն. զի ոչ  
փոքր է ճշմարտութիւն նոցա բժշկութեանն: Քան-  
զի յորժամ տեսանեն նոքա զոք հիւանդացեալ,  
ոչ յապաղեն երթալ առ նոսա, այլ փութացեալ  
հնարին մատուցանել զառողջութիւն: Մանաւանդ  
եթէ յարքունիս մի ոք ի սիրելեաց թագաւորին  
ախտանայցէ, և հասեալ ի մեծ հրապարակին տե-  
սանիցէ զբազմութիւն պատուաւորացն, և զա-  
ռողջութիւն գեղեցիկ երիտասարդացն, և ևս ի  
ներքս մատուցեալ ի սրահան արքունի, և անդ  
տեսանիցէ զամենայն սպասաւորացն զչքնաղ և  
զսքանչելի տեսիլն, ոչ ինչ զարմանայ ընդ հրա-  
շակերտ տեսիլն: Նա և եթէ գահոյք ականա-

կապք իցեն և համակ ոսկեղէնք՝ յորոց վերայ  
հիւանդն անկեալ զնիցի, չէ ինչ նմա փոյթ  
զայն ամենայնէ. այլ ի բաց հրամայէ առնուլ  
զոսկեհուռ վերարկուան, և ձեռն ի ներքս տա-  
րեալ՝ զննէ զամենայն մարմինն, եթէ ջերմ իցէ  
բնութիւնն, և եթէ սիրտն ի տեղւոյն հանդարտ  
կայցէ, և կամ թէ լեարդն կակո՞ղ իցէ, և կամ  
թէ շարժք երակացն յարմար իցեն. և ըստ նմին  
զգարման բժշկութեանն առնիցէ՝ շնորհելով նմա  
զառողջութիւն:

«Իսկ արդ եթէ մարդկային բժշկութիւնն  
այսպիսի զիտէ քամահել զամենայնիւ, և միայն  
զիւր արուեստն յառաջ մատուցեալ՝ զգործն կա-  
տարէ, որչափ ևս առաւել ձեզ արժան էր, որ  
զբոյր աշխարհս ունիք յիշխանութեան մեծի,  
հոգ յանձին տանել՝ նախ զհոգիսդ բժշկել յամե-  
նայն ախտալից մոլորութեանց աշխարհիս, և  
մարմնովք իսկ կային ամենեքեան ձեզ ի ծառա-  
յութեան: Արդ այժմ զի դուք տգիտացարուք, և  
զանմահ հոգիսդ մահկանացու արարէք յանշէջ  
հուր գեհեհնին, մարմնովդ՝ եթէ կամիք և եթէ ոչ  
կամիք՝ ախտացեալ էք յախտաւորութիւն անա-  
ռողջութեան. և զմեզ նախատէք մարմնոյ ցաւովք,  
որ ոչ ի կամս մերոյ ազատութեան է, այլ որ-  
պէս զիպեցաւ ի բնութեանս մարմնոյ իւրաքան-  
չիւր մարդոյ:

«Եւ Քրիստոս ճշմարիտ Աստուած կենդա-

նարար՝ ի կամս իւրոյ բարերարութեան եղև բժիշկ հողուց և մարմնոց. և նախ ինքն ի ցաւս շարչարանաց իւրոց բժշկեաց զամենայն ազգս մարդկան: Եւ ևս խանդաղատագոյն զթացեալ, վերստին ծննդեամբն ծնեալ զմեզ յառողջութիւն՝ անցաւ և անվէրս, և ի ծածուկ հարուածոց զհին ծակոտուածան վիշապին ողջացոյց, և արար զմեզ անսպիս և անարատ հողով և մարմնով, զի իցեմք բանակակից հրեշտակաց և զօրք երկնաւոր թագաւորին մերոյ: Եւ քո զայս ոչ զիտացեալ, և ոչ վայելեալ յերկնաւոր պարգևսն Աստուծոյ, և ոչ ևս այլ կամիս ուսանել ի մէնջ. այլ և զմեզ ևս վրիպեցուցանել կամիս, որում չիք հնար, և մի այլ լիցի, և ոչ կարես իսկ առնել:

«Այլ վասն իմոյ ախտալից մարմնոյս ասացից քեզ կարճառօտս: Խնդամ և ուրախ եմ յորժամ տեսանեմ զմարմինս իմ շարչարեալ. զիտեմ զի զօրանայ յիս առողջութիւնն հողուցս իմոյ: Մանաւանդ զի ունիմ ինձ գրաւական զմեծ վարդապետն հեթանոսաց, որ ի ցաւս մարմնոյ անձին մխիթարէր, և ի կուփումս սատանայական մարմնոյ պարծէր, և ասէր. «Զի եթէ անկակիցք եղաք նմանութեան մահու նորա, սրչափ ևս առաւել լիցուք հաղորդք յարութեան նորա»: Այլ դու որ ունիս իշխանութիւն ի վերայ մեր, դատեա զմեզ ըստ շարութեան կամաց քոց: Զեմք ինչ զանգիտելոց յահագին յահաւոր սպառնալեացդ

քոց, և ոչ երկիւղած ի դառն մահուանէն՝ զոր ածելոց ես ի վերայ մեր»:

Յայնժամ մեկուսացոյց սակաւիկ մի զերանելիսն ի միմեանց, և միայն ասէ ցտուրբ եպիսկոպոսն. «Գովութիւն զոր ետու քեզ յառաջ, ոչ իմացար պատիւ անձին քոյ: Յիշեցուցանեմ քեզ զչարիսն զոր գործեցեր դու, զի անձամբ զանձն քո արասցես մահապարտ: Արդարև դ՞ու աւերեցեր զատրուշանն յիշտունիս, և կամ զկրակն դ՞ու սպաներ. նա և որպէս լուայ և ստուգեցի, թէ և զմոզան դու շարչարեցեր, և զսպաս պաշտամանն դու տարար. արդ եթէ արդարև դու առեր, պատմեա ինձ»:

Ետ պատասխանի սուրբն և ասէ. «Ա՛րդ կամիս ուսանել զայդ յինէն՝ եթէ յառաջագոյն զիտէիր»:

Դենշապուհ ասէ. «Այլ է համբաւ, և այլ է ճշմարտութիւն»:

Եպիսկոպոսն ասէ. «Որպէս կարծեսդ՝ ասա ինձ»:

Դենշապուհ ասէ. «Իմ լուեալ էր՝ եթէ զամենայն փնասն յիշտունիս դու արարեր»:

Եպիսկոպոսն ասէ. «Եւ զի այդպէս հաւատեալ ի վերայ հասեր, կրկին զի՞ հարցանես»:

Դենշապուհ ասէ. «Զճշմարիտն ի քէն կամիմ ուսանել»:

Եպիսկոպոսն ասէ. «Ոչ զօգուտ կենաց քոց կամիս ուսանել յինէն, այլ արեան իմոյ ցանկան միտք քո»:

Իենշապուռն ասէ. «Զեմ գաղան արիւնսխանձ, այլ վրէժխնդիր եմ աստուածոցն անարգութեան»:

Եպիսկոպոսն ասէ. «Զտարերս համերս աստուածս անուանես, և զպատկերակիցս քո մարդիկ խողխողել կամիս. տալոց հատուցանելոց ես վրէժ թագաւորաւն քով յանկաշառ ատենին Սատուծոյ: Եւ զոր քո շար կամօքդ կամիս լսել յինէն, զայդ ես ասեմ քեզ: Զտունն արդարեւ ես աւերեցի, և զմոզան շարշարեցի գանիւ, և զկահ պղծութեան որ ի տանն էր՝ ի ծոփս ես ընկեցի: Այլ զկրակ ո՞վ կարէ սպանանել. քանզի ամենիմաստ արարիչն արարածոց հոգ խնամոյ տարեալ յառաջագոյն՝ անմահս հաստատեաց զբնութիւն շորից նիւթոցս: Աղէ սպան դու զօդ՝ եթէ կարես, և կամ ապականեա զհող՝ զի մի բուսուցէ զգալարի, փողոտեա զգետ՝ զի մեռցի: Եթէ զայդ երեսին կարես առնել, ապա և զկրակ կարես սպանանել:

«Ապա եթէ ճարտարապետն մեր միաբանեաց զշորից տարերացդ զանքակութիւն, յահա և գտանի բնութիւն հրոյ ի քարինս և յերկաթս և յամենայն տարերս զննելիս, ընդէր ստութեամբ զրպարտես զիս՝ թէ դու զկրակ սպաներ: Աղէ

դու սպան զՉերմութիւն արեգական, զի ունի նա մասն հրոյ, և կամ տուր հրաման՝ զի մի թափեսցի հուր յերկաթոյ: Մեռանի այն որ շընչէն և շարժի և զնայ և ուտէ և ըմպէ. երբ տեսներ դու զկրակ դնայուն կամ խօսուն կամ զիտուն: Արդ զոր կենդանի քո չէ տեսեալ՝ մեռեալ խոստովանիս: Գանի անթողի է ամբարշտութիւնդ ձեր քան զամենայն հեթանոսաց, որ զիտնագոյնք են քան զձեզ. որ թէպէտ և ի ճշմարիտն Աստուծոյ մոլորեալ են, զանխօս տարերս աստուած ոչ խոստովանին: Արդ եթէ դու անզիտութեամբ կորնչելի ասես զբնութիւն հրոյ, ոչ առնուն քեզ յանձն արարածքս. քանզի խառն է դա յամենեցունց»:

Իենշապուռն ասէ. «Ոչ ինչ մտանեմ ես ընդ քեզ ի պայքար քննութեան վասն բնութեան արարածոցս. այլ խոստովանեա ինձ, եթէ դ՞ու անցուցեր զկրակն՝ եթէ ոչ»:

Պատասխանի ետ երանելին և ասէ. «Որովհետեւ ոչ կամեցար լինել աշակերտ ճշմարտութեանն, ասայից զկամս հօրն քո սատանայի: Ես ինձէն մտի ի կրակատունն ձեր, և տեսի զի կային պաշտօնեայք ամբարշտութեանն սնտոի կարծեացն ձերոց. և կրակարանն լի հրով առաջի նոցա բորբոքեալ այրէր: Հարցի ցնոսա բանիւ և ոչ գանիւ, թէ զի՞նչ համարիք ի միտս ձեր զկրակ պաշտամանս այսորիկ: Ետուն պատաս-

խանի և ասեն: Մեք ինչ ոչ գիտեմք. բայց այս-  
չափ ինչ իմանամք, զի սովորութիւն է նախ-  
նեացն և հրաման բուռն թագաւորին:

«Ասեմ դարձեալ ցնոսա. եւ զբնութիւն կրա-  
կիդ զի՛նչ իմանայք. արարի՛չ կարծէք, թէ ար-  
րարած: Ասեն միաբան ամենեքեան. Արարի՛չ մեք  
զդա ոչ գիտեմք, նաև ոչ հանգուցիչ աշխատե-  
լոց: Ձեռք մեր փապարեալ են ի կացնի, և ո-  
ղունք մեր տեռեալ են ի փայտակրի. աչք մեր  
գիշացեալ են արտասուօք ի կծութենէ ծխոյ դո-  
րա, և երեսք մեր մրտտեալ են ի խոնաւութեանց  
թանձրութենէ նորին ծխոյ: Եթէ շատ մատու-  
ցանեմք նմա զկերակուրն, յոյժ քաղցնու. և եթէ  
բնաւ չտամք, ամենեկին անցանէ. և եթէ մօտ  
երթամք և երկիր պագանեմք, կիզու զմեզ.  
և եթէ ոչ երթամք մօտ ամենեկին, մոխիր լինի:  
Մեր այդպէս հասեալ է ի վերայ բնութեան դորա:

«Ասեմ դարձեալ ցնոսա. Իսկ լուեալ է ձեր՝  
եթէ այր ուսուցեալ է ձեզ զայդպիսի մոլորու-  
թիւն: Ետուն պատասխանի և ասեն: Զի ի լսելոյ  
հարցանես զմեզ, այլ հայեաց ընդ առաջիկայ  
իրադ. զի օրէնսդիրքն մեր հոգւովք մտաց միայն  
կուրացեալ են, այլ թագաւորն մեր մարմնով  
միով ակամբն կոյր է, այլ ոգւոյն բնաւ չիք  
իսկ աչք:

«Վասն այնորիկ և ես իբրև լուայ զայս ի  
մոզուցն, յոյժ ողորմեցայ. զի տգիտութեամբ

զարդարն խօսեցան: Սակաւիկ մի չարչարեցի  
զնոսա. գանիւ, և նոցուն իսկ ետու զկրակն ի  
ջուրն ընկենուլ, և ասացի այսպէս. Աստուածք  
որ գերկինս և գերկիր ոչ արարին՝ կորիցեն ի  
ներքոյ երկնից. և ապա զմոզան ի բաց արձա-  
կեցի»:

Զայս ամենայն իբրև լուաւ Դենշապուհ ի  
բերանոյ սուրբ եպիսկոպոսին, անհնարին գահի  
հարաւ ի թշնամանաց թագաւորին և յանարգա-  
նաց դենին: Վասն որոյ և երկեալ իսկ մատու-  
ցանել զնա ի տանջանս հարուածոց, թէ գուցէ  
այլ ևս մեծ անարգանս զթագաւորէն տացէ ասել  
յատենին, և ի նա ձգիցին կարծիք թշնամանացն,  
զի երկայնատութեամբ պայքարեցաւ ընդ նոսա:

Եւ քանզի սուսեր ընդ մէջ ածեալ նստէր  
յատենի ահարկանելով սրբոցն, գոչեաց իբրև  
զառեւծ գայրազին, և հանեալ զսուսերն՝ գաղա-  
նաբար յարձակեցաւ ի վերայ երանելեացն, և ե-  
հար եպիսկոպոսին գաջ ուսն, թիկամբն հետ և  
զձեռն ի վայր ընկէց: Եւ նորա յահեակ կողմն  
յերկիր անկեալ, և դարձեալ անդրէն պատասպա-  
րէր, առնոյր գաջ ձեռն ի վեր. աղաղակեաց մե-  
ծաձայն և ասէ. «Ընկալ, Տէր, զկամաւոր պա-  
տարագս՝ որ ինձէն զիս քեզ մատուցի բոլորովիմ,  
և խառնեա զիս ի գունդս սուրբ զինուորացն քոց»:

Դարձեալ քաջալերէր զընկերակիցսն իւր և  
ասէր. «Հնապա առաքինիք, եհաս ժամ կատար-

ման մերոյ. խցէք զաչս մարմնոյ վայր մի, և այժմ տեսանէք զյոյան մեր Քրիստոս: Եւ թաւալելով ընդ արիւնն անձինն իւրոյ ասէր. «Օրհնեցից զՏէր. յամենայն ժամ, հանապազ օրհնութիւն նորա ի բերան իմ: Ի տէր պարծեսցի անձն իմ, յուրիցեն հեզք և ուրախ եղիցին»: Եւ ասելով զսաղմոսս զայս կատարէր մինչև ցայս տեղի. «Բազում նեղութիւնք են արդարոց. յամենայնէ փրկէ զնոսս Տէր և պահէ զամենայն ոսկերս նոցա»:

Եւ մինչդեռ կայր յուժի մարմնոյն սակաւիկ մի, իւրովք աչօք իսկ հայեցեալ տեսանէր յերկնից եկեալ գունդս բազում հրեշտակաց և վեց պսակ ի ձեռին հրեշտակապետին: Դարձեալ և լսէր ևս բարբառ ի վերուստ, որ ասէր. «Քաջաբերեցարուք, սիրելիք իմ. զի ահա մոռացայք զվշտալի կեանսդ, եւ հասէք երանելի պսակացդ՝ որ ձերով ճարտարութեամբդ կազմեցէք. առէք դիք յիւրաքանչիւր գլուխ: Զի նիւթ պատրաստական ի ձէնջ հիւթեցաւ, իսկ ճշմարտութիւն զորձոյդ յամենասուրբ ձեռացն Քրիստոսի կազմեցաւ. զոր ի սպասաւորաց այտի իսկ ընկալեալ ընդ Ստեփանոսի լինիք պնակակիցք: Նա և զայն ևս քաջապէս տեսանէր, զի դեռ ևս շողայր սուրն ի վերայ պարանոցի երանելեացն:

Զոր իբրև ետես սուրբն Ղևոնդ, եթէ ոչ ևս զմի մի կամին հարցանել և դատել, այլ միան-

զամայն հրաման եղև մահու, ասէ ցերանելին Յովսէփ. «Մատիր, յառաջեա ընդդէմ սրոյն, զի դու աստիճանաւ ի վեր ես քան զամենեսեան»: Եւ զայս իբրև ասաց, կարգեցան կացին մի ըստ միոյէ. և առ ձեպ տագնապի ստիպելոյ դահճացն՝ միանգամայն հատին ընկեցին զպարանոցս երանելեացն առաջի սուրբ եպիսկոպոսին. և նորա ընդ հանել ոգւոցն աղաղակեաց և ասէ. «Տէր Յիսուս, ընկալ զոգիս մեր ամենեցուն, և խառնեա զմեզ ի գունդս սիրելեացն քոց»: Եւ միանգամայն կատարեցան ամենեքեան ի նմին տեղուջ:

Եւ եթէ զմոզպետն ևս՝ որ հաւատաց ի Քրիստոս՝ կամիցիս ընդ նոսա ի համար արկանել, թուով են եւթն. թող զերկուսն ևս որ ի Վարդէան կատարեցան, և մեւս եպիսկոպոսն ԹԱԹԻԿ անուն յասորեստանի: Բայց անդէն ի տեղուջն վեցեքին, որոց անուանքն են այսոքիկ.

ՍԱՀԱԿ եպիսկոպոս յիշտունեաց.

Սուրբն ՅՈՎՍԵՓ ի Վայոց ձորոյ ի գեղջէ Հողոցմանց.

ՂԵՒՈՆԻ երէց ի Վանանդայ ի գեղջէ Իջաւանից.

ՄՈՒՇԷ երէց յԱղբակոյ.

ԱՐՇԷՆ երէց ի Բագրևանդայ ի գեղջէ յԵղեգեկայ.

ՔԱԶԱԶ սարկաւագ՝ ուստի եպիսկոպոսն էր Ռշտունեաց:

Իսկ երանելի ՄՈԳՊԵՏՆ ի Նիւշապուհ քաղաքէ:

ՍՍՄՈՒԷԼ երէց յԱյրարատոյ՝ ի գեղջէ յԱրածոյ:

ԱԲՐԱՀԱՄ սարկաւագ ի նմին գեղջէ:

Արդ զվեց զայս սուրբս յանապատին՝ ուր կատարեցին, Դենշապուհ, մոզպետն և Զնիկանն և մայպետն անդէն ի տեղուջն պահապանս ընտրեցին յիւրաքանչիւր սպասաւորացն, և պահել հրամայեցին զմարմինս երանելեացն ցաւուրս տասն կամ ևս աւելի, մինչև կարաւան արքունի անցեալ գնայցէ. զի մի ալլաղենքն եկեալ բառնայցեն զոսկերս զոցա, և բաշխեալ սփռեսցեն ընդ աշխարհս ամենայն, յոր և մարդիկ ևս առաւել յորդորեալ մոլորիցին զկնի նածարացւոց ազանդին:

Իսկ Սուժիկն, զոր յառաջագոյն ասացաք, զինու հանդերձ մնայր անդէն ընդ պահապանսն որպէս զմի ի նոցանէ, այր լի իմաստութեամբ և կատարեալ աստուածային գիտութեամբ, սպասէր և գէտակն ունէր՝ եթէ որով օրինակաւ հնարս գտցէ զոսկերս սրբոցն զողանալ ի նոցանէ:

Եւ իբրև աւուրք երեք անցին ի վերայ, արհաւիրք մեծ անկանէին ի վերայ ամենեցուն, և իբրև թմբեալ և կիսամեռք անյարիրք անկեալ

դնէին գերիս աւուրան: Իսկ ի չորրորդում աւուրն՝ երկուք ի պահապանացն չարաչար լլկեցան ի դիւէ: Դարձեալ հասարակ գիշերաւ չափ՝ ձայնք անեղբ հնչէին, և թնդիւնք որոտածայնք ի ներքուստ՝ որպէս գորդումն գետնաշարժի. երկիրն զողայր ի ներքոյ նոցա, և շողիւնք սուսերաց փայլատակունս արձակէին շուրջ զնոքօք: Եւ զամենեսեան զգիակունսն կանգնեալ տեսանէին, և զնոյն բանս ատենին անագինս բարբառէին ի լսելիս նոցա. մինչև խուճապել նոցա ընդ միմեանս, գեռ ևս զիրեարս սատակէին: Եւ այսպէս տագնապեալք և ցնորեալք, մինչև այր զընկեր ի փախուստ չգիտէր ընդ որ երթայր: Եւ եկեալ պատմէին մեծաւ զարմացմամբ զամենայն անցս չարչարանացն զոր կրեցին:

Ի խորհուրդ մտին նախարարքն երեքեան, և սկսան զարմանալով ասել ցմիմեանս. «Զինչ գործեսցուք, զինչ արասցուք վասն անքնին աղանդոյն քրիստոնէից. քանզի մինչդեռ կենդանի էին, զարմանալի էր կեանք նոցա. ընչատեսցք էին իբրև զանկարօտս, սրբասէրք էին իբրև զանմարմինս, անաչառք էին իբրև զարգարագատս, աներկեւղք էին իբրև զանմահս: Եթէ զայս ամենայն ասեմք իբրև զտգիտաց և իբրև զյանդգնելոց, իսկ զայն զի՞ առնիցեմք՝ զի ցաւոտք ամենայն ի կարաւանի աստ նոքօք առողջանան: Եւ կամ որ մեծս է քան զայդ ամենայն, ոյր

ուրուք զի կանգնեալ երևեցաւ ի կենդանեաց, կամ բարբառ բանից ոք լուաւ ինմանէ:

«Զի սուտ չեն մեր սպասաւորքն. մեր մեզէն իսկ հասեալ է ի վերայ ստուգութեան սոցա: Եւ եթէ կամեցեալ էր սոցա մարմնաւոր ինչ ազահութիւն ի ներքս խառնել, սակաւ մի ակնարկէին քրիստոնէից ի կարաւանիս, զկշիռ իւրաքանչիւր մարմնոց նոցա ոսկի առնուին: Դարձեալ և արքդ, որ ի դիւէ չարչարեցան, զի յայնժամ ցաւոտք չէին՝ և մեք գիտեմք. յայտ է եթէ այսօր նշան մեծ երևեցաւ: Եթէ լուռ լինիմք այսպէս, մեզ և անձանց մերոց կասկած իսկ է. և եթէ տանիմք զդոսա առաջի թագաւորին, լսելով նորա ի դոցանէ գայդ ամենայն մեծամեծ սքանչելիս, գուցէ և օրինացս մերոց քակտումն ինչ հասանիցէ»:

Ետ պատասխանի մոզպետն և ասէ ցնոսա. «Ո՛չ զիս ոստիկան արարին ի վերայ ձեր երկոցունցն. զի՞ այդչափ նեղեալ տազնապիք յանձինս ձեր. դուք զգործ ձեր կատարեցէք, և զհրամանն արքունի ի գլուխ տարայք: Արդ եթէ համբաւդ այդ յայտնեսցի, և հարցափորձ ինչ լինիցին առաջի արքային, այդ ինչդիր մեր մոզաց է. դուք անհոգ լերուք, և մի ինչ ածէք զմտաւ: Եւ եթէ զարհուրեցայք ինչ յոգիս ձեր, վաղագոյն առաւօտուցն ի դարի-թիւր եկայք. զի վա-

զիւ անդ: Մովպետան մովպետ ուստ՝ յագէ. և նոյն հաճեալ հաւանեցուցէ զմիտս ձեր»:

Իսկ Խուժիկն իբրև լուաւ զայս ամենայն, և զիտաց՝ եթէ փոյթ ինչ ոչ է նոցա յայնմհետէ սուրբ սպանելոցն, փութացաւ վաղվաղակի էառ տաան այր, որոց զչափ գիտէր զքրիստոնէտութեանն, և հասեալ ի տեղին՝ շէն եզիտ զամենեսեան: Եւ քանզի կասկած ունէր տակաւին ի նոցուն ի դահճացն, դարձեալ փոխեցին անտի զսուրբսն յայլ տեղի բացագոյն իբրև երկու հրասախօք: Եւ իբրև յանհոգս եղեն, սրբեցին կազմեցին զոսկերս երանելեացն. բերին ի բանակն և ունէին ի ծածուկ. և ան սակաւսակաւ յայտնեցին նախ զօրականին Հայոց, և ապա բազում քրիստոնէիցն որ էին ի կարաւանին: Եւ զառաջին պտուղ ընծային մատուցանէին կապեալ նախարարացն. և անդէն վաղվաղակի արձակեցան նոքա ի կապանաց իւրեանց, և սպառնալիք մահուանն անցին զնոքօք, և հրովարտակք թողութեան առաքեցան յաշխարհն Հայոց:

Արդ երանելի այս Խուժիկս, որ արժանի եղել ի ծածուկ սպասաւոր լինել սրբոցն, որ ինչ ի մահուանէն և այսր ասացաւ դատակնիք վճռիս այսօրիկ՝ սա երկրորդեաց մեզ զամենայն կարգաւ. զչարաչար քարշումն, և զհարց և զփորձ դատաւորացն, և զիւրաքանչիւր անձանց սրբոցն զպատասխանիսն, և զկատարումն մահուան նո-

ցա, և զահագին արհաւիրսն որ ի վերայ պահապանացն անկաւ, և զհեծեծումն քննութեանն նախարարացն երեցունց, և զամփոփումն սուրբ ոսկերաց նոցա ոչ խառն ի խուռն ի մի վայր ժողովելով, այլ զմի մի ի նոցանէ ուրոյն ի վեց տապանս ժողովէր, և զանուանս իւրաքանչիւր ուսեալ և ի վերայ տապանացն նշանակեալ էր: Եւ զկապանսն երկաթիս ընդ իւրաքանչիւր ոսկերսն եգեալ էր, քանզի դահճացն ի բաց ընկեցեալ էր. որպէս և զհանդերձս զիւրաքանչիւր տապանակի նշանակեալ էր:

Եւ կատարեցան սոքա վեցեքեանս սուրբ և ցանկալի մահուամբն իւրեանց որ օր քնանս և հինգ էր հրոտից ամսոյ՝ ի մեծ անապարհին յԱպար աշխարհի ի սահմանս Նիւշապուհ քաղաքի:

Վ Ա Ս Ն

ԽՈՍՏՈՎԱՆՈՂԱՅՆ ՀԱՅՈՑ

ԽՈՐԵՆԱՅ ԵՒ ԱՐՐԱՀԱՄՈՒ

Իսկ աշակերտք երանելեացն ի կապանս կային ի ներքս ի քաղաքին. եկն դահճապետ մի արքունի և եհան զնոսա ի քաղաքէ անտի արտաքս:

Եհան ի նմին քաղաքէ ասորեստանեայս քրիստոնեայս արս հինգ, քանզի և նոքա ի կապանս էին վասն անուանն քրիստոսի. եհարց զնոսա բանիւք, և ոչ հաւանեցան երկիր պագանել արեգական: Չարչարեաց զնոսա զանիւ, և նոքա ևս առաւել ի նոյն միտս պնդեցան. կրտրեաց զնոցա դէնչս և զականջս, և ետ տանել յԱսորեստան, զի կայցեն ի մշակութեան արքունի: Երթային մեծաւ յօժարութեամբ, իբրև այն թէ մեծ պարգևս գտեալ ի թագաւորէն:

Արդ եկն դարձեալ նոյն դահճապետն անաշակերտս սուրբ սպանելոցն, ընտրեաց երկուս

ի նոցանէ որ համեստագոյնք էին, առեալ մեկուսի յայլոցն և ասէ ցնոսա. «Ձի՛նչ անուանք են ձեր»:

Ետ պատասխանի մին և ասէ. «Առ ի ծնողաց ինձ Խորէն, և դմա Աբրահամ. իսկ ըստ շնորհատուր կարգիս՝ ծառայք Քրիստոսի եմք, և աշակերտք երանելեացն զոր սպանէք»:

Ետ պատասխանի դահճապետն և ասէ ցնոսա. «Իսկ արդ զի՛նչ գործ է ձեր, և կամ բնաւ ո՞յր իսկ ածեալ է զձեզ այսր»:

Առ այս ետ պատասխանի Աբրահամ և ասէ ցնոսա. «Ձայդ ձեզ ի վարդապետաց մերոց արժան էր ուսանել. զի ոչ դուզնաքեայք ոք էին նոքա, այլ ունէին ստացուածս հայրենիս ըստ արժան բաւականին, ըստ նմին և սպասաւորս, էր որ իբրև զմեզ, և էր որ լաւագոյնքան զմեզ. որոց մնուցեալ և ուսուցեալն էր, ընդ նոսա եմք եկեալ: Քանզի և պատուէր իսկ ունիմք. յաստուածատուր օրինացն մերոց՝ սիրել զնոսա իբրև զսուրբ ծնողս, և սպաս տանել նոցա իբրև հոգևոր տերանց»:

Յասեաւ դահճապետն և ասէ. «Իբրև զանխրատ և զաներկիւղ ստամբակս խօսիս: Մինչդեռ ի խաղաղութեան և յաշխարհի էիք, բարիք էր. յորժամ զբուհ եղեն նոքա յիրս արքունի և մահապարտ գտան ըստ զործոց իւրեանց, ձեզ չէր արժան ամենևին մօտ երթալ առ նոսա: Ո՛չ տեսանէք ի մեծ կարաւանիս. յորժամ ոք ի պա-

տուաւորացն ի դիպահոջն արքունի լինիցի, սգոյ հանդերձ ազանի, և զատեալ որոշեալ ի բացէ նստի միայնիկ, և ամենևին հուպ ոչ ոք իշխէ երթալ առ նոսա: Եւ դու այդպէս իբրև զանյանցի աշակերտ պարծելով խօսիս»:

Առ այս ետ պատասխանի Խորէն և ասէ. «Ոչ ձեր կարգդ անիրաւ է և ոչ մերս ստույթեամբ. նախարարն յանցաւոր՝ ուստի զպարզեն գտեալ էր, այնպէս պարտ էր նմա հպատակ լինել, զի ի պատուոյն վերայ և այլ ևս պարզես մեծամեծս գտանէր ի նմանէ: Արդ փոխանակ զի զայն չարար, ճախողակի յետս ընդդէմքն պատահեաց նմա: Եւ մեր վարդապետքն եթէ առ Աստուած յանցուցեալ էին, և կամ առ թագաւորն մեղուցեալ ինչ էին, նոյն օրինակ և մեք առ նոսա առնէաք. ոչ յաշխարհի մօտ երթայաք, և ոչ ի տար աշխարհ այսր զնեա նոցա գնայաք: Բայց քանզի առ երկոսին կողմանսն արդարութեամբ կեցեալ են, և դուք զուր տարապարտուց սպանէք զնոսա, մեք արդևս առաւել սպասաւորեմք սուրբ ոսկերաց նոցա»:

Ասէ ցնա դահճապետն. «Ես յառաջագոյն իսկ ասացի՝ եթէ կարի ստամբակ ոմն ես դու. ահա յայտ եղեւ աւաղիկ, եթէ յամենայն վիսաս նոցա խառն էք դուք»:

Աբրահամ ասէ. «Յո՞ր վրաս»:

Դահճապետն ասէ. «Առաջին ի մահ մո-

գուցն, ապա և յայլս ամենայն»։  
 Աբրահամ ասէ՝ «Այդ ոչ միայն ի մէնջ է, այլ ըստ կարգի և ձերոց օրինացդ. թաղաւորք ձեզ տան հրաման, և դուք ի ձեռն ձերոց սպասաւորացդ գործէք»։

Դահճապետն ասէ. «Ի Միհր աստուած երդուեալ իմ. խստագոյն ևս խօսիս քան զվարդապետն քո. յայտ է եթէ վասնակարագոյն ևս էք դուք. Արդ ոչ է հնար ձեզ ապրել ի մահուանէ, բայց եթէ երկիր սպազանէք՝ արեգական, և կատարիցէք զկամս օրինաց մերոց»։

Խորէն ասէ. «Յայժմ իբրև զմարդ չարախօսէիր, և արդ իբրև զչուն անպիտան ընդ վայր հաջես։ Եթէ գոյր արեգական ականջք, դու տայիր նմա թշնամանս Գնել. արդ նա քնութեամբ անզգայ է, և դու չարութեամբ անզգայագոյն քան զհարսն մեր. մի բանիւք զփորձ առնուլ կամիս զմեր, այլ հանդէս արա՛ քում. չարութեանդ և մերում բարութեանս, և ամաչեցեալ գտանի հայրն քո սատանայ, ոչ միայն ի մէնջ որկատարելագոյնքս եմք, այլ և որ կարիփոքրիկն թուի քեզ՝ նա զիցէ վէրս սաստիկս յոգիս և մարմինս քո»։

Չայս իբրև յուսաւ դահճապետն, սրտմտեալ բարկացաւ ի վերայ նոցա և տ քարշել չարագոյն քան զառաջինսն. և այնչափ սաստիկ քարշեցին, մինչև բազմաց կարծիք եղեն՝ թէ մեռան։

Իսկ իբրև ժամք երեք ի վերայ անցին, դարձեալ խօսել սկսան երկոքեանն և ասեն. «Փոքր համարիմք զանարգանս զայս և առ ոչինչ զցաւս մարմնոյս առ մեծ սէրն Աստուծոյ, որով կատարեցան հարքն մեր հոգևորք։ Հնապ մի դլար և մի դադարեր, այլ զոր ինչ առ նոսայն արարեր՝ զնոյն և առ մեզ կատարեաւ. Եթէ չարագոյն թուին քեզ գործքն նոցա, կրկին և զմերս համարեսցիք. զի նոքա բանիւք հրամայէին, և մեք գործովք զարդիւնսն կատարէաք»։ Յայնժամ ևս առաւել զայրազնեցաւ ի վերայ նոցա, և հրամայեաց զմահու գան հարկանել։ Եւ առ մի մի ի նոցանէ փոխեցաւ վեց վեց այլ ի դահճացն. և մինչդեռ կիսամեռք յերկիր անկեալ զնէին, հրամայեաց զերկոցունց ականջս մօտ կտրել։ Եւ այնպէս բրեցին՝ որպէս թէ չիցէ լեալ ի տեղւոյն։

Զարթեան որպէս ի քնոյ ի սաստիկ հարուածոցն, սկսան աղաչելով պաղատանս մատուցանել, և ասեն. «Աղաչեմք զքեզ, քաջ զինուոր թագաւորին. կամ կատարեա զմեզ իբրև զհարսն մեր մահուամբ, և կամ արա՛ զպատու հասդ ըստ օրինակի վերջնոցս։ Զի ահա լսելիք մեր առողջացան զանախտաւորութիւն երկնաւոր, իսկ հոտոտելիքս դեռ ևս աստէն ի տեղւոջ կան յանցս չարչարանաց. մի կիսապարգև առնեք զմեզ յերկնից բարութեանէն։ Սրբեցեք

զմարմինս մեր քարչելով, և զլսելիս մեր կտրելով. սրբեա և զոնգունս մեր հատանելով. քանզի որչափ տգեղս տունես զմեզ երկրաւորաւս, զեղեցկագոյնս առնես զմեզ երկնաւորաւս»:

Ետ պտտասխանի հեղութեամբ դահճապետն և ասէ. «Եթէ և այլ յամեմ ես առ ձեզ մօտ կալով, կարծեմ եթէ և աշակերտէք զիս ի ձեր յամառութիւնդ: Զի անաւարդ և զխորհուրդս արքունի ի վեր հանեմ ձեզ. ծայր վայր եղև հրամանս պատուհասիդ ձերոյ, և ի վերայ դորին պատուհասի՝ երթալ ձեզ յԱսորեստան, և լինել ձեզ մշակ յարքունիս. զի որ ընդ ձեզ հայեսցի՝ մի ի դմին յամառութեանս պնդեսցի ընդդէմ հրամանաց թագաւորին»:

Ասեն ցնա երանելիքն. «Դու զմեր երկիրս կիսագործ թողեր. մեր յարքունի երկիրն կէս մարմնովք մերովք ոչ վաստակեմք»:

Իբրև զայս լուաւ դահճապետն, աղաչեաց զգինուորսն որ տանէին զնոսայ և ասէ. «Միայն աստի դուք անէք զնացէք, և հասեալ յԱսորեստան՝ ուր կամ իւրեանց է և շքչեսցին»:

Այս են Հայոց խոստովանողք, որ զլսեղութիւնն և զչարչարանսն խնդութեամբ ընկալան յանձինս իւրեանց: Եւ վասն զի վրիպեցին ի սուրբ մահուանէն, սգով և տրտմութեամբ երթային զերկայնութիւն ճանապարհին: Ոչ ծանր թուէին նոցա կապանք ոտիցն և ձեռացն, իբրև

զայն՝ թէ ընդէր ոչ եղաք արժանի հաւասարել ընդ քաջ նահատակսն:

Եւ իբրև տարան հասուցին զնոսայ երկիրն Բաբելոնաց, ի գաւառ մի գոր Շանուղն անուանեն, թէպէտ և էին յարքունի պատուհասին, սակայն և յայտ և զադտ մեծապէս ընկալեալ եղին ի բնակչաց աշխարհին: Սակայն երանելիքն և յայնմ յոյժ տրտմագին էին, իբր այն՝ եթէ սակաւ վաստակեցաք և մեծապէս հանգչիմք և հանապաղ ի նմին զեղջի կային:

Եւ անդէն թեակորէին տեսանել զսուրբ կապանսն նախարարացն, լինել սպասաւոր մարմնաւոր պիտոյից նոցա: Իմացուցին զայս մեծամեծաց աշխարհին, որք էին ի նմին սուրբ ուխտի քրիստոնէութեանն: Եւ հաւանեալ ամենեցուն մեծամեծաց և փոքունց՝ ազդ առնել ամենայն երկիրն, զի հաճոյ թուեսցի ամենեցուն ի ձեռն մարմնաւոր պիտոյիցն կցորդ լինել սուրբ կապելոցն ի հեռաւոր օտարութեանն:

Եւ այսպէս ամ յամէ ժողովէին՝ ըստ իւրաքանչիւր կարի մարդկանն, ոմն սակաւ և ոմն շատ, ոյր զինչ և ի ձեռս պատրաստութիւն լինէր, եթէ դրամոց և եթէ դահեկանաց, ժողովէին կազմէին տային յերանելիսն՝ տանել նոցա: Եւ այսպէս յարբանեկութեան կային՝ մինչև տասն ամս լցաւ սպասաւորութեանն:

Եւ վասն զի յոյժ խստագոյնս պահէին ի ջերմոջ աշխարհին, և անդադար էին ի ճանապարհորդութեանն ընդ նոյն Շահուղ, ընդ Մեշոփն և ընդ Քաշկար և ընդ ամենայն Ասորեստան և Խուստտան, սաստիկ տապով հարեալ ի խորշակէ մեռանէր սուրբն Խորէն, և աւանդեալ լինէր ի բնակչաց աշխարհին ընդ սուրբ վկայն:

Իսկ երանելին Աբրահամ կայր ի նմին առաքինութեան անդադար. և դամենայն տուրս հաւատացելոցն շրջէր ժողովէր և տանէր ի մեծ հեռաստանն, և ինքն մատակարարէր ըստ իւրաքանչիւր կարօտութեան: Եւ այնպէս յերկարեցաւ մինչև յերկոտասաներորդ ամն պատժաւորացն, մինչև աղաչել զնա միաբան ամենեցուն, զի հաւանեացի երթալ յաշխարհն Հայոց. զի ընդ մտանել նորա առ նոսա՝ ի նմա տեսցեն և զքաջ նահատակն որք կատարեցան սրով, ի նմա տեսցեն և զսուրբ կապանս չարչարանացն:

Եւ յորժամ մարտիրոսք և խոստովանողք և կապեալք նովաւ տեսանին, նովաւ օրհնի աշխարհն ամենայն, նովաւ օրհնին և տղայք նոցա յաճումն, նովաւ զգաստանան երիտասարդք նոցա ի սրբութիւն, նովաւ համեստանան ծերք նոցա յիմաստութիւն: Նովաւ ուսանին ի շխանք նոցա զմարդասիրութիւն, նովաւ անկանի գութ յԱստուծոյ ի սիրտ թագաւորին՝ շինել և խաղաղութիւն առնել բոլոր աշխարհին: Նովաւ եկե-

ղեցիքն պարծին իբրև քաջ և կատարեալ զինուոր, նովաւ վկայարանքն զարդարին, նովաւ և վկայքն ցնծացեալ բերկրին: Նովաւ և դաշան Աւարայրի պայծառացեալ ծաղկալից լինի, ոչ անձրևաբեր ամպոց, այլ ի սուրբ և յարիւնաբուխ վկայից ցանեալ և ցրուեալք սպիտակութիւնք սուրբ ոսկերացն: Յորժամ կոխեսցեն ամենավաստակ ոտք խոստովանողին զլայնատարած տեղիս պատերազմին, յորժամ կենդանի մարտիրոս ընդ նա շրջեսցի, կենդանի առ կենդանիս երթեալ՝ ամենայն աշխարհին կրկին լինի կենդանութիւնն:

«Գիտեմք, ասեն, յորժամ տեսցեն զսա ամենայն միայնակեացք աշխարհին Հայոց, սովաւ յիշեսցեն զհոգևոր գունդս պատերազմողացն, որ փոխանակ մեր, ասեն, ետուն զանձինս ի մահ, և հեղին զարիւնս իւրեանց ի հաշտութեան պատարագ Աստուծոյ: Սովաւ յիշին սուրբ քահանայքն, որք խողխողեցան յօտարութեանս և ցածուցին զսրտմտութիւն բարկութեան թագաւորին: Սովաւ թերևս զի զմեր կապանս յիշեսցեն, և աղօթս առնելով խնդրեսցեն յԱստուծոյ զի գերէդարձ լիցի մեզ անդրէն ի հայրենի երկիրն մեր:

«Քանզի յոյժ անձկացեալ եմք՝ ոչ միայն ըստ մարմնոյ կարօտութեան, այլ առաւել տեսանել զսուրբ եկեղեցիսն մեր և զսրբասէր պաշ-

տօնեայան մեր, զոր ի նմա կարգեալ հաստատեցաք: Եւ եթէ միւսովս յաջողեացէ մեզ Աստուած երթալ և խուլ զկարօտութիւն մնացելոցն, զիտեմք զի և մեզ բանայ Աստուած զդուռն ու զորմութեան իւրոյ՝ ընդ նոյն ճանապարհ երթալ, ընդ որ ոտք սրբոյս կարապետեն»:

Զայս խորհուրդ խորհելով աստուածաշնորհ նախարարացն, մեծաւ թախանձանօք ածէին զխոստովանողն ի հաւանութիւն: Եւ վասն զի ոչ էր սովոր երբէք բարւոյն ընդդէմ դառնալ, ըստ առաջին սովորութեան և յայսմ վայրի փութացաւ վաղվաղակի կատարել զհրամանն զմիաբանն հաւանեցելոցն յաստուածային առաքինութիւնն: Եկն եմուտ յաշխարհն Հայոց:

Փութացան և ելին ընդ առաջ նորա վաղվաղակի արք և կանայք, մեծամեծք և փոքունք, և ամենայն բազմութիւն ազատաց և շինակահաց: Անկանէին և փարէին զոտիւք և զձեռօք առաջի սրբոյն և ասէին. «Օրհնեալ Տէր Աստուած ի բարձունս, որ առաքեաց մեզ հրեշտակ յերկնից՝ բերել մեզ աւետիս յարութեան, զի լինիցիմք ժառանգք արքայութեան: Զի ահա ի քեզ կերպարանեալ տեսանեմք զամենեսեան զհրաժարեալսն յուսով յարութեամբ, և զկապեալսն ակնկալութեամբ արձակելոյ: Ի քեզ տեսանեմք և զաշխարհիս շինութիւն խաղաղութեամբ. քև եկեղեցիքն մեր ցնծացեալ բերկրին, և քև սուրբ

վկայքն մեր անդադար լիցին մեզ ի բարեխօսութիւն առ Աստուած: Օրհնեալ զմեզ, սուրբ հայր մեր. դու ես բերան հանգուցելոցն, խօսեաց ընդ մեզ յայսնի օրհնութեամբ, զի յոգիս մեր լուիցուք ի ծածուկ զօրհնութիւնս սրբոցն:

«Հորդեցեր ճանապարհ այնորիկ՝ որ անձկացեալ էին դալ յերկիր իւրեանց. խնդրեալս Աստուծոյ զի ստէպ եկեսցեն զհետ սուրբ կարապետիդ: Եւ որպէս հորդեցեր զարգելեալ ճանապարհ երկրի, բաց և յերկինս զդուռն աղօթից մերոց, զի և մեր մեղաւորաց մտցեն պաղատանք առաջի Աստուծոյ ի բարեխօսութիւն նոցին կապելոց և մինչդեռ եմք յերանելի մարմինս, որպէս տեսաք զքո՞ երանելի սրբութիւնդ, տեսցուք և զսիրելի անձկալիսն մեր, որ ի բազում ժամանակաց հարեալ և պաշարեալ եմք յոգիս և մարմինս մեր: Արդ հաւատամք յանսուտ յոյսն, զի որպէս լցեալ կատարեցաւ ի քեզ տեսիլս ի սուրբ սէր քո, այնպէս և ընդ մօտոյ ունիմք տեսանել զճշմարիտ վկայսն Քրիստոսի, որ հասնապազ խանդակաթ եմք ի տեսիլս երկնաւոր գեղոյ նոցա»:

Բայց երանելի խոստովանողն, թէպէտ և այնպէս սիրով ընկալեալ եղև յամենայն աշխարհէն, ոչ ինչ կամեցաւ ամենեկին մերձենալ առ ոք ըստ մարմնոյ կարօտութեան. այլ ընտրեաց իւր տեղի մի գատ յամենայն բազմամբոխ ժո-

դովրդոց, և առաքինի եղբարքք երիւք կատարեաց զկեանս իւր մեծաւ ճգնութեամբ:

Զոր եթէ կամիցի ոք ի կարգ արկանել: դժուարաւ կարասցէ, ասել զվարս առաքինութեան նորա: Զի եթէ գտքնութիւնն ասիցես, իբրև զկանթեղ անշէջ կայր. զամենայն գիշերս և եթէ դասկաւապիտութիւնս կերակրոցն, համարեաց՝ եթէ զանկերակուր հրեշտակացն բերէր գնամանութիւն: Եթէ զհեղութիւն ցածութեանն կամիցիս ասել, ոչ զոք ի կենդանեաց կարիցես գտանել նման նմա, և եթէ զանընչասիրութիւնն կամիցիս ասել, դարձեալ զոր օրինակ չպատրի մեռեալ ի կարասի, գնոյն օրինակ ճշմարտութեամբ և առ երանելին իմասջիր:

Անյագական ձայնիւ հանապազորդեալ էր ի պաշտաման, և անհատ աղօթիւք միշտ ընդ Աստուծոյ ի բարձունս խօսէր: Աղ եղև նա անհամելոց, և խթան ընդոստուցիչ ամենայն հեղացելոց: Դսրովեցաւ նովաւ ազահութիւն, և կարի յոյժ ամաչեաց նովաւ շուայտութիւն որկորամուլութեան: Առողջութիւն եղև նա աշխարհիւ Հայոց, և բազում վիրաւորք ի ծածուկ նովաւ գտին զառողջութիւն: Եղև նա վարդապետ կատարեալ վարդապետաց իւրոց, և սուրբ հայր խրատաու հարանց իւրոց: Ի լուր համբաւոյ նորա իմաստնացան տգէտք, և ի տեսիլ մերձաւորութեան նորա զգաստացան լկտիք: Բնակեալ էր

լստ մարմնոյ ի նեղ խցկան, և ան սրբութեան նորա արկեալ էր զհեռաւորօք և զմերձաւորօք: Զարհուրեցան դևք և փախեան ի նմանէ, իջին հրեշտակք և բանակեալ էին զնովաւ:

Յոյնք երանի ետուն վասն նորա աշխարհին Հայոց, և բազում բարբարոսք փութացան տեսանել զնա մարմնով: Սիրելի եղև նա սիրելեացն Աստուծոյ, և զբազումս ի թշնամեաց ճշմարտութեանն ած ի հաւանութիւն սուրբ սիրոյ: Սկիզբն արար առաքինութեանն անդստին ի տղայ տիոց իւրոց, և նովին առաքինութեամբ կատարեցաւ ի վախճան կենաց իւրոց: Որպէս ոչ խառնեցաւ ի կարգս սուրբ ամուսնութեան աշխարհիս, այսպէս չեմուտ ընդ մարմնաւոր պիտոյիւք ամենայն անպականացու իրաց աշխարհիս: Եւ եթէ պարտ է պարզաբար ասել, որպէս փոխանակեաց զպէտս մարմնոյ ընդ պիտանացու հոգեոր իրաց, այսպէս փոխադրեալ եղև յերկրէ ի յերկինս:

ԱՆՈՒԱՆՔ ՆԱԽԱՐԱՐԱՑՆ

Որք կամօք յօժարուժեամբ վասն սիրոյն Քրիստոսի ետուն զանձինս ի կապանս արքունի:

Յազգէն Սիւնեաց երկու եղբարք ԲԱԲԳԷՆ և ԲԱԿՈՒՐ.

Յազգէն Արծրունեաց ՆԵՐՇԱՊՈՒՀ և ՇԱԻԱՍՊ և ՇՆԳԻՆ և ՄԵՀՐՈՒԺԱՆ և ՊԱՐԳԵՒ և ՏԱՃԱՏ.

Յազգէն Մամիկոնէից ՀԱՄԱԶԱՍՊԵԱՆ և ՀԱՄԱԶԱՍՊ և ԱՐՏԱԻԱԶԴ և ՄՈՒՇԵՂ.

Յազգէն Կամսարականաց ԱՐՇԱԻԻՐ և ԹԱԹ, ՎԱՐՁ, ՆԵՐՍԵՀ և ԱՇՈՏ.

Յազգէն Ամատունեաց ՎԱՀԱՆ և ԱՌԱՆԶԱՐ և ԱՌՆԱԿ.

Յազգէն Գնունեաց ԱՏՈՄ.

Յազգէն Դիմաքսենից ԹԱԹՈՒԼ և ՍԱՏՈՅ, երկու ևս այլովք ընկերօք.

Յազգէն անձևացեաց ՇՄԱԻՈՆ և ԶՈՒԱՐԷՆ և ԱՌԱԻԱՆ.

Յազգէն Առաւելոյնից ՓԱՊԱԿ և ՎԱՐԱԶԴԷՆ և ԴԱՏ.

ՅԱրծրունեաց տոհմէն ԱՊՐՍԱՄ.  
Ի տոհմէն Մանդակունեաց ՍԱՀԱԿ և ՓԱՐՍՄԱՆ.

Յազգէն Տաշրացեաց ՎՐԻՆ.  
ՅՌափսոսնեան տանէն ԲԱԲԻԿ և ՅՈՀԱՆ.

Այս երեսուն և հինգ արք, են որ յաւագ նախարարացն, և են որ ի կրսերագունիցն, սակայն ամենեքեան ըստ մարմնոյ են նախարարագունք, իսկ ըստ հոգևոր առաքինութեանն ամենեքեան երկնային քաղաքացիք: Եւ բազում ևս այլ ազատ մարդիկ են որ յարքունի տանէ, և են որ ի տանէ նախարարացն իսկ նոցուն, նիզակակիցք և մարտակիցք քաջ նահատակացն: Եւ ամենեքին սոքա կամօք մատնեցան ի սուրբ կապանս չարչարանացն:

Այլ մեք առ այժմ ոչ ընդ այս եմք զարմացեալ միայն՝ զի կամօք չոգան մտին ի փորձութիւնն, այլ առաւել ընդ այն եմք սքանչացեալ, զի մարդիկ փափուկ իբրև զնոսա՝ ընդարձակասուն բնակիչք ձիւնեղէն լերանց՝ եղեն բնակիչք խորշակաբեր դաշտաց: Որ զօրէն ազատ էրէոյ շրջէին ի մէջ ծաղկաբեր լերանց, ի բոցակէզ աշխարհն արևելից կապեալ ոտիւք և կապեալ ձեռօք: Հաց նեղութեան և ջուր կարօտանաց, խաւարարգել ի տուէ և անլոյս ի գիշերի, անվերարկութիւն և անանկողինք, զազանաբար գետնախշտիք լինէին զինն ամ և զվեց ա-

միս: Եւ այնպէս մեծաւ խնդութեամբ տանէին զնեղութիւնն, զի ամենեկին ոչ ոք տրտուել հայհոյութեան ի բերանոյ նոցա լուաւ, այլ յորդառատ գոհացողութիւն ըստ նմանութեան բարեկեցիկ մարդկան, որ են յաստուածալաշտութեան:

Եւ մինչդեռ էին յայնպիսի նեղութեան, կարծիք եղեն ի միտս թագաւորին՝ թէ առ յոյժ վշտին ձանձրացեալ են դառնութեան կենօքն իւրեանց: Յղեաց առ նոսա՝ զմեծ հազարապետն և ասէ. «Գոնեայ յայսմ հետէ զգաստացայք յանձինս ձեր, և մի կայք ի նոյն յամառութեան. երկիր պագէք արեգական, և արձակիք ի չարաչար կապանացոյ, և ունիք անդրէն զիւրաքանչիւր հայրենի կեանս ձեր»:

Ետուն պատասխանի երանելիքն և ասեն. «Առ փորձ ինչ եկեալ հարցանես ցմեզ, եթէ արդարեւ թագաւորն իսկ յիեաց զքեզ»։ Երդուաւ հազարապետն և ասէ. «Չիք այդր բան աւելի կամ պակաս՝ որ ոչ ի բերանոյ նորա ելեալ է»։ Ասեն ցնա անդրէն. «Որք միանգամ, աշակերտեալ են ճշմարտութեանն, ոչ երբէք փոխին ի նմանէ. այլ որ ենն՝ նոյն կան: Միթէ յայնժամ առ չիմանալ ինչ պնդեցաք, և այսօր նեղութիւնս իմաստնացոյց ինչ զմեզ. ոչ այնպէս: Այլ զղջումն մտաց մերոց այս է, եթէ ընդէր ընդ առաջինսն չկատարեցաք զկեանս մեր: Բայց

արդ աղաչեմք զքեզ և քեւ զթագաւորն ձեր, մի այլ վասն այդպիսի իրաց հարցանէք ցմեզ. այլ զինչ եղեալ է ի մայի՛ ձերում վասն մեր՝ կատարեցէք»:

Իբրև լուաւ զայս մեծ հազարապետն, յոյժ գովեաց ի միտս իւր զպնդութիւն հպատատութեան նոցա. և յայնմ հետէ սկսաւ արկանել պէր ընդ նոսա՝ իբրև ընդ սիրելիս Աստուծոյ՝ Եւ բազում բանիւք ողորջանօք անէր զթագաւորն ի հաւանութիւն, զի թողութիւն արացէ նոցա ի կապանացն իւրեանց: Զի թէպէտ և վոխեցաւ նա ի գործոյ հազարապետութեանն արքունի, և ի բազում իրն գտաւ վասակար, ինքն իսկ յանձն իւր կրթէր զանեւր աշխարհին: Հայոց վասն որոյ և մեծաւ անարգանօք յուղարկեցաւ ի տունն իւր, սակայն զկապելոցն ոչ երբէք չարխօս կամէր լինել մինչև ցօր վախճանի կեանաց իւրոց:

Իսկ յերանելեացն բազումք ի նոցանէ՝ որ մանկագոյնքն էին՝ ունան զզարուցիւն հայրենի աշխարհին իւրեանց, և եղև նոցա այն կերակուր հոգևոր, որով զանձինս քաջալերէին և զընկերան մխիթարէին: Եւ այնպէս զմայլեցան ի միտս և յոգիս իւրեանց, զի և որ ձերագոյնքն էին ի նոցանէ՝ փափկացան մատաղացան մանկացան: Զի թէպէտ և զարուցեան ժամանակքն անցեալ էին, սակայն բազում սաղմոս ի բերան

առեալ՝ հոգևոր՝ երգակից լինէին մատաղերամ բազմութեան մանկաւոյն:

Եւ այնպէս բարձրացուցանէին զպաշտօնն սրբութեան, մինչև ոմանք ի դառն դահճացն՝ մեծապէս քաղցրութիւն անկանէր ընդ լսելիս նոցա, և որչափ ի ձեռս իւրեանց էր՝ արտաքոյ արքունի հրամանին զիւրութիւն առնէին նոցա, և սէր խնամոյ ունէին առ ամենեսեան, և բազում անգամ զմարմնաւոր պէտս նոցա ընուին նոքա: Մանաւանդ զի նշանք ևս բժշկութեան յԱստուծոյ յաշողեալ լինէր ի ձեռս նոցա. որպէս զի բազումք ի դիւահարաց սրբեցան ի նմին քաղաքի՝ ուր կապեալքն կային: Իբրև ոչ ոք գոյր առ նոսա քահանայ, զիմէին առ նոսա հիւանդք և ախտաժեռք քաղաքին, և ընդունէին ի նոցանէ զիւրաքանչիւր ցաւոց զառողջութիւն:

Նա և որ մեծ իշխանն էր աշխարհին, զոր և Հարեշղոմ Շապուհ անուանէին, և նմա իսկ յանձն էին ամենայն պատժաւորքն, մեծապէս գութ սիրոյ էարկ առ ամենեսեան: Զծերս ի նոցանէ առ հարս ունէր, և զմանկագոյնս ի նոցանէ իբրև զսիրելի որդիս գգուէր: Բազում անգամ գրեաց և եցոյց յարքունիս զվիշտս նեղութեան կապելոցն, և զառն առն իւրաքանչիւր զբարս ազնուականութեանն ցուցանէր նոցա առաջի մեծամեծացն տառապէր Չանայր ազգի ազգի հնարիւք, մինչև բազում բարեխօսիւք ա-

ծին ի հաւան զթագաւորն: Հրամայեաց լուծանել զկապանս նոցա, և բառնալ ի նոցանէ զսուգ պատուհասին, և ազանել նոցա հանդերձ զօրէն նախարարութեանն. կարգեաց նոցա ռոճիկ, և զպատրաստութիւն սպառազինութեանն հրամայեաց յարքունուտ: Գրեաց և յանձն արար մեծ սպարապետին, զի ընդ զօրս արքունի երթիցեն ի գործ պատերազմի:

Եւ իբրև այս այսպէս կարգեցաւ, և կազմեցաւ նոր հրաման թագաւորին, ի բազում տեղիս՝ ուր և հասին՝ առաւելեալ գտան ի գործ արութեան, մինչև գովութեան հրովարտակ վասն նոցա ի Դուռն տային: Որպէս զի քաղցրացաւ իսկ մտաց թագաւորին, հրամայեաց զամենեսեան ածել զառաջեաւ: Եկին և յանդիման եղեն Յագկերտի արքայից արքային: Ետես զնոսա զուարթութեամբ, խօսեցաւ ընդ նոսա բանիւք խաղաղութեամբ, և խոստացաւ տալ նոցա զիւրաքանչիւր իշխանութիւն ըստ կարգի հայրենի պատուոյն, և արձակել զնոսա յաշխարհն օրինօք քրիստոնէութեանն, յորոյ վերայ և մեծապէս էին չարչարեալ:

Եւ մինչդեռ անդէն մեծաւ խնդութեամբ շրջէին ի կարաւանին առաջի թագաւորին, ի նմին ժամանակի հասանէր վախճան կենաց թագաւորին՝ յիննտամներորդ ամի թագաւորութեանն իւրոյ: Եւ ընդ հակառակս ելեալ երկու

որդիք նորա ի վերայ տէրութեանն կռուէին. սաստկանայր գործ դառնութեան պատերազմին զերկուս ամս:

Եւ մինչդեռ նոքա յայնմ խռովութեան էին, ապաստամբեաց և Աղուանից արքայն. վասն զի քեռորդի էր նոցա, և ըստ կարգի հայրենի հաւատոցն՝ քրիստոնեայ էր յառաջ, և Յազկերտ արքայից արքայ բռնի մոգ արար: Եւ նորա գտեալ ժամանակ անձինն պարագոյ, հարկեցաւ զանձն ի մահ զնել. լաւ համարեցաւ մեռանել ի պատերազմի, քան ուրացութեամբ ունել զթագաւորութիւնն: Վասն այսր ամենայնի յապաղումն եղև արձակելոյն նոցա յաշխարհն:

Իսկ կրօսեր որդւոյն Յազկերտի դայեակն, Ռահամ անուն ի Միհրան տոնմէն, թէպէտ և ետես զգունդն Արեաց ընդ երկուս բաժանեալ, սակայն կիսովն գազանաբար յարձակեցաւ ի վերայ երէց որդւոյ թագաւորին. հար, սատակեաց զգունդն, և ձերբակալ արարեալ գորդի թագաւորին՝ անդէն ի տեղւոջն հրամայէր սպանանել: Եւ զմնացեալ զօրսն ածէր հաւանեցուցանէր, և առնէր միաբանութիւն ամենայն Արեաց գնդին. և թագաւորեցուցանէր զիւր սանն, որում անուն էր Պերոզ:

Զի թէպէտ և Արեաց աշխարհին առնէր մեծապէս խաղաղութիւն, սակայն Աղուանից արքայն ոչ կամէր նուաճել անդրէն ի ծառայու-

թիւն. այլ խրամատեաց զպահակն շորայ, և անցոյց յայս կոյս զգօրսն Մասքթաց. միաբանեաց զմետասան թագաւորս զեառնորդեայն, և ընդդէմ եկաց պատերազմաւ Արեաց գնդին, և բազում փնաս արար զօրացն արքունի: Թէպէտ և երկիցս և երիցս ետուն հրովարտակ աղաչանաց, ոչ ինչ կարացին ածել զայրն ի հաւանութիւն. այլ գրով և պատգամաւ յանդիմանէր զնոսա՝ վասն զուր աւերածի աշխարհին Հայոց: Յիշեցուցանէր նոցա զմահ նախարարացն և զչարչարանս կապելոցն: «Ի վերայ այնչափ սիրոյ և վաստակոց, փոխանակ կեանս առնելոյ՝ զարև հատէք, ասէր: Լաւ լիցի ինձ, ասէ, զնոցա չարչարանն յանձն իմ առնուլ, քան թողուլ զքրիստոնէութիւնն»:

Եւ իբրև տեսին, թէ ոչ բռնութեամբ և ոչ սիրով կարացաք ածել ի հաւանութիւն, զանձս սաստիկս ետուն տանել յաշխարհն Սալյանդրաց, բացին զղբունս Ալանաց և հանին զունդ բազում ի Հոնաց, և կռուեցան տարի մի ընդ Աղուանից արքայի: Թէպէտ և թօթափեցան և ցրուեցան զօրքն իւր ի նմանէ, սակայն զնա ոչ կարացին հնազանդել. այլ և հարուածք ևս մեծամեծք հասին ի վերայ նոցա, էր որ կռուով և էր որ ախտիւ չարչարանօք: Եւ յայնչափ ժամանակաց ընդ երկարել պաշարմանն, մեծ կէս

աշխարհին աւերեցաւ, այլ ոչ ոք ի նմանէ երկմտեալ բաժանեցաւ:

Յդեաց առ նա դարձեալ թագաւորն Պարսից. «Զքոյրդ իմ, ասէ, և զքեռորդիդ ի բաց տուր ածել, զի ի բնէ մոգք էին և դու քրիստոնեայ արարեր, և աշխարհդ քեզ լիցի»: Իսկ սքանչելի այրն ոչ ի տէրութեանն վերայ կռուէր, այլ յաստուած պաշտութեանն: Զմայրն և զկիսն ետ տանել, և զաշխարհն բովանդակ ի բաց եթող. և ինքն զաւետարանն առ և յաշխարհէն ի բաց կամէր գնալ:

Զայս իբրև լուաւ թագաւորն կարի զեղջ և ապաշաւ անկանէր ի միտս նորա, և զամենայն փնասս իրացն զհարբն իւրով արկանէր: Անսուտ երզումն կնքէր և տայր տանել առ նա, եթէ յաշխարհէդ միայն մի գնար, և զինչ ասես առնեմ: Խնդրեաց զմանկութեան սեպհականն, զոր հօր իւրոյ շնորհեալ էր նմա ի տղայութեանն հազար երդ. առ զայն ի թագաւորէն, և նստաւ ի նմա միայնակեցօք հանդերձ: Եւ այնպէս հանապազօրդեաց զինքն յաստուածային պաշտամանն, զի և չիշէր ամենևին թէ և թագաւոր լեալ իցէ յառաջ:

Եւ այս ամենայն յերկար խոսովութիւնք, որ եղեն մինչև ի հինգերորդ ամս Պերոզի արքայից արքայի, պատճառք եղեն չարձակելոյ նախարարացն Հայոց. այլ ոռճկաւ և ի տաճար մտանել

յարքունիս մեծապէս առատացոյց քան զամաց սովորութիւնն:

Եւ ի նմին հինգերորդ ամին զբազմաց նոցա անդրէն զկեանս շնորհեաց, և այլոցն առ յոյսն խոստացաւ՝ յամն վեցերորդ միանգամայն արձակել զամենեսեան կենօք և սլատուով:

Բայց ի տեղի այսր ինձ դարձեալ զալ պիտի: Իսկ կանայք երանելի առաքինեացն և կապելոցն և անկելոցն ի պատերազմին՝ ընդ ամենայն աշխարհն Հայոց համօրէն համարել ես ոչ կարեմ. զի բազում այն են զոր ոչ գիտեմ, քան թէ զիտիցեմ: Զի հինգ հարիւրով չափ յականէ յանուանէ ճանաչեմ. ոչ միայն որ աւագագոյնքն էին, այլ զբազումս ի կրսերագունաց անտի:

Ամենեքեան միահամուռ զերկնաւոր նախանձ բերելով, ոչ ինչ ընդհատ երեւեցան յայնցանէ՝ որ ոչ ճաշակեցին զաշխարհ: Քանզի եթէ աւագագոյնք էին, և եթէ մանկագոյնք, զմի առաքինութիւն հաւատոյ զգեցան: Ոչ ինչ յիշեցին ամենևին զանուն փափկութեան մայրենի ազատութեանն՝ այլ իբրև մարդք՝ որ վշտամբերք լեալ իցեն անդատին ի շինական սովորութեանցն տանջելով վարեալ զկեանս աշխարհիս, անզբազոյնք ևս քան զնոսա յանձն առին զհամբերութիւն վշտաց:

Ոչ միայն յոգիսն մխիթարեալ կացին առ

աներևոյթ գորութիւն յուսոյն յաւիտենից, այլ և մարմնոյ նեղութեամբք առաւել ևս բարձին՝ զբեռն ծանրութեան: Զի թէպէտ և ունէին զիւրաքանչիւր ձեռնասուն սպասաւորս, ոչ ոք երեւէր ի նոցանէ՝ թէ որ տիկինն իցէ և կամ որ նաժիշտն. մի հանդերձ էր հասարակաց, և միապէս գետնախշտիք երկոքեան: Ոչ ոք ումեք անկողնարկ լինէր. քանզի և չճանաչէին իսկ զխոտեղէնան ընտրել ի միմեանց. մի գոյն թխութեան փսիրայիցն, և մի գոյն սեւութեան սնաւից բարձիցն:

Ոչ գոյր նոցա համեմ խահամոքք անուշարար առանձինն, և ոչ հացարարք որոշեալ ի պէտս սպասու ըստ ազատաց կարգի, այլ հասարակաց էր: Շաբաթամուտն ըստ կարգի միայնակեցաց, որ յանապատի բնակեալ են: Ոչ ոք ումեք ջուր ի ձեռս արկանէր, և ոչ կրտսերք աւազաց դաստառակս մատուցանէին. շանկաւօջանն ի ձեռս փափկասուն կանանց, և ոչ մատուցաւ եւղ ի զուարթութիւն խրախութեան: Զեղան առաջի սուրբ սկտեղք, և ոչ անկան բաժակակալք յուրախութիւն. չեկաց ուրուք նոցա նուիրակ առ դուրս, և ոչ կոչեցան պատուականք յարանց ի տաճարս նոցա. չյիշեցան նոցա՝ թէ գուցէ ոք ամենևին ի բնականունդ դայեկաց և կամ բնաւ ի սիրելի հարազատաց: Փոշոտեցան և ծխոտեցան սրահակք և սըրս-

կապանք նորեկ հարսանց, և սարդիոստայնք ձգեցան ի սենեակս առազաստաց նոցա. կործանեցան բարձրագահք տաճարաց նոցա, և խանգարեցան սպասք երախանաց նոցա. անկան կործանեցան ապարանք նոցա, և տապալեալ աւերեցան ամուրք ապաստանի նոցա: Զորացան ազագեցան բուրաստանք ծաղկոցաց նոցա, և տաշտախիլ եղեն որթք զինեբեր այգեաց նոցա:

Աչօք իւրեանց տեսին զյափշտակութիւն արարոց իւրեանց, և ականջօք իւրեանց լուան զչարչարանս վշտից սիրելեաց իւրեանց. առանգանձք իւրեանց յարքունիս, և ոչ մնացին ամենևին զարդք երեսաց իւրեանց:

Տիկնայք փափկասունք Հայոց աշխարհին, որ զրգեալք և զգուեալք էին յիւրաքանչիւր բաստեռունս և ի զահաւորակս, հանապազ բոկ և հետի երթային ի տունս աղօթից, անձանձրոյթ խնդրեալ ուխտիւք՝ զի համբերել կարասցեն մեծի նեղութեանն: Որ ի մանկութենէ իւրեանց սնեալ էին ուղղովք զուարակաց և ամճովք էրէոց, խոտաբուտ կենօք իբրև զվայրենիս ընդունէին զկերակուրն մեծաւ խնդութեամբ. և ոչ յիշէին ամենևին զսովորական փափկութիւնն: Սկացեալ ներկան մորթք մարմնոյ նոցա. վասն զի ցերեկ արևակէզք էին և զամենայն գիշերսն գետնաբեկք:

Սաղմոսք էին մշտնջենաւորք՝ մրմունջք ի բերանս նոցա, և մխիթարութիւնք կատարեալք

ընթերցուածք մարգարէիցն: Միաբանեցին երկու երկու իբրև ամուլք հաւանք և հաւասարք՝ ուղիղ տանելով զակօսն արքայութեան, զի առանց վրիպելոյ հասցեն ի նաւահանգիստն խաղաղութեան:

Մոռացան զկանացի տկարութիւն, և եղեն արուք առաքինիք ի հոգևոր պատերազմին. մարտ եղեալ կռուեցան ընդ մեղսն կարևորս, հատին կտրեցին և ընկեցին զմահաբեր արմատս նորա: Միամտութեամբ յաղթեցին խորամանկութեան, և սուրբ սիրով լուացին զկապուտակ ներկուածս նախանձուն. հատին զարմատս ազահուլթեան, և չորացան մահաբեր պտուղը ոստոց նոցա: Խոնարհութեամբ կռիւեցին զամբարտաւանութիւն, և նովին խոնարհութեամբ հասին երկնաւոր բարձրութեանն: Աղօթիւք բացին զփակեալ դրունս երկնից, և սուրբ խնդրուածովք իջուցին զհրեշտակս ի փրկութիւն. լուան աւետիս ի հեռաստանէ, և փառաւորեցին զԱստուած ի բարձունս:

Այրիք որ ի նոսա էին՝ եղեն վերստին հարսունք առաքինութեան, և բարձին յանձանց զնախատինս այրութեանն: Իսկ կանայք կապելոցն կամօք կապեցին զմարմնաւոր ցանկութիւնս, և եղեն կցորդ չարչարանաց սուրբ կապելոցն. ի կեանս իւրեանց նմանեցին քաջ նահատակացն մահուամբ, և ի հեռաստանէ եղեն վարդապետք մխիթարիչք բանտարգելեացն: Մատամբք իւրեանց վաստակեցին և կերակրեցան, և զկար-

գեալ ոռճիկ նոցա յարքունուստ՝ ամ յամէ թոշակ առնէին և տային տանել նոցա ի մխիթարութիւն: Անարիւն ճիւղանց նմանեցին, որ երգոյն քաղցրութեամբ առանց կերակրանաց կեան, և կենդանի են միայն զօղն ծծելով, զանմարմնոցն բերեն զնմանութիւն:

Բազում ձմերաց հալեցան սառնամանիք. եհաս գարուն և եկին նորեկ ծիծեռունք. տեսին և խնդացին կենցաղասէր մարդիկ, և նոքա ոչ երբէք կարացին տեսանել զանձկալիսն իւրեանց: Ծաղիկք գարնանայինք յիշատակեցին զպսակասէր ամուսինս նոցա, և աչք իւրեանց կարօտացան տեսանել զցանկայի գեղ երեսաց նոցա: Սպանեցան բարակք որսականք, և խցեալ կուրացան արշաւանք որսորդաց: Բնագրօք յիշատակեցան նոքա, և ոչ մի տօնք տարեկանաց ոչ ածին զնոսա ի հեռաստանէ. ի ճաշակատեղս նոցա հայեցան և արտասուեցին, և յամենայն յատեանս յիշեցին զանուանս նոցա: Բազում արձանք կանգնեալ էին յանուն նոցա, և անուանք իւրաքանչիւր նշանակեալ ի նոսա:

Եւ իբրև այնպէս յամենայն կողմանց այլեկոծ լինէին միտք նոցա, ոչ ինչ կասեալ թուլացան յերկնաւոր առաքինութենէն: Արտաքնոցն երևէին իբրև այրիք սգաւորք և չարչարեալք, և յոգիս իւրեանց զարդարեալք և մխիթարեալք երկնաւոր սիրով:

Ոչ ևս սովորեցին հարցանել զեկեալ ոք ի հեռաստանէ, եթէ երբ լինիցի մեզ տեսանել զսիրելիսն մեր. այլ այն էին իղձք աղօթից նոցա առ Աստուած եթէ որպէս սկսանն՝ քաջութեամբ ի նմին կատարեսցին լի երկնաւոր սիրովն:

Եւ մեր և նոքա հասարակ ժառանգեսցուք զքաղաքամայրն բարեաց, և հասցուք խոստացելոց սիրելեացն Աստուծոյ ի Քրիստոս Յիսուս ի Տէր մեր:



Վ Ե Ր Ջ

*[Faint, illegible text, likely bleed-through from the reverse side of the page]*



« Ազգային գրադարան



NL0412531

